

Alexandre de Bernay (vers 1185),

LE ROMAN D'ALEXANDRE

LA PREMIERE BRANCHE

L'enfance d'Alexandre et ses premières conquêtes

LA DEUXIEME BRANCHE

L'épisode du «fuerre de Gadres», une attaque par ordre d'Alexandre dans la région de Gaza

LA TROISIEME BRANCHE

Les événements qui vont de la défaite de Darius au complot des traîtres qui préparent l'empoisonnement d'Alexandre

LA QUATRIEME BRANCHE

La mort d'Alexandre, ses funérailles et le partage de son empire

ROMAN D'ALEXANDRE ILE ROMAN D'ALEXANDRE

[1.1] Qui vers de riche istoire veut entendre et oïr,
Pour prendre bon exemple de prouece acueillir,
De connoistre reison d'amer et de haïr,
De ses amis garder et chierement tenir,
Des anemis grever, c'on n'en puisse eslargir,
Des ledures vengier et des biens fes merir,
De haster quant leus est et a terme soffrir,
Oëz dont le premier bonnement a loisir.
Ne l'orra guieres hom qui ne doie pleisir;
Ce est du meilleur roi que Dieus laissast morir. [10]
D'Alixandre vous voeil l'istoire rafreschir,
Qui Dieus donna fierté et u cors tel aïr
Que par mer et par terre osa gent envaïr
Et fist a son commant tout le pueple obeïr
Et tant roy orgueilleus a l'esperon venir.
Qui service li fist ne s'en dut repentir,
Car touz ert ses corages en leur bons acomplir,
Et il i parut bien aus durs estors souffrir,
Car au destroit besoing ne li volt nus faillir.
Qui servir nel deigna, nel pot tor garantir [20]

Ne deserz ne mal pas, tant seüst loing foïr.
 A l'eure que li enfes dut de sa mere issir
 Dieus demoustra par signe qu'il se feroit cremir,
 Car l'en vit l'air müer, le firmament croissir
 Et la terre croller, la mer par leus rougir
 Et les bestes trambler et les homes fremir;
 Ce fu senefiance que Dieus fist esclarcir
 Pour moustrer de l'enfant qu'en devoit avenir
 Et com grant seignorie il avroit a baillir.
 [1.2] L'estoire d'Alixandre vous voeil par vers tretier [30]
 En romans qu'a gent laie doie auques profiter;
 Mes tieus ne set finer qui bien set commencier,
 Ne moustrer belle fin pour s'ouvraigne essaucier,
 Ainz resamble l'asnon en son versefier,
 Qui biaux est quant il nest et mainte gent l'ont chier;
 Com plus croist, plus ledist, et resamble aversier.
 Cil trouveour bastart font contes abessier
 Si s'en veulent en court seur les meilleurs prisier,
 Ne conoissent bons mos et les veulent jugier,
 Et quant il ont tout dit, si ne vaut un denier, [40]
 Ainz couvient la leur oevre par paniaus atachier.
 Mes encontre ces vers doit la teste drecier
 Qui veut de bonnes meurs son cuer asouploier
 Et savoir qu'il doit fere et et quel chose leissier,
 Comme il doit ses amis et blandir et proier,
 Ceus qu'il a fes tenir et autres pourchacier
 Et ceus qu'il ne connoist par oevres essayer,
 Ses anemis grever et si estoutoier
 Que uns seuls envers lui n'ost mostrer samblant fier,
 Plus le tiegne cremeus qu'aloëte en gibier [50]
 Quant el voit de la main departir l'espervier.
 Mes ne soit mie avers, s'aneur veut essaucier,
 Car ainc par averté ne puet riens gaagnier;
 Qui trop croit en tresor trop a le cuer lanier,
 Ne puet conquerre aneur ne terre justicier.
 Je ne vous commens mie de Landri ne d'Auchier,
 Ainz vous commens les vers d'Alixandre d'Alier,
 De qui sens et proëce furent gonfanonnier;
 A lui prengne regart qui se veut affetier
 Et de bonnes coustumes estruire et enseignier [60]
 Si m'oie bonnement et sanz contralier.

[1.3] La vie d'Alixandre, si comme elle est trouvee
 En pluseurs leus escrite et par bouche contee,
 El fu a sa naissance par signe demostree,
 Qu'apercevoir s'en pot toute chose senee

Que large seignorie ert en celle heure nee.
 Pour ce mua li airs, c'est veritez provee,
 Et parurent esclistre souz la noire nüee,
 Li firmamenz croissi, dont gent fu estonnee,
 Qu'il esmouvroit tel noise et de cors tel sonnee [70]
 Quant il chevaucheroit en parfonde valee
 Que li tertre souverain orroient la menee;
 Et la voie du ciel refu par lui tentee,
 Quant la chaiere d'or en fu lassus portee
 Par les quatre grifons, a qui fu acouplee;
 Et fu d'astronomie sa pense enluminee,
 Que de toutes estoiles connut la compassee.
 Pour ce crolla la terre en icelle jornee
 Qu'en celle eure nessoit la persone doutee
 A la qui poësté el fu puis aclinee. [80]
 Et la mer enrougi par celle destinee
 Que en lui prist l'enging de la guerre aduree
 Et d'enbuschier aguez dedens selve ramee,
 Dont sans fu expandus en lointiegne contree.
 Et li mont en tramblerent sanz nule recelee,
 Pour ce que mainte force fu par le roy matee
 Et de maint orgueilleus abati la posnee.
 Les bestes en fremirent, quant sorent la menee,
 Que maniere de char n'ert el monde formee
 Dont aucune ne fust par le roi sormontee, [90]
 L'une por lui servir du tot abandonnee
 Et l'autre por nuisir encontre revelee,
 Si comme li serpens en la terre eschaudee
 Dont grant masse de l'ost fu puis envenimee.
 A l'eure qu'il nasqui fu joie recouvree
 Et barnages creüz et bontez ravivee,
 Qui par mauvés seigneurs ert si anientee
 Que nuz hom ne donnoit vaillant une denree
 Ne seul tant qui montast une pomme paree,
 S'ainz ne seüst de quoi li fust guerredonnee. [100]
 Mes puis donna li enfes et ot chiere levee,
 Car la seue maniere li fu si esmeree
 Et la seue bontez des autres desevee
 Qui chose li rouva, ainz ne li fu vee;
 Chiens donnoit et oisiaus et mainte chose amee,
 Mainte pelice grise et d'ermine engoulee
 Et maint hanap d'argent, mainte coupe doree,
 Maint cheval bel et cras, mainte mule afeutree,
 Ducheez et royanmes, puis qu'il ot çaint espee;
 Et pour ce fu sa gent si bien entalentee [110]
 De conquerre s'onnoir en bataille joustee.
 Des puis qu'il ert armez et sa gent conraee,

Nus regnes envers lui n'ot nulle contrestee.
 Ainsi vet de seigneur o maisnie honoree;
 Quant tant a exploitié que il l'a assamblee,
 Adont li fait honour et ce que li agree,
 Ne chose ne li dit dont el cuer soit grevee,
 Ainz vet touz premerains sa targe enchantelee;
 Ses anemis requiert o la lance aceree,
 Dont est la seue enseigne hautement escriée [120]
 Et celle gent hetiee qui si est commandee.
 Honour de seignorie fu en cestui plantee,
 Mes cil qui sont remés chantent la descordee,
 La cueillent mauvestié ou honte fu semee.
 Li avoires qu'il dona li fist tel presentee
 Et li riches corages o la fiere pensee
 Que par tout Oriant fu sa force moustree;
 Jusqu'aus bonnes Artu fu s'enseigne portee
 Et il les trespasa plus d'une aubalestee
 Et lança son espiel tout outre une rüee. [130]
 Trestoute eüst la terre qui pot estre habitee,
 Se ne li fust si tost la poison destrempee,
 Par quoi sa belle char fu morte et enterree,
 Quant prise ot Babyloine, que tant ot desirree.
 Mains de trente anz vesqui, ce fu corte duree,
 Mes nuz hom entretant ne fist tel conquestee,
 Ne Julius Cesar ne Crassus ne Ponpee.
 Après refu la terre a martire livree
 Par l'orgueil des barons et gaste et desertee,
 Car l'estache ert froissie ou elle fu fermee; [140]
 Perte de bon seigneur n'est pas tost recovree.
 De toutes bonnes gens devroit estre ploree,
 Ainz puis terre ne fu a si bon commandee.
 Or commencent li ver ou ou sa vie ert mostree.
 [1.4] Li rois qui Macidoine tenoit et Alenie
 Et Gresse en son demaine et toute Esclavonie,
 Cil fu pere a l'enfant dont vous orrez la vie;
 Phelippes ot a non, mout ot grant seignorie.
 Une dame prist belle et gente et eschevie,
 Olimpias ot non, fille au roy d'Ermenie, [150]
 Qui riches ert d'avoir, d'or et de manantie,
 De terres et d'onors et de gent mout hardie;
 Et la dame fu preus et de grant cortoisie
 Si ama biaux deduiz de bois, de chacierie,
 Rote, harpe et vïele et gigue et siphonie
 Et autres instrumens o douce melodie.
 Cil ert privez de li, si ne s'en covroit mie,
 Qui par armes queroit pris de chevalerie;
 Et li donnoit biaux dons, car de biens ert guarnie,

Et biaux chevaus d'Arrabe et mules de Surie [160]
 Et riches garnemens, palefroiz de Hongrie,
 Les siglatons d'Espagne et pailles d'Aumarie,
 Et cendaus et tirés et le vair de Rossie,
 Dyapres d'Antioche, samis de Romenie,
 Les chainsils d'Alemaigne, qu'ele avoit en baillie.
 Puis li fu sa bonne oeuvre a grant mal revertie,
 Car la mauvese gent, qu'ele avoit enhaïe
 Et de qui el n'avoit soulaz ne compaignie,
 L'orent en traïson de maldire aqueillie,
 Distrent qu'ele fesoit de son cors lecherie, [170]
 Ne gardoit pas sa foy qu'ele ot le roy plevie,
 Car a pieür de lui se connoissoit amie
 Et de cors et d'avoir li otrioit partie.
 Autresi sont encor li garçon plain d'envie;
 N'est dame, se tant fet qu'ele se jeut ne rie
 Ne moustre biau samblant, qu'el ne soit envaïe.
 Qui mal leur quiert a tort, Damedieus les maudie.
 De bouches mesdisans est la meison emplie
 Ou li deables regne o sa grant ost banie,
 Car li siecles est plains de grant losengerie, [180]
 Si ne commence or pas, ainz muet d'accesserie.
 La roïne le sot, qui mout en fu leidie,
 Car neïs de l'enfant distrent il vilanie,
 Que il estoit bastars, nez par enchanterie.
 El tans que il fu nez, si com l'istoire crie,
 Ert uns hom en la terre plains de mout grant boisdie,
 Naptanabus ot non en la terre arrabie;
 A nestre aida l'enfant, que que nuz vous en die,
 Qu'il fu nez pres du point qui done seignorie.
 Et s'il eüst un poi ceste nuit devancie, [190]
 Qu'il fust nez en l'espace que il avoit choisie,
 Ne fust mie si tost sa proëce fenie
 Ne par venin mortel la seue euvre acomplie,
 Plus regnast longuement et plus eüst baillie.
 [1.5] Molt fu li varlés larges et preus de toutes riens;
 Qui du sien li rouva, du veer ne fu riens,
 Car de lui commença li donners et li biens.
 Il conquist les Hermins, Persans et Suriens
 Et la gent d'Oriant et les fiers Indiens,
 Ceuls d'Aufrique, les noirs et les Egyptiens [200]
 Et ceus de Babiloine après les Tyriens;
 Ce conte l'escripture touz li mondes fu siens.
 Après sa mort le dist Cesaires Juliens
 Que ce fu touz li mieudres des princes terriens.
 [1.6] Grant joie vint en Grece le jour que il fu nez.
 Ja estoit touz li siecles ainsi anïentez

Et donners refroidiez et creüe avertiez,
 Avarices estoit en si haut bruit montez,
 Qui avoit le tresor, ja mes ne fust mostrez,
 Ainz ert sempres en terre et repoz et boutez; [210]
 Encore en a en terre cinc cens somiers troussez
 Que ja mes ne sera ne veüz ne trouvez.
 Mes puis fu par le roi mains tresors effondrez
 Et aus frans chevaliers departis et donnez
 Par qui prist les chastiaus et brisa les citez,
 Dont fu par tout le mont rois et sires clamez.
 Et puis en fu Porus griement aresonnez
 Seur l'eve de Caulus ou il fu encontrez;
 A plus de vint mile homes i ot les chiez copez
 Et li siens cors meïsmes retenuz et matez. [220]
 Mout fu fiers Alixandres et hardis ses pensez,
 Que se nuz li moustra ne orguel ne fiertez,
 Onques nel pot guerir chastiaus ne fermetez
 Que il nel suivist tant qu'il fust desiretez;
 Mes ançois qu'il eüst quarante jorz passez,
 Fu ses cuers de noblece ainsi enluminez
 Onques sers de put ere ne devint ses privez,
 Mes a la franche gent volt fere touz lor sez;
 Vilaine ne ancelle nel pot servir a grez.
 [1.7] L'enfance d'Alixandre fu mout gentil et belle, [230]
 Biau samblant fet et rit a chascun qui l'apele,
 Onques nel pot servir vilaine ne ancelle,
 Ainz le couvint touz jorz nourir une pucele,
 Et d'une franche dame aletoit la la mamelle.
 Desci en Ocident en ala la nouvelle,
 Mes nus hom ne l'ot dire, qui la merveille espelle,
 Qu'il ne cuist, s'il vit tant qu'il puist monter en selle,
 Que ce ert Alixandres, qui tout le mont chadelle,
 Tout avra desouz lui, com faus la tourterelle.
 [1.8] Quant li roys Alixandres fu nez en icel jour, [240]
 Avoec lui furent né trente fuiz de contour
 Qui furent gentil homme et bon conquereour;
 De la terre de Gresce estoient li plusour
 Et tuit li autre estoient gentil Macedonour.
 Cil soffrirent o lui mainte ruiste dolour
 En la terre eschaudee ou onques n'ot froidor,
 Touz jorz vesquirent d'armes, itel fu lor labor.
 Par ceus et par les autres conquist il mainte honor,
 Car de par toute terre le tint on a seignor.
 [1.9] En l'aé de cinc ans, ce conte l'escripture, [250]
 Se dormoit Alixandres en un lit a peinture;
 D'un chier paile a orfroiz estoit la couverture,
 De martrines dedens estoit la forreüre.

La nuit sonja un songe, une avison obscure,
 Qu'il manioit un oef dont autres n'avoit cure,
 A ses mains le roloit par mi la terre dure,
 Si que li oés brisoit par mi la paveüre;
 Uns serpens en issoit d'orgueilleuse nature,
 Onques hom ne vit autre de la seue figure;
 Son lit avironnoit trois foiz tot a droiture, [260]
 Puis reperoit arriere droit a sa sepouture,
 A l'entrer cheoit mors, ce fu grant aventure.
 [1.10] Quant li chambellens vit qu'Alixandres s'esveille,
 Effreez de son songe, qu'il ne dort ne someille,
 Ses garnemens li donne, gentement l'apareille,
 Et quant il fu vestuz, a Phelippe conseille.
 Quant li rois l'entendi, durement se merveille;
 La ou il sot sage homme jusqu'a la mer Vermeille
 Pour espondre le songe ses messages traveille.
 [1.11] Phelippes a mandé la sage gent lointiegne, [270]
 Les bons devineours fet querre par le regne,
 Devins et sages clers communalment amene;
 Premiers i est venus Aritotes d'Ateine.
 Quant furent assamblé, une chambre i ot plene.
 Tout le songe leur conte et chascuns d'els se peine
 De respondre par sens bonne reison certaine.
 [1.12] Uns Grieus parla premiers qui cuidoit estre flors
 De maintes sapiences et de sortisseors
 Et de l'art d'ingremance et de devineours;
 Pour ce ot non Astarus que il sot touz les cors [280]
 Des estoiles du ciel et du sens des auctours.
 "Ore entendez, fet il aus granz et aus menors,
 De vostre songe espondre serai maistre doctors.
 Li oés est vaine chose, petite est sa vigours;
 Li serpens qu'en issoit, fiers et de fieres mours,
 C'est uns hom orgueilleus qui movra mains estors
 Et voudra seurmonter rois et empereours
 Et metre desouz lui et princes et contours
 Et conquerre par force les chastiaus et les tours
 Et prendre et retenir et terres et honours, [290]
 Mes nel porra pas fere, petite ert sa labors,
 Lors tornera arriere si charra sa valors."
 Quant Phelippes l'entent, d'ire mua colors,
 Et cuide d'Alixandre que soit mauvés oirs sours.
 [1.13] Après celui parla Salios de Minier,
 Sages hom de la loy, assez sot du mestier.
 "Oëz, seignor, fet il, dont vous voeil acointier:
 De chose qui en songe peçoie de legier
 Ne m'est vis que nuz hom puisse bien exploitier.
 Li oeus est veine chose si brise de legier; [300]

Li serpens qu'en issoit, qu'il vit felon et fier,
 C'est uns hom de fol cuer, qui vodra guerrier
 Et le país conquerre et par force regnier
 Et les sauvages terres desouz lui abessier;
 Mes ja de riens qu'il voeille ne porra exploitier,
 Car tuit cil li faudront qui li devront aidier,
 Et mout mauvesement l'estevra reperier,
 Si com fist li serpens qui retorna arrier."
 Cil respons fist Phelippe durement esmaier.
 [1.14] Après ces deus parla Aritotes d'Ateine, [310]
 En piez s'en est levez, de bien dire se peine.
 "Oëz, seigneur, fet il, une reison certaine.
 Li oés dont cil parole n'est mie chose veine,
 Le monde senefie et la mer et l'areine,
 Et li moieus dedens est terre de gent plaine;
 Du serpent qu'en issoit vous di chose certaine,
 Que ce est Alixandres qui sofferra grant poine
 Et ert sires du mont, ma parole en ert seine,
 Et si homme après lui le tendront en demeine,
 Puis retournera mors en terre macidoine, [320]
 Si com fist li serpens qui vint a sa cavaine."
 Quant Phelippes l'entent, mout grant joie en demaine.
 [1.15] Phelippes ot grant joie du songe qui bien prent,
 Mout ama Aritote et le tint richement,
 Tout li abandona son or et son argent.
 Alixandres fu preus et de grant escient;
 Ce conte l'escripture, se la letre ne ment,
 Que plus sot en set jourz que uns autres en cent.
 La nouvelle est alee deci en Ocident;
 De ne sai quantes terres i sont venu la gent, [330]
 Li mestre des escolles, li bon cleric sapient,
 Qui vouloient connoistre son cuer et son talent.
 Aritotes d'Athenes l'aprist honestement;
 Celui manda Phelippes trestout premierement.
 Il li moustre escripture, et li vaslés l'entent,
 Grieu, ebrieu et caldieu et latin ensement
 Et toute la nature de la mer et du vent
 Et le cours des estoiles et le compassement
 Et si com li planete hurtent au firmament
 Et la vie du siecle et quanqu'a lui apent [340]
 Et connoistre reison et savoir jugement,
 Si comme rethorique en fet devisement;
 Et en après li moustre un bon chastïement,
 Que ja serf de put ere n'et entour lui souvent,
 Car maint home en sont mort et livré a torment,
 Par losenge, par murtre, par enpoisonnement.
 Li mestres li enseigne et li varlés aprent;

Il en jure le ciel et quanqu'a lui apent
 Que ja nus sers par lui n'avra essaucement.
 [1.16] Une grant piece après qu'Alixandres fu nez, [350]
 Vint uns hom en la terre, de grant sens esprouvez,
 Naptanabus ot non, d'engin estoit parez.
 Cil fu puis Alixandre et mestres et privez,
 Cil li moustra de l'air toutes les oscurtez
 Et par con fete guise li soleus est posez
 Et si comme la lune remue ses clartez
 Et le cours des estoiles quant li airs est troblez;
 Mes tant lut ingremance et tant en fu usez
 Que si bons enchanterres ne fu onques trouvez.
 S'il eüst devant vous cinc cens homes armez, [360]
 Vous semblast qu'il feüst de touz abres ramez
 Et d'une eve courant quatorze arpens de prez
 Et meist en sa bourse les tours de vint citez.
 De lui fu Alixandres mescreüs et blasmez,
 Pour ce que de sa mere et de lui ert privez;
 Dient qu'il ert ses fuiz et de lui engendrez.
 Un jour le prist aus mains, d'un tertre ou ert montez
 Sel bouta contre val que sempres fu tüez.
 [1.17] Mout fu preus Alixandres, quant ot passez dis ans;
 De par toutes les terres a mandez les enfans, [370]
 Les fuiz aus gentils homes et touz les mieus vaillans;
 Assez en poi de terme en ot avoec lui tans
 Com s'il eüst la terre a quatorze amirans.
 Largement leur donoit et fezoit lor talens:
 Chevaus et muls d'Espagne et palefroiz amblans,
 Tirés et dras de soie et pailles aufriquans.
 Ses ostieus resambloit foire de marcheans,
 Tant avoit entour lui de petis et de grans.
 Ne prenoit pas conseil aus honnis recreans,
 Mes a ses gentils hommes, a touz les mieus vaillans, [380]
 A ceus qui mieus resamblent hardis et combatans.
 La parole est bien voire et si est connoissans
 Que li bons fet le bien et si est conseillans;
 Ja de male racine n'ert abres bien portans.
 [1.18] Alixandres s'aloit par un jour deporter
 Entre les murs d'areine et la greve de mer;
 La contree fu belle et li soleus luist cler.
 Tout entour lui commence l'enfes a regarder;
 Environ lui aloient tel troi cens bachelier,
 N'i a cel ne soit fuiz a demeine ou a per [390]
 Ou a prince de terre que li roys doit amer.
 Alixandres les fist par ses letres mander,
 Pour ce que, quant il ert au terme d'adouber,
 Avoc lui les fera richement atorer;

Puis leur couvint o lui mainte paine endurer
 Et mainte nuit veillier et maint jor jeüner
 Par les terres sauvages que il vot conquerer.
 Alixandres s'estut si prist a escouter,
 Desus toute la ville oiün cri criier,
 A touz ceus de la ville estut le sanc müer, [400]
 Ainz n'i ot si hardi qui n'esteüst trambler.
 Alixandres les lui vit un sien mestre ester,
 Du cri qu'il ot oïli prist a demander,
 Car n'a soing qu'il li doie grant merveille celer.
 Li mestres li commence autre chose a mostrer,
 Pour ce que ceste chose li veut fere oublier,
 Car il set son corage si felon a danter
 Que ja de riens qu'il voeille nel porroit destorner.
 De Nicholas le roy li commence a conter,
 Qui guerroie son pere pour lui desheriter [410]
 Et veut toute sa terre escillier et gaster,
 Car treü li demande qu'il ne li doit donner.
 Alixandres ot ire si commence a pensser,
 Après li respondi: "Nel puis or amender;
 Tant com je sui en mue, me couvient endurer,
 Et quant je avrai elles, si m'estevra voler;
 Tieus me veut or mal fere qui le puet comparer."
 [1.19] Alixandres apelle un sien dru Festion,
 De Dieu le conjura selonc s'entencion
 Que del cri qu'il oïli die la reison, [420]
 Et li quens respondi: "N'en dirai se voir non,
 Pour quant c'est grant folie que nous le vous dison.
 Une beste est mout fiere, ainz telle ne vit on,
 Felonnesse et diverse, cheval l'apellë on;
 En un jour fustes né, que de fi le set on.
 La roÿne d'Egypte le tramist Phelipon,
 Assez de jeune aage et petitet faon;
 Or n'a en tout le siecle cheval issi felon.
 Onques hom ne vit beste de la seue façon:
 Les costez a bauçans et fauve le crepon, [430]
 La queue paonnace, fete par devison,
 Et la teste de buef et les ieus de lion
 Et le cors de cheval, pour ce a Bucifal non.
 Clos est en une volte et murez environ,
 Ja ne veut vooir homme en la seue meson,
 Ainz en toute sa vie n'ot soing de compaignon.
 Quant en prent en ce regne traïtor ne laron,
 Ja nus hom n'en fera justice se il non;
 A la beste le livrent, s'en fet destruicion;
 Il en ocirroït bien quatre vins d'un randon. [440]
 N'a cent hommes en Grece, ainsi com noz cuidon,

Qui osassent geter Bucifal de prison."
 Lors respont Alixandres a guise de baron
 Et jure cel seigneur qui fist Oceanon
 Qu'il savra a court terme se ce est voir ou non;
 A ce mot le seisirent et pristrent environ.
 Il en jura son chief et met sa main en son
 Que, se nus le tient mes, ja n'avra guerison
 Du poing ou du pié perdre sanz nule raençon;
 Ainz puis n'i ot un seul ne li feïst bandon. [450]
 [1.20] Pour le dit du cheval fu Alixandres liez;
 Ja mes n'avra grant joie si s'i ert acointiez;
 Assez plus le desirre que fameilleus daintiez.
 N'a homme en sa compaigne qui mout n'en soit iriez,
 Car il ne gardent l'eure que il soit depeciez
 Et les membres du cors desrompus et sachiez,
 Et chascuns en cuide estre destruis et escilliez.
 Droitement a la volte est venus eslaissiez,
 A l'uis s'est arrestez si a feru des piez
 Et d'un mail qu'il trova que touz est debrisiez. [460]
 Li chevaus vit son mestre si s'est humeliez;
 Son corage li moustre si s'est agenoilliez,
 Plus se tint cois et mus qu'esmerillon en giez.
 Alixandres l'esgarde, mout en devint hetiez;
 Sempres li fu li cors par tout aplanoiez,
 Hui istra de prison, tant a esté liez.
 [1.21] Mout fu liez Alixandres, quant il vit le cheval
 Qui vers lui s'umelie, onques ne li fist mal;
 La croupe li aplaigne et les crins contre val,
 Qui plus estoient cler que pierre de cristal, [470]
 Et le front li essue du pan de son cendal,
 Ou chief li met le frain a or et a esmal;
 Au plus tost que il pot monta sus Bucifal
 Et issi de la volte dont fort sont li mural;
 Ou mi leu de la sale s'areste et prent estal.
 De toutes pars li fuient, ainz n'i ot si vassal
 Qui osast arrester, tant le tienent a mal,
 Car ne sai a quans homes a fet felon hostal.
 Alixandres descent devant le dois royal,
 Tholomer le commande, cil le rent Helyal, [480]
 A un homme le roy, son prince mareschal.
 Li grant et li petit criënt tout communal:
 "Icist fet bien enseigne de roy emperial!"
 [1.22] Tuit ont ceste merveille oïe et entendue,
 Qu'Alixandres a tret Bucifal de la mue;
 Onques n'ot en ce mont tant fiere beste mue.
 Quant le virent venir, s'ont tel paor eüe
 Que la gent d'environ en est toute esperdue;

Cil se tient a gueri qui premiers se remue.
 Tost fu par tout le mont la nouvelle expandue; [490]
 Grieu et Macedonois en ont grant joie eüe
 Et dient que leur terre ert par lui secourue
 Et la gent Nicholas gastee et confondue.
 [1.23] Mout fu de ceste chose joians li rois Felis
 Que tant est Alixandres preus et volenteïs,
 Onques en icest siecle ne nasqui si bons Gris.
 La roïne en fu liee, qui le sien i ot mis,
 Son or et son argent et son ver et son gris,
 Qu'Alixandres donnoit aus damoisiaus de pris,
 Aus fuiz aus nobles hommes de par tout le país, [500]
 Tant que par tout le mont est si montez ses pris
 Qu'en ne cuidoit qu'el siecle fust autretieus hom vis.
 A treze ans et cinc mois fu ses termes assis
 Que chevaliers doit estre, li congiez en est pris.
 Li baron vont au roy, a reison l'en ont mis:
 "Une rien pouëz croire et si en soiez fis
 Que il a son corage de grant fierté espris
 Et tant cuide conquerre desus ses anemis
 Qu'au partir en sera li plus riches mendis;
 Et vous soiez a eise, en repos soiez mis [510]
 Avoec vostre moillier, qui tant a cler le vis,
 Et alez en riviere o vos faucons volis,
 Et il soit chevaliers si deviegne penis
 Et conquiere les terres sus touz ses anemis.
 Dieus a fet petit terre, si com nous est avis,
 Car se il en estoit sires poësteïs,
 Toute l'avroit donnee descı a quinze dis.
 Cestui plet conperront li cuvert riche assis
 Qui les frans chevaliers ont fez povres mendis
 Et ont les granz tresors et les chiers pailles bis [520]
 Dont li regnes de Grece est vestus et porpris."
 [1.24] Entour le roy estoient si demaine et si per;
 D'Alixandre li prient nel face demourer,
 Car bien est de l'aage qu'il doie armes porter.
 La roïne de Grece en vet au roy parler;
 Li roys ot la parole et le terme nonmer.
 Riant dist la roïne: "Or vous esteut penser
 De dras de mainte guise a leur cors conraer,
 Et je m'entremetrai de bons conrois donner,
 Si en ferai trois cens pour s'amour adouber." [530]
 La roïne en fu liee, qui mout s'en vot pener,
 Car c'est la riens el siecle qu'ele pot plus amer.
 A icest mot commence li baniers a crier:
 Pour les varlés bagnier facent l'ave tremper.
 Alixandres l'ot dire si respont comme ber

Et jure le seigneur, qui fet le soleil cler
 Seoir el firmament pour le mont alumer,
 Que ja n'i avra iaue fors la sausse de mer.
 Le soir d'une grant feste qu'il durent celebrer
 Sont venu a la rive pour leur cors esclaver; [540]
 Ilueques veïssiez baignier tant bachelier
 Et courre par celle iaue et saillir et noër;
 Icel jour les alerent maintes gens esgarder.
 [1.25] Dementiers qu'Alixandres s'estoit alez baignier,
 La roïne de Grece fist deus chevaus charchier
 De riches dras de soie qui mout estoient chier,
 Droitement a la rive les a fet envoier.
 Li nouviaux roys de Grece, qui le corage ot fier,
 Qui onques nen ama traïteur losengier,
 A fet ses compaignons devant apareillier [550]
 Et dist que li plus povre soient vestu premier,
 S'ait chascuns bonnes armes et bon courant destrier.
 Les conroys Alixandre ne porroit nus prisier;
 Toutes ses vesteüres ne vous sai desraisnier:
 Ses haubers fu ouvrez en l'ille de Durier,
 Li pan sont a argent, la ventaille d'or mier,
 La maille ne crient lance ne cop d'aubalestier,
 Onques de sa bonté ne vit hom si legier;
 Le cercle de son hiaume ne poïst esligier
 Li roys de Maceline pour or ne pour denier, [560]
 Douze pierres i ot que fols ne doit baillier,
 Devant seur le nasel un escharboucle chier;
 Ses escus de synople et ses brans fu d'acier,
 Quatre mois et demi mist Bilés au forgier,
 Les renges sont de paille fetes par eschequier.
 Devant lui amenerent Bucifal le legier,
 Alixandres i monte par son estrier d'or mier.
 La veïssiez grant joie a l'issir du gravier,
 Et furent bien troi cens tuit nouvel chevalier;
 Chascuns point son cheval, qui le vot eslessier. [570]
 Li roys Phelis commande la quintaine a drecier;
 A cel tens ert coustume, si nel vodrent lessier.
 Icel jour i ferirent li nouvel sodoier,
 A l'aubaleste jouent cil qu'en sont coustumier,
 Et Phelippes meïsmes s'i vet esbanoier;
 Li auquant se deduient a trere et a lancier.
 Après trestouz les geus ala li roys mengier;
 Ilueques veïssiez tant conte et tant princier,
 De la terre de Grece i furent li guerrier.
 Ainz qu'il lievent des tables, es vous un mesagier [580]
 Qui conta tel parole, sanz dit de mençoncier,
 Dont morurent aus armes maint vaillant chevalier.

[1.26] Mout fu belle la court en la salle a lambrus.
Pour l'amour Alixandre servi Antioqus,
Tholomer et Dans Clins, Arristez et Caulus,
Perdicas et Lyoines, li preus Antigonus,
Licanor et Filotes, Aridés li menbrus;
Devant le mestre dois servi Emenidus.
A tant ez vous un mes que on clame Crebus,
Le roy Phelippe apelle voiant contes et dus: [590]
"Roys Nicholas te mande que li rendes treüs
De toi et de ta terre, ne li demourer plus;
Et se tu nel veus fere, d'une chose t'encus:
En ta terre vendra o Hermins et o Turs;
Ne te guerra chastiaus ne cité ne fors murs,
Que tant ne te guerroit qu'il vendra au desus,
Si que par vive force te metra en reclus."
Quant l'entendi Phelippes, plus dolens ne fu nus;
Ne pot un mot respondre, ains bessa le chief jus.
[1.27] Iriez fu Alixandres, quant il vit le message [600]
Qui li a raconté son duel et son damage,
De mautalent merci et mua son visage.
Voiant toute la court se drece en son estage,
Seur l'espaule s'apuie Emenidus d'Arcage,
Le mesagier apelle si li dist son corage:
"Je mant a ton seigneur trop a fet grant outrage
Qui du regne de Grece demande treüage;
A brief terme l'avra, se je puis, si sauvage
Que mout li tornera a perte et a damage.
Ja nul jour que je vive ne l'en donrai ostage [610]
Ne n'avra, se je vif, fermeté ne estage
Quel puisse garantir, tant i ait fier passage.
De ma part le deffi, voiant tout mon barnage,
Que el regne de Grece ait plain pié d'eritage.
Or m'en irai seur lui prover mon vasselage;
Ja n'avrai mes grant joie en trestout mon eage
Tant qu'il m'ait ceste honte amendé par son gage,
Si que le chief de lui en avrai en ostage."
[1.28] Li mes ot la parolle si se met el repaire;
Ainz ne fina d'esrer tant qu'il vint a Cesaire. [620]
Et au roy Nicholas raconta son affere;
Et conte d'Alixandre, qui a fier le viaire
Et plus hardi le cuer que lyon qu'en ot braire:
"Ains ne nasqui tieus princes pour bonne gent atrere;
A ceus qui sont o lui est frans et debonnere,
Et vers ses anemis trop fel et de put ere.
Ne vous cuide leissier ne chastel ne repere,
Ainz vous en cuide bien a vive force trere."
Quant Nicholas l'entent, sachiez ne li pot plere;

Il en jure son cuer et sa pelice vere, [630]
 S'aus poins le puet tenir, il li fera contrere:
 "Je li cuit destremper si felon letuaire
 Nel donroit son parent, s'il li veoit l'ueil trere."
 Li mes dist en riant a Bruiant de Valquerre:
 "De loing le menaciez, il ne vous prise gaire."
 [1.29] Merveille ot Alixandres, quant il ot de la guerre,
 Que li roys Nicholas veut treü de sa terre.
 Par les lointiens paiz fet les bachelers querre,
 Les povres chevaliers qui n'ont mie grant terre,
 C'or viegnent cil a lui qui ont oés de conquerre. [640]
 Li nouviaux roys de Grece les granz tresors desserre,
 C'uns n'en puet remanoir en huche ne en serre;
 A ceus les fet donner que la povretez merre,
 Qui vodront avoec lui les granz poines souferre.
 [1.30] De ce fist Alixandres que gentilz et que fiers,
 Que frans roys debonneres, que nobles chevaliers:
 Quant ot par les contrees mandé les sodoiers,
 Par le congié son pere a pris les usuriers,
 Les sers de put afere, les felons pautonniers,
 Qui les tresors avoient et les mons de deniers [650]
 Qu'il lessaient moisir a muis et a sestiers;
 Touz les a departiz aus povres chevaliers,
 Aus povres bacheliers qui il estoit mestiers;
 Il les a atornez d'armes et de destriers,
 De riches vesteüres et de garnemens chiers;
 N'i a celui qui n'ait o lui trois escuiers,
 Cinc sergans a cheval et bons aubalestiers.
 Pour ce qu'iert preus et larges et touz jorz costumiers
 De conquerre les terres et les regnes pleners,
 A touz ses anemis veut estre justiciers; [660]
 Et quant vint en bataille, touz jorz fu li premiers.
 Quant furent assamblé par les plaines d'Aliers,
 Plus en ot Alixandres de quarante milliers;
 Emenidus d'Arcage fu ses gonfanoniers.
 [1.31] Onques n'issi de Grece tant gent pour Phelippon
 Comme Alixandres ot es plaines de Valbon.
 En la terre d'Alie dont il ot le seurnon
 La veüssiez tendu maint riche paveillon.
 Aritotes se jut seur un paile esclavon
 Qui fu orlez d'orfrois et bordez environ; [670]
 Sous ciel nen a senblance d'oiseil ne de poison
 Dont ilueques ne soit escrite la façon.
 Alixandre en apelle si l'a mis a reison:
 "Eslisiez douze pers qui soient compaignon,
 Qui merront voz batailles touz jorz par devisaon,
 Et amez touz voz hommes et leur fetes gent don.

Ce sachiez: qui bien donne, volentiers le sert on,
 Par donner puet l'en bien amoloier felon;
 Qui tout veut trestout pert, des auquans le voit on.
 Se voulez estre larges, plus en serez preudon [680]
 Et conquerrez les terres jusqu'en Oceanon;
 Ja n'avra roys ne princes vers vous deffension
 N'autre gent en bataille a la vostre foison."
 Quant l'entent Alixandres, si dreça le menton:
 "Vostre merci, biaux mestre, ci a bonne reison,
 A maint homme est il mieus de la vostre aprison;
 Eslisiez vous meïsmes de qui noz les feron."
 "Premerains i metez Tholomer et Cliçon,
 Licanor et Filote et dant Emenidon,
 Perdicas et Lyoine avoec Antigolon, [690]
 Et le conte Aridés, Aristés et Caulon,
 Antioqus avoec, es les vous touz par non;
 Icil sont tuit preudomme et chevalier baron.
 Emenidus d'Arcage port vostre gonfanon."
 Et respont Alixandres: "A Dieu beneïçon."
 [1.32] En icel jour que furent eslit li douze per,
 Que li roys Alixandres les ot fet deviser,
 Lors fet monter sa gent et ses grelles sonner;
 El regne Nicholas voudra des or entrer.
 Emenidon commande son gonfanon porter; [700]
 Ja mes ne finera si vendra a la mer
 Dont Dieus a clos la terre por le ciel deviser.
 Devant ses ieus encontre li roys un bacheler
 Qui les cheveus ot blons et le viaire cler;
 Son samblant ne sa face ne vous sai deviser,
 De plus gentil danzel n'orrez ja mes parler.
 Afublez d'une guiche, touz nus piez, sans soler,
 A ceus devant commence le roy a demander.
 Uns danzels l'esgarda si li ala moustrer;
 Bonnement commença le roy a salüer: [710]
 "Sire, entent ma parole, bien la dois escouter;
 Ne m'aiez pour ce vil que me vois povre aler,
 Ja me peüsse mieus vestir et atoner;
 Mes tieus hom me fet querre, s'il me pooit trover,
 Qui me feroit le bu de la teste sevrer.
 Je sui niez le roy Daire, ne le te quier celer,
 Fuiz sui de sa serour, mout me deüst amer,
 Mes il me tolt ma terre por moi desheriter.
 Or sui venuz a toi, que j'ai oïconter
 Que tu retiens les povres qui ont oeus d'amender, [720]
 Et plus povre de moi ne pues tu esgarder,
 Car je n'ai tant d'avoir dont je pregne un diner."
 A ice mot a fet maint chevalier plorer;

Alixandres meïsmes commence a souspirer,
 Après li demanda: "Comment te fes nonmer?"
 "Sire, j'ai a non Sanses, fuiz sui le roy Omer;
 Li roys Daires, mes oncles, le fist enpoisonner
 Et moi fist de son regne escillier et jeter;
 Tyr me tolt et ma terre qui est selonc la mer
 Plus c'uns hom ne porroit en quatre jorz aler. [730]
 El royanme de Perse t'oïforment loër;
 Onques entrusque ci ne me vos arrester.
 Hui devieng tes hom liges, mout me vodrai pener
 De fere ton service, bien t'i porras fier."
 Li roys en ot grant joie, quant si l'oïparler;
 A pié descent, sel beise, pour lui mieus honorer.
 Son mestre chambellenc fist li roys apeler,
 De riches dras de soie le fist bien conreer,
 Chevaus et bonnes armes li commande a donner;
 Sa terre li rendra, s'il la puet conquerer, [740]
 Et du sien li donra, s'il le sert sanz fausser,
 Dont bien porra en ost dis mile hommes mener;
 Et Sanses chierement l'en prist a merciër.
 [1.33] Bel homme ot en Sanson quant il fu bien vestus;
 Ses mantiaus fu hermins par deseure volus,
 D'un samit de Palerne vermeil, ouvrez menus,
 Li tassel sont a pierres, li ors i est batus,
 Chauces ot d'un brun paile et esporons agus.
 En riant dist au roy: "Tieus amis t'est creüz
 Qui ja ne te faudra tant com durt sa vertus." [750]
 Voiant les douze pers est ses hom devenus
 Et il fu d'Alixandre volentiers receüs;
 De terre a dis mile homes li est ses fiez creüs.
 "Sire, ce li dist Sansses, granz biens m'est avenus,
 Encor cuit voir l'eure que Daires ert veincus;
 Vous en avrez la terre et il ert confondus.
 Quant j'eschapai de Perse et j'en fui fors issus,
 Assés fui de maint homme pour ocirre seüs;
 Par Cesaire la grant m'en ving touz irascus,
 Mes onques par nul homme n'i fui reconneüs. [760]
 La trouvai Nicholas qui ert d'ire esmeüs,
 Ainsi menace Grece a ardoir comme fus,
 Pour ce que ne l'en est aportez li treüz."
 Lors respont Alixandres sanz conseil de ses drus:
 "Vous irez a Cesaire, qui en estes venus,
 Et direz Nicholas que je sui ja meüs,
 Treüage li port a tout cent mile escus;
 Se par temps nel vient querre, a son oés est perdu.
 Mes avant li direz de par moi tieus salus,
 Que je serai ainz mors ou il sera veincus [770]

Que ja cist treüages li soit par moi rendus.
 La bataille li mant, ou soit armez ou nus,
 Et cil qui veincus ert sera roys abatuz;
 Ne doit terre tenir jeunes hom recreüz."
 [1.34] Sanses ot la parolle si monte el bai de pris.
 A Cesaire est venuz ains que past li midis
 Et trouva Nicholas en son palés assis;
 Mout ot entour lui princes, demaines et marchis.
 Son mesage li conte devant en mi le vis:
 "Alixandres te mande, li roys poësteïs, [780]
 Que de mort te deffie et n'est pas tes amis.
 Pour ce que de sa terre as treüage quis,
 Fierement le t'apporte a tout cent mile Gris;
 En ta terre est entrez, par foi le te plevis
 Que ja mes n'en istra par homme qui soit vis
 Tant que seraz veincus ou il en ert ocis.
 Ne veut que autres hom en soit mors ne malmis;
 La bataille te mande et je la te devis:
 Ambedui cors a cors seur les chevaus de pris,
 Et cil qui veincus ert avra perdu son pris." [790]
 Lors s'enbronche li roys d'ire plains et pensis;
 Après li respondi comme maltalentis:
 "Mesages, comme as non?" "Sire, Sanses de Tyr[s],
 Et sui niez le roy Daire, mes ore en sui eschis.
 A tort me desherite, mes a tel me sui pris
 Qui me rendra ma terre et plus m'en a promis,
 Dont puis mener en ost set mile homes et dis;
 C'est touz li mieudres roys et li plus volentis,
 D'amour et de bon cuer et de doner espris,
 Qui nasquist puis qu'Adans issi de Paradis. [800]
 S'il te treuve en bataille, de ce soies tu fis:
 Tu remaindras veincuz et tes regnes conquis.
 Seur le fer de sa lance est jugiez tes juïs,
 Ja mes ne finera tant qu'il t'ait mort ou pris."
 Quant l'entent Nicholas, de faintié fet un ris:
 "Va, si di ton seigneur ses mortieus anemis
 Le semont de bataille d'ui en quarante dis,
 Se il veut cors a cors ou gent contre gent mis."
 [1.35] Quant Nicholas entent le dit dou mesagier,
 Quel menace Alixandres de la teste a trenchier [810]
 Et seur touz autres hommes le vodra empirier,
 Le mesage commence forment a losengier;
 A soi le voudra trere, se il puet exploitier:
 "Amis, ce dist li roys, je te voeil acointier.
 Des que tu es niez Daire, je te voeil mieus prisier,
 Mes parens es mout pres, ne me dois esloignier;
 Mout en ledist sa face qui son nez fet trenchier,

Qui honnist son lignage nel doit en avoir chier,
 Mes guerpis Alixandre et si me vien aidier;
 Donrai toi de mon regne, se toi plest, un quartier [820]
 Et te ferai vers Daire, ton oncle, rapezier
 Et te rendrai ta terre toute sanz chalengier.
 Or veus celui servir qui me veut guerrier;
 Se treü ne m'apporte, jel cuit si chastoier
 Et de l'orgueil qu'il a si durement plessier
 Nel voudroient veoir cil qui or l'ont plus chier."
 "Or oi plet, ce dist Sanses, qui bien fet a leissier.
 Celui qui bien m'a fet me reuves tu changier?
 Ja, tant comme je aie le cuer du ventre entier,
 Nel guerpirai pour homme, por les membres trenchier. [830]
 Comment guerra autrui qui lui ne puet aidier?
 Toi meïsmes quide il destruire et escillier,
 Par temps te cuide ocirre et de terre chacier;
 Ce n'est mie roys Daires o le cuer pautonnier.
 Qui d'un serf racheté a fet son conseilier
 Ja devant Alixandre n'oseroit aprochier.
 S'uns li disoit losenge por nului empirier,
 Li roys le feroit pendre ou tout vif escorchier;
 De lui et de ses hommes te couvient acointier."
 Quant il l'ot deffié, si monte en son destrier; [840]
 Jusqu'au tref Alixandre ne se volt atargier.
 [1.36] Quant Alixandres vit son mesage venir,
 Encontre va, sel beise, ne s'en pot astenir.
 Nouvelles li demande, car mout les veut oïr:
 "Que mande Nicholas? Vodra s'en il fouir
 Ou se voudra vers moi en bataille tenir?"
 Et cil li respondi: "Mout est de grant aïr.
 Par mon chief, ce dist Sanses, il vous cuide honnir;
 Ainz mes ne vi si homme de bataille aatir.
 Il me cuida de vous par losenge partir, [850]
 Mes je n'ai pas corage de mon seignor traïr.
 Le treü vous demande, ne s'en veut pas souffrir."
 Quant l'entent Alixandres, d'ire jete un soupir
 Et jure cel seigneur qui soleil fet luisir
 Que par temps en couvient l'un des deus a morir.
 A ce mot s'en alerent aus herberges gesir.
 Au matin quant il vit le soleil esclarcir,
 Lors fet monter ses hommes et ses tentes cueillir.
 Ja mes ne se voudra par homme retenir
 Deci que de Cesaïre puisse les tors choisir. [860]
 [1.37] Dolens fu Nicholas et pensis des respons
 Qu'Alixandres manda, orgueilleus et felons,
 Que nel guerra vers lui fermetez ne donjons.
 De par toutes ses terres a mandez ses barons.

"Or leur couvient leissier deduis d'esmerillons
 Et la chace des chiens et le giet des faucons,
 Et facent rafreschir de nouvel leur blasons,
 Et aient bonnes armes et bons chevaus gascons,
 Frains nués et selles nueves et escus a lions,
 Et vieignent a Cesaire a coite d'esperons, [870]
 Apareillié de guerre, car aparmain l'avrons."
 Tout semont le païs, qui fu larges et lons,
 Trusqu'el regne d'Egipte en ala la reisons;
 Il en jure ses dieus, qui il fet oroisons,
 Que se il i remaint chevaliers ne paons
 Qui puisse porter armes ne monter en arçons,
 Qu'il en fera justice voiant ses compaignons.
 Quant furent assamblé et il les ot semons,
 Plus sont de deus cens mile, ainsi com noz cuidons;
 Ilueques veïssiez tans vermeus gonfanons, [880]
 Vers et indes et jaunes et de toutes façons.
 Seur l'eve de Barsis tendent leur paveillons.
 [1.38] Quant li roys Nicholas ot s'ost a soi mandee,
 Seur l'eve de Barsis en la plaine assamblee,
 Plus durerent les loges de demie jornee;
 Ne cuide que par homme soit ja desbaretee,
 Mes ja ainz ne verra la quinzaine passee
 Que tieus a grant orgueil qui perdra sa posnee.
 Alixandres chevauche, l'oriflambe levee,
 O sa grant compaignie d'une gent aduree, [890]
 Qui sera en bataille essaïe et prouvee.
 Ja mes ne verrez gent qui mieus soit pourpensee,
 De bon seigneur garnie et si enluminee,
 Qui tout fet quanqu'il veulent et quanqu'il lor agree;
 Et elle rest pour lui ainsi entalentee
 Que set tans d'autre gent n'avront vers li duree.
 La terre Nicholas ont ja par leus gastee
 Et chevauchent a force tres par mi la contree.
 Tholomer regarda vers une plaine lee,
 Des loges Nicholas a choisi la fumee [900]
 Et vit mil paveillons el fons d'une valee
 Seur l'eve de Barsis ou elle est arrestee.
 Li uns des Griens a l'autre a l'ost au doi mostree,
 Et dient en riant: "Ja mes ne çaigne espee
 Qui de ceus partira s'ert sa terre effondree.
 La richece Alixandre, qui tant nous est privee,
 Doit bien estre a iceus premerains comparee."
 Ja fust l'ost Nicholas a ce mot escriee,
 Mes li roys Alixandres a sa teste juree
 Que mar s'en mouvra uns s'ert sa gent ordenee [910]
 Et chascune bataille sagement devisee;

Que puis que si grant gent ert ensamble ajoustee,
 Sous ciel n'a homme en terre par qui fust desevee
 Desci que mainte teste en esteroit copee
 Et chevaliers cheüz et selle reversee.
 Par la geude de pié commença la meslee.
 [1.39] Quant de deus pars se sont les os reconneües
 Et les geudes de pié, qui devant sont venues,
 Ont de l'ost Nicholas les herberges veües,
 Tentes et paveillons et aucubes tendues, [920]
 De pourpre, de couleurs, estelees menues,
 Et ont les granz richeces de l'ost aperceües
 Et n'orent les deffensses Alixandre entendues,
 Celle part vont courant, n'i ont regnes tenues,
 Granz cops se vont donner de leur lances agües;
 Li dart que li Grieu lancent et seetes menues
 Voloient plus espés qu'en mai pluies menues,
 Et cil se redefendent o les espees nues.
 Ainz qu'en ait Alixandres les nouvelles eües,
 I ot sanc et cervelles de deus pars expandues. [930]
 "Sire, dist Tholomer, les os sont esmeües,
 Ja i a de deus pars maintes testes tolues.
 Fetes armer voz gens par ces plaines herbues
 Et joustez voz batailles, quant seront ferveüstes,
 Que ne soient ancui folement decheües;
 S'erent ces trois batailles Nicholas bien ferues
 Que je voi la armees les ces brueilles foillues,
 Si que soient ancui ledement desrompues,
 Ja mes toutes les autres ne seroient tenues."
 [1.40] Quant Nicholas vit l'ost des Grijois en la plaigne [940]
 Et les geudes de pié qui paient leur bargaigne,-
 Tieus i ala touz sains qui perciee a l'entraigne,-
 Lors commande li roys a mener sa compaignie
 Et fet le harnois treere vers les puis d'Aliagne,
 S'il vient au desconfire, qu'aient large champagne.
 Mout bien les amoneste et estruit et ensaigne,
 Chascun prie par soi que nus d'eus ne se faigne,
 Ne se desroit pas l'ost, mes ensamble se taigne:
 "Alixandres est fiers et sa gent est grifaigne;
 Ne vous esmaiez mie, se l'uns l'autre mehaigne. [950]
 Au departir du champ verra l'en la gaagne;
 Ja mes ne sera jour que chascuns ne s'en plaigne;
 Mieux vodroie estre mors que ma terre pourpraigne."
 Abilas de Laserre a commandé s'ensaigne;
 Ne cuide que tel homme ait tant com la mer çaigne.
 [1.41] Quant Alixandres vit de l'ost la commençaille
 Et les geudes a pié qui muevent la bataille,
 Uns Greus s'en est partis, ferus par mi l'entraille,

Li sans qui du cors ist seur son arçon li caille.
 Alixandres li dist: "Ce n'est pas devinaille." [960]
 Et dist par maltalent: "Ja Dieus ne m'ait en baille,
 Se ja de l'assamblee i a mes desevraille.
 Sa chape gart chascuns, tout voist a communaille."
 Douze eschielles devise, mout bien les aparaille.
 Emenidon d'Arcage la premeraine baille
 Et dist que bien les maint et sagement i aille
 Et gart ne se desroit ne nuz des rens ne saille,
 Car a si fier besoing et a tel assamblaille
 Ne puet nus hom bien fere, se mout ne se travaille.
 Emenidus respont: "Ja tant com j'avrai maille [970]
 En l'auberc de mon dos, pan entier ne vantaille,
 Et mes harnois vaudra le pris d'une maaille,
 Ne j'aie escu entier ne espee qui taille,
 Pour doutance de mort ne fera mes cors faille,
 Ainz i serai ferus tres par mi la coraille
 Et m'estevra le cors bender d'une touaille."
 Li roys dist en riant a Garsil de Biaille:
 "Preus est Emenidus, ne cuit que nus le vaille."
 Lors veïssiez les Griens liez et de grant gazaille,
 Qui mieus nel cuide fere ne se prise une caille. [980]
 [1.42] La premiere bataille conduist Emenidus,
 Perdicas la seconde et la tierce Caulus
 Et la quarte Leoynes, la quinte Antigonus
 Et la siste bataille conduist Antioqus,
 En icelle ot assez de princes et de dus,
 Qui feront a la gent Nicholas tieus pertus,
 Ses treuvent en estour, bien iront a reüs,
 Ne cuit c'au departir s'en puisse gaber nus;
 Et les autres batailles se retraient en sus,
 Qui bien vodront ancui deffendre leur treüs. [990]
 [1.43] Mout fu preus Alixandres et de sens esprouvé,
 Et les autres batailles a il bien commandé;
 Li autre per les mainent sagement par fierté,
 Onques n'i ot desroy ne outrage mené.
 Dans Clins maine la sesme et l'uisme Tholomé;
 Cil dui ne furent onques en leur vie sevré,
 Assez d'un aage erent et pres d'un parenté,
 D'un samblant, d'une guise et d'une volenté;
 De toute l'ost de Grece furent li plus douté,
 Fors seul Emenidon au corage aduré; [1000]
 Ainz d'estour ne fouirent quatre toises de lé,
 Pour tant qu'estre i poïssent a nulle sauveté.
 La nuesme ot Licanor et la disme Arristé,
 Cil dui resont hardi et vassal aduré.
 [1.44] L'onzime des batailles conduit dans Filotés,

En la douzime en chief si estoit Aridés.
 Alixandres revient o sa grant gent après,
 Qui en l'aspre besoing sofferront greignor fes.
 Le jour fist Alixandres que de roy n'oïmes,
 Que toutes les batailles a outrees em pes, [1010]
 En la premiere eschiele est venus a eslés.
 Aus premiers vodra joindre li roys macedonés;
 Ancui le trouverront si anemi engrés,
 Onques mes n'acointierent si mal voisin de pres.
 [1.45] En la premiere eschiele, que Emenidus maine,
 Fu li roys Alixandres sus Bucifal demaine,
 Qui des premieres joustes vodra avoir l'estreine,
 Assez plus le desirre que douz chant de sereine.
 Estes vous de Chesaire l'eschielle premeraine;
 Devant trestouz les autres vint li dus de Betaine [1020]
 Et sist seur un destrier qui plus cort d'une alaine
 Que ne vole esmerils quant l'aloë est prochaine;
 Il ot un costé brun et l'autre blanc com laine,
 Ses couvertures furent d'un cendal de Miçaine.
 Quant le voit Alixandres, de bien fere se paine,
 Bucifal esperonne si li lasche la raine;
 Ja orrez d'ambes pars une joute certaine.
 Li dus ala ferir Alixandre demaine,
 Que sa lance peçoie sus le roy macedoine,
 Et li roys feri lui, aussi com sus quintaine, [1030]
 Que toute li perça la fort brogne claveine,
 Faussee est seur le pis, la ou elle ert plus saine;
 A trois doie du cuer li a trenchié la vaine;
 Toute plaine sa lance l'abat mort en l'araine.
 Les deus batailles hurtent et la tierce fu saine;
 Cil qui bien s'encontrerent n'ont mestier de quintaine.
 [1.46] Au jouter des batailles chaïrent li vassal;
 Ilueques veïssiez un estour communal,
 Tant hiaume detrenchié, tant escu, tant nasal,
 Le sanc et la cervelle cheoir encontre val; [1040]
 Li couart s'espoëntent et guerpissent estal,
 En toutes les besongnes seufrent li preu le mal.
 Et Alixandres point, qui sist seur Bucifal,
 El chief de la bataille vet joindre a Nabigal,
 Par mi le cors li passe l'enseigne de cendal,
 Si l'abat a la terre que rompent li poitrail,
 Puis a trete l'espee au poing d'or a cristal;
 Au torner de la joute ala ferir Coustal,
 Que tout le pis li trenche et la veine coral.
 Emenidus l'esgarde si apela Hunbal [1050]
 Et dist c'onques tieus princes ne monta seur cheval.
 A ses anemis joute, mes li cop sont mortal,

Ne leur lera de terre valissant un jornal.
 [1.47] Emenidus chevauche un destrier arragon
 Et vet par la bataille a coite d'esperon,
 Iriez desouz son hiaume, s'ot regart de lion;
 El chief de la bataille vet joster a Sanson,
 Hom estoit Nicholas et bien de sa meison
 Et si tenoit sa terre tote quite en son non;
 El cors li mist le fer a tout le gonfanon, [1060]
 Si l'abat du cheval qu'en vuident li arçon.
 Aspiros de Calice sist en Valerion,
 Un sor destrier d'Arrabe de mout gente façon,
 En l'eschiele desriere ala joindre a Leon,
 Toute plaine sa lance l'abat mort du gascon.
 Forment poise Alixandre de la mort son baron,
 Et dist: "Vous m'avrez sempres mout pres a compaignon."
 Au torner que il fist le fiert de tel randon,
 Sa coiffe estoit cheüe et laschié li bouton,
 Que la teste li trenche par desouz le menton. [1070]
 Cil de Cesaire dient: "Enevois i perdron;
 S'ainsi noz vont menant, ja n'avron guerison;
 Ja de combatre aus Griens ne vendra se maus non."
 [1.48] Es vous par mi l'estor sus un destrier venir
 Sanson le neveu Daire, qui fu jetez de Tir.
 Li vassaus vint armez et li chevaus d'aïr,
 En mi la greignor presse ala un duc ferir,
 Qui ot de Nicholas mout grant terre a tenir,
 Que l'escu de son col li fist fraindre et croissir,
 Si l'abat contre terre que l'ame en fist issir; [1080]
 Puis a trete l'espee, vers eus prist a guenchir,
 Amiras d'Abilac ala le chief tolir.
 Alixandres l'esgarde, si li vint a pleisir,
 Et dist: "Mout doit l'en bien tel vassal retenir,
 Qui en si fiere coite set son seigneur servir;
 Qui tel homme tolt terre, bien l'en doit maus venir."
 La compaignie Alixandre les vet si envaïr
 Que la premiere eschiele nes pot onques soffrir;
 A touz les premerains ont fet estal guerpir.
 [1.49] Es vous l'autre bataille, que conduit Perdicas; [1090]
 A la seconde eschiele des hommes Nicholas
 S'ajouste comme ains pot, assez plus que le pas;
 La oïssiez brisier tante lance de saps,
 Tant hiaume et tant escu veïssiez iluec quas,
 Tant chevalier armé gesir a terre bas.
 Seur le ver d'Oliferne sist armez Belias;
 Cil estoit nez de Grece et parens Eneas,
 Qui eschapa de Troie quant li païs fu ars;
 El chief de la bataille vet joindre a Josias,

Un baron de Cesaire et né de Caÿfas [1100]
 Et tint toute la terre descî en Belinas,
 Que l'eschine li trenche outre par mi les dras,
 Toute plaine sa lance l'abat du cheval gras.
 Abilas de Laserre a ocis Brunadas,
 Un chevalier de Grece et parent Filotas.
 La veïssiez combatre Greus et Macedonas;
 La compaigne Alixandre, qui nes espargne pas,
 Aus espees trenchans les vont ferir el tas.
 Le jour les abuvrerent a si felons hanas
 C'onques de celle eschiele, nel tenez mie a gas, [1110]
 Par le mien escient cent n'en estordent pas.
 [1.50] Ez vous la tierce eschiele, que Caulus li quens guie,
 Qui maint bon chevalier ot en sa compaignie;
 Jousta a la bataille Clariel d'Estorie.
 L'une gent envers l'autre se porte grant envie,
 Durement s'entrefierent, car touz jorz s'est haïe;
 Ilueques veïssiez tante targe florie
 Et maint bon chevalier abatre sanz la vie.
 Caulus point le cheval ou durement se fie
 Et feri Samadon seur la targe florie, [1120]
 Qu'il li fent et estroue, ne li vaut une allie;
 Par mi le cors li passe l'enseigne d'Aumarie,
 Seur l'arçon daesrain l'enverse tout et plie;
 Outre passe poignant, mes son branc n'i oblie,
 Du fuerre le sacha quant la lance est faillie;
 Au tour grezois fiert l'autre seur l'iaume de Pavie,
 Mes par devant l'escu est l'espee guenchie,
 Que l'espaule senestre li a du cors partie;
 Li bras a tout l'escu chiet seur l'erbe florie.
 Cil s'esmaia du cop s'a la selle guerpie, [1130]
 Quatre foiz s'est pasmez en mi la praerie.
 Caulus prist par la resne le destrier d'Orcanie,
 Batant l'en maine au plat de l'espee forbie,
 A un Grieu le rendi qui du sien n'avoit mie.
 Nus ne voit celle jouste qui de cuer ne s'en rie.
 A grant bien li atornent celle chevalerie;
 La bataille aus Grezois a si l'autre envaïe
 Que de vint arpens est arriere sortie.
 [1.51] Ez vous l'autre bataille, que conduisoit Leoyne,
 Jointe a la quarte eschiele Nicholas sanz essoine; [1140]
 La veïssiez percier maint escu de Blioine.
 A tant es vous poignant Drapendés de Sydoine;
 Cil ert hom Alixandre et tint Escalidoine
 Et sist seur un cheval qu'en apelle Pyoine;
 En l'escu de son col ala ferir Antoine,
 Un baron Nicholas, né devers Babyloine,

Que sa lance peçoie comme un rain de pyoine;
 Puis a trete l'espee au poing d'or a sardoine,
 A mont le fiert en l'iaume ou siet la casedoine,
 Que il li trenche et fausse et la coiffe et la broigne, [1150]
 Ou cervel li embat le branc nu sanz essoine.
 La veïssiez combatre la flor de Macedoine,
 Qui ert a Nicholas venue par essoine.
 [1.52] Quant la premiere eschiele, qui aus Griens est jostee,
 Vit la gent Alixandre tant fiere et aduree
 Et duite de bataille et si bien pourpensee
 Qu'ains si hardie gent ne fu de mere nee
 Et ont l'autre compaigne Alixandre esgardee-
 Chascune des batailles vient par soi devisee,
 Si com li maines roys l'avoit toute ordenee- [1160]
 Et virent la leur gent joste eus desbaretee,-
 Tel quatre cens des leur en gisent en la pree
 Trestouz li plus haliegres a la teste copee,-
 La premiere bataille en est si effraee
 Que la seconde après en est toute esgaree
 Et la tierce fremie et la quarte branlee,
 Si que l'une bataille est a l'autre hurtee.
 Quant la gent Nicholas, qui vint après armee,
 Vit celle de devant si forment effraee,
 Et est toute seur eus en fuiant reversee, [1170]
 Lors fu si de bien faire enfin destalentee
 Que l'une gent por l'autre est en fuie tornee.
 Alixandres les suit o ceus de sa contree;
 Ilueques veïssiez mainte enseigne brodee
 En cors de chevalier tainte et ensanglantee
 Et a tant bon vassal tante teste copee,
 En icelle chace ot mainte targe effondree.
 Trusqu'aus puis d'Alierne n'i ot resne tiree,
 Ou li harnois estoit et l'autre gent alee,
 Assez pres de Cesaire a mains d'une liuee; [1180]
 Deus liues et demie a la fuie duree.
 Çà defors la cité au destroit d'une entree
 S'est la gent Nicholas de four arrestee.
 Abilas de Laserre a s'enseigne a s'enseigne escriee;
 Iluec vodront hui mes maintenir la mellee.
 [1.53] Les deus os sont jostees el destroit de Cesaire,
 Durement s'entrefierent, que ne s'amerent gaire;
 Maint gentil chevalier oïssiez iluec braire
 Et tant baron a terre gesir mort sanz suaire.
 Emenidus se sist seur Ferrant de Liaire, [1190]
 Qui ert bons chevaliers et preus et debonnaire,
 De toute l'ost de Grece ne pot on meilleur treere;
 Seur l'escu de son col fiert le duc de Nazaire,

La brogne c'ot vestue ne li valt une haire;
 Le cuer li a trenchié souz la pelice vaire.
 Quant le vit Nicholas, mout li vint a contraire,
 Car il estoit ses niez, de riens ne li pot plaire;
 Le cheval esperonne por vengier cel affere.
 [1.54] Nicholas esperonne le bon destrier mouvant.
 Quant vit mort son neveu a la terre sanglant, [1200]
 Mout durement l'en poise, le cuer en ot dolant,
 Ce n'est mie merveille, car il l'amoit forment;
 Fuiz estoit de son frere, qu'on apeloit Persant,
 En toute sa compaignie n'avoit nul si vaillant.
 En sa targe florie ala ferir Balant,
 Que il li a perciee et l'auberc jaserant,
 Desrompu douze mailles trestout en un tenant;
 Dejoust le costé vet li aciers coulant,
 En char l'a entamé, mes ne l'a mort a tant,
 A la terre l'abat, quel virent ne sai quant. [1210]
 Puis a trete l'espee si regarde le brant,
 Un chevalier de Grece feri en trespassant
 Par desouz la ventaille, si que le chief en prent.
 Tholomer esperonne si li vint au devant,
 Si grant cop li donna sus son hiaume luisant
 Que trestout l'adenta sus son arçon devant;
 De l'espee li donne tieus trois cops maintenant
 Que si l'a estonné qu'a riens n'est entendant.
 Par la resne le prist si l'en maine batant,
 Puis li dist par contrere trois mos en ramposnant: [1220]
 "Hui avrez le treü que aliez demandant."
 Ja fust pris Nicholas et si homme fuiant,
 La bataille veincue et li leur recreant,
 Quant li quens Abilas i est venus poignant.
 La orrez d'ambes pars une mellee grant;
 Li vassal s'entrefierent, li roys s'en part a tant,
 Car de sa compaignie n'avra hui mes talent.
 [1.55] Abilas sist armez el destrier missodour
 Et feri Tholomer par mi son hiaume a flour,
 Que il en abati le mestre coing hautour. [1230]
 Et Tholomer fiert lui el hiaume de colour,
 Que il li a trenchié tout le cercle d'entour;
 Li cops chiet seur l'escu s'en a fendu un dour.
 De l'espee li donne tieus trois cops par irour
 Que sus l'arçon l'adente du destrier coureour.
 De l'escu le hurta, si l'abat a son tour,
 Contre terre le fiert, mort l'eüst a dolour,
 Quant la gent de Cesaire l'encloënt tout entour.
 Sus Tholomer s'arrestent tel trente ferreour,
 Qui aus brans li estoient de mort presenteour, [1240]

Desouz lui li ocient son bon cheval le jour;
 Mes li vassaus fu preus et plains de grant valour,
 Durement se deffent a son branc de colour.
 Ja fust mors Tholomer, ce content li auctour,
 Quant Dans Clins, ses compains, se feri en l'estour
 Et connut Tholomer a pié entre les lour;
 Le destrier esperonne s'est venuz au secour,
 Et poignent avoec lui maint bon conbateour
 Des hommes Alixandre, Grieu et Macedonour.
 Ja orrez de deus pars un merveilleus estour; [1250]
 Durement s'entrefierent, qu'il n'i a point d'amor.
 [1.56] Dans Clins fiert le premier, qui tenoit Tholomé,
 Merveilleus cop li donne sus son hauberc saffré,
 Que par desouz le pis li a fraint et faussé
 Et le cuer de son ventre en deus moitez copé.
 Par la regne a or fin a le destrier combré,
 Tholomer qu'ert a pié l'a Dans Clins présenté;
 Et li bers i monta par son estrier doré.
 Emenidus fiert l'autre du branc a or letré,
 Que desus les espales li a le chief copé, [1260]
 Et Perdicas le tiers et le quart Arristé;
 Licanor fiert le quint, si com l'a encontré,
 Que tout le hanepier li a dou chief osté,
 Par desus les oreilles li a au branc rasé;
 Tieus n'a si grant coronne de qui l'en fet abé,
 Onques mes ne vi homme si vilment coronné.
 Li douze per de Grece sont seur eus aresté,
 Qui sont en mainte coite cremu et redouté.
 Le jour i veïssiez bien aidier Tholomé,
 Comme il cherche les rens a son branc acéré, [1270]
 Un prince de Corinte leur i a mort jeté.
 [Cil qui clos les avoient sont en fuie torné,]
 Et Dans Clins les enchaucé au corage aduré
 Et tuit li douze per, ques ont cueilli en hé.
 [1.57] La meslee est partie et Tholomer rescous,
 Et li besoins fu fiers et forment perillous.
 Li quens Aridés point contre val un herbous
 Et sist seur un cheval courant et ravinous,
 En l'escu de son col va ferir Malatous,
 Un baron Nicholas, felon et orguellous, [1280]
 Toute plaine sa lance l'abat du destrier rous;
 Et cil resaut en piez, qui du cop fu hontous,
 Le branc nu en sa main vers lui vint tous iros,
 De sa lance qu'il tint li a fet quatre trous,
 Par devant les oreilles feri le bai guignous,
 Le cheval ou il sist, que du chief le fet blous.
 Aridés saut en piez com fiers et coragous

Et fu de lui requerre durement couvoitous;
 Se l'uns vassaus fu preus, l'autre fu orgueilleus.
 O les brans s'entredonent granz cops et merveillous; [1290]
 Ne puet mes remanoir la mellee des dous
 Desci la que li uns en sera courreçous.
 [1.58] Malatous tint le branc, vers le Greu vint a et
 Sel feri par mi l'iaume que trestout li a fret;
 Aridés refiert lui, qui le sien avoit tret;
 Durement se combatent les le chief d'un garet.
 Li Hermines li a tout son escu defret,
 El cors souz son hauberc l'eüst mort par aguët,
 Quant cil contre le branc a l'escu avant tret.
 Iluec li a donné si grant cop au retret [1300]
 Que l'os du bras li trenche et cil geta un bret:
 "Pour Dieu, merci!" li crie, de sa vie quiert plet;
 Tant li donra avoir com li vendra a het,
 D'or fin li charchera cinc somiers entreset.
 Cil entent la promesse, por tant vivre le let,
 Par son escu le prent et cil o lui s'en vet;
 Alixandre le rent, qui desarmer le fet.
 Il ot le chief plus blanc que ne soit glous de let;
 Il a demandé mires et prie qu'il en ait;
 Se raaimbre le veut et respasser le let, [1310]
 D'or fin li rasera toute plaine une met.
 [1.59] "Malatous, dist li roys, vous estes mes prisons."
 "Voire, dist li Hermins, granz ert la raençons;
 Fetes moi bien guerir, ne sui mie garçons,
 Encor tieng je de Daire cent chastiaus et donjons
 Dont je maing bien en ost cent mile compaignons
 Qui vienent tuit a moi quant je les ai semons.
 Pour ce qu'il est de vous tieus los et tieus renons,
 Devendrai vostre hom liges sanz point de traïsons."
 Alixandre atalente mout tres bien cil sermons. [1320]
 Deus siens mires li baille, Ametis et Gorons,
 Et cil li couvenacent: "Tout sain le vous rendrons."
 A tant estes vous deus des douze compaignons:
 Li uns fu Tholomer et li autres Cliçons.
 Cil ont en la bataille conquis tieus deus prisons,
 Des homes Nicholas, de ses meillors barons;
 Alixandre les rendent anzdeus par les boutons;
 S'il en veut raençon, mout en ert biaux li dons,
 Et li roys les commande mener aus paveillons.
 [1.60] Alixandres commande les prisons a garder. [1330]
 Grans ert la raençons, s'en veut plet escouter;
 Chascuns s'offre set foiz de fin or a peser,
 O les autres loiers qu'il en vodront donner.
 Li roys desouz son hiaume commence a regarder

Et vit de la bataille un Grezois retourner.
 Feruz fu d'un espiel ou cors au traverser,
 Tant ot perdu du sanc ne pot avant aler,
 Seur le col du cheval le couvint a pasmer.
 Alixandres l'esgarde, nel pot plus endurer,
 Bucifal esperonne si vet a euls joster, [1340]
 Sempres le couvendra qui que soit comparer;
 Set foiz cerche les rens, n'i treuve qu'encontrer.
 Un chevalier de Perse feri au trestorner,
 Que desus les espales li fet le chief voler;
 Ainz mes de si fier prince n'oïnus hom parler.
 Li roys crie s'enseigne por sa gent rassambler,
 Trestoute la bataille fet devant lui trambler;
 Environ lui s'arrestent trestuit li douze per.
 [1.61] Li douze per s'arrestent tuit environ le roy.
 La poïssiez veoir un merveilheus desroy, [1350]
 La n'avoient li conte nul talent de dosnoi,
 Li cuvert vanteour souz les hiaumes sont quoi.
 Cil de Cesaire voient l'orgueil et le bufoi
 De la gent Alixandre qui vers eus nen ont foi,
 Dient: "C'or penst chascuns de sa vie endroit soi,
 Car de l'estor soffrir n'i a mes nul conroy."
 Les dos leur ont tornez, si lessent le tornoi,
 Vers Cesaire s'en fuient trestuit a grant desroy.
 [1.62] La bataille est veincue, cil ont torné les dos,
 Vers Cesaire s'en fuient, les gonfanons destors; [1360]
 Et li Greu les enchaucent, qui par tout ont le los,
 Les eschines leur trenchent par desriere les dos,
 Si que par vive force les ont leens enclos.
 Cil serrerent les portes dont li flael sont gros,
 Puis ne craignent assaut quatre testes de chous;
 Tant sont fort li murail dont li bors est enclos
 Que li roys nes puet prendre, mout en a le cuer gros;
 Defors se hebergierent par les plains d'Abilos.
 Ce soir pristrent li Greu en lor tentes repos.
 [1.63] Es plains desouz Cesaire sont hebergié li Gré; [1370]
 Mes la ville est si fort qu'el ne crient home né;
 Li mur estoient haut et parfont li fossé
 Et les tours bateilliees de brun marbre listé,
 Li quarrel en estoient tout a plonc seelé.
 Deus liues environ n'a montaigne ne pré
 Ou li Grieu ne se soient logié et atravé.
 La bataille est veincue, cil dedens sont maté.
 Mout fu granz li eschés qu'il i ont conquesté;
 Li roys l'a a ses homes departi et donné,
 Onques n'i ot baron, malade ne navré, [1380]
 Que il nen ait le jor bonnement regardé.

Quant li roys ot mengié, si s'asist en son tré;
 Environ lui apelle Cliçon et Tholomé
 Et touz les autres pers, si lor a devisé:
 "Seignor, dist Alixandres, la merci Damedé,
 De ceste premiere oevre noz est bien encontré;
 Bien se sont hui li Grieu en bataille prové.
 Un don vous prometrai et tendrai en verté
 Que ja ne conquerrai ne chastel ne cité
 Qui ne soient trestout a vostre volenté. [1390]
 Ja mes ne finerai en trestout mon aé
 Tant que chascun de vous ferai roy couronné."
 Li douze per l'entendent si l'en ont mercié.
 Lors commande li roys que dui mile homme armé
 Escharguetassent l'ost, quant il ert avespré,
 Que cil dedens n'en issent coiemment a celé,
 [Car li Grieu dormiront, por ce qu'il sont lassé.]
 [1.64] Alixandres commande l'ost a escharguetier,
 Que cil dedens n'en issent por sa gent empirier.
 Mes li roys de Cesaire ne se volt atargier, [1400]
 La dedens a ses hommes se prist a conseilier:
 "Seigneur, dist Nicholas, com porrai exploitier?
 Alixandres me cuide destruire et escillier;
 Li roys est orgueilleus et li Grieu sont mout fier;
 Ne chastiaus ne cité ne me cuide lessier."
 Abilas de Laserre et Salos de Valmier
 Entendent la parole si responnent premier:
 "Rois, fai mander tes hommes jusqu'aus porz de Briër
 Et jusqu'a la montaigne ou l'en cerche l'or mier,
 Que onques n'i remaigne serjant ne paonnier [1410]
 Ne franc homme a cheval ne bon aubalestier
 Qu'a Cesaire ne viegnent por leur seigneur aidier,
 Et cil qui remaindront soient tuit servagier;
 Ne leur leissiez tenir ne terre ne moillier."
 "Ce plet, dist Nicholas, ne pris je un denier.
 Tuit li homme du siecle, serjant ne escuier,
 Ne guerroient aus Grieus, tant sont hardi et fier;
 Il ne fuïroient mie por eus touz depecier;
 Nulle riens ne durroit encontre leur acier.
 Autre chose ai pensee, dont vous voeil acointier: [1420]
 Demain me combatrai armez sor mon destrier,
 Cors a cors en bataille, contre le roy d'Alïer.
 Se jel pooie ocirre et la teste trenchier,
 Puis en seroient quite mi homme et mi terrier.
 En nulle autre maniere ne m'en puis mieus vengier,
 Mes ainz covient ce plet de deus pars otroier."
 "Li dieu, dient si homme, vous en puissent aidier."
 [1.65] Au matin par son l'aube, quant li jorz aparoit,

Nicholas prist un mes que il forment creoit
 Et set que son mesage si bien li conteroit [1430]
 Que ja por paour d'homme nulle riens n'en leroit.
 Alixandre l'envoie a son tref ou estoit:
 Bons ostages avra et les siens li renvoit,
 De touz les meilleurs trente que eslire porroit.
 Li mes descent a pié quant Alixandre voit,
 Et conte son mesage, si comme il le savoit:
 "Nicholas te semont de bataille or endroit,
 Cors a cors par vous deus, ainsi l'otroieroit.
 Ne veut que autre gent ja mes maumise en soit."
 Alixandres respont: "Dont soit fet or endroit." [1440]
 Tant forment le desirre que encor le mescroit,
 Mout durement le haste, car il crient qu'il refroit.
 Li roys dist a ses hommes: "Fols ne crient, si reçoit;
 Hom orgueilleus ne crient tant que mors l'asoploit;
 Tieus cuide autrui destruire qui la mort en reçoit."
 Lors veïssiez le roy en piez saillir tot droit;
 Tholomer apela, que il mout aime et croit:
 "Fetes moi Bucifal amener a exploit,
 Desci que en la terre touz couvers de fer soit,
 A granz bendes de paile, a boutons d'or estroit; [1450]
 Mout avroie grant ire, se on le m'ocioit.
 Ancui pens de Cesaire recovrer le destroit;
 Tholomer le donrai, a son oeus i claing droit."
 Ce responnent si homme: "Et Dieus le vous otroit."
 [1.66] "Rois, oies, dist li mes, que te mande mes sire,
 Escoute la parole, si com je la voeil dire.
 Ne veut mes que li pueples soit livrez a martire,
 Les hostages demande de ceus de ton empire,
 Et se il te puet vaintre, detrenchier et ocirre,
 Que ti homme s'en aillent, de qui sa terre est pire, [1460]
 Et se tu le pués vaintre et en bataille aflire,
 Sa terre sera teue jusqu'a la mer de Tire;
 Tuit vous en serviront, et li mieudre et li pire.
 De ce avras ostages, tieus com vodras eslire."
 Quant l'entent Alixandres, de joie prist a rire;
 Au mesagier a fet unes letres escrire.
 Cil les rent son seignor; Nicholas les fet lire.
 [1.67] Li mes s'en est tornez, poignant a esperon,
 Nicholas a contee et dite sa reison:
 "Alixandres te mande, qui cuer a de lion, [1470]
 Qu'il otroie ce plet, ainsi com noz dison.
 Onques mes en ce siecle ne nasqui uns tieus hon:
 Le cors a il petit et fiere a la façon;
 Ne vous cuide lessier ne chastel ne donjon,
 De toute vostre terre a il ja fet le don,

Voiant moi l'a donnee Tholomer son baron,
 Ne prendroit de ta teste nesune raençon."
 Et respont Nicholas: "Tieus est diz de bricon;
 Entre fet et parole a grant deusion;
 Ançois en sera mors l'uns de nous el sablon. [1480]
 Se bien ne la deffent, dont elle est a garçon;
 Onques mes n'acointai un voisin si felon.
 Aportés moi mes armes, ce m'est vis que tardon,
 Et couvrez jusqu'en terre le bon cheval gascon."
 Abilas de Laserre apela par son non:
 "Ensamble o moi vendrez et trente compaignon,
 Et donron noz ostages et les leur reprendron."
 Et cil li respont: "Sire, bien est, si l'otroion."
 [1.68] Nicholas s'est armez d'un hauberc jaserant
 Qui ot la maille blanche et serree et tenant; [1490]
 Onques de sa bonté ne vit on mains pesant,
 Ne doute cop de lance, ne quarrel d'arc trenchant.
 La ventaille li lacent dui danzel en plorant;
 El chief li ont assis un vert hiaume luisant,
 A laz d'or et de soie li vont entour laçant;
 Et ot une escharboucle ens el nasel devant.
 Et a çaint par les renges une espee trenchant;
 Ses esperons li chaucent dui neveu l'amirant,
 Devant lui amenerent un bon destrier courant;
 Li roys i est montez par son estrier pendant. [1500]
 A son col li pendirent un escu d'olifant,
 Hanste ot roide de fresne et gonfanon pendant.
 Par mi la mestre porte s'en issi galopant,
 La lance sus le fautre, et l'escu tint avant;
 Quatre vins chevalier le vont au dos suivant;
 Et vet par mi la plaine son destrier essaiant,
 A destre et a senestre le vet sovent tornant,
 Trusque devant les tentes se vet ademetant.
 Devant le mestre tref s'en est venuz esrant,
 Son cheval fet restraintre et le poitral devant [1510]
 Et rechange son frain a un plus destraignant
 Pour ce que son destrier trouva un po tirant,
 Et redrece son hiaume, qui li vet enclinant.
 Ja mes ne verrez homme armé plus avenant,
 Et ot bien d'Alixandre le cors deus piez plus grant;
 S'il ne fust orgueilleus, fors le roy conquerant
 N'eüst un meilleur prince descî qu'en Orient.
 Par compaignes le vont li Grijois esgardant;
 S'il fust bien d'Alixandre, volentiers l'amissant.
 [1.69] Dedens son tref demaine se rest li roys armez [1520]
 Et vesti un hauberc qui ert fors et serrez,
 A mailles de fin or estoit par leus ouvrez;

Devant en mi le pis et entor les costez
 Estoit li haubers doubles et richement cloëz.
 Uns hiaumes de haut coing li fu el chief fermez,
 A laz d'or et de soie atachiez et noëz,
 Devant ot un topasce qui bien fu esprouvez;
 Et a çainte une espee dont li brans fu letrez
 Et de mout bonne guise trenchanz et acerez.
 Ses esperons li chaucent Caulus et Aristez. [1530]
 Devant lui fu couvers Bucifal amenez;
 Par son estrier a or i est li roys montez.
 Hanste ot roide de fresne, li fers fu bien temprez,
 Desci qu'aus poins li bat uns gonfanons fresez.
 "A Dieu, dient si homme, soiez vous commandez,
 Qui hui vous doigne fere toutes voz volentez."
 Bons ostages a pris et bons les a donnez,
 De touz les meilleurs trente que l'en leur a nonmez,
 Et li ples fu tenuz, si com fu devisez,
 Après fu li uns roys de l'autre deffiez; [1540]
 Ambedui s'esloignierent la costiere d'uns prez.
 Ja orrez la bataille, mes que bien l'escoutez.
 [Sus les escus se sont granz cops entredonnez,
 Desouz les boucles d'or les ont frains et troëz.]
 [1.70] Li prez fu lons et plains et l'erbe fu deugie
 Et la joustes des roys durement aprochie;
 Onques jusqu'au ferir n'i ot regne sachie.
 Nicholas fiert le roy que sa lance a brisie,
 Car de mout grant vertu la portoit aloignie,
 Et li roys refiert lui, qui sa lance ot baissie, [1550]
 Que la targe li a et troëe et percie,
 La maille du hauberc rompue et desmaillie,
 Mes ne l'a pris en char a icelle foïe,
 Car sa lance li est ens el poing esclicie;
 Pour quant si l'a enpainted que l'eschine a ploïe
 Et la selle detriers en est mout empirie;
 L'un des estriers li tolt, la corroie est laschie,
 Par po que Nicholas n'a la selle voidie;
 La mestre des corroies du hiaume est deslachie
 Et la ventaille a or estendue et ploïe. [1560]
 S'Alixandres n'eüst sa lance peçoïe,
 Ja fust de Nicholas la praere jonchie.
 [1.71] Nicholas fu honteus de ce qu'il fu ploiez,
 Mout par fu tost resours si s'est bien afichiez;
 Se dou roy ne se venge, vieus est et vergoigniez.
 Le cheval esperonne, vers lui s'est eslessiez;
 Le branc nu en sa main, celle part vint iriez,
 Merveilleus cop li donne quant il fu aprochiez;
 En l'escu d'olifant s'est li brans embroiez,

Par un po qu'au retrere n'est par mi peçoiez: [1570]
 Au retour se dut estre d'Alixandre vengiez.
 Quant li roys vit le cop, si s'est a val bessiez,
 De l'escu d'olifant s'est devant enbuschiez;
 Puis a trete l'espee si regarde ses piez,
 Li cuers li est el cors plaine paume dreciez,
 Et feri Nicholas, qui li fu aprochiez,
 A mont par mi son hiaume, que par mi est trenchiez;
 Les pierres sont chetïes et li cercles brisiez,
 Li hiaumes esquarterelle, qui mout fu empiriez,
 Par desus les espauls en chieent les moities. [1580]
 Mout par fu granz li cops, que li brans fu oschiez
 Et li chevaus souz lui par force ajenoilliez.
 Nicholas ot paour, ne vous en merveilliez,
 Sous ciel n'a homme en terre qui n'en fust esmaiez,
 Assez avez veüs hommes mieus aeisiez;
 Et dist a soi meïsmes: "Mes termes est jugiez;
 Du treü Alixandre serai hui engigniez."
 Volentiers s'en fouist, touz en ert conseilliez,
 Se nel lessast pour ceus des estranges regniez,
 Et pour ce qu'il en fust destruis et escilliez; [1590]
 Mieus aime morir roys que du regne chaciez.
 Ses chevaus est resors et il est redreciez.
 [1.72] Nicholas fu iriez du cop qu'a receü;
 Pour un seul petitet qu'il ne l'a abatu;
 D'une chose se tient a mort et a veincu,
 Que encor ne l'en est de riens bien avenu.
 Par les flans esperonne le bon bauçant quernu;
 D'Alixandre s'aproche et tint le branc molu,
 Merveilleus cop li donne par mi son hiaume agu,
 Que il li a trenchié et le cercle rompu; [1600]
 Au devaler du cop chiet li brans seur l'escu,
 Que plus de plaine paume l'a trenchié et fendu;
 Ja mes ne verrez homme sanz navrer mieus feru.
 Et Alixandres point Bucifal par vertu,
 Bien li a de cel cop contrechange rendu,
 Et feri Nicholas, si com l'a conseü;
 N'avoit mie du hiaume, ançois l'avoit perdu,
 Sa ventaille ert cheoite si avoit le chief nu.
 Lors le fiert Alixandres com hom de grant vertu,
 Que la teste li trenche rez a rez seur le bu; [1610]
 D'autre part est volee en mi le pré herbu.
 Puis li dit par contrere, que tuit l'ont entendu:
 "Nicholas, mal avez pourchacié le treü,
 Nel me demandez mes, car jel vous ai rendu."
 Cil de Grece s'escriënt quant le cop ont veü:
 "Cist doit bien tenir terre, onques tieus ber ne fu."

Puis sont contre le roy a granz torbes venu.
 Dans Clins reçut l'espee et Tholomer l'escu,
 Sus un fautre de paile ont le roy descendu,
 A merveilleuse joie le desarment si dru. [1620]
 Cil de Cesaire sont dolent et irascu.
 Ens el champ a la nuit Alixandres jeü,
 Trusqu'au matin a l'aube que le jor a veü.
 [1.73] Au matin par son l'aube, quant le jor pot choisir,
 La lueur du soleil et le jour esclarcir,
 Le cors de Nicholas commanda a servir,
 Richement metre en terre et bien ensevelir.
 "Baron, dist Alixandres, je vos di sans mentir,
 Ainc ne vi plus preudome por un estor souffrir,
 Mais ainc de grant orguel ne vi home joïr." [1630]
 Et respondent si home: " Bien le savés garir."
 Li rois fait ses ostages par devant lui venir.
 "Baron, dist Alixandres, rendés moi sanz faillir
 La terre Nicholas quitement a tenir,
 Tholomer la donrai, qu'a son oés la desir,
 Voiant toute ma gent l'en vodrai revestir;
 Et se vous la volez a force retenir,
 Je vous ferai ja touz ens en un feu brüir,
 Puis la reconquerrai par force et par air,
 Et ferai ceus des tours a la terre saillir." [1640]
 Et cil li respondirent: "Tout a vostre pleisir."
 Les tours li ont livrees et il les fet garnir,
 Ceus i mist de sa gent qu'il li vint a pleizir.
 [1.74] Quant Nicholas fu mors et sa grant terre prise
 Et li roys Alixandres l'ot a force conquise,
 Tholomer apela, voiant touz li devise:
 "La terre Nicholas vous ai des ier promise;
 Tenez, je la vous doing et otroi par tel guise
 Que vostre en ert touz jorz et rente et commandise.
 Quant revendrons de Perse et avrons fet justise [1650]
 De Daire et de ses hommes, qui ma terre ont malmise,
 En celle haute tour, qui est de marbre bise,
 Vous en sera el chief coronne d'or assise."
 Tholomer s'agenoille, si l'a en clinant prise,
 Et li roys l'en revest par un vert rain de Frise.
 "Sire, dient li Grieu, ne puet mieus estre mise."
 [1.75] Quant li roys Nicholas ot la teste copee
 Et Alixandres ot sa terre autrui donnee,
 Nouvelle vint au roy, qui li fu devisee,
 C'une cité avoit en icelle contree, [1660]
 La premiere qui onques fust en Grece fondee;
 De sens et de clergie ert si enluminee
 Toute la sapïence du mont i est trovee

Et par trestout le regne espadue et portee.
 Mout est noble la ville et riche et asazee,
 Et li baron dedens l'ont ainsi bien gardeee
 Ainz ne fu roys ne quens, tant çainsist haut espee,
 A qui la seignorie en fust onques donnee
 Ne sire en peüst estre seul une matinee.
 Quant l'entent Alixandres, s'a la teste crollee, [1670]
 Et dist par maltalent une reison doutee,
 Qui puis fu en maint regne chierement comparee,
 Et Orians conquis et la bonne passee:
 "Se il ne la me rendent, a pis ert effondree,
 Ou a feu et a flambe ert arse et enbrasee."
 [1.76] Li rois ot la parole, durement se merveille,
 Que la citez est telle nuz ne vit sa pareille.
 Tant forment la desirre qu'il ne dort ne someille.
 Alixandres chevauche qui por conquerre veille;
 Il ne prise sejour la monte d'une treille, [1680]
 En un jour et demi tant forment se travaille
 Venuz est a Athenes qui en la mer oreille.
 De celle part l'assieent ou li roys leur conseille.
 Iluec veïssiez tendre mainte porpre vermeille.
 [1.77] Li roys jut en son tref, qui fu de porpre bise,
 Et fet venir un clerc, dist li c'un brief escrise,
 A ceus dedens l'envoie, et li mes lor devise: [1690]
 Se la cité ne rendent, ançois que il l'ait prise,
 Et il atendent tant que li roys l'ait conquise,
 A feu grezois ardant sera arse et esprise
 Et trestoute la gent detrenchiee et ocise.
 [1.78] Mout par est fort Athene, la cité siet sor mer,
 Ne crient assaut ne tret ne lancier ne jeter;
 En mi leu de la ville ot assis un piler,
 Cent piez avoit de haut, Platons le fist lever;
 A mont a une lampe, desus un chandeler,
 Qui par nuit et par jor art et reluist si cler [1700]
 Que de toute la ville ne puet l'en riens geter
 Que les gaites ne voient qui la doivent garder.
 A une part se traient li baron et li per,
 Dolent sont d'Alixandre, qui si les veut gaster
 Et metre souz ses piez et si vilment mener
 C'onques nus hom en terre ne l'osa mes penser.
 Il vont a Aritote por conseil demander,
 Qui ert nez de la ville, prince, demaine et per,
 Et fu mestre Alixandre pour bien endoctriner.
 Les bons enseignemens du mont li volt mostrer, [1710]
 Comme il deüst les regnes par force conquerter
 Et touz ses anemis fere vers lui cliner.
 Tuit ensamble li priënt si li reuvent aler,

Que por l'amour de lui les lest en pais ester:
 "Orians est mout granz, mout a a conquerer."
 Aritotes a fet un mulet enseler;
 Et li mes Alixandre s'en prist a retourner.
 [1.79] Li messages s'en torne, qui la chartre a guerpie,
 Par la porte s'en ist seur un mul d'Orcanie,
 Trusqu'au tref Alixandre de l'aler ne s'oublie, [1720]
 Et conte la reison que il avoit oïe,
 Com la gent de la ville a Aritote prie
 Qu'il requiere Alixandre et prit sa compaignie
 Qu'isse hors de la terre, car a tort les guerrie:
 "Orians est mout granz, si a mainte partie,
 Ja ne l'avra conquis en trestoute sa vie;
 Pour ce qu'il est ses mestres, ne l'en mesorra mie."
 Quant l'entent Alixandres, touz li cors li formie;
 D'autre part s'est tornez, seur Tholomer se plie,
 [De ceus dedens li poise, qui tornent a folie,] [1730]
 Et dist aus douze pers: "Nel me conseiliez mie."
 Seur la loy leur jura et par foi lor affie
 Que ja n'en fera riens qu'Aritotes l'en die.
 [1.80] Aritote ist d'Athenes, qui de la ville ert nez,
 Et uns des senatours par son savoir clamez;
 De sens et de clergie estoit si esprouvez
 Par maintes pars du siecle en est li nons alez.
 Ainz qu'il voie Alixandre, li fu li diz contez,
 Que li roys ot plevi, et li ples est jurez
 Que de riens qu'il li prit n'ert uns mos escoutez [1740]
 Par coi tourt a Athenes a nulles sauvetez.
 Quant l'entent Aritotes, un poi s'est arrestez,
 De si parfonde chose s'est le jor porpensez
 Dont puis fu mainz païz escilliez et gastez.
 Trusqu'au tref Alixandre ne s'est mie arrestez,
 Qui ert d'or et de pierres entour avironnez;
 En son ot un charboucle qui giete granz clartez.
 Li roys le vit venir si est encontre alez
 Et ambedeus ses bras li a au col jetez;
 Dejouste lui l'assist, car mout ert ses privez, [1750]
 Et du savoir de lui ert bien enluminez.
 [1.81] Mout par fu grant la presse entour Aritotés;
 Nouvelles li demandent et de loing et de pres,
 Se cil tendront la ville ou la rendront en pes.
 Aritotes respont cortoisement après,
 Bellement par mesure, qu'il n'estoit pas crüés:
 "La cité n'est pas close de pieus jointis ne d'es;
 Li chevalier sont preu et li borjois engrés;
 Li mur furent fondé des le temps Moÿsés;
 Onques n'orent seigneur, non avront il ja mes." [1760]

Alixandres respont: "Dont lor sort uns tieus fes
 Que a toutes lor vies avront il paine adés."
 [1.82] Alixandres se jut seur un paile fresé,
 Jouste lui Aritote, son mestre et son privé;
 A merveille le tient que tant a demouré
 Qu'il ne li a le don requis et demandé
 Que Athenes eüst et pes et seürté.
 Li mestre a le conseil en autre fueil torné,
 Trusqu'a heure de nonne ont ensamble parlé.
 Lors li a Aritotes le congié demandé, [1770]
 Par son estrier monta el mulet sejourné
 Et a dit tel parole dont le roy a pesé,
 Dont puis furent maint regne escillié et gasté.
 "Alixandres, fet il, por qu'as tant demouré?
 Fai crier a tes hommes que tost soient armé,
 Assail de toutes pars ceste bonne cité,
 Met en feu et en flambe quanque avraz trové,
 Que nes puissent guerir haut mur ne grant fossé,
 N'i remaigne vaillant un denier monnéé."
 Quant l'entent Alixandres, si a le vis troublé; [1780]
 Ses deus poins fiert ensamble si a le chief crollé,
 Et dist a soi meïsmes: "Malement ai esré,
 La ville est de moi quite, tuit sont asseüré;
 Au savoir d'Aritote ai malement gardé,
 Mes mestres m'a soupris et bien m'a enchanté."
 Aritotes s'en torne et li Grieu sont monté;
 Alixandres chevauche et a forment juré
 Ja mes ne finera en trestout son aé
 Desci que il avra tout le mont conquesté
 Et de par toutes terres l'avront seigneur clamé. [1790]
 [1.83] Quant li roys ot conquise la terre Nicholas
 Et departi d'Athenes, c'onques n'i ot mur quas,
 A tant es vous un mes esrant plus que le pas;
 Li chevaus ou il sist fu estanchiez et las,
 Isnellement apelle le roy macedonas:
 "Sire, entent mes nouvelles, se toi plest, si orras."
 "Quius sont? dist Alixandres, ne me mentir tu pas."
 Et espont li messages: "Par foi ja n'en jorras!
 Tes peres t'a houni par le le conseil Jonas,
 Le seneschal de Grece, que a lui acordas, [1800]
 Et a leissié ta mere, ma dame Olimpias,
 Et veut prendre a moillier une Cleopatras,
 Nee de Pincernie, fille le roy Guias."
 Quant l'entent Alixandres, si tint le chief en bas,
 Après li demanda: "Messagiers, est ce gas?"
 "Nenil, par mon chief, sire, tout a tens i vendras.
 Li seneschaus en a ja eü set cens mars

Et cent ostoirs müez et trente chevaux gras,
 Et si dist a la gent, nel tenez mie a gas,
 Que tu n'es fuiz Phelippe ne en Grece droit n'as, [1810]
 Enchanteur t'apelle et fuiz de Sathenas."
 Lors ot li roys grant ire s'apela Filotas:
 "Li seneschaus de Grece m'a bien sanz eve ras,
 Mes ja ne coucherai seur coute ne seur dras
 Tant qu'il en ert destruiz et en un feu touz ars."
 [1.84] Quant Alixandres ot sa vergogne noncier,
 De maltalent commence son viaire a changier,
 Onques n'i volt atendre palefroy ne destrier,
 Ainz vit en mi le pré un roncín estraier,
 De plaine terre i saut, onques n'i quist estrier, [1820]
 Et a dit a ses hommes: "Penssez de l'exploitier."
 Onques descí en Grece ne se volt atargier.
 Devant le roy Phelippe es vous un mesagier,
 Qui estoit ja assis as nocés au mengier.
 "Sire, dist il au roy, ja celer ne vous quier;
 Alixandres chevauche, qui le corage a fier,
 Et a en sa compaigne maint gentil chevalier;
 Nicholas a ocis a l'espee d'acier
 Et a fet Tholomer de son regne heritier;
 Le douaire sa mere est venus chalengier. [1830]
 Sempres porrez vooir nocés bien peçoier,
 Car il voudra de cuer ceste honte vengier.
 Li seneschaus meïsmes n'i puet riens gaaignier;
 Ne donroie en sa vie la monte d'un denier."
 Quant l'entendi Jonas, n'i ot que corroucier;
 Ja feïst au mesage anzdeus les ieus sachier
 Quant en l'uis de la salle entrerent li princier.
 [1.85] Li roys entre en la salle, qui le cuer ot marri,
 Et vit par mi les tables le mengier establi,
 Lors dist par maltalent, si que tuit l'ont oï: [1840]
 "Ancui serez de moi a ces nocés servi."
 La ou il vit Jonas, ne l'a pas meschoisi:
 "Jonas, dist Alixandres, cuivers, je te deffi."
 Lors a trete l'espee, durement l'en feri,
 Que desus les espales la teste li toli.
 Cil leverent des tables, le mengier ont guerpi
 Et furent par la salle durement estourmi;
 Et cil de Pincernie sont aus armes sailli,
 Qui ensamble o leur dame estoient venu ci.
 [1.86] La salle fu troblee et meslee la gent; [1850]
 Ilueques veïssiez un grant tooillement,
 Et cil de Pincernie se deffendent forment,
 Mes li homme Alixandre les fierent durement,
 Que navrés que ocis en i ot plus de cent;

De la salle les gietent, li plusor sont sanglent.
 Quant Phelippes le voit, si mua son talent,
 Et tint en sa main destre un coutel a argent
 Et vint vers Alixandre, courant isnellement;
 Ja l'en ferist ou cors, par le mien escient,
 Quant li pié li eschapent, si chiet ou pavement. [1860]
 La veüe li troble et touz li cuers li ment,
 Quatre foiz s'est pasmez, seur le mabre s'estent.
 Quant le vit Alixandres, le cuer en ot dolent;
 Celle part vint courant, entre ses bras le prent,
 En un lit le coucha si li dist bonnement:
 "Se ne fussiez mes pere, ja n'eüssiez garant;
 Sempres fussiez venuz a mauvés jugement.
 Mout par fet grant folie hom de vostre escient,
 Qu'est venuz en eage et a guerpi jouvent,
 Qui lesse sa moillier pour dit de fole gent; [1870]
 Tieus donne mau conseil n'i gaagne noient.
 Mes prenez vostre fame et vivez bonnement
 Et metez bon escrit en vostre finement;
 De vous doivent venir li bon enseignement."
 Phelippe ot la parole, mout grant bien i entent.
 [1.87] Phelippes fu cheüs s'ot la coulor perdue,
 De la dolour qu'il ot touz li cors li tressue.
 Quant la force li fu et la santé venue,
 Puis a mandé sa gent, la grant et la menue,
 Par le conseil d'eus touz a la dame rendue; [1880]
 Vet s'en en Pincernie, la dont elle ert venue;
 Mout i ot de sa gent dampnee et confondue.
 Li roys reprist sa fame, que maint jor ot eüe;
 Cel jor fu el palés la joie maintenue.
 Alixandres li a la coronne rendue
 Qu'il ot de Nicholas, quant la teste ot perdue,
 Qui li avoit sa terre gastee et confondue;
 Tost fu par tout le mont la nouvele seüe.
 Quant Daires l'entendi, li corages li mue;
 Il en jure ses dieus et sa teste chanue [1890]
 Ne lera Alixandre le vaillant d'une alue,
 Ne guerir ne puet il en terre ne souz nue.
 [1.88] De Nicholas fu Daires dolens, qui fu ocis,
 Car il ert ses parens, ses hom et ses amis;
 Lors a pris ses mesages, ses envoia Felis:
 Si comme il tient de lui sa terre et son país
 Et il est ses hom liges por fere son servis,
 Qu'il viegne a lui en Perse por fere ses plesirs,
 En manaide d'ocirre ou de remenoir vis;
 Et mande a Alixandre, qui chadelle les Gris, [1900]
 Qu'il li rende le regne Nicholas, qu'a conquis,

Et li viegne droit fere de ce qu'il a mespris;
 Et se il ce refuse, d'une chose soit fis,
 Ja ne verra passer un mois et quinze dis.
 Pour ce que il est enfes et de folie espris,
 Li envoie semblances, si com je vous devis,
 Un frain, une pelote, une verge de lis,
 Et un escing d'argent ou avoit ens or mis,
 Et un brief pour espondre li a avoec tramis.
 [1.89] Daires fist ses semblances Alixandre envoyer, [1910]
 La verge et la pelote et le frain a destrier
 Et un escing d'argent qui touz fu plains d'or mier.
 La verge li envoie pour son cors chastier,
 Pour ce que il est enfes et a talent legier;
 Ne se doit par outrage folement essaucier,
 Par quoi le recouviegne ledement trebuschier;
 La pelote reonde pour lui esbanoier,
 Que encore se doit jouer et foloier,
 Et ne port si grant fes qu'il ne puisse charchier;
 Le frain pour lui tenir, et l'escing plain d'or mier, [1920]
 Pour ce que il se doit vers lui humelïer,
 Que Daires est ses sires, si se doit souploier
 Et touz jorz obeïr et servir et prier
 Et contre son plaisir ne doit mie resnier.
 L'endemain sont de Perse meü li mesagier;
 Onques descî en Grece ne se vodrent targier.
 [1.90] Cel jour fu Alixandres de la cité issus;
 Avoec lui Tholomer et Cliçon et Caulus,
 Perdicas et Filotes, a leur cols leur escus,
 Et tuit li autre per, dont nus n'est esperdus [1930]
 De servir leur seigneur de toutes leur vertus;
 O euls ala Phelippes, li vieus et li chanus,
 Es prez souz la cité est ensamble venus.
 Iluec avoit un bois, plus biaux ne fu veüs,
 De pins et de loriers et d'oliviers foillus;
 La fu li mestres tres Alixandre tendus;
 Et par la praerie mil paveillons menus,
 Tant aïgle et tant pomel i ot a or batus.
 Alixandres les voit, li cuers li est creüs.
 Il en jure ses dieus, Jupiter et Caüs, [1940]
 Que pour plaine la tour qui fu Semiragus
 Du plus fin or d'Arrabe qui onques fust fondus
 Ne lesseroit il mie, ne ne metroit il jus,
 Qu'il ne voise seur Daire, aïnz qu'avrils soit venus.
 Se Perse ne li rent, mors est et confondus.
 [Dedens son tref s'asist seur un païle bofus;]
 Entour lui s'arresterent dis mile de ses drus.
 [1.91] Du tref roy Alixandre vous dirai la feture.

Il ert et granz et les et haus a desmesure;
 L'estache en fu d'ivoire a riche entailleüre, [1950]
 Et quant elle estoit droite, ja n'i paroit jointure.
 Li festes estoit d'or, touz a noieleüre;
 A pierres precieuses estoit la bordeüre;
 Deus pomiaus i a tieus qui sont bon par nature,
 Li uns est d'un charboucle, qui luist par nuit obscure,
 Li autres d'un topasce, la pierre est clere et pure
 Et trempe du soleil la chaleur et l'ardure.
 Or vous dirai après quieus est la couverture;
 Il n'ot onques meilleur tant com li siecles dure,
 Car tuit li quatre pan furent fet sanz costure. [1960]
 [1.92] De fin or espanois furent fet li paisson,
 Et les cordes de soie, qui tendent environ,
 Et ot avoec mellee plume d'alerion;
 Arme nes puet trenchier, tant i ait acier bon.
 Li quatre pan sont fet chascuns d'une façon;
 L'uns est plus blans que nois et plus clers d'un glaçon,
 Li autres de travers est plus noirs que charbon,
 Et li tiers fu vermeus, tains de sanc de dragon,
 Et li quars fu plus vers que fueille de plançon.
 La roïne le fist, ce dist en la leçon, [1970]
 Qui par sa grant biauté deçut roy Salemon,
 Du poil fu d'une beste qui salemandre ot non,
 Touz temps se gist en feu, n'a autre guerison,
 Ne ja ne porra feus ardoir le paveillon;
 Et quant il est ploiez et mis en quareillon,
 Sel met l'en en l'eschale d'un seul oef de grifon.
 [1.93] Li huis dou paveillon fu fes d'autre maniere,
 De la pel d'un serpent qui fu grant et pleniere;
 Elle est et blanche et clere plus que nulle verriere,
 Pour la bonté qu'ele a doit elle estre plus chiere, [1980]
 Car se nus hom l'aproisme, neïz fame legiere,
 Qui port entoschement, torner l'esteut arriere;
 Sempres se clot et serre, com fust une maisiere;
 Après devient obscure et giete tel fumiere
 Com fet desus le feu une boillant chaudiere;
 Celle espoisse li dure une louee entiere.
 Plus de mil mars d'argent en valoit la charniere;
 Sa mere li donna, mes ce fu par priere.
 [1.94] Seur le feste du tref, ou sont li dui pommel,
 Par mout grant maiestire ot assis un oisel [1990]
 En samblance d'une aigle, nus hom ne vit tant bel;
 La roïne le fist c'on clamoit Yzabel.
 Li pié sont d'äymant, entaillié a cisel,
 Et s'i ot sanc de buief, pres de plain un tonnel,
 Et tient entre ses piez de fer un grant quarrel;

Et li cors et les elles et li mestre coutel
 Furent tuit de fin or et cuisses et mustel;
 Et la plume d'argent, entailliee a neel;
 Les pierres precieuses valent mieus d'un chastel;
 Et la queue fu fete de l'os d'un poissoncel [2000]
 Qui n'est mie plus granz que le cors d'un agnel;
 Si ne fist onques Dieus nul dromont si isnel,
 Qui tant fust escueillis a val le vent novel,
 Qu'il ne face estre quoi, sel claiment escuinel.
 Ens el bec dedevant avoit un chalumel;
 Quant li vens se fiert ens, adont chante si bel,
 Que mieus vaut a oïr que flagol ne frestel.
 [1.95] Tieus est li tres defors com je vous ai conté;
 Or vous raconterai par dedens la biauté.
 El premier chief devant fu pains li mois d'esté, [2010]
 Tout si com li vergier verdoient et li pré
 Et tout si com les vignes florissent et li blé.
 Li douze mois de l'an i sont tuit devisé
 Einsi comme chascuns nonme sa poësté;
 Les heures et li jor i sont tuit aconté;
 Li cieus et li planete, li signe, tuit nonmé;
 Li soleus et la lune i giete grant clarté
 Et li ans est desus pains en sa maiesté;
 Par letres sus escriptes i est tot ce mostré.
 [1.96] En l'autre pan après, sel volez esgarder, [2020]
 Verrez la mapemonde enseignier et mostrer,
 Ainsi comme la terre est enclose de mer
 Et com li philosophe la vodrent deviser
 Et metre en trois parties que je sai bien nonmer:
 C'est Aise et Eürope et Aufrique sa per;
 Les montaignes, les flueves, les citez a conter,
 Par letres sus escriptes, i poëz tout trouver.
 Alixandres li roys i veut mout esgarder
 Quant il gist en son tref pour son cors deporter,
 Li douze per o lui por son sens escouter; [2030]
 Et quant porpensez s'est, si commence a jurer
 Que mout fist Dieus peu terre por un homme honorer;
 Deus tans en poïst bien uns preudon gouverner.
 Et puis a dit après: "Se longnes puis durer,
 Seur tant comme il en est vodrai je seignorer."
 [1.97] En la tierce partie estoit escrit comment
 Herculés fu conçuz et nez premierement;
 Quant il jut en son lit, petis et de jovent,
 Et Juno sa marrastre, qui le haoit forment,
 Deus serpens li tramist por envenimement; [2040]
 Quant Herculez les vit, ses prist par maltalent,
 Aus poins que il ot gros les ocist esraument;

Puis conquist il la terre descî en Oriënt,
 Iluec mist il ses bornes voiant toute sa gent.
 Tout ce mostre la letre, se l'estoire ne ment.
 En la fin de l'estoire i est confetement
 Le ciel tint a son col par son enchantement.
 Alixandres li roys i esgarde souvent,
 Et quant l'a esgardé, jure son serement,
 Se il puet longnes vivre, qu'il fera ensement: [2050]
 Il metra les siens hommes par devers Oriënt.
 [1.98] En la quarte partie, si com li tres define,
 Est escrite l'istoire d'Elaine la roïne:
 Si con Paris pour li en ala a Messine,
 Et li roys Menelaus en ot en sa seisine
 Un escu a peinture, a forme leonine,
 Ainsi comme la dame en vint en la santine
 Et chevaucha la mule qui n'estoit pas frarine,
 Et Paris l'en mena en sa nef par ravine.
 Roys Menelaus en ot grant duel et grant corine, [2060]
 O sa gent en ala seur Troie en la marine.
 Protheselaus li preus en fu mors a l'estrine;
 Dis anz i fu li sieges, la letre le devine,
 Puis fu toute livree a duel et a gastine.
 Alixandres li roys esgarde la courtine
 Et dist aus douze pers: "Cist furent de morine (l. m¹orine);
 De la cité de Perse ferai autel ruïne
 Et ferai dou roy Daire autretel decepline,
 Qui damoisiaus a fez des sers de sa cuisine."
 Ne volt ore plus dire, a tant sa raison fine. [2070]
 [1.99] Quant li mesage Daire orent l'ost sorvetüe,
 Virent la praerie toute de Grieus vestue;
 Mainte enseigne de paile virent a or batue
 Et la tente le roy devant le brueil tendue,
 Aus pommiaus et a l'eigle l'ont tres bien conneüe.
 Tres par mi leu de l'ost ont leur voie tenue;
 Devant le tref le roy fu la place vestue,
 Mout i ot chevaliers et autre gent menue.
 Chascuns est descendus de la mulle crenue
 Si l'a a l'escuier par la regne rendue. [2080]
 Zaröés va avant, a la teste chanue;
 Quant il vit Alixandre, de riens ne le salue,
 Mes fierement li dist parole aperceüe.
 [1.100] "Alixandres, fet il, tu te fes roys clamer,
 Mesages sui roy Daire, si vieng a toi parler;
 Ses hom deüsses estre et lui treü donner,
 Ou fols ou hardis es, qui ce osas pensser
 Qu'as ocis Nicholas, que tant pooit amer.
 Et se tu me veus croire, va li merci criër

Touz deschauz et nus piez, garde n'i demourer, [2090]
 Ses hom devenras liges por s'amour acheter
 Et rendras son treü, s'il nel veut pardonner."
 Alixandres l'escoute, ne daigna mot sonner,
 Par mautalent l'esgarde, prist soi a porpensser;
 Puis apela Cliçon, Caulun et Tholomer;
 Perdicas et Lyoines, Antioqus li ber
 Et Filotes et Sanses et tuit li autre per
 Des mesages roy Daire se pristrent a gaber.
 Dient a Alixandre: "N'avon que demourer,
 Mes alons deseur Daire ains qu'avrils puisse entrer." [2100]
 [1.101] Es vous venus en Grece les mesages esrans,
 Et trouverent le roy et ses homes jouans
 Pour l'amour Alixandre, qui si est conquerans
 Que des autrui avoires fet ses hommes manans.
 Li dui message tezent et li tiers fu parlans:
 "Phelippes, ce te mande Daires, li roys persans,
 Qu'a lui vieignes en Perse pour fere ses commans;
 De toi et de ta terre si fera ses talens,
 Ne t'en lera tenir que metes en tes gans;
 Alixandres meïsmes puet bien estre sachans, [2110]
 Se Daires le puet prendre, ja ne verra deus ans."
 Quant Phelippes l'entent, iriez fu et dolans;
 Li roys bessas la teste, si fu mus et pensans,
 Ne feïst un bon ris pour un mui de besans,
 Car contre le roy Daire ne fu onques regnans,
 Neïz aus mesagiers ne fu mot responnans.
 Quant ce vit Alixandres, ne fu mie teizans,
 Les mesages apelle, si dist en son romans:
 "De ma part dites Daire, qui sire est des Persans,
 Que mes peres nel prise ne de lui n'est tenans, [2120]
 Ne il n'est ses amis ne je ses bienvoeillans.
 Ja ançois ne verra quatorze mois passans
 Que metrai en sa terre cent mile combatans;
 Perse voeil que soit moie et trestouz Orians,
 Je claing la seignorie des petis et des granz."
 Lors veïssiez les Griens esbaudiz et joians
 Et par toutes les tentes par tropiaus conseillans.
 Ce dist li uns a l'autre: "Mes chevaus est corans
 Et mes haubers serrez et mes espieus trenchans;
 Qui or n'ira en Perse touz soit il recreans." [2130]
 Neïz li roys Phelippes en fu liez et joians.
 [1.102] Li mes ont bien Phelippe leur message noncié,
 Tres devant Alixandre se sont ajenoillié;
 Pour ce que il le voient et pensif et irié,
 Ne gardoient mes l'eure que tuit fussent jugié
 Et livré a martire, ocis et depecié.

Le present li donnerent, com lor avoit charchié
 Daires li roys de Perse, et ont le brief baillié;
 Et il l'a receü et le seel brisié
 Et par mout grant estude leü et reversié, [2140]
 Et connut pour coi Daires li avoit envoié:
 Pour ce que il est enfes l'a ainsi foloié,
 Que par itant le cuide avoir mout esmaié.
 Li roys se porpenssa si a le vis drecié;
 Les mesages apelle si a le brief ploié.
 [1.103] Quant li roys ot penssé, si se dreça a mont;
 Les mesages apelle, sagement leur respont,
 Quanque Daires manda oiant touz leur espont:
 "Vostre roys est mout sages, qui set quanque cil font;
 Semblances m'a tramises qui a voir torneront, [2150]
 De mout grant sapience a veü en parfont.
 Ceste pelote moustre que conquerrai le mont
 Ainsi comme la mer l'enclot tout en reont;
 Les verges senefient, qui ci ilueques sont,
 Que doi batre touz ceus qui me contresteront;
 Et li frains senefie que tuit de moi tendront;
 Et li ors de l'escring que mi homme seront
 Plus haut que tuit li autre et touz jorz m'ameront.
 Dites Daire meïsmes, s'avoec eus ne s'apont
 Et a moi n'est aclins, ainsi com je vous cont, [2160]
 Par les ieus dont vous voi, qui me sieent el front,
 Ja ne çaindrai espee, se primes nel confont."
 Li mes ont grant merveille de ce que oïont,
 Congié prenent si montent, en Perse s'en revont,
 Si ont Daire conté tout ce que apris ont.
 [1.104] Li mes vienent en Perse si ont Daire redit
 Ainsi comme Alixandres a leü son escrit
 Et par con fete guise son affere a desdit,
 Et dist que pas ne l'aime, gart qu'en lui ne se fit.
 Se Perse ne li rent et le regne d'Egyt, [2170]
 Ne li voudra lessier chastel ne borc ne cit,
 Ne ja tant qu'il l'ait mort n'avra mes nul delit:
 "Ne ses peres ne tient riens de vous a son dit."
 Quant ce ot li roys Daires, de maltalent sorrit,
 Vers terre s'enclina, si penssa un petit,
 Et dist que po se prise se par temps ne l'ocit.
 Mes li roys Alixandres n'a talent qu'il s'oublit,
 Tout le regne de Grece a semons et banit,
 Que onques n'i remaigne le grant ne le petit
 Qui puisse porter armes, li uns l'autre convit, [2180]
 Chascuns en viegne en Perse sus Daire, sel deffit.
 N'avra en sa compaigne si povre homme, ce dit,
 N'ait vestu drap de soie ou bliäut de samit.

Au quint jor mut li roys, n'i ot plus de respit,
 Et Phelippes remaint, qui mout aime delit
 Et deduit de riviere et repos de bon lit.
 Andui s'entrembrachierent, plorant sont departit
 Par tel eür qu'ains puis li uns l'autre ne vit.
 [1.105] Meüz est Alixandres et sa gent est montee;
 Belle fu sa compaigne quant ele fu joustee. [2190]
 La terre au roy Phelippe a toute trespassee;
 En autre plus diverse est l'ost de Grece entree.
 Li roys garde a senestre par une matinee,
 Une roche a veüe qui est et longe et lee
 Et haute vers le ciel et par nature nee;
 D'une part la clooit uns bras de mer salee
 Et de l'autre l'avoit uns fluns avironnee.
 La gent qui la converse est si asseüree
 Ne doute force d'omme qui soit d'autre contree.
 Alixandres la voit, si l'a aus Griens mostree; [2200]
 Pour veoir la merveille s'i est l'ost arrestee.
 Un paisans d'iluec a tres bien escoutee
 La reison que li roys a a sa gent mostree,
 Qu'ains mes ne fu el mont tel fermetez trouvee;
 Il a dit tel parole qui Alixandre agreee:
 "Sire, la haute roche que tant as esgardee,
 C'est une fermeté qui mout est redoutee;
 Li sires en destraint toute ceste contree,
 Sous ciel nen a richece n'i puisse estre trovee."
 "Di, va, dist Alixandres, a il porte n'entree?" [2210]
 Li hom li respondi: "Devers celle valee
 A une estroite voie par tel sens compassee,
 Se toute la gent Dieu ert desous aünee,
 Par si que par cent hommes fust desseure gardee,
 N'i porroient monter une seule tezee;
 Ne doute nul assaut de nulle gent armee."
 Alixandres respont: "Bien la m'as devisee;
 Ja ne m'en tornerai si me sera livree."
 [1.106] Li roys prist un mesage qui mout ert ses privez;
 A la roche l'envoie et cil i est alez [2220]
 Et manda a celui qui sire en ert clamez
 Que la roche li rende, dont tant est redoutez,
 Et deviegne ses hom et ses liges chalez;
 Et se ce ne veut fere, sempres soit deffiez:
 "Ja ne m'en partirai si ert desheritez."
 Et cil vint a la roche quant du roy fu sevez;
 O le branc de s'espee les a tant acenez
 Que li sires le vit si s'en est avalez.
 Li mesages parole, qui fu preus et senez:
 "Di, va, qui est li sires et comment est nonmez [2230]

Qui garde ceste roche et si haut est montez?"
 Et li dus respondi, qui fu preus et menbrez:
 "N'i a mes que nous deuz, pres de vous le veez."
 "Sire, dist li messages, oiez et entendez:
 Alixandres vous mande, qui est roys couronnez,
 Que li rendez la roche et ses hom devenez,
 Se ce ne voulez fere, sachiez, c'est veritez,
 Ja ne s'en tornera si serez afamez;
 Ne vous porra guerir roche ne fermetez."
 Et li dus respondi: "De folie parlez. [2240]
 Quius hom est Alixandres et de quel terre nez?"
 "Sire, de Macidoine est li plus redoutez
 Qui seïst encore onques desus destrier armez,
 Et a en sa compaigne tant de Griens assemblez
 Sous ciel n'a homme en terre, s'il est a lui mellez,
 Se il vient en bataille, ne soit espoëntez."
 "Par mon chief, dist li dus, ançois est fols provez;
 Ne donroie en sa force deus deniers monneez.
 Mains avoies a riche homme ert ainz a mont portez
 Dont noz ferons avant toutes noz volentez. [2250]
 Je n'ai soing d'Alixandre ne de ses nobletez.
 Quius gens a il o lui? comme est chascuns formez?
 Je ne dout nulle riens, tant sui asseürez,
 Ne mes ire du ciel et anges empaneiz."
 Et respont li messages: "De fors escuz bouclez
 Ont elles li Grezois, et de brans acerez."
 [1.107] Li dus ot le message parler en tel mesure:
 Qu'Alixandres est fiers et sa gent est si dure;
 Se a lui ne se rent, trestouz ses dieus en jure
 Ja nel porra guerir chastiaus ne fermeüre. [2260]
 Dont respont au message et dit sanz couverture:
 "De l'orgueil Alixandre ne du dangier n'ai cure.
 Quant je sui la a mont, tant est ma gent seüre
 Ne crieng de ça a val nulle mesaventure.
 Va t'en a ton seigneur si li di a droiture
 Que ne pris son dangier une pomme meüre;
 Ne feroie por lui seul itant de feture
 Qu'en perde mon dormir un po de nuit obscure."
 Li mes tint un des las de s'entasseleüre;
 Quant il l'ot deffié, si s'en vet a droiture. [2270]
 [1.108] Li mes revint en l'ost et a conté le roy
 Ce que li dus li mande, l'orgueil et le bufoi,
 Qu'il ne l'aime ne prise, ne home de sa loy,
 "Ne vaillant deus deniers ne feroit il pour toi;
 Ne ja n'en lessera son dormir en recoi."
 Alixandres respont: "Par le Dieu ou je croi
 Ja ne m'en tornerai si ert en grant effroi;

Ne li lerai de terre ou il couchast son doi."
 Les douze pers de Grece apelle en un chaumoi,
 Et chascuns d'eus li donne bon conseil endroit soi. [2280]
 Alixandres parole hautement sanz recoi:
 "Vous, jeune chevalier de pris et de dosnoi
 Qui avez belles armes et le riche conroy
 Et desirrez souvent et guerres et tournoy,
 Qui premiers montera sus la roche que voi
 Et de ma riche enseigne mosterra le desploi,
 Dis mars d'or li donrai, ce li plevis par foy,
 Li autre en avra nuef et li tiers uit, ce croy,
 Li quars set, li quinz sis, li sistes cinc de moi,
 Li sesmes en ait quatre, a l'uisme en erent troi, [2290]
 Li nuesmes en ait deus, le disme un en otroi,
 Et chascuns de ces autres en avra un par soi,
 Pour ce qu'il m'abatront du duc le grant boufoiy."
 [1.109] Quant li Grieu entendirent que li roys leur devise,
 Qu'il avront la richece que il lor a promise,
 Le jour en veïssiez mainte brongne en dos mise.
 Portent hiaumes d'acier et bons haubers de Pise
 Et bons fers por monter et crous de mainte guise;
 Et par devers la mer encontre la falise
 Gravissent li Grezois a mont la roche bise; [2300]
 A fers et a crochieres percent la roche alise.
 [1.110] Ainz que li Grieu montassent, lor commanda li roys
 Que se il pueent prendre la roche et le defois,
 Que sempres i mostrassent une enseigne a orfrois;
 C'est la seue demaine au fer arrabiois;
 A ce porra connoistre ceus de sa gent li roys.
 De la devers l'entree, par devers le marois,
 Les ira assaillir a mil Macedonnois,
 Pour fere ceus descendre qui sont la sus son pois,
 Et a tel chose entendre dont leur ira sordois. [2310]
 Et li homme Alixandre i monterent ançois,
 Car il sont ainsi fort et devant et detrois
 Que ne leur forferoient dis mile homme un balois,
 Par si que de leur hommes i eüst deus ou trois.
 Alixandres meïsmes, li preus et li cortois,
 Le jour emprist tel chose par ire sanz gabois
 Dont a mout grant folie le tindrent li Grezois.
 [1.111] Quant li Grieu assaillirent a la roche a cel jor
 Pour fere ceus descendre qui erent plus hautour,
 A dars et a saietes traient envers les lor; [2320]
 Et cil se descendirent contre val li plusour
 Pour esgarder les Grieus qui sont de tel fieror.
 Alixandres s'en torne, comme hom de grant valour,
 Et vint la ou cil montent, qui sont de tel labour,

Dont li mieudres ne prise tout le monde une flor.
 Quant li uns en descoche, ce content li auctor,
 Vint ou trente en cravente contre val a dolour.
 "Haï! fet Alixandres, Greu et Macedonour,
 Com vous faiz hui entrer en doloreus labour!
 Or pouëz vous bien dire qu'avez mauvés seignor; [2330]
 Se ne vous faiz aïde, ja n'aie je honour."
 A ceus qui sont cheoit tolt les cros par irour,
 Puis se prent a la roche pour monter en la tour.
 [1.112] Quant li roys se fu pris a la roche monter,
 A tant es vous poignant Cliçon et Tholomer,
 Licanor et Filote et tuit li douze per;
 A force le retient si l'ont fet retourner,
 Ou il vousist ou non, le couvint avaler.
 "Sire, ce dist Caulus, mout fetes a blasmer;
 Ja estes vous venus por conquerre outre mer [2340]
 Et vous voulez ja ci en cest païz finer."
 "Baron, dist Alixandres, pour Dieu, lessié me aler,
 Je voi morir mes hommes, devant moi craventer;
 Se je n'apreng o euls les maus a endurer,
 Comment se porra dont nus hom en moi fier?"
 [1.113] Li Grezois ont monté le roy sor son cheval,
 Puis viennent a l'entree ou cil tienent estal,
 Gietent lances et traient et font grant batestal.
 Cel jor i ot jeté mainte pierre poignal;
 Et cil se descendirent trusque vers le portal, [2350]
 Mes li Greu les engignent com Renars fist le jal
 Qu'il seisi par le guele quant il chantoit jornal.
 Et li Grezois porprenent la roche et le costal;
 Ja furent sus monté quatre mile vassal,
 Qui traient les espees, si escriënt: "Royal!"
 Et moustrent l'enseigne leur seigneur natural;
 Ceus qu'il truevent a mont ferirent communal
 Et ocïent et trenchent et craventent a val.
 Alixandres les vit, qui sist seur Bucifal,
 Et a dit a ses hommes: "Fet sont nostre jornal; [2360]
 Ahi! baron de Grece, tant par estes loial!"
 [1.114] Quant li dus de la roche vit sa gent decopee,
 Prise, morte et ocise et contre val jete,
 Et sa roche perdue, que maint jour ot garde,
 Et l'enseigne Alixandre vit contre mont levee,
 Lors maudit les Grezois et toute lor contree,
 Qu'ains mes tel felonnie ne fu el mont trovee;
 Et vint a Alixandre contre val a l'entree,
 Merci li a crié et veut rendre s'espee;
 Mes li roys en jura sa teste couronnee [2370]
 Que ja ne sera prise s'ert sa mort devisee;

Si comme il a touz jorz l'autre gent demenee,
 Prise, morte et destruite et leur terre gastee,
 La merci qu'il ot d'eus est seur lui retournee.
 A meïsmes la roche qu'il avoit tant amee
 L'ont pendu tout armé, puis s'en est l'ost alee.
 Mes avant ont li Grieu si la roche atornee
 Conques n'i remest hom, tant par fu desertee.
 [1.115] Quant la roche fu prise et li dus fu pendus,
 Alixandres chevauche, qui de Grece est meüs. [2380]
 [Mout fu belle la route des granz et des menus;]
 Il ot en sa compaigne soissante mile escus.
 Aus devises des terres, quant du regne est issus,
 Au pié d'une montaigne leur est uns fluns parus,
 Une eve belle et clere, sans fanc et sans palus;
 Mes ainz que fust li vespres aprochiez ne venus,
 Dejouste le rivage orent leur trez tendus;
 Mes l'ardour du soleil et li chaus qu'est creüs
 Et la toufeurs de l'air les a si confondus
 Que n'i pooit guerir nus hom qui fust vestus. [2390]
 Iluec en veïssiez tieus set mile venus
 Qui se fierent en l'iaue, que jeunes que chanus.
 Dejouste le rivage est li roys descendus,
 Pour le chaut touz armez s'est en l'eve ferus.
 De la froideur du flun, dont clers estoit li rus,
 Et du chaut du soleil, qui seur eus est cheüs,
 Li est li sanz ou cors troblez et commeüs;
 La parole li faut et li roys devint mus.
 Or ert mout granz damages se ainsi est perdu.
 [1.116] La grant froidour de l'eve qui sordoit de fontaine [2400]
 Et l'ardour du soleil qui au flun les amaine
 A si seurpris le roy que seur lui nen a vaine
 Qui de sanc seelé ne soit seuronde et plaine;
 La parole li faut et li roys pert l'alaine.
 Tholomer le regarde, qui sa coulor vit vaine,
 Cliçon en apela et Perdicas açaine,
 Par les bras l'a seisi, o ices (l. icés) deus l'en maine,
 Ne veut que l'ost le sache ne qu'entour lui s'agraine
 Ne que la gent de pres le die a la foraine.
 En son tref le couchierent seur un drap de Miçaine. [2410]
 Li douze per regretent Alixandre le maine:
 "Ahi! tant mar i fustes, bons roys de Macedoine;
 Par foi, honor de Grece, mout estes hui soutaine.
 Or remaint a conquerre mainte terre lointaine."
 Environ pleure l'ost une louee plaine;
 La veïssiez pasmer quatre mile en l'areine
 Et rompre maint chevel noir et blanc comme leine;
 [Onques mes n'ot el siecle si grant duel d'un chateine.]

Uns mes se part de l'ost desus un dromadaine,
 Qui vait Daire noncier de l'exploitier se paine. [2420]
 [1.117] Li mes est ou chemin, de l'esrer ne s'oublie
 Tant que il vint a Daire a la chiere hardie.
 La nouvelle li conte, qu'a volentiers oïe,
 Du malage Alixandre, en qui il ne se fie:
 En l'eve de Nidele a pris l'enfermerie
 Dont ja mes ne guerra en trestote sa vie.
 Et conte la dolour, comme l'ost pleure et crie;
 Et regretent le roy et sa grant cortoisie,
 Son sens et sa prouece et sa chevalerie.
 Tieus mile en vit pasmer en mi la prairie, [2430]
 Se Alixandres meurt, que lor joie est fenie.
 Quant Daires l'entendi, ne puet müer ne rie;
 De la joie qu'il ot touz ses dieus en mercie.
 Li roys se porpenssa d'une grant felonnie:
 Pris a un mesagier sel tramist a Carie,
 Qui guerist Alixandre, qu'a ses herbes l'ocie;
 Tant li donra rouge or et pailles d'Aumarie
 Nes porroient porter quatre mul de Sulie.
 Son bras li mist au col, priveement li prie;
 Mes ce plet couvient fere sagement sanz folie. [2440]
 [1.118] Li mez se part de Daire, congié prent si s'en va,
 [Trusqu'a l'ost Alixandre onques ne sejorna;]
 A la guise grezoise sagement s'atorna,
 En la tente le roy si coiement entra
 Qu'ains n'i fu conneüz d'homme qui l'esgarda;
 Lez le mire s'acoste, un petit le bouta,
 D'un des eus li fet signe, d'autre part se torna
 Et dist: S'en lui se fie, son preu li noncera,
 Ja, s'il veut, en sa vie mes povres ne sera.
 Et cil li respondi: Ja mar en doutera, [2450]
 Coitement est venus et coites s'en ira,
 Or die que li plest et il l'escouterà.
 De par le roi de Perse li glous le salua,
 En l'oreille li dit, sagement li conta:
 S'il ocit Alixandre, riche homme le fera,
 Quatre sonmiers charchiez de fin or li donra
 Et cent pailles de soie des meilleurs que il a,
 Encontre toute gent quitement le tendra.
 Cil entent la parole, une piece pensa,
 Fremist et devint pales et de paor trembla, [2460]
 Coiement li respont que son pleizir fera;
 Se cest avoir li donne, voirement l'ocirra
 A ses herbes meïsmes, ja uit jorz ne vivra.
 Or penst Dieus d'Alixandre! cil mal conseil pris a;
 Se ses sens nel retient, couvoitié le vaincra.

[1.119] Li mes se part dou tref et prent congié du mire,
 Et cil a pris ses herbes, dont le roy dut ocirre,
 Et vint a Alixandre, qui sa dolour empire.
 La destrece du mal le fet palle et aflire,
 [La char taindre et nercir, le sanc et les os frire.] [2470]
 Sa gent est entour lui, qui mout pleure et soupire;
 Sachiez n'i a celui qui ait talent de rire.
 Li mires le regarde, en son cuer prist a dire
 Qu'or ocirra celui qui des autres est sire
 Et dit que touz li mons se doit vers lui afflire:
 "Ce est li mieudres hom que nus puisse descrire.
 Se je fais de cest roy por avoir homecide
 Et destrui ceste gent et depart cest empire
 Et pour seulement moi faiz tel gent desconfire,
 Bien devroit l'en mon cors livrer a grant martire. [2480]
 Li roys pour lui guerir m'a fet d'autres eslire;
 Se par moi est destruis, Dieus me puisse maudire!"
 [1.120] Mout fu sages li mires, qui si bien se conseille,
 Ne veut por couvoitise fere si grant merveille
 Qu'il ocie celui qui tout le mont esveille,
 Mes de lui bien guerir tant forment se traveille
 Qu'Alixandres menjue et dort bien et soumeille,
 Et revient sa coulor blanche, fresche et vermeille;
 Et li Grieu mainent joie, qu'ains ne fu sa pareille,
 Car ne sevent sanz lui la monte d'une treille, [2490]
 S'Alixandres meïsmes nes conduit et conseille;
 Autresi les chadelle comme paistre s'öeille.
 [1.121] Mout par fu granz la joie quant li roys fu gueriz;
 Lors veïssiez par l'ost les Grezois esbaudis,
 Qui cuidoient du roy ses termes fust fenis.
 Les paveillons destendent si ont les tres cueilliz,
 Charchent muls et cameus et bons chevaus corsiz,
 Et font mener en destre les destriers arrabiz,
 Portent escus et lances a fers d'acier forbis
 Et enseignes de paille, de porpre et de samis, [2500]
 Et trespasent le regne de Bile et de Lutiz.
 Ceus qui a lui se tornent a li rois recueilliz
 Et ceus qui le refusent a mors et desconfiz,
 Les felons orgueilleus a destruis et affliz
 Et les citez a prises et les palés voltiz.
 Alixandres meïsmes les a des siens garniz,
 Les granz avoires en a aus Grezois departiz.
 Les bachelers du regne, les jovenciaus esliz,
 Qui ont larges espauls, les poins gros et massiz,
 Ceus en maine li roys ses a o lui cueilliz. [2510]
 Tant leur donne Alixandres, si les a asoupliz,
 Que mieus aiment sa paine que nus autres deliz;

Ne ja mes en sa vie ne sera d'euls partis,
 Ainz en porra bien estre honorez et servis.
 Alixandres chevauche, qu'en est chadius et guis;
 Et font l'arriere garde Tholomer et Danz Clins.
 A l'issue du regne, a l'entree d'Esliz,
 Truevent une merveille ques a touz esbahiz,
 Un tertre aventureus, de maint homme est haïz,
 Qui ert et haus et lons et de deus pars closis [2520]
 De vaus granz et parfons, perilleus et soutiz;
 Qui charroit la dedens bien porroit estre fiz
 Que ja mes n'en istroit, ainz i seroit porriz.
 Or oiez la merveille dont li mons est garniz:
 Quant couars hom i entre, sempres devient hardiz,
 Touz li pires du mont i est si esbaudiz;
 Et li preus i devient ainsi acouardiz
 Et mauvés de corage et de fez et de diz
 Touz li mieudres i est fols et avilaniz;
 Et li destriers de garde mornes et alentiz [2530]
 Et li roncins mauvés desreez et braidiz.
 De maint homme a esté icist tertres maudiz.
 [1.122] La merveille du tertre, ce treuve l'en lisant,
 Est escrite en un livre d'une istoire mout grant.
 Li homme de la terre l'aloient eschivant;
 Li païsant l'apellent le tertre recreant.
 Or oiez la merveille que li Grieu vont fesant:
 Com plus montent le tertre, plus vont acouardant,
 Li premier qui estoient a la pointe devant,
 Qui tant soloient estre preudomme et combatant, [2540]
 Ont si de mauvestié perdu leur hardement,
 Com plus vont et plus montent, plus se vont repentant.
 Li retorners arriere lor vient mout a talent,
 Mes li mons ne leur leisse, qui les vet destraignant.
 Quatre s'en desrochierent, onques n'orent garant,
 De la coste desrochent, a val vont perillant,
 Onques puis n'en issirent en trestot lor vivant;
 Li autre se chastient, si se vont aroutant,
 Et li mauvés aloient les bons reconfortant
 Et dient aus preudommes: "Tuit estes recreant; [2550]
 Nous conquerrons la terre descî en Orient."
 Li bon destrier de garde i aloient laschant
 Et par mi la montaigne li plusor estanchant,
 Et li roncî mauvés, desreé et saillant,
 Henissent et regibent et font noise si grant
 Que cil qui desus sont vont souvent trebuchant;
 N'a si preudomme en l'ost qui ne s'en espoënt;
 Alixandres meïsmes s'en vet mout merveillant.
 [1.123] Li val furent parfont et li tertres agus,

Qui a fet mains pseudommes dolens et irascuz; [2560]
 Mout ot li roys grant ire ainz qu'il en fust issuz.
 Au devaler du tertre treuvent uns prez herbus
 Et un brueil d'oliviers nouvellement fueilluz;
 Iluec rest a chascun ses corages venuz
 Et li cheval de garde recuevrent leur vertuz.
 Ilueques veïssiez les roncins recreüz,
 Qui avoient el tertre trovees tieus vertuz.
 Grant joie ot Alixandres quant les Griens ot veüz,
 Seur l'erbe qui fu fresche est a pié descenduz;
 Pour le repos qu'il veulent i ont leur trez tendus. [2570]
 Alixandres meïsmes en apela ses drus;
 Dient de la merveille ques a si deceüz,
 C'onques mes en cest siecle ne fu tieus ples veüz.
 [1.124] La merveille du mont fu le jor mout descrite.
 En une terre entrerent qu'est de totes eslite;
 Trois jorz demeure l'ost et repose et delite,
 Li sejors que il font durement leur profite.
 Toute la gent du regne qui en la terre habite
 Vient contre le roy, la grant et la petite.
 Qui ot chier drap de soie, paile ne carepite, [2580]
 Bonnement li presente, mout est vers lui afflite,
 Et li roys mout les aime et a grant chose dite,
 Qu'encontre toute gent ert mes la terre quite.
 Une ymage de pierre trouverent en Eslite,
 Qui por Neptanabus i fu fete et escrite.
 [1.125] Cil d'Elite reçoivent le roy de bon corage,
 Volentiers le servirent et lui et son barnage;
 Li roys vers toute gent lor promet seürtage.
 En mi leu de la terre troverent une ymage,
 Qui en samblance d'omme ert dreciee en estage. [2590]
 Alixandres demande a un homme d'aage:
 "De qui est celle forme?" Cil l'en dit son corage:
 "Por dant Neptanabus, qui ci vint de Cartage;
 Onques n'ot en cest siecle un seul homme si sage."
 Lors s'en rist Alixandres et crolla son visage,
 D'autre part est tornez et tint tout a folage.
 A l'issue du regne passerent un marage;
 Après icelle terre trouverent plus sauvage,
 L'escripture l'apelle la contree de Trage.
 Trage fu en mi leu, une cité ombrage, [2600]
 Et sist seur une roche el destroit d'un passage.
 La gent est felonnesse et fiere comme rage,
 Et responnent au roy orgueil et grant outrage,
 Et ne prisent ne lui ne sa gent un fromage.
 Alixandres en jure touz ceus de son lignage
 Que mar ont contre lui essaucié leur parage,

Par temps leur couvendra montrer lor vasselage;
 Dont les assaillent Greu s'en font si grant damage
 C'onques ne leur lessierent fermeté ne estage,
 Bien ont fet aus felons comparer leur outrage. [2610]
 [1.126] De la cité de Trage s'est bien li roys vengiez,
 Les tours a abatues et les murs peçoiez.
 Emenidus d'Arcage s'i est mout bien aidiez,
 Licanor et Danz Clins, Tholomer li proisiez.
 Des douze pers de Grece fu li regnes cerchiez;
 Ou treuvent forterece ne haus murs batailliez
 Ne fort baille environ ne granz fossez trenchiez,
 Tout prennent et abatent, n'en i remaint uns piez.
 Quant les ot Alixandres destruiz et escilliez,
 A sa tente de paile est li roys repairiez; [2620]
 De l'assaut de la ville fu forment travailliez,
 Auques en estoit mornes, penssiz et mauhetiez,
 Seur un fautre de paile s'est un petit couchiez.
 Ses disners, quant vint l'eure, fu bien apareilliez;
 Au mengier sont assiz, assez i ot daintiez.
 Uns harperes de Trage s'est du roy aprochiez,
 De lais fere a fleütes ert duis et enseigniez,
 Sous ciel n'a instrument dont ne fust affetiez;
 Par son savoir s'est tant d'Alixandre acointiez,
 Ançois que il s'en tort, en sera bien paiez. [2630]
 [1.127] Devant le tref le roy s'est li harpiere assiz
 Et commença un lai que il ot bien apris,
 De la harpe aus fleütes ainz ne fu entrepris;
 Mout fu bien escoutez d'Alixandre et des Gris.
 Quant li roys ot mengié, si l'a a reison mis.
 "Di, va, dist Alixandres, dont es? de quel païs?"
 Li herpierres respont: "Sire, tu as mespris;
 Je sui uns chevaliers, povres et de bas pris,
 De celle gaste ville touz estrez et naïz
 Que tu as hui destruite et le regne conquis; [2640]
 Hier avoie je auques, mes or sui je aquis.
 Et tu dis: 'De quel terre?' Merveilles as enquis."
 Quant l'entent Alixandres, si en a fet un ris.
 "Par mon chief, dist li roys, a parole m'as pris.
 Se tu es d'avoir povres, tu avraz biaux amis;
 Vien avant, sanz-demeure, que je t'en revestis
 De la cité de Trage et de tout le païz;
 Ja n'en perdras plain pié tant com je soie vis;
 Ne ne m'en tornerai, de ce soies touz fis,
 Si ert aussi pueplee com ert hui a uit dis [2650]
 Et seront redrecié li mur de mabre bis."
 Et cil li respondi: "Sire, cinc cens mercis."
 Devant lui s'ajenoille, li roys poësteiz

Li a donné la terre par son peliçon gris.
 [1.128] Quant li roys ot la ville au harpeeur donnee,
 Onques ne s'en torna tant que il l'ot pueplee
 Et trestoute environ autresi bien muree
 Comme elle ert devant ce que elle fust gastee.
 Lors s'en torne Alixandres si passe la contree
 Vers le regne de Sire a sa voie tornee; [2660]
 Ce estoit une terre garnie et asazee.
 Toute la gent du regne est contre lui alee,
 Richece et seignorie li ont bien presentee,
 Et li roys mout les aime et forment li agreee,
 L'onour qu'il li ont fete lor a guerredonnee.
 [1.129] Li roys en est entrez en Sire la garnie,
 Qui depart celle terre et celle de Persie.
 Encore n'estoit pas Anthioche bastie,
 Qu'Antiocus fist puis par mout grant seignorie,
 Car li roys Alixandres l'en donna la baillie, [2670]
 Qui li fist de son regne en la fin grant partie.
 La terre treuvent riche et mout bien replanie
 De mout bonnes vitailles et de grant manantie.
 Toute la gent du regne envers lui s'umelie
 Et li roys mout les aime et promet et affie
 Que ja ne leur faudra en trestote sa vie.
 Au quint jor est meüz et Tholomer les guie;
 Tant chevauche Alixandres, qui d'aler ne s'oublie,
 Qu'il vit les tours de Tyr et la terre a choisie,
 Mes avant ot conquise la terre de Sulie, [2680]
 Tant comme il en trova a mis en sa baillie.
 "Sire, ce li dist Sanses, se Dieus me beneie,
 Quant je voi ceste terre, touz li sans me fremie,
 Pour ce qu'el fu mon pere et vers moi ne sopleie;
 Daires la m'a tolue par sa grant felonnie."
 Alixandres respont: "Or ne mescreez mie,
 Ja ne m'en tornerai s'ert en vostre baillie."
 Cil entent la parole, en plorant l'en mercie.
 [1.130] Quant li roys choisi Tyr, mout fu liez et joians,
 Les tours vit bateilliees et les murs haus et granz. [2690]
 Ens en un coing de mer la ferma Tyrians;
 Ce fu li premiers roys de ce regne tenans;
 Les terres d'entour lui fist a lui apendans,
 Pour lui li mist non Tyr, tant par fu redoutans,
 Après la seue mort le leissa ses enfans;
 Ce conte l'escripture que ce fu deus cens ans
 Après que li deluiges fu par le mont courans.
 Ore est en la main Daire, qui sire est des Persans;
 De lui la tient uns dus Balés qu'en est gardans,
 Qui est bons chevaliers et seürs et aidans. [2700]

La citez est mout forte et en fort leu seans,
 De toutes pars li est la mer entour cloans,
 Ne crient assaut de gent ne quarrel d'ars treans
 Ne mangoniaus dreciez ne perrieres jetans,
 Touz les sieges du mont ne prise deus besans
 Fors que seul l'Alixandre, qui tant est conquerans;
 Et li Grieu se logierent par plains et par pendans.
 Le jor i ot tenduz paveillons ne sai quans;
 Adonques veïssiez ceus de Tyr esmaians,
 Pour paour d'Alixandre pensis et couardans. [2710]
 [1.131] Ly rois assist la ville, qui nulle n'en seonne,
 Et par mer et par terre trestote l'avironne,
 Mout ot en sa navie char et vin et anonne.
 De la fierté de l'ost, de la noise qui sonne,
 Sont cil de la cité effreé jusqu'a nonne.
 Li dus Balés parole et les siens araisonne:
 "Mout est preus Alixandres et de fiere personne,
 De la fierté de lui touz li mondes resonance,
 Babyloine veut prendre et avoir Escalonne
 Et conquerre par force Aufrique et Sarragonne; [2720]
 Ja ne guerra vers lui qui treü ne li donne."
 A ce mot li presentent d'or fin une coronne;
 Les oevres et les pierres valurent plaine tonne
 Du plus chier argent fin qui soit en Arragonne.
 [1.132] Li rois prist la coronne, qui mout fist a loër,
 Tholomer la commande por Sanson coronner,
 Et dist a ceus de Tyr ques leissassent aler
 En la cité leens pour les dieus aourer.
 Adonques se commence li dus a porpenser,
 La fierté Alixandre forment a redouter, [2730]
 Que par force nel voeille de la cité jeter;
 Puis li dist: "La dedens ne vous chaut a entrer,
 Car noz les vous ferons ça defors apoter."
 "Comment, dist Alixandres, volez vous dont penser
 Que je par mesprison voeille leens entrer?
 Ou m'oïstes vous onques de traïson reter?"
 Alixandres ot ire si commence a jurer
 Et le ciel et les nues et la terre et la mer
 Sous ciel n'a homme en terre ques poïst acorder
 Ne treü ne coronne encontre lui tensor; [2740]
 Aillent s'en fors de l'ost; puis les fist deffier,
 Et cil entrent en Tyr si font leur gent armer.
 Et li roys commanda quatre grelles sonner,
 Pour assaillir la ville fet sa gent contraer.
 Mes a eure de nonne commença a venter
 Et une grant tormente merveilleuse a lever
 Qui fet les nes brisier et les ondes lever

Et les barges ensamble l'une a l'autre hurter;
 Et li Grieu commencierent durement a crier
 Et les dieus touz ensamble forment a reclamer, [2750]
 Car grant paor avoient li plusor d'afonder.
 Alixandres commande que l'en bate la mer
 Pour les ondes bessier et les flos avaler.
 [1.133] Oëz con grant merveille, par quel devison
 Lor vint une semblance en guise de poisson
 Errant par mi la mer, fendant a esperon;
 La guele porte ouverte a guise de dragon
 Et giete feu et flambe fierement a tençon,
 Les nez et la cité aclot tout environ;
 Adont leur recommence grant tribulacion, [2760]
 Une ire, une tempeste, une confusion
 Qui leur nez achanterent, et froissent li chevron;
 Par un po que ne furent cueilli li paveillon
 Quant en mer se refiert a guise de plunjon;
 Ainz aus hommes le roy ne fist se paor non.
 [1.134] Li roys ot commandé la mer a ledengier,
 Et li Greu i ferirent por les ondes bessier,
 Adont les veïssiez durement apesier.
 Cil de Tyr se commencent forment a merveillier
 Et li homme Alixandre mout a esleecier. [2770]
 Uns fevres de la ville voloit le jor forgier
 Quarriaus de fer aguz o les pointes d'acier
 Pour les armes aus Grieus et leur cors domagier,
 Après les refeisoit de venin entoschier.
 Mes uns signes avint que il vodrent noncier
 Aus hommes Alixandre pour eus bien esmaier.
 Aus batailles des murs s'alerent apuier;
 Uns des barons de Tyr commença a huchier:
 "Di, va, ralez vous ent, serjant et chevalier,
 Paour avez eüe li plusor de noier. [2780]
 C'est li dieus de la mer qui vous veut corroucier;
 Ceste citez est seue si la veut chalengier;
 Nepturnus, qui elle est, vous voudra trebuschier,
 Encor vous fera pis, sel veez aïrier.
 Ceens est avenue grant merveille des hier
 D'un fevre de la ville, comme il voloit forgier
 Saietes et quarriaus por voz gens domagier,
 Mes li fers de sanc cler commença a raier.
 Vez le ci ou jel tieng, nel vous quier plus noier.
 De ces deus aventures vous devez esmaier; [2790]
 Cueilliez voz paveillons, ralez vous ent arrier,
 Et nous vous en leron sains et saus reperier."
 Alixandres respont: "Ainz orrez del pleidier!
 Vous en verrez ançois cinc cens escus percier,

Et des noz et des vos maint pasmer et plaiier.
 Assez avons oïde tieus gens menacier
 Qui mauvés cuer avoient d'un estor commencier
 Et au four du champ estoient li premier."
 [1.135] Li roys ot ceus de Tyr, qui le vont menaçant
 Qu'il guerpisse le siege et si s'en aille a tant, [2800]
 Et il leur respondi qu'il n'a pas cuer d'enfant:
 "Cuidiez vous que li Grieu soient ja recreant?
 Ja ne furent il onques en bataille teçant,
 Mes seur toute autre gent hardi et combatant;
 Ja ne s'en torneront en trestout leur vivant
 Tant qu'avrai pris la vile et fet a mon talent."
 Sanson a apelé si li rent par son gant,
 Et cil l'a receüe de cuer en merciant.
 Alixandres ot ire si tainst de mautalent,
 A ceus des murs parole si se drece en estant: [2810]
 "Di, va, mauvese gent, felon et mescreant,
 Vous ne devez pas estre de la cité tenant.
 La tormente de mer, que veïstes si grant,
 Et li dieus Neptunus, qui aloit tempestant,
 Vous fet la demostrance, et bien est aparant,
 Qu'il ne veut que soiez en la cité manant
 Ne si mauvese gent i soient habitant;
 Mes leissiez moi la ville, de par lui le commant,
 Trestuit vous en issiez or endroit maintenant,
 Et li Greu la tendront de ce jor en avant. [2820]
 Li fers chaus que veïstes en la forge seignant,
 Ce sera uns machacres, que vous verrez si grant
 Avenir desus vous ançois un mois passant
 Ja n'i porra guerir li pere son enfant.
 Hui verrez tant vert hiaume et tant escu luisant
 Et tant hauberc blanchi et tant bon branc trenchant
 Et tant bon chevalier hardi et combatant
 Environ la cité et desriere et devant,
 Lez les murs de la ville seront tuit reluisant.
 Se ne la me rendez ainz le soleil couchant, [2830]
 Tuit en serez pendu, ja n'en avrez garant."
 Lors furent cil de Tyr esmaïé et pensant
 Et demandent le roy un respit avenant
 Tant qu'il aient parlé la dedens a lor gent.
 Alixandres respont: "Je l'otroi et creant,
 De prendre bon conseil me vient mout a talent."
 Mes les murs de la ville vet sovent regardant.
 [1.136] Li dus prent son conseil o les barons de Tyr
 Et dient d'Alixandre qu'il est de tel aïr
 Que chastiaus ne cité ne le puet retenir; [2840]
 Se a lui ne se rendent, ja ne porront guerir.

Ja preïssent conseil des Grezois recueillir,
 Se ne fust sorvenus Ladinés de Monmir,
 Qui leur dist tel parole que bien peüst tezir:
 "Ceste terre est roy Daire, si l'en devon servir,
 Nostre droit seignor lige ne devons pas traïr
 Desci que il noz voeille et lessier et guerpïr.
 Alixandres est fel et noz puet tant haïr,
 Comment qu'il ait la ville, nous en covient fourir;
 Tous noz fera en mer ou en terre perir [2850]
 Et les pluseurs de nous en chaudieres boullir."
 Cist conseuls leur a fet la parolle guerpïr;
 Dient a ceus de l'ost, si quel porent ouïr:
 "Grieu et Macedonois, or vous couchiez dormir,
 Car d'assaillir la ville avrez mes bon loisir;
 Assez vous en porra chascun jour souvenir."
 Quant l'entent Alixandres, d'ïre prist a nercir
 Et commande les Grieus fors des loges issir.
 El bois de Josaphaille a fet les fus cueillir
 Et aporter en l'ost et en la mer jalir. [2860]
 [1.137] Alixandres a fet mil chevaliers armer,
 Et vont o ceus a pié pour les abres coper.
 Du bois de Josaphaille font les fus amener
 Et aporter en l'ost et couchier en la mer;
 Puis les font de deus pars a reortes coupler,
 Desus vodrent la raimie et l'areine jeter.
 [1.138] Quant voient cil de Tyr qu'Alixandres leur fet,
 Que la mer lor deffent et bastist son atret,
 Li dus se tient a mort s'en ce point ne lor vet.
 Quant la nuis fu oscure et la brunor estet, [2870]
 A petites nacelles s'en issirent a tret
 Coïement de la ville quatre, cinc, sis et set,
 Et copent les reortes sanz tençon et sanz bret.
 Dolans ert Alixandres quant il savra ce plet.
 [1.139] Ce fu bien par matin, quant il dut esclairier,
 Li Grieu vont a la mer lor labour commencer,
 Virent l'atret perdu et l'affetement d'ïer,
 Adonques ne se prisent valissant un denier.
 Li roys se commença forment a corroucier
 Et maudist la cité qui le fet travailler, [2880]
 Car ne puet vers la ville nulle riens exploïtier;
 Avant voudra conquerre et puis la reperier.
 Lors monterent par l'ost serjant et chevalier,
 A trois liues de Tir s'alerent hebergier.
 Iluec fist Alixandres un chastel commencer
 Desus une montaigne, assez pres d'un gravier;
 Scandalion l'apelle et sist seur un rochier;
 Pour ce que li paien distrent au temps premier

Que Scandras avoit non Alixandres d'Alie,
 Si vodrent en son non le chastel batisier. [2890]
 Ilueques sejournerent por leur cors aiesier.
 Une vois dist au roy, quant fu alez couchier,
 Qu'il s'en retourt a Tyr por la ville assegier;
 Il la prendra mout bien, n'ait cure d'esmaier.
 Lors retornent a Tyr et font lor tres fichier.
 El bois de Josaphaille refont les fus trenchier
 Et aporter en l'ost et en la mer lancier,
 A chaanes de fer et a bendes lier;
 Les ont fet de deus pars sagement atachier,
 Que cil dedens nes puissent mes de rien engignier; [2900]
 Mes cil de Tyr les grievent, li bon arbalestier,
 Dars leur lancent aguz et seetes d'acier,
 Que li Grieu ne se pueent de la mer aprochier.
 Alixandres commande ses perrieres drecier,
 De pos plains de sablon fet tant dedenz lancier
 Que la mer jusqu'au mur en lesse a ondoier;
 Et li Grezois s'armerent pour les fus adrecier,
 Puis font deseure metre la pierre et le mortier,
 Et furent si fondé en un seul mois entier
 Qu'il porent par desus a seür chevauchier. [2910]
 D'autre part en la mer vodrent chastel drecier,
 Que navie n'i viegne qui lor port a mengier.
 Cil de Tyr se commencent forment a esmaier
 Et sont venu au roy aus batailles pledier;
 A set jorz li prièrent de l'assaut respitier,
 Tant c'uns messages viegne qu'il doivent envoyer
 Au duc Betiz de Gadres ces paroles noncier;
 Puis se vodront a lui bonnement apaier.
 Mes il veulent le roy par itant delaier
 Tant que secors venist qui lor poïst aidier. [2920]
 A set jorz li prièrent de l'assaut respitier,
 Tant c'uns messages viegne qu'il doivent envoyer
 Au duc Betiz de Gadres ces paroles noncier;
 Puis se vodront a lui bonnement apaier.
 Mes il veulent le roy par itant delaier
 Tant que secors venist qui lor poïst aidier.
 A set jorz li ont fet cil de l'ost otroier.
 [1.140] Li roys vit la cité, qui tant est bien assize,
 Toute est close de mer fors la porte de bise,
 Fierement la regarde, durement la felise, [2930]
 Et de leens entrer a mout grant couvoitise.
 Il en jure celui ou sa creance a mise
 Que ja n'en tornera descil qu'il l'avra prise.
 Dehors fu l'ost logiee desus l'eve de Lise;
 La ot tendu maint tref de soie vert et bise;

Par la rive s'espandent s'ont la vitaille prise.
 Li dus Betiz de Gadres a la nouvelle aprise,
 Que li sires de Tyr li a par mer tramise,
 Qu'assis l'a Alixandres et sa terre porprise
 Et durement destruite et dampnee et aqoise; [2940]
 Or li envoit l'aïde que tant li a promise,
 De par le roy de Perse qui le regne justise.
 Li dus ot la nouvelle, que forment aime et prise,
 Met sa main a son flanc si respont par cointise:
 "Dites le duc Balés g'irai en son servise;
 Se truis l'ost environ, targe en sera malmise;
 Onques de tant de gent ne fu si grant ocise."
 [1.141] Li mes se part de Gadres, a Tyr vint a eslés,
 Devers la mer s'en entre par la posterne a es
 Et conte les nouvelles qui leur viennent après, [2950]
 Com li sires de Gadres mande sa gent adés.
 S'environ truevent l'ost, ja n'en iront après;
 Aus spees d'acier en feront maint confés.
 Mes li Greu ont la ville bien assize de prés
 Et la terre porprise jusqu'a la roche Alés,
 Ou la mer fiert et hurte chascun jor a grant fes.
 Li roys prent ses messages ses envoie a Balés,
 Qu'il li rende la ville, la tour et le palés,
 Et viegne a sa merci, puis avra de lui pes;
 Et se il ce refuse, sel trouverra engrés, [2960]
 Que ja en son vivant ne s'en tornera mes
 Desci qu'il l'avra prise et arse comme un es;
 La dedens la cité lanceront feu griés.
 Li dus voit les messages, mout fu vers els irez,
 Et respont par ireur: "N'ai talent que vous bes."
 Ja les eüst penduz se ne fust Ladinés,
 Uns princes de la ville qui gardoit le palés.
 [1.142] Li dus vit les messages, de maltalent s'aïre
 Et a prises les letres que li roys fist escrire;
 Connut ce qu'il ot ens, car il les sot bien lire. [2970]
 Balés taint et merci et commença a frire
 Et respont par ireur qu'il n'ot talent de rire:
 "Orgueil mande Alixandres, si com je oi descrire,
 Que la cité li rende et vers lui m'aïlle aflire;
 Et se ce ne voeil fere, si com ce brief oi dire,
 Il nous prendra par force et pendra touz a tire
 Ou noiera en mer ou ardra comme cire;
 Mout me tieng a mauvés se ne l'en faiz desdire,
 Se pres sui ses voisins, mestier avra de mire."
 Et a dit a ses hommes: "Demain fetes martire, [2980]
 Qu'il soient tuit destruit et corrouciez leur sire."
 Et respont Ladinés: "Dus, refraigniez vostre ire.

Mout est preus Alixandres et si a grant empire
Ne cuide que nuz hom le puisse desconfire.
Li mes n'ont pas forfet que l'en les doie ocirre,
Mes donnez leur du vostre si les fetes conduire;
Tant est preus Alixandres ne lera nel vous mire."
[1.143] Li dus vit les mesages, mout ot le cuer dolent,
Qu'Alixandres li mande tant orgueilleusement
Que la cité li rende apareilliement [2990]
Et toute la devise, si comme a Daire apent;
Et se ce ne veut fere et a force le prent,
Ja ne tiegnë il terre se il ne l'art ou pent.
Ja feïst les mesages presenter vers le vent
Se ne fust Ladinés, qui li blasme et deffent
Et conduïst de la ville descï a sauvement,
Fors tant leur dit li dus et ses cuers li consent
Que li roys n'a de lui triues n'acordement,
Ainz li fera, s'il puet, grant damage briement.
Li mes par mi les loges s'en vont hastivement, [3000]
Trusqu'au tref Alixandre n'i ot arestement,
Et content la parole sanz nul amendement
Si com li dus li mande et menace et desment;
D'euls eüst fet joutice, s'il en eüst consent.
Quant l'entent Alixandres, d'ire eschaufe et esprent,
Et respont par ireur: "Or me tient il por lent?
Touz soie je honnis se ce mot ne li vent."
Lors fet sonner un grelle et atoner sa gent;
Ilueques veïssiez tant bon cheval courant
Et tant escu a or et tant hiaume luisant, [3010]
De la clarté des armes touz li païs respulent.
Et cil de la cité s'arment isnellement,
Par la porte s'en issent estroit serreement.
La gent qui ist de Tyr le rivage porprent.
Icel jor commencierent un tel tornoïement
D'ambes pars en remestrent maint chevalier sanglent
Qui regreterent puis et ami et parent.
C'est coustume de guerre et conseulz de jovent
Que l'en i pert bien tost et gaaigne souvent.
[1.144] Par la porte vers terre s'en issent cil de Tyr; [3020]
Ilueques veïssiez maint vert hiaume luisir
Et tant destrier de garde galoper et hennir
Et contre le soleil ces armes respuldir.
Li dus Balés les guie et Salos de Valmir.
Sus Ferrant sist armez Ladinés de Monmir,
Qui ert bons chevaliers et sages sanz mentir.
Mout par sot bien chacier et avenant fouir,
Et quant il vient en leu, aus premerains guenchir.
Li dus crie s'enseigne por sa gent resbaudir,

Le jour veut ceus de l'ost fierement envair. [3030]
 Ilueques veïssiez tant fort escu croissir
 Et tant vassal a terre craventer et morir;
 Qui fu aus commençailles et sains s'en pot partir,
 De grant ire du ciel li poïst souvenir.
 [1.145] A l'assambler des Griens i veïssiez brisier
 Tante hanste de fresne et tant escu percier
 Et tant vassal a terre morir et trebuschier.
 Ce dist cil ques esma, qui bien les sot prisier,
 Que cil de Tyr estoient plus de trente millier.
 Li roys fet trois batailles et serrer et rengier, [3040]
 Nes volt mie de primes trop fort estoutoier
 Ne sa gent metre ensamble avant au commencier,
 Car gent estoutoiee est plus male a hetier.
 Tholomer commanda trois batailles premier
 Entre euls et la cité sagement envoier,
 Qu'a la porte vers terre ne puissent reperier,
 Touz les veut prendre aus mains ou en la mer noier;
 Par itant i vodront li Grezois gaagner.
 Et Alixandres point Bucifal le legier,
 Entre lui et le duc se vodront acointier. [3050]
 Si granz cops se donnerent aus gonfanons bessier
 Que les lances de fresne font ansdeus peçoier.
 Li roys s'en passa outre, qui le corage ot fier,
 Au reperier l'encontre et tint le branc d'acier,
 Car de tieus aventures se sot mout bien aidier.
 Sel fiert par mi son hiaume, dont li laz erent chier,
 Que trestout l'enclina sus le col du destrier.
 Par mi les blanches mailles du blanc hauberc doblier
 En fet le sanc issir et le bliaut moillier
 Et le cheval souz lui trestout ajenoillier. [3060]
 Ja au partir dou roy n'eüst soing de gibier
 Quant s'espee peçoie les le poing a or mier,
 Jouste lui s'acosta, sel courut enbrachier.
 Ja l'en menast tout pris, ne se poïst aidier,
 Quant devers son escu li sordent chevalier;
 Ou li roys voeille ou non, li couvint a lessier.
 [1.146] Li dus vit Alixandre, qui forment le le tormente,
 Si l'a feru du branc que sus l'arçon l'adente.
 Il l'eüst pris ou mort a touz jorz sans atente,
 Quant des siens le sequeurent, ce m'est vis, plus de trente; [3070]
 Balés a tret le branc, de vengier ne s'alente,
 Et fiert si un Grezois quel jeta de jovente.
 L'espee au poing d'or fin fu si pres sa parente
 Que la teste a tout l'iaume en mi le champ presente.
 De ce cop, ce m'est vis, ert s'amie dolente,
 Ne cuit c'uns chevaliers eüst guieres plus gente.

Outre s'en est passez, s'espee tint sanglente,
 Perdicas abati au travers d'une sente.
 Se cil qui fist ces vers ne mesprist ou ne mente,
 Ja mes Flordyonés n'eüst en lui atente [3080]
 S'Emenidus ne fust, qui li livra entente.
 O les brans s'entrassailent, griement l'uns l'autre tente;
 N'i a nul au partir si pres l'acier ne sente
 Qu'a tout le plus halegre covendra metre tente;
 C'est costume de guerre, de tel marchié tel vente.
 [1.147] A iceste assamblee est mout bleciez li dus,
 Forment refu navrez el cors Emenidus;
 Li sans qui ist des plaies a la terre chiet jus,
 Li escu et li hiaume tornerent a reüs,
 Mout i a cops d'espees et de lances percus. [3090]
 Emenidus le fiert en son hiaume desus
 Si durement du branc que tout l'eüst confus,
 Quant Balés s'en parti, qui nel pot soffrir plus,
 Et maudit les Grezois, que tel gent ne vit nus.
 [1.148] Perdicas saut en piez et a le branc nu tret,
 Du duc qui l'abati ot il vergoigne et let,
 Et vit un de ses druz qui ens el champ s'estet;
 Par la regne le prist, ainz quel meist an plet,
 Si l'a feru del branc qu'a toz jorz l'a deffet,
 La cuisse a tout le pié a leissie el garet; [3100]
 Puis sailli el cheval, vers la presse se tret.
 Une lance recuevre, le destrier point a het
 Et fiert un Turïen, tant com chevaus li vet,
 Que souz la boucle a or li a son escu fret,
 Le hauberc desmaillié, le sanc en a fors tret,
 Les estriers li fet perdre, a la terre le let;
 Ançois que d'eus se parte, en a si baillis set
 Que touz li plus haliegres est tornez a dehet.
 A grant bien li atorment, car le jour l'a bien fet;
 Ainz nus ne l'esgarda qui envie n'en et. [3110]
 [1.149] Emenidus d'Arcage et Balés sont sevré;
 Ladinés vit le duc mout durement navré,
 Sus l'arçon de la selle devant tout adenté;
 Tant a perdu de sanc tout a le vis troublé.
 Li quens Emenidus l'ot le jor rencontré;
 S'auques i esteüst, de lui eüst finé.
 D'une faisce de paille li a le cors bendé,
 Jouste les tornoians l'en maine a sauveté;
 Par desrier la bataille sont au chastel torné,
 Mes n'i porent venir, car li Greu sont outré; [3120]
 Tholomer et Danz Clins furent outre passé,
 En la premiere eschiele Caulus et Aristé.
 Ladinés connut l'uevre, que mal orent ovré,

Par les flans esperonne le bauçant pomelé
 Et fiert si un Grejois seur son escu listé
 Que sus la boucle a or li a fret et quassé;
 Et li Greus refiert lui en son escu bouclé,
 Que les lances peçoient, li tronc en sont volé;
 Des boucles des escus se sont entrehurté,
 Que tuit li chandelier sont fret et desmenbré; [3130]
 Si forment s'entrehurtent que tuit sont estonné.
 Les armes Ladinés ont le Greu encombré,
 Les estriers li fet perdre si l'a asouviné;
 Li agus de son hiaume feri en mi le pré.
 Ladinés met la main au bon branc acéré,
 Desus lui s'aresta, el vis l'eüst navré
 Se Filotes ne fust, qui mout en a pesé.
 Le cheval esperonne, s'ot un panon fresé;
 Ja sera, ce cuit je, de deus pars comparé.
 [1.150] Del Greu qui fu cheüs pesa mout Filotés, [3140]
 Le destrier esperonne, qui court a grant eslés,
 En l'escu de son col va ferir Ladinés,
 Que par desouz la boucle en peçoia les es;
 Se ne brisast la lance, de lui eüst fet pes,
 Ja cil de la cité nel reveissent mes.
 Quant sa lance ot perdue, si tret l'espee après.
 Se l'uns vassaus fu preus, li autre fu engrés,
 A leur brans s'entredonnent si granz cos et de pres
 Que les hiaumes detrenchent et des escus les es.
 Ja fust mien escient li uns mors desconfez, [3150]
 Quant les batailles hurtent de deus pars a eslez,
 Iluec s'entreperdirent Filote et Ladinés.
 [1.151] Iluec ou cil de Tyr josterent aus Grezois
 Veïssiez depecier maint escu de manois
 Et tant hauberc fausser et tant panon d'orfrois
 Passer par mi cors d'homme et gesir en sanc frois
 Et tant bon chevalier gesir par ces chaumois.
 En la premiere eschele vint chevauchant li rois
 Et ot en son sa lance un gonfanon turcois.
 La fierent cil dedens ou furent plus espois, [3160]
 Et cil bien se deffendent qui lor geus ont asprois;
 La cité leur metoient durement en defois.
 Bien le fist a cel poindre Licanor li cortois,
 Et dou royal effors i jousta plus de trois
 Des meilleurs qui i sont, Greu et Macedonois.
 [1.152] Iluec ou les deus os josterent en la plaigne,
 Veïssiez peçoier maint escu d'entresaigne.
 Li roys fiert en l'escu Caliot de Sardaigne,
 Ne li valent ses armes le pris d'une chastagne,
 Fer et fust et panon li met par mi l'entraigne; [3170]

La lance vole en pieces, cil chiet en la champagne,
 Outre s'en est passez et cil crie s'ensaigne.
 Après le roy josterent tel cent de sa compaignie,
 N'i a nul qui n'abate ou sa lance ne fragne.
 Cil dedens font le jor aus Grezois tel bargagne
 Que mout leur a torné a mauvese gaagne;
 C'est costume de guerre l'uns ou l'autre s'en plagne.
 [1.153] Es vous par mi la presse Sanson esperonnant,
 Le jour fu bien armez sus Bauçant le movant;
 Hanste ot roide de fresne et gonfanon pendant [3180]
 Et fiert un Turrien qu'en apeloit Saillant,
 Le cuer li a trenchié par mi le piz devant;
 Outre s'en est passez et mist la main au brant
 Et crie Macidoine, l'enseigne conquerant.
 Cel jour leur vet il bien la cité chalenjant.
 Alixandres l'esgarde si li dist en riant:
 "Bien doit conquerre terre qui si la vet clamant."
 Li roys point Bucifal, qui les granz saus porprent,
 En mi la greignor presse prist le chief d'un Persant.
 Lors vint Emenidus par mi l'estour poignant [3190]
 Et fiert un Turrien au monter d'un pendant,
 Que la teste li tolt a l'espee trenchant;
 Mes Balés l'ot navré d'une lance en jostant;
 Pour le chaut qui l'argüe vet sa plaie seignant.
 Alixandres le voit, celle part vet courant,
 Entre ses bras le prist si li dist en oiant:
 "Avra vous mestier mires? cuidiez vous vivre tant?"
 Et cil li respondi: "Mout vois afoibloiant."
 A icest mot se pasme sus le col de Ferrant.
 Alixandres le baille a un mire sachant; [3200]
 Cil a dit Alixandre: "Mar en irez doutant,
 Tout sain le vous rendrai ainz le tiers jour passant."
 Et il si fist mout bien quel virent li auquant.
 [1.154] Du duel Emenidon fu mout li roys embruns,
 Car ainz mieudre vassaus ne fu princes ne dus;
 Par un seul chevalier ne fu onques conclus
 Ne d'un grant fes empredre ne fu onques refus,
 Ainz le commença bien et en vint au desus.
 Ce dit cil ques esma, qui bien connut le plus,
 Fors que seul Alixandre, a lui ne se prist nus. [3210]
 Cel jour ot de l'estour le pris Emenidus.
 [1.155] Par l'estour vet poignant Ladinés de Monmir,
 Grant duel ot de son frere qu'il ot veü morir,-
 Emenidus d'Arcage li fist le chief tolir,-
 En l'escu de son col ala un Grieu ferir,
 Desouz la boucle a or li fet fraindre et croissir
 Et le fer de sa lance par mi les cors sentir,

Si l'abat contre terre qu'ains ne l'estut languir;
 Au partir de la jouste escria deus foiz: "Tyr!
 Qui si deffent sa terre mout la doit bien tenir. [3220]
 Li roys n'est mie sages qui la noz veut tolir;
 De ceste grant folie l'estevra repentir."
 Li roys ot la parole et celui ahatir,
 Mout se tient a mauvés s'il nel fet repentir.
 Macidoine escria et fet sa gent garnir,
 Les compaignes armees fet des loges issir.
 La fierent ceus dedens ou les pueent choisir;
 La poïssiez vooir un estour si fornir
 Et cil tornent les dos qui nes porent soffrir,
 Tout droit a la cité commencent a fourir. [3230]
 Noienz est, d'autre part les estevra guenchir,
 A la porte vers terre ne porent il vertir,
 Car li roys l'a bien fete de ses hommes garnir;
 Vers la mer s'en tornerent ou cuidierent guerir,
 Par destrece en couvint tieus mil dedens saillir;
 Se toute ne la boivent, noienz est de l'issir.
 [1.156] La bataille est finee, cil de Tyr sont veincu,
 Vers la cité s'en fuient a force et a vertu,
 Mes noient ne leur vaut, que tuit sont deceü.
 Tholomer et Dans Clins lor sont devant venu, [3240]
 En la premiere eschiele Aristés et Caulu.
 Tholomer par iror a Ladinés feru,
 Que lui et le cheval a a terre abatu,
 Et Dans Clins tolt Binas le destre bras du bu;
 Li autre i referirent; cil sont si esperdu
 Qu'il ne sevent que fere, mort sont et confondu
 Et par tout le rivage sont a val espandu.
 Par destrece s'en sont tel mil en mer feru,
 Se toute ne la boivent, noié sont et perdu.
 Seur les ondes flotoient et lances et escu; [3250]
 Bien pot avoir cheval qui a la rive fu.
 Mout se sont bien li Grieu icel jor conbatu,
 Mes de tant seulement leur est mal avenu
 Qu'en la desconfiture i ont le duc perdu
 Et set mile des autres o Ladinés son dru.
 Par la porte vers terre se sont en Tyr feru
 Et maudient les Grieus, c'onques tel gent ne fu.
 [1.157] Le jour de ceus dedens sont cheü li revel,
 En la cité s'en entrent sanz joie et sanz fretel.
 Et li Greu s'en tornerent quant ont fet leur avel; [3260]
 Devant une fontaine dont cler sont li ruissel
 Desarmement Alixandre a l'entrer d'un prael.
 Il remest deffublez, n'ot cure de mantel;
 La toufeur estoit granz seur la roche Mabel,

Pour ce li amenoient le vent a un flavel.
 Le duc Balés desarment li troi fil Maniel,
 Navrez fu d'une lance el pis souz le forcel,
 Que deus des mestres costes trenchierent li cotel;
 Mes li dus fet venir le mire Samüel,
 Qui plus savoit de plaie que vilains de rastel. [3270]
 Cil li dist tel parole dont forment li fu bel:
 "Ne vous esmaiez mie, vous guerrez de nouvel."
 Le duc Betiz de Gadres a tramis un seel:
 Se il l'aime de riens, c'or le sequeure isnel,
 Car li Greu le demainent com vilains son flael;
 Devant Tyr la cité li ont fet tel maisel
 Des mors et des navrez sont senglant li ruissel.
 De l'ost des Griens se partent tel set cens damoiseil
 Qui portent entreseignes, chascuns un panoncel;
 Devant la mestre porte leur ont fet un cembel, [3280]
 Mes cil de la cité n'ont soing de leur avel,
 Ainz se plaignent leens autresi comme oisel.
 Alixandres apelle Licanor et Sabel:
 "Fetes cerchier la mer trusqu'au port Daniël,
 Gardez n'i lessiez barge ne chalant ne batel."
 Cil ont fet son pleisir, que forment lor fu bel; [3280]
 De devant la cité el havre tyriël
 La dedens en la mer lor ont fet un chastel
 Tout ouvré par nature de chaux et de quarrel;
 Au desus des estages sont assis li crenel.

Roman d'Alexandre II

[2.1] Devant les murs de Tyr, la dedens en la mer,
 Li rois de Mascedoine fist un chastel fremer.
 Molt fu riche la tour s'ot entor maint piler;
 La façon du chastel ne vos sai deviser.
 De la porte vers terre lor veut le port veer,
 Q'a la cité ne puissent ne venir ne aler,
 Ne barges ne galies n'i puissent ariver.
 Li rois i commanda de sa gent a entrer,
 Armes et garnisons i fait assés porter.
 Souvent de jor en autre lor fait assaut livrer [10]
 Et cil se deffendirent a traire et a geter,
 Que la cité ne veulent ne rendre ne livrer.
 Alixandre i anuie forment a sejourner,
 Car entour aus ne pueent vitaille recouvrer.
 Li rois par maltalent commença a jurer
 Que ja n'en prendra un que nel face afoler.
 Emenidus d'Arcage commande en fuerre aler

Et sept cens chevaliers ensamble o lui mener,
 Perdicas et Lioine et Caulon qui fu ber,
 Licanor et Filote por les forriers garder.
 Le val de Josafaille a molt oï loër,
 Que c'est la mieudre terre que on puisse trover.
 Sanson qui clame Tyr les commande a guier,
 Qui bien set le païs et les destrois passer.
 Li rois retint Cliçon o lui et Tholomer;
 Et cil issent de l'ost si font lor gent monter.
 [2.2] Mult fu fiers...asses orent comment.
 [2.3] Li Grieu issent de l'ost por querre la vitaille,
 Et Sanses les conduit el val de Josafaille,
 Une terre garnie de bestes et d'aumaille,
 Mais la gens est molt fiere et duite de bataille
 Et vait tous jors armee por crieme q'on l'asaille;
 Ce qu'il ont a garder, n'est mie controville,
 A envis en lairoient vaillant une maaille.
 Ançois que li Grieu l'aient, vos di sans devinaille,
 En sera il perciés mains pis et mainte entraille,
 Et de maint blanc hauberc desrompue la maille.
 Trop vont a eschari, ne cuit que preu lor vaille;
 Ançois qu'il s'en retornent, le comperront sans faille.
 [2.4] Le jor vont bien li Grieu en guise de forriers,
 Chauces de fer chaucies, et font as escuiers
 Devant porter les armes et mener lor destriers.
 Toute nuit chevalchierent sans bruit et sans noisiers;
 Au matin par son l'aube, quant jors fu esclairiés,
 El val de Josafaille vers les puis de Gibiers
 Ont veüe la proie et choisi les vachiers.
 Mais il n'aloient mie en guise de berchiers,
 Ains ierent bien armé, car il lor iert mestiers,
 Et d'escu et de lance, de dars trenchans d'aciers,
 Et ont chevaus d'Arrabe abrievés et corsiers.
 Li Grieu sont descendu les un brueil d'oliviers.
 Chascuns de soi armer ne fu mie laniers;
 Emenidus d'Arcage est montés tous premiers
 Et est alés avant a tout cent chevaliers.
 [2.5] El val de Josafaille lor font li Grieu saillie
 Et acuellent la proie, une si grant partie
 Dont l'ost peüst bien estre molt lonc tans replenie;
 Mais li cris est levés et la gent estormie.
 Li sires qui les garde ot non Oteserie,
 A un cor d'olifant les rassamble et ralie.
 Devant lor sont venu sous la roche enhermie,
 A sept des premiers Grieus ont tolue la vie,
 La proie lor resquent, maugré aus l'ont guerpie.
 Emenidus les vit, qui les chadele et guie;

S'or ne se puet vengier, ne se prise une alie;
 Lors reclaime sa gent et s'ensegne rescrie,
 Et li Grieu s'espandirent par mi la praerie.
 Ja sera de deus pars commencie folie.
 [2.6] Emenidus ot ire quant vit ses compaignons
 Morir por la vitaille dont li rois l'ot semons.
 Ferrant, qui tost li vait, broche des esperons
 Et fiert si le premier qu'il vuide les arçons,
 Et l'auberc li faussa com se fust auquetons,
 Par mi le cors li passe fer et fust et penons,
 Si que de l'autre part en geta les regnons.
 De deus pars s'entrevient, baissiés les gonfanons,
 Des mors et des navrés fu sanglans li sablons.
 Tant forment s'entrefierent n'ont cure de prisons,
 As espees d'acier paient lor raençons.
 [2.7] El val de Josafaille vont li Grieu proie prendre,
 Mais cil ont bon talent qui lor veulent deffendre,
 As espees d'acier lor sont venu contendre.
 Caulus point le destrier, grans saus li fait porprendre,
 Et fiert Lucianor que l'escu li fait fendre,
 Le plus hardi des lor et si estoit li mendre,
 Niés fu Oteserie, el champ le fist estendre,
 Si l'a a mort feru l'ame li estuet rendre.
 [2.8] Molt ont bien li Grigois la mellee tenue,
 Cel jor i ot doné maint caup d'espee nue.
 Duel ot Oteserie de la descovenue
 Qant voit mort son neveu desor l'erbe menue.
 Le cheval esperone, qui molt tost se remue,
 Et fiert si un Grigois de l'espee esmolue
 Que la teste du bu li a au branc tolue.
 Lioines point le brun toute une voie herbue
 Et fiert Oteserie sor la targe volue;
 Desous la boucle d'or li a fraite et fendue,
 Mais sa lance peçoie comme un raim de ceüe;
 Outre s'en est passés et traist l'espee nue.
 Mais a Oteserie fu male eure venue,
 Q'en une autre bataille, q'a un Grieu ot tenue,
 Furent li las rompu et la coiffe cheüe.
 Et Lioines le fiert en la teste chanue,
 Que l'espee li a tresq'es dens enbatue.
 Qant li sires fu mors, l'autre gent fu vaincue,
 Par mi une montaigne s'en fuit toute esperdue.
 Et li Grieu de la proie i ont tant retenue
 Dont l'ost peüst bien estre un lonc tans repeüe,
 Mais avant que il l'aient lor sera chier vendue.
 [2.9] Li Grieu s'en retournerent vers l'ost molt liement,
 Mais ançois qu'il soit nuis seront mat et dolent,

Car li sires de Gadres ot mandee sa gent
 Tant que il furent bien trente mil et sept cent.
 Li dus Balés de Tyr li ot mandé sovent
 Q'Alixandres li torne sa terre a grant torment,
 Or le vaura secorre, s'il puet, prochainement.
 De la vile s'en ist molt efforcïement;
 Il en jure le ciel et la mer et le vent
 Que fols iert Alixandres s'en bataille l'atent.
 Li dus Betys regarde vers les puis d'Oriant
 Et connut les forriers et sot certainement.
 Puis a dit a ses homes: "Esgardés quel present.
 Ceste gent sont de l'ost, jel sai a ensient,
 Qui en maine la proie et la terre porprent.
 Se as premieres jostes n'en preng le vengeance,
 Ja ne tiegne de terre ja mais un seul arpent;
 Hui savra Alixandres que je ne l'aim noient."
 Emenidus d'Arcage les vit premierement
 Et a dit as Grigois: "Chevalchiés sagement;
 Ves l'empire de Gadres qui nos vient au devant.
 En aventure somes de mort et de torment,
 Mais tout soit il honis qui ançois ne s'i vent;
 Hui porra on veoir qui plus a hardement.
 Se seüst Alixandres icest encombrement,
 Hui vausist li gaains cent mile mars d'argent."
 Li Grieu sont descendu tost et isnelement,
 De lor cors atoner ne furent mie lent,
 Et montent es chevaus, qui ot escu sel prent.
 [2.10] Emenidus esgarde vers les puis d'Anemonde
 Et voit la gent de Gadres dont tos li vaus soronde;
 N'a mie par grant vent en haute mer tante onde
 Com il viennent espés la valee parfonde;
 Tous les veulent enclorre entor a la reonde,
 Autresi les açaignent com vilains fait la fonde.
 Poi a gent a combatre, nen a cuer qu'il responde,
 Ne por paor de mort n'a talent qu'il s'esconde,
 Et bien set et connoist que tuit sont des chiés monde
 Et ne voit nul secors qui envers lui s'abonde;
 Lors n'a oel en sa teste qui de pitié ne fonde.
 Il en a apelé Licanor de Mormonde:
 "Biaus ja est tes destriers, plus isniaus d'une aronde.
 Car va dire Alixandre, se tost ne nos habonde,
 Hui perdra de la gent que plus aime en cest monde."
 Qant l'entent Licanor, ne puet müer ne gronde,
 Et ne laisse por qant que son sens ne responde:
 "Non ferai, dist li quens, par ceste teste blonde,
 Ains parra mes escus estre targe reonde,
 Et avrai detrenchie du cors la maistre esponde,

Q'ançois isse du champ que des lor nen i tonde."

[2.11] Emenidus a dit: "Car i alés, Filote,
Et dites Alixandre que toute terre est mote
Et venue sor nos de Gadre et d'Amiote,
Et sont trente milliers de gens en une flote.
Se tost ne nos secort, en si male riote
Nos a mis Alixandres que chascuns s'en defrote."
Et cil li respondi: "Ne me pris une bote
S'ançois ne vois au branc commencer une note
C'onques Bres ne fist tele en vièle n'en rote.
Molt estera honis qui verra tel complote
Et partira du champ se ançois n'i escote;
Ne cuit que cis besoins soit pas gieus de pelote.
Quant mes haubers sera pertuisiés comme cote
Et mes escus a or com dras qu'on haligote
Et li sans de mon cors seur mon arçon me flote
Et revenra au pas mes chevaus qui or trote,
Se lors vois en message ne diront: 'Cis asote,'
Ne ne m'en blasmera li rois ne Aristote.
Or soions tuit seür comme chastel seur mote;
Honis soit li preudom qui por un jor radote."

[2.12] Emenidus esgarde vers les puis de Nimioie
Et voit la gent de Gadres dont li país ondoie,
Qui plus viennent espés qu'espi ne sont en moie.
El premier chief devant mainte enseigne de soie
Et tels mil aprochant dont chascuns se desroie.
La compaigne des Griens durement s'en effroie,
Puis n'i ot si hardi qui entendist a proie.
Emenidus apele Lione si li proie
D'aler a Alixandre, por le secors l'envoie;
Et s'il fait cest affaire, tout le pris l'en otroie.
Et Liouines respont: "Ja puis Dieus ne me voie
Que je aille en message desi que on me croie.
Mes escus est tous sains et ma lance ne ploie,
Ce diroit Tholomés que por paor fuiroie
Et Dans Clins ses compains, qui as tentes s'ombroie.
La gent que j'ai menee en cest champ guerpiroie;
Li rois les m'a chargiés et sans aus m'en iroie;
Dont porroit on bien dire que traîtres seroie.
Mieus veul avoir percié d'une lance le foie
Que ja aie tesmoingne que vis recreans soie."

[2.13] Emenidus apele le hardi Perdicas:
"Car nous fai cest message, biaux amis, car i vas."
Et cil li respondi: "Or ne m'amés vos pas,
Ge vos vaudrai aidier a descroistre cel tas.
Ains iert ma lance fraite et mes escus tos qas
Et mes chevaus corans iert revenus au pas;

Mieus i vuel estre ocis, du tout matés ou las,
 Que g'isse de l'estor fors ne haitiés ne cras.
 Se je venoie au roi armes saines et dras
 Et vos laissez mors el val de Josaphas,
 Molt avroie bien fait le service Judas;
 Li rois seroit malvais se demain n'estoie ars."
 [2.14] Emenidus a dit: "Car i alés, Caulus,
 Uns des douze pers estes, tant vos crera on plus,
 Et dites Alixandre que tout somes conclus.
 Se tost ne nos secort, mort somes et confus,
 Car a sa gent de Gadres nos a enclos li dus.
 Or somes en esprueve et il sont au desus."
 Et cil li respondi: "Cest afaire refus.
 Par la foi que vos doi, biau sire Emenidus,
 Qant de cest champ istrain, nen i remanra nus
 Se ne sui mors ou pris ou tornés au dejus."
 [2.15] Emenidus a dit: "Alés i, Aristé.
 Ja a il tant en vos vasselage et bonté-
 Bien connois cel destrier sor quoi vos voi armé-
 Que ne vos bailleroient trestout cil qui sont né.
 Et dites Alixandre que tant avons alé,
 Se tost ne nos secort, mort somes et outré.
 Se nel faites por nos, si le faites por Dé
 Et por l'amor du roi qui tant nos a amé."
 Cil li a répondu: "Or avés bien parlé!
 Ne vauroie estre sains por iceste bonté;
 Au plus malvais de tous m'avés or esgardé
 Par mon chief vos meïsmes qui l'avés commandé;
 Se ja mais estions de cest besoing torné,
 Assés en petit d'eure m'en avriés gabé.
 Qant j'avrai l'escu fraint et le hauberc fausé
 Et le hiaume en cent lieux trenchié et enbaré
 Et le branc de m'espee tors et ensanglenté
 Et je avrai le cors en pluseurs lieux navré,
 Se lors vois el message que m'avés commandé,
 Ne dira pas li rois, Dans Clins et Tholomé
 Que m'en voient parti comme couart prové.
 Je n'en prendroie mie tout paradis en gré
 Por ce que je n'eüsse en cest besoing esté."
 [2.16] Qant voit Emenidus por noient se travaille,
 Que por lui ne feront vaillant une maaille,
 Antioqus apele, qui fu nes de Soraille:
 "Vous irés el message desor cel Cervagaille,
 Qui plus vait de randon qu'espreviers après caille,
 N'a plus isnel destrier deci en Cornouaille;
 Et dirés Alixandre q'a cest besoing nos vaille.
 Se tost ne nos secort, nel tiegne mie a faille,

Ne trovera el champ ne le grain ne la paille."
Et cil li respondi: "Or oi grant devinaille;
Ains iert mes haubers rous par desous la ventaille
Et je navrés el cors tres par mi la coraille;
Mieus veul estre avec vous en iceste bataille.
Certes plus le desir, ce sachiés vos sans faille,
Q'estre sires de Rome ne rois de Cornouaille.
Je remanrai o vous, querés autre qui aille."

[2.17] Emenidus d'Arcage Antigone apele:
"Vos irés el message sor Bauçant de Castele,
Qui plus cort de randon que ne vole arondele,
N'a plus isnel destrier dusq'as murs de Tudele;
Et dites Alixandre, qui tantes gens chadele,
Se tost ne nos secort, mal torne la rouele,
N'en trovera mais un en cheval ne en sele."

Et cil li respondi: "Or oi gente favele;
Ains iert mes escus frais sous la boucle novele
Et mes haubers rompus par desous la mamele.
Qant avrai de mon branc sanglente l'alemele,
Et sor l'arçon devant me gerra ma boiele,
Lors m'en irai au roi a Tyr sor la gravele;
Adonc crera il bien que voire iert la novele.
Dehais ait, s'ains i vois, qui honi ne m'apele."

[2.18] Emenidus d'Arcage en apele Sanson:
"Car i alés, fait il, gentieus fieus a baron,
Et dites Alixandre, qui fu fieus Phelippon,
Qu'il nos viegne secorre a coite d'esperon,
Que l'enpires de Gadres nos enclost environ;
Et sont bien trente mile, a itant les esmon."
Et cil a respondu: "Vous parlés en pardon.
Je sui ja tous armés et tieng mon gonfanon,
Desirrans de ma terre dont li rois m'a fait don,
Et ateng la bataille, ves la ci, ja l'avrom;
Et or aille el message a guise de garçon?
Mieus vuel estre tornés a grant confusion
Que g'isse de cest champ se mors ou navrés non.
Ou l'onnor en iert nostre, si que nos le verrom,
Ou nos i morrons tuit, ja n'avrons garison."

Qant Emenidus l'ot, si baissa le menton.
Lors regrete li quens Tholomé et Cliçon:
"Qant vos laissai as tentes, molt oi sens de briçon (l. bricon);
Hui partiront a glaive li douze compaignon."
Et li dus lor escrie: "Tuit i morrés, glouton,
Ja guerpissiés la proie, nos la vos chalengom.
De vos cors ne prendroie nisune raençon,
Trestuit perdrés les testes sans autre devisaon."

[2.19] Or voit Emenidus...ne me remue."

[2.20] Qant voit Emenidus, qui tant fait a loër,
 Q'en nul de ciaux ne puet nul bon conseil trover,
 Des biaux ieus de son chief commença a plorer
 Et le roi Alixandre forment a regreter:
 "Ha! frans rois debonaires, qui tant nos seus amer,
 Tes pailles et ton or et ton argent doner
 Et tes beles richeces a chascun presenter
 Et tout canque li dieu te laissent conquerer,
 Ja mais ne te verrons, ce os bien afermer.
 Ha! Dieus, com grant souffraite ai hui de Tholomer
 Et de Cliçon le conte, qui les rens fait trambler;
 Ne je ne puis ici un chevalier trover
 Qui voist dire le roi por ceste gent sauver."
 A une part du champ commence a esgarder
 Et voit un chevalier desous un arbre ester.
 Corineüs ot non, ainsi l'oïnomer,
 Povres hom iert d'avoir, mais de corage iert ber.
 Luec estoit descendus por son cors atoner,
 Durement se penoit de son chief bien armer,
 Car il voloit le jor ciaux de Gadres grever,
 Son maltalent et s'ire desor aus desenfler
 Et l'onor Alixandre, s'il pooit, eslever.
 Emenidus l'apele, qui molt set bien parler:
 "De ceste gent, fait il, te veul merci crïer.
 Sire, par ta franchise pense du delivrer.
 Se tu fais cest message, pres sui de l'affier
 Q'encore t'en ferai du roi si mercïer
 Grant masse te donra de l'or de ça la mer
 Et t'en saront bon gré trestout li douze per."
 Et li vassaus respont: "Je me veul d'el pener.
 Se secours volés querre, autre i convient aler.
 Se je sui povres hom, ne me devés gaber,
 On ne doit povreté laidement reprover;
 Mais povres hom est vieus, sel devoit on tüer,
 Q'a paines est si preus q'on le veulle honorer,
 Ses oevres et ses fais a nul bien atoner.
 Por pramesse d'avoir me volés vergonder,
 Mais itant de respit vos en veul demander
 Que me laissiés les las de mon elme fremer
 Et monter el cheval, ou tant me puis fier;
 Puis certes vos envi de l'estor endurer,
 Et par icele foi que doi le roi porter
 Or sachiés bien de voir, et ce vos puis jurer,
 Qant partirai du champ n'i vauriés demorer."
 Emenidus respont: "Dieus te laist bien ouvrir!
 Par bon cuer i remains, je ne t'en puis blasmer."
 [2.21] Emenidus d'Arcage apela Festion.

Cil iert bien d'Alixandre, du mieus de sa maison,
 Ses maistre chambellens, en escrit le trovom.
 "Va, fait il, di le roi, de cui nos fiés tenom,
 Hui est venus li jors que chier les deservom.
 Li dus Betys de Gadres est plus fiers d'un lion,
 Ci nos a amené fiere procession
 Si nos promet a faire dure confession.
 Di au roi que chevauche a coite d'esperon
 Rescorre ses amis de mort et de prison.
 Se tu fais cest message, tu avras guerredon
 Et t'ame en iert el ciel si avra voir pardon.
 Tu vois pres nostre mort et de fi l'atendom,
 Trop est grans li meschiés s'a aus nos combatom.
 Se n'i vient li bons rois q'a segnor reclamom,
 Les vies et les chiés sans rachat i perdrom;
 Mais el fer de sa lance a nostre garison.
 Des que bien me ramenbre de la sieue façon,
 Et des bones proëces que veoir soliom,
 Si m'en croist li corages vers cest pueple felon
 Et si m'est bien avis q'a grant tort les doutom,
 Comment que il nos aient ci trovés a bandon.
 Mieus veul estre ferus el cors et el pomon
 Que li champs soit guerpis, que a aus ne jostom."
 Et li vassaus respont: "Or avés dit raison.
 Biaux sire Emenidus, or soions compaignon,
 Car tant com jou avrai si entier le blason
 Ne le hauberc du dos ne le hiaume d'en son,
 Ne partirai du champ si verrai tel tençon
 Dont li couart seront en molt male friçon.
 Or soions esprevier et il soient pinçon.
 Se il sont plus de nos, tant bien les requerom
 Que par les premerains ciaux derriere esmaiom.
 Nos somes tuit eslit et conneü baron
 Et privé Alixandre, qui nos a fait maint don;
 Bien est qant Dieus le veut que merite en aion.
 De vivre ou de morir a honor atendom,
 Si que nostre oir n'en aient vilaine retraçon,
 Ne li maines rois honte, quel fin que nos façom,
 Ne vers n'en soit ois de malvaie chançon.
 En tant lieu ont esté taint nostre gonfanon
 Que por ce n'est pas drois que nos espoëntom.
 Soions de bon confort et nos cuers rafremom,
 Car de trop criembre mort ne vient se honte non.
 As premerains s'en fuit qui trop doute prison,
 Qui muert por son segnor o Dieu a sa maison.
 Les amis Alixandre encor hui conoistrom;
 Se nus l'aime de cuer, au ferir le verrom."

[2.22] Emenidus resgarde desous un olivier,
 Descendu vit a terre un povre saudoier.
 Sa sele ravoit mise et cenglé son destrier,
 N'avoit ensamble o lui sergant ne escuier.
 Il a lance et escu et espee d'acier;
 N'a plus de toutes armes, que nes pot esligier,
 Et celes furent tels, s'il les vausist laissier,
 Ja frans hom par droiture ne les deüst baillier.
 Gros fu par les espaulles et les par le braier
 Et grailles par les flans s'ot le viaire fier,
 Blonde cheveleüre et longe por trecier,
 Et grant enforcheüre por le mieus chevauchier.
 Emenidus l'esgarde, qui molt fist a proisier,
 Et dist entre ses dens souavet sans noisier:
 "Se cist avoit proëce, bien samble chevalier,
 Por fil d'empereor nel convendroit changier."
 Mais s'il le conneüst, il l'eüst forment chier;
 Nés fu de sa seror, fieus d'un riche princier.
 Daires l'avoit tenu quatorze ans prisonier,
 Petis i fu portés por son pere ostagier;
 Eschapés lor estoit a l'entrer de genvier,
 En l'ost le roi de Gresce iert venus avant ier,
 Encor nel connoisoient riche home ne princier.
 Emenidus l'apele sel prist a araisnier:
 "Amis, en cest message vos vauroie envoyer,
 Car i alés por Dieu et por nos conseillier,
 Et dites Alixandre, s'il nos venoit aidier,
 C'onques en un seul jor ne pot tant gaaignier
 Ne de sa gent rescorre ne de ciaus enpirier
 Qui nos cuident anqui laidement damagier.
 N'avés pas bones armes, remanoir ne vos quier;
 Por ce que cest message pëuissiés exploitier
 Vous ferai mil mars d'or doner au repairier,
 Dont porrés achater et harnois et destrier."
 Et cil li respondi belement sans noisier:
 "Biaus sire Emenidus, ne m'en devés proier.
 Certes je ne vi onques Alixandre d'Alier,
 Ne par iteus paroles ne m'i veul acointier.
 Ja de povre home estrange ne faites messagier,
 Envoiés i plus riche, qui mieus sache plaidier;
 Ja Dieus, se je i vois, ne m'en doinst repairier.
 Certes je ne fui onques en nul estor plenier,
 En cestui remandrai, je m'i veul ensaier;
 Bien tost ou vos ou autre i puis avoir mestier.
 Mais d'une autre parole me vaurai afichier,
 Que ja Dieus ne garisse le mien cors d'encombrier
 Se de l'estor partir me veés hui premier;

Molt avrai grant ensoine se je premiers n'i fier."
 [2.23] Emenidus regarde par mi le champ a destre
 Et vit un chevalier qui mieudres ne puet estre,
 Cousins estoit germain Aridé de Valestre.
 Il li dist: "Biaus amis, por Dieu le roi celestre,
 Di le roy, va vers l'ost les cel bruel a senestre,
 C'or nos viegne secorre en cest champ nostre mestre.
 Onques n'en acointames un si felon apestre;
 Tous li plus vieus de nos ne vausist encor nestre
 Et tous li plus hardis s'amast mieus a Guincestre."
 "N'irai pas, ce dist cil, qui que s'en doie irestre,
 Se en cest mien escu ne voi ains tel fenestre
 Que bien savra li rois que autre ne puet estre
 Et li champs dont je part n'iert pas jeus de palestre
 Ne li chevaus sous moi n'a trop alé en destre."
 [2.24] Emenidus d'Arcage vit le duc aatir
 De grant meslee rendre et de l'estor souffrir,
 Et voit les premerains les fors escus saisir
 Et les hantes de fraisne paumoier et brandir,
 Tant riche gonfanon contre le vent bruïr,
 Tant elme vert et cler au soleil resplendir,
 Sous tant corant destrier ot la terre fremir,
 Ces moieniaus soner, tabors et cors bondir;
 La plus fiere ost du mont s'en peüst effreïr.
 Aridés de Valestre sist sor Baiart de Tyr,
 Dont il ot abatu Ladinés de Mommir.
 Emenidus l'apele o plors et o souspir:
 "Ha! sire, car pensés de ceste gent garir;
 Ne voi mais nul secors se m'en volés faillir.
 Tel m'ont hui du message respondu lor plaisir
 Qui seront ains le vespre trop tart au repentir.
 Tant avons atendu tart serons au choisir
 Le quel nos vient mieus faire, ou attendre ou fuïr."
 Et li vassaus respont: "Des or me puis haïr
 Puis que on ne me veut au grant fais sostenir.
 On me soloit jadis o les mellors souffrir,
 Et ne por qant bien doi si preudome obeïr,
 C'onques mieudres de vos ne pot lance tenir.
 Por vos et por le roi, que devons tuit servir,
 Et por ce que ciaux voi en ensai de perir,
 Le message ferai, Dieus nos en laist joïr!
 Mais ains verrai mon hiaume enbarer et croisir,
 Et mon escu percier, mon hauberc desartir,
 Et le sanc de mon cors a grant randon issir,
 Le cheval desous moi d'aigre suor covrir.
 Sans bien voires enseignes ne veul le champ guerpier,
 Ne m'en devra nus hom gaber au departir

Ne li rois trop blasmer se a lui puis venir."
 De deus pars s'entrevienent apresté de ferir.
 [2.25] Molt furent peu li Grieu, mais bien se conforterent.
 Tuit descendent a pié, communalment s'armerent;
 Lor poitraus ont restraint, lor chevaus recenglerent,
 Lor guiges racorcierent et lor resnes nouerent,
 Enseignes et penons en lor lances fremerent;
 Lor escus a lor cols, sor lor chevaus monterent.
 Estroitement chevalchent et sagement errerent.
 Lors dist li uns a l'autre que bones oevres perent;
 Les paroles sont beles de ciaux qui bien ouvrerent.
 La fu grans li meschiés ou li Grieu assamblerent
 A l'empire de Gadres, quant ensamble ajosterent,
 Car ne sont que sept cens et cil trente mil erent.
 As premeraines jostes forment i meschaverent,
 D'un de lor mellors homes le jor i desevrerent,
 Dont en icel besoing plus se desconforterent.
 Alixandre le jor maintes fois regreterent;
 Por qant tant i esturent que chier le compererent,
 Car il par sont si poi q'a paines entr'aus perent.
 [2.26] A l'assamblar des Griens josta premiers Sansons,
 Desirrans de sa terre dont li fu fais li dons.
 Il et li dus Betys brochent des esperons,
 Si grans cops s'entredonent, baissiés les gonfanons,
 Que li hauberc fausserent tres par mi les blasons.
 Sanses brise sa lance s'en vole li tronçons,
 Et li dus feri lui, iriés comme lions,
 Que desous la mamele li caupe les regnons,
 Toute plaine sa lance l'abat mort des arçons.
 Outre s'en est passés si goins comme uns faucons.
 Par contraire li dist: "D'un plait estes semons
 Dont ja par vostre bouche jugement n'en orrons;
 Hui savra Alixandres que de riens ne l'amins
 Et li sires de Tyr que de vous le vengons.
 Ne tenrés en sa terre fremetés ne dongons."
 [2.27] La fu molt grans li dels ou Sanses fu chaois
 Et jut mors a la terre sor son escu tous frois;
 La veïssiés les Griens coreçous et destroys.
 Emenidus le pleure et se pasme trois fois,
 Bonement le regrete et depiece ses dois:
 "Gentieus rois Alixandre, ja mais ne nos verrois!
 Ahi! que n'estes ci, gentieus sires adrois,
 En l'estor perilleus le vassal vengissois.
 Hui perdrons tuit les testes, de verté le sachoï.
 Sanses, s'or ne vos venge, couars sui et revois."
 Le destrier esperone contre mont un chaumoï,
 Si se met en la presse que tous i fu estroï,

Et fiert Salehadin, qui sire iert de leur lois,
Arcevesques de Gadres ausi noirs comme pois,
L'eschine li trencha o l'acier qui fu frois.
De la mort de Sanson fu iluec pris li drois,
Et li Grieu s'entralient et plevissent lor fois
Que l'uns ne faudra l'autre tant soit de mort destrois.

[2.28] Salatons fu armés sor Liart blancherale,
Un fort destrier isnel qui fu nes de Valfale,
Onques ne gousta d'eaue, lait boit, et char q'on sale
Li portè on trossee et molue en la malle.
Salatons fu uns quens et tint la cité d'Ale,
Qui siet sor la mer Rouge, ainc nus hom ne vit tale.
Riens n'i avoit sans or ne degré ne eschale,
Mais li Grieu la conquirrent, or n'i a tor ne sale.
Salatons esperone et vait joindre a Ostale,
Un chevalier de Gresce qui tint la tor d'Avale.
Desor le gros du pis son acier li enpale,
Par l'arçon de derriers du destrier le devale.
Estes vos une eschiele de gent noire et de pale,
Ars portent et saietes, molt par est laide et sale;
Toute jor en estor de ferir communale,
A la gent Alixandre fu molt crüeuse et male.

[2.29] Ciaus apeloient Turs qui portent les roieles,
Les ars et les saietes qui tant ierent isneles.
A la gent Alixandre crevoient les pruneles,
Et as pluisors Grigois espandent les boëles.
Perdicas et Liouines sordent d'unes vauceles,
Lor espees sanglentes, lor mains a lor maïsseles.
De toutes lor compaignes qu'il menoient si beles
N'ont que vint chevaliers qui mais sieent en seles.
Vers les Turs esperonent par mi unes combeles,
As espees lor trenchent les pis et les mameles.
Emenidus escrie: "Ferés, baron, chaeles!
Se Dieu plaist, encor hui orrons bones noveles."

[2.30] Corneüs sist el bai q'a Cesaïre ot conquis,
Des esperons le hurte, es grans galos s'est mis;
En la presse se met, de bien faire pensis,
Comme bons chevaliers qui iert d'armes penis,
Et fiert un chevalier, neveu au duc Betys,
Que le cuir et les ais trenche de l'escu bis;
Mort l'abat des arçons ou li ors iert assis.
Molt li a bien mostré qu'il n'iert pas ses amis;
Cil ne s'en pot gaber se Sanses est ocis,
Tel le plouront ancui qui ançois orent ris.

[2.31] Antigonus de Gresce vint par l'estor poingnant,
Lance droite sor fautre et l'escu trait avant,
Les langes de l'ensegne vont au vent baloiant,

Bien samble chevalier hardi et combatant
 Et fu molt bien armés sor un destrier ferrant;
 Empereres ne rois nul mellor ne demant,
 Car il i faudroit tost se il l'aloit querant.
 Et voit un Arrabi qui les rens vait cerchant,
 La compaigne des Griens forment affebloiant;
 Quatre lor en a mors d'un poindre maintenant.
 Antigonus laist corre le cheval remuant,
 Et cil broche vers lui, nel va pas redoutant.
 Li Arrabis failli, car cheval ot tirant;
 Antigonus le fiert, tous plains de maltalant,
 Grant caup en son escu de son espié trenchant,
 Desous la boucle d'or fent les ais d'olifant;
 Par grant vertu li ront son hauberc jasant,
 Tant com hanste li dure, l'abat mort sovinant.
 Sa lance li peçoie mais nel laist pas a tant,
 Met la main au costé si en a trait le branc
 Et guenchist vers les autres en la presse plus grant;
 Il nel tenront hui mais du ferir por enfant.
 [2.32] Androines sist armés et galope sor frain,
 Lance roisde levee et l'enarme en la main.
 As garnemens tenir ne sambla pas vilain,
 Plus cointement nes tint nus fieus de chastelain;
 Si s'afiche es estriers qu'en croissent li lorain
 Et broche le destrier qu'il ot delivre et sain.
 Un Arrabi felon encontra premerain,
 Qui tint tout le païs d'environ flun Jordain,
 Calafier ot a non et fu fieus Godouain,
 L'amiraut beduin de terre Madiain;
 La gent de sa contree mengüent petit pain,
 Lait boivent de chamel et au soir et au main.
 Par desus le jupel ot vestu un clavain;
 Sa lance ne fu mie de sap ne de fusain,
 D'une fort cane fu norrie en sousterain,
 Loïe fu de ners de chevrel ou de dain,
 Li fers est plus trenchans que faus qui soie faim.
 Des homes Alixandre ot ocis un commain
 Et un conte abatu tout envers en un plain;
 Mais ja sera vengiés de son cousin germain,
 Car Androines le fiert ens el pis tout de plain,
 Le clavain li fausa, qui iert du tans Elain,
 Et li trencha le cuer o l'acier corroçain.
 Tant com hanste li dure l'abat mort el terrain,
 Le cors en laist sanglent et sans arme tot vain.
 [2.33] Festions sist armés sor un amoravi,
 Ainc hom ne vit mellor gascon ne arrabi;
 D'un chier paile iert covers, onques mellor ne vi,

Trois lionciaus d'or fin i ot toissu en mi;
Et li vassaus fu preus si ot le cuer hardi,
A l'estraindre des armes li destriers tressailli.
Et fiert un riche duc que des autres choisi;
Cil avoit en l'estor Licanor acuelli
Et de caus si charchié que ses chevaus chai,
Mais cil le vengera quil tenoit a ami.
Tel li done ens l'escu frait li a et parti,
Le blanc hauberc du dos derrouet et desarti;
El cors li met l'espîé a tout le fer burni,
Si que dedens le pis la hante li croissi.
Tant roisdement l'enpaint q'a terre l'abati;
Cil est mors a dolor et maint autre autresi.
[2.34] Aristés vint poignant par mi l'estor plénier,
Hante roisde sor fautre a loi de bon guerrier;
Li fers en fu trenchans et l'anste de pumier,
Les langes de l'ensegne laist au vent baloier.
Le cors ot bel et gent et le visage fier,
Ainc ne veïstes home mieus samblast chevalier;
Riens ne pooit durer encontre son acier.
Durement se penoit des Gadrains damagier,
Et fiert un duc de Perse, niés estoit Murgaïfier,
Que le cuir et les ais fait de l'escu percier
Et le hauberc du dos desrompre et desmaillier.
Par mi le cors li fait son gonfanon baignier,
Si que de l'autre part li a fait essiauer;
Tant com hanste li dure l'abat mort du destrier.
Cil compere Sanson, qui quel doive vengier.
Tel le plouront ancui qui s'en rirent premier.
Lors commence li rens sor destre a espessier.
La peüssiés veoir un estor si plénier,
Ces escus estoër et ces lances froissier,
Ces vassaus enverser et ces seles vuïdier,
Et ces chevaus aler par ces champs estraiier.
Aristés laisse corre, qui n'a soing de tencier,
En mi la gregnor presse s'est alés acointier.
La vit Emenidon tant fierement aidier,
Sanc et cervele expandre et poins et piés trenchier
Et l'un mort deseur l'autre verser et trebuchier.
"Ha! gentieus dus, fait il, tant par fais a proïsier;
Gent qui tel connestable ont por aus justicier
Ne se devoient mie por petit esmaier,
Mais le droit lor signor vistement chalengier,
Car certes a destruire ne sont mie legier.
Li caup de vostre espee nos font tous rehaitier,
Car après vostre main n'a nus entrais mestier.
Honis soit cui il poise se li rois vos a chier,

Car nus mieudres de vos ne puet lance baillier."
 [2.35] Emenidus d'Arcage vit la gent honoree
 Por l'amor Alixandre de mort abandonee,
 Que por meschief que voie ne se tient effreee
 Ne vers la gent de Gadres ne doute la mellee.
 Li dus les reconforte au trenchant de l'espee,
 Car contre son acier n'a nule arme duree,
 Et Ferrans li cort mieus toute une randonee
 Que faucons n'espreviers ne vole a recelee.
 Un duc lor a trenchié tres par mi l'eschinee,
 Si que l'une moitiés est de l'autre sevree,
 Mais l'espee li brise si q'en trois est volee
 Par mi l'enheudeüre ou de viés fu quassee.
 La maisnie Betis iert ja si reüsee
 Q'arriere estoit sortie plus d'une arbalestee.
 Li bers fu molt aidans, la lance a recouvree,
 Ains qu'il parte d'entr'aus iert en chaut sanc boutee
 Et la mort de Sanson chierement comperee
 Et as plus orgelleus fierement demandee.
 Del seneschal le duc a sa gent delivree,
 Qui l'avoit a deus poindres molt durement grevee.
 Cil tenoit Damiete, une cité loëe,
 Del tans saint Abraham fu desus mer fondee;
 Sieue iert la paumeroie, qui tant iert renomee,
 Toute tresq'en Larris ot la terre aquitee.
 Emenidus le fiert en la targe bendee,
 Sous la boucle a argent li a fraite et quassee
 Et la broigne doubliere et rompue et faussee.
 Cinq piés li met el cors de la lance planee,
 Si que de l'autre part a l'ensegne mostree;
 Tant com hanste li dure et plus une tesee
 L'en porte en mi le champ de la sele doree.
 La maisnie Betys se fu dont rasambee,
 Seure li sont couru et font une hüee.
 Se la gent Alixandre ne l'a bien encontree
 Au grant meschief qu'il voient, n'en doit estre blasmee.
 Lors ont estal guerpi et place remüee
 Tresq'a une plaissie q'ont devant aus trovee.
 Ja fust la gent roial toute desbaretee,
 Ne fust Emenidus a la chiere menbree
 Qui derriere se mist o la lance aceree
 Et a tant le grant fais et la presse enduree
 Que trestoute la chace a par force arestee.
 Mais l'ensegne Alixandre n'a il pas oubliee,
 Mascedoine a trois fois hautement escriee.
 L'ensegne qu'il escrie les la bruelle ramee,
 Que li Grigois avoient d'une part acostee,

Lor a tel hardement et seürté donee
 Tuit recuevrent ensamble, n'i ot regne tiree.
 [2.36] La ou li Grieu recuevrent fu li chaples molt grans,
 Et selonc le meschief li affaires pesans,
 Mais li home Alixandre fierent grans cops des brans;
 Bien voient qu'il ne sont pas per ne a tans quans,
 Il ne se fient mie en lor chevaus courans,
 Car uns ne se fueroit por un mui de besans;
 Il cuideroit bien estre plus vieus que recreans.
 Mais molt se vendent chier as Mors et as Persans,
 Qu'il nes tenront hui mais de ferir por enfans.
 [2.37] Grieu se vendent molt chier, qu'il n'i truevent manaie
 Envers la pute gent qui de pres les ensaie.
 Une eschiele de Turs lor sourt les une haie,
 Plus furent de sept mil, n'i a celui ne traie.
 Des homes Alixandre n'i a gaires sans plaie,
 Mais de vengier son cors nus d'aus ne se delaie.
 Li solaus s'esbaudist qui en lor armes raie,
 Tel hardement lor done tous li cuers lor esgaie.
 La baniere Alixandre contre le vent balaie;
 Or dient q'as espees querent acorde et paie.
 [2.38] La maisnie le roi fu molt affebloie,
 Por l'estor maintenir malmise et enpirie;
 Ne n'i a gaires nul qui n'ait la char percie
 Par desous son hauberc et rompue et trenchie,
 Descouloree et pale, que de sanc fu voidie,
 Car l'eschiele de Gadres qui se fu debuschie
 Lor traient plus espés que n'est pluie deugie.
 Duel ot Emenidus, cui ele fu charchie,
 Qant la vit a cel poindre si fort estoutoie.
 Il embrace l'escu s'a la lance baissie,
 Et Licanors li preus ra la sieue alongie.
 Chascuns des compaignons a la targe embracie,
 Il laissent corre ensamble vers la pute lignie;
 Ja i avra espee en cervel touellie,
 De plus de mil en ont la champaigne voidie.
 L'eschiele se repent que tant fu aprochie,
 Cil qui pot eschaper n'oblia sa corgie.
 Ensi comme li Turc orent place guerpie,
 Emenidus les tint qu'il n'aillent a folie.
 Par mi un val parfont devers destre partie
 Lor resort une eschiele du regne de Nubie.
 Plus furent de sept mile de cele gent haie,
 Roële avoit chascuns et fort cane burnie
 Et li pluisor ensaignes de soie d'Aumarie;
 Molt i ot de lor loi fiere chevalerie.
 Salatins les conduist, qui les Grieus n'aime mie,

Onques nus joenes hom n'ot gregnor estoutie,
 Car ne prise cors d'ome vers le sien une alie.
 El chief de Rouge Mer avoit hebergerie,
 Une cité molt bele, assasee et garnie,
 Clere fu apelee qant el fu estableie.
 Tant par fu bele et riche entor la pescherie
 Que trestoute paissoit la terre de Surie,
 Mais or l'ont crestien trestoute desertie.
 Salatins vaura faire premiers ceste envaie;
 Tant forment les requiert et par tele aatie
 A l'assambler des Griens en i brait molt et crie.
 La maisnie roial en fu molt effreie,
 Car grant mestier avoit de secors et d'aie.
 Ja fust a icel poindre la bataille fenie,
 Ne fust Emenidus, qui proëce n'oublie,
 Qui deerrains se mist o la lance burnie.
 Cel tant qu'il ot de gent aveuc lui se ralie,
 Grant hardement lor done quant Mascedoine crie.
 [2.39] Devant ses compaignons vint armés Salatins
 Baus des Griens desconfire, tous les tint a frarins;
 Onques puis ne fu nes si cointes Beduins.
 Ses chevaux fu covers de deus cendaus porprins,
 Orfresés environ et par roies sangins.
 O le fer de sa lance fu ocis uns meschins,
 Cil iert parens Filote et ses germaines cousins.
 Onques nel pot garir li haubers doublentins,
 Par mi le cors li passe li gonfanons porprins,
 Que tous en fu sanglens li bliiaus ostorins;
 Puis en ot sa deserte comme d'Abel Caÿns,
 Car Licanors le fiert, qui pres iert ses voisins,
 A mont desor son hiaume ou reluist li ors fins;
 Desi en la cervelle but li brans acerins.
 Filotes tint l'espee et fu sous l'elme enclins
 Qant vit mort son parent q'a terre jut sovins,
 Bonement le regrete, o ses mains trait ses crins.
 Por l'amor du vassal commença tels traïns
 Dont le jor fu perciés mains peliçons hermins,
 Et maint bon chevalier aprochié de lor fins.
 Des mors et des navrés fu jonchiés li chemins,
 La meslee commence les le bruel de sapins.
 [2.40] Par le champ esperone li povres desarmés,
 Niés fu Emenidun et de sa seror nes.
 Li escus de son col fu en sept lieux troués,
 Et il par mi le cors d'une lance navrés.
 Bien garra de la plaie, que li fers n'iert pas les,
 Et ne por qant si iert d'une faisce bendés.
 A un baron de Gadres s'est en l'estor jostés

Qui iert a une part fors des autres sevrés.
 Ainc ne vi chevalier plus bel fust atornés;
 Li hiaumes fu a pierres et li cercles dorés
 Et ses escus fu chiers et richement bendés,
 De sinople et d'asur iert par entor orlés;
 Li chevaus ou il sist fu uns bais sejoinés.
 Li vallés vit les armes si fu entalentés,
 Le cheval esperone, cele part est alés.
 La lance li peçoie desor un des costés,
 Et lui et son cheval abat en mi uns prés.
 L'eschine li est fraite et li cols desnoués,
 Plus de quatorze fois s'est d'angoisse pasmés.
 Li vallés saut a terre, qui bien fu apensés,
 Du cheval et des armes s'est molt tost atornés,
 Prist l'escu as enarmes, el destrier est montés;
 Le cheval esperone, molt est bien conreés.
 Le branc tint en sa main, s'a ses piés regardés,
 Li cuers li est el cors plaine paume levés;
 Et vit Emenidon qui molt estoit grevés,
 Tant s'estoit combatus tous les bras ot enflés;
 Cheüs fu desous lui li ferrans pumelés.
 Plus de sept chevaliers ot sor lui arestés
 Qui sovent le feroient de lor brans acerés.
 Li vallés crie Arcage, cele part est tornés,
 S'en fiert un de l'espee, dont li brans est letrés,
 Que le bras li caupa, a la terre est volés.
 En la presse se fiert, si com vint, abrievés,
 Plus de cent caus lor a de l'espee donés.
 Ou il veullent ou non, les a si conreés
 Que par force les a de la place getés.
 Li chevaus se redrece, li quens s'est relevés,
 Le vallet apela: "Biaus amis, ça venés.
 Com avés non? Qui estes qui tel mestier m'avés?"
 "Sire, dist li vallés, ja mes nons n'iert celés,
 Corineüs me claiment, ainsi sui apelés.
 Ma mere fu d'Arcage et tous mes parentés.
 En la prison roi Dayre fui quatorze ans gardés,
 Assés i fui petis por mon pere portés.
 Molt avrai hui esté por mes armes gabés;
 Merci nostre segnor, or en avons assés.
 Niés sui Emenidon et de sa seror nes,
 Or vois querant mon oncle par estranges regnés."
 "Dieus, fait Emenidus, tu soies aourés!
 Biaus niés, je sui vostre oncles que vos tant desirrés
 Et vos estes mes niés, bien sai qu'est verités.
 Or serés mes amis et jou vostres privés,
 En la court Alixandre serés des plus amés."

Ansdeus ses bras li a desor le col getés,
 Plus de cent fois le baise, sor lui s'est aclinés.
 "He! Dieus, dist li vallés, com sui bons eürés.
 Molt est mes cuers en joie, biaux sire, or en pensés
 Que je soie par vos et par moi honorés."
 "Niés, dist Emenidus, pres de moi vos tenés;
 Li estors est molt fiers, tost serions sevrés."
 "Sire, dist li vallés, ains sera comparés,
 Li brans de ceste espee tains et ensanglentés
 Que ja parte de vos s'a mort ne sui navrés."
 [2.41] Licanors et Filotes vont irié par l'estor,
 Et sont andui li frere armé d'une color.
 Alixandre reclaiment, le maine emperaor:
 "Ahi! si grant souffraite avons hui de segnor.
 Tholomés et Dans Clins, ne savés la dolor
 Que li baron de Gresse souffriront hui cest jor;
 Vous venissiés molt bien enevois au secor."
 Licanors vait ferir un des fieus Sarator,
 Le chief sor les espaulles en a pris a son tor.
 E vos Guimadochet desor un missaudor,
 Sires fu de Melide et tint Roche Menor,
 Onques en nule terre n'ot tel devineor;
 Et poignent avec lui tel mil combateor
 N'i a nul qui de lui ne soient teneor.
 Et li sires fu riches si ot molt grant honor,
 En la terre d'Aufrique n'ot tel sortisseor,
 Sovent demostroit pertes et joies et tristor.
 Vait ferir Filotés en l'escu de colour;
 Por ce que ses chevas ot trop souffert le jor
 Abat entre ses cuises le destrier missaudor,
 Sor la gambe senestre li jut comme une tor.
 Entre lui et la terre le tint tant a sejour
 C'onques de lui lever ne pot avoir laissor.
 Sor Filote s'arestent maint fil de vavasor
 Qui vers la gent de Gresse n'orent onques amor;
 Contre terre le fierent par mi son elme a flor.
 Cil crie Mascedoine, que l'entendent pluisor,
 Ja i porra bien perdre s'il n'a secors des lor.
 [2.42] Li Grieu oient l'ensegne Alixandre criër,
 Por Filote rescourre courent i quatre per,
 Perdicas et Liouines et Licanor li ber,
 Emenidus d'Arcage, qui ne s'i vaut celer.
 La veïssiés les Grieus belement assambler,
 Maint hiaume i ot trenchié ains qu'il peüst monter,
 Et maint pié et maint poing i veïssiés voler.
 Ahi! si grant damage, que li Grieu sont trop cler,
 A tant d'effors comme orent les firent remüer.

Cil de Gadres s'aïrent quant les virent ester,
 Car tant estoient poi q'on les pooit nonbrer.
 Ireement guenchissent si vont a aus joster,
 Ja convenra as febles les plus fors comparer.
 Nel porront li Grigois longement endurer,
 Ou aus convient morir ou du besoing torner.
 [2.43] Pour Filote rescourre sont li Greu assamblé,
 La ot as brans d'acier maint pesant caup doné.
 Emenidus d'Arcage a un grant poindre outré,
 L'amiraut d'Escalone a si bien rencontré
 Le chief sor les espaulles en a au branc sevré.
 Cil s'arestent sor lui qui molt l'orent amé,
 A loi de gentil home l'ont plaint et regreté.
 Et li Grieu entre tant ne s'ont mie oublié;
 Filote ont el cheval par force remonté.
 De vengier son anui a bien le cuer menbré;
 Ce qu'il fu abatus iert ains nuit comperé.
 Emenidus laist corre le cheval abrivé
 Et se fiert li gentieus en l'estor aduré
 Ausi comme esprevier qui vole a recelé
 Depart les estorniaus qui pasturent el pré,
 Derront Emenidus par vive poësté
 La force des Gadrains quant mieus sont ajusté.
 Cele part ou il torne sont il molt effréé
 De conduire son cors a chascuns enpensé;
 Cil qui onques ains pot li a chemin livré.
 Au departir d'un Turc qu'il lor a mort geté,
 Le fiert uns Arrabis qui derrier l'ot visé,
 D'une cane molt roide o un fer acéré
 Le blanc hauberc li a desrout et desserré
 Et le vassal el cors d'outre en outre navré,
 Si que de l'autre part en a le fer mostré;
 La cane brise el pis, qui molt l'a esgené.
 Il meïsmes l'en traist, qui molt ot grant fierté,
 Puis a celui de pres o le branc si hasté
 Que tresqu'en la çainture l'a fendu et caupé.
 De son bliaut d'ermine a le pan desciré,
 Par mi lieu de ses plaies en a son cors bendé
 Por le sanc estanchier qui'n aloit a plenté.
 De ses compaignons crient, car il sont molt grevé,
 Que s'il savoient ore de son mal la purté,
 N'i avroit puis samblant de bien faire mostré;
 Lor termine atendroient du tout desconforté,
 Car s'il seus lor defaut malement ont erré.
 [2.44] Cil de Gadres n'ont mie conneüe l'ovraigne,
 Si com Emenidus d'Arcage la souveraine
 Est ferus ens el cors assés pres de l'entraigne,

Fors seul li dus Betys a la chiere grifaigue;
 Cil vit le caup ferir et la plaie qui saigne.
 Por ce que sa maisnie le trueve si estraigue,
 Et tous li recovriers estoit de sa compaigne,
 En fu liés en son cuer, n'a droit que il s'en plaigne.
 Vers lui point le cheval, mais ains crie s'ensaigne
 Et commande sa gent que cele part s'estraigne.
 Et Emenidus sist sor Ferrant de Cartaigne,
 Ainc ne vit on mellor ne gascon ne d'Espaigne.
 Espee tint el poing forgie d'Alemaigne,
 Cel jor ne la donast por l'onor d'Aquitaingne.
 Ireement chevalche le vaucel d'une plaigne,
 Et Betys li descent du chief d'une montaigne.
 Iluec s'entrencontrerent a si riche bargaigne
 Molt en porra li uns peu prisier la gaaigne.
 Ains ne dona tel caup Corestins de Bretaigne
 Ne cil de Durendal qui fu niés Challemaine
 Com fait Emenidus, cui maltalens engraigne.
 Betys n'a si fort hiaume que trestout ne li fraigne,
 N'il n'a tant de loisir que au cheval se praigne;
 Si lons com il estoit mesura la champaigne.
 Qui voit sa contenance ne cuide qu'il se faigne,
 Tels rais li saut du nes qui son visage baigne.
 Or li avra mestier mires qui plaie estraigne,
 Car cil l'a encontré qui maint orguel mehaigne;
 Des or mais est bien drois que ses orgeus remaigne.
 [2.45] Por rescorre Betys i sont ses gens venues,
 Trois eschieles qui sont du tertre descendues;
 En la menor avoit mil lances esmolues
 Et mil canes molt roides et mil espees nues.
 Les compaignes le roi ont durement ferues
 Et laidies forment et si escombatues
 Que ferant les en mainent et mortes et vaincues
 Vers un viés chastelet tout unes gastes rues.
 Emenidus d'Arcage ot ses resnes rompues,
 Au guenchir vers le duc les ot courtes tenues,
 Li bougon estendirent, si furent fors issues.
 Et Ferrans s'en vait mieus par ces combes agües
 Que faucons monteniers ne randone après grues.
 Cil se prent au cheval qui maintes ot veües,
 Ses oevres au besoing n'ierent pas desseües;
 Delés unes broceles menüement fuellues
 La retint le cheval dont paines ot eües;
 Se les resnes ansdeus li avoit Dieus rendues,
 As Gadrains reseroient dures paines creües.
 Por rescourre Betys sont les gens assamblees,
 [2.46] Trois eschieles qui furent des tertres devalees.

A cheval le ront mis, ses armes recouvrees,
Son poitrail relachié et ses renges nouees.
Le mieus de ses barons et ses gens plus privees
En a a une part devers soi apelees,
De vengier son anui les a amonestees,
Et il les en trova molt bien entalentees.
Emenidus d'Arcage ot ses resnes nouees
Et remonte el cheval sans autres demorees.
Si com bestes de bois par brachés effreees
Que li veneor ont par ataindre trovees,
Revint li gentieus hom au chaple des espees.
Les compaignes le roi trueve desbaretees,
D'aïde de signor durement esgarees,
Car li auquant s'en fuient, lor targes adossees;
Lor escus ont guerpis et lor lances getees.
Lors a li gentieus hom grosses lermes plorees,
D'a val li sont du cuer el visage montees,
Si que par mi les ieus li resont fors coulees.
Lors s'escria en haut: "Deservons les saudees
Que nos a Alixandres par maintes fois donees.
Mal avroit emploié son vin et ses pevrees,
Ses chars, ses venisons et fresches et salees,
Ses riches dras de soie et ses porpres listees,
Ses biaux henas d'argent et ses coupes dorees
Et ses beles richeces qu'il nos a presentees,
Se ci ne sont por lui nos proëces mostrees.
Por noient avons hui tant lor forces doutees,
Car lor mellors batailles avons tels conreees
Toutes sont derrompues, n'ierent mais assamblees.
Gardés hui vos honors, franchises gens honorees,
Hui mais verrés mes caus et mes pointes doblees."
[2.47] Qant voit li dus Betys des Griens la contenance,
C'onques si poi de gent n'orent si grant poissance,
Il en jure ses dieus ou il a sa creance:
"Se li home Alixandre sont tuit de tel poissance,
Il n'a cité el mont ou truisent contrestance;
Ou il ne sevent gaires ou il le font d'enfance.
S'or nes fais remüer, molt avrai grant pesance."
Le destrier esperone qui fu nes d'Abilance
Si feri Licanor, qui les autres avance,
Devers le costé destre sor la reconissance,
Par mi le cors li passe les coutiaus de la lance.
Licanor tint le branc acéré de Valance
Et fiert le duc Betys ens l'elme de Costance.
Si grant caup li douna que sor l'arçon le lance.
Si navrés com il iert en preïst la vengeance,
Qant après le duc poignent tels mil d'une sieuance

Qui tuit ierent si home de la sieue aliance.
 Caulon ont abatu et Aristé d'Auquance;
 De tels trente Grigois lor i ont fait sevrance
 Dont li rois avra ire et dolor et pesance.
 Cil de Gadres les outrent, or ont li Grieu errance;
 La bataille grigoise a cest poindre balance,
 Il n'i a si hardi qui n'ait de mort doutance.
 [2.48] Cel jor fu li besoins fierement commenciés.
 Molt i ot de Grigois malmis et enpiriés;
 Cil de Gadres les hurtent ses ont si esmaiés
 Que ferant les en maintent tresque vers uns plaissiés;
 Molt les ont a cel poindre forment estoutoiés.
 Emenidus recuevre sous l'escu enbrunchiés,
 En sa main une lance dont li fers n'est pas viés;
 Un chevalier de Gadres feri tout desploiés,
 Q'ambedeus les estriers li a tolu des piés;
 Li agus de son hiaume est ens el pré fichiés.
 Et li Grieu lor guenchissent de proëce afichiés;
 Cil de Gadres se tienent, qui molt sont vesiés.
 Ilueques veïssiés tant fors escus perciés
 Et tant hauberc fauser et tant hiaumes brisiés,
 Des mors et des navrés est li chemins jonchiés.
 Aridés de Valestre va par l'estor iriés,
 De la mort as Grigois est forment coreciés.
 Vait ferir un Gadrain dont il fu aproismiés,
 Que par desous le foie ert li penons baigniés;
 Mais troi conte le fierent de lor trenchans espiés,
 Li dui en son escu et en l'auberc li tiers.
 Sor l'arçon deerain en est tous enbrunchiés,
 Li chevaus s'agenolle, tant fu de caus charchiés;
 Mais par molt grant vertu s'est li vassaus drechiés,
 O l'espee qu'il tient s'est d'aus si esmouschiés
 Qu'il n'i ot si hardi ne s'en soit eslongiés.
 De deus espiés trenchans fu ens el cors plaiés;
 Des Grigois entor lui li prist molt grans pitiés,
 Bien voit s'il n'ont secours lor termes est jugiés;
 Par lui iert Alixandre li messages nonciés.
 De la presse se part quant fu pris li congiés,
 Forment pleure sous l'elme quant les siens ot laissiés.
 Cil de Gadres le voient, tienent soi engigniés;
 Qui chaut? que ja par home ne sera mais bailliés.
 Par mi une montaigne s'en va tous eslaissiés,
 Au devaler d'un tertre s'est en un val plungiés,
 Li chevaus desous lui a bien rompu ses giés.
 Tresq'au tref Alixandre n'iert mais ses frains sachiés;
 Ja dira tel parole dont li rois iert iriés.
 [2.49] Tholomés et li rois et Dans Clins sont venu

D'un assaut merveilleus q'a Tyr orent eü,
 Mais cil de la cité se sont bien deffendu.
 Li rois devant son tref voit le mes descendu,
 Molt resamble bien home de felon lieu issu;
 Vit sa lance brisie et percié son escu
 Et son hauberc fausé et son elme fendu,
 Et le vassal meïsme par mi le cors feru.
 Sous l'elme le regarde si l'a reconeü;
 Il le dut bien conoistre, car des douze pers fu.
 Li rois li demanda: "Aridés, dont viens tu?"
 Et cil li respondi: "Mal nos est avenu.
 Rois, car secors tes homes a force et a vertu;
 El val de Josafaille sont tuit mort et vaincu.
 Li dus Betys de Gadres nos a cest plait meü,
 Et a trente mil homes nos sont devant venu.
 Sanson le neveu Daire nos i ont mort rendu
 Et Licanor navré et Filote abatu.
 Mais ançois que jou aie mon blanc hauberc tolu
 Savrai je com il sont en l'estor maintenu."
 "Cist en fait bien a croire," fait Dans Clins qui la fu.
 "Voire, dist Tholomés, molt li est bien paru."
 Puis regrete li quens Aristé et Caulu,
 Et li rois Alixandres Emenidun son dru,
 Et de Sanson de Perse sont grain et irascu.
 "Par foi, dist Alixandres, or ai je molt perdu."
 Puis s'escrie, "Montés! trop avons atendu,
 Gardés que n'i remaigne ne joene ne chanu."
 Aridés les en maine par mi un val herbu
 El val de Josafaille delés un bos fuellu.
 Ançois que cil de Gadres soient aperceü,
 Lor sourdent li Grigois, qui molt sont irascu;
 Tels a son escu sain qui ja l'avra fendu.
 [2.50] Qant li Grigois conurent Alixandre d'Alie
 Et le secors des lor qui leur venoit aidier,
 Il n'i ot si malvais ne s'afiche en l'estrier,
 Lors sonerent un cor por lor gent ralier.
 A une part du champ s'esturent li forrier
 Et virent lor bataille forment estoutoier,
 Quatre des douze pers retenir et loier,
 Caulus et Aristé et Leoines le fier;
 Lors enpirent un poindre por lor pris essaucier.
 Li dus Betys regarde vers les puis d'Alie,
 Vit la force des Griens contre lui chevalchier,
 Alixandre meïsme sa bataille rengier,
 L'ensegne desploie venir el front premier;
 Ains puis n'i ot parlé de tenir prisonier.
 Il a dit a ses homes: "Esgardés, chevalier.

Ves la gent Alixandre pres de nos aprochier,
 Ancui pense li rois durement gaaignier;
 Gardés q'a cest estor soions et fort et fier
 Et maintenons le chaple as espees d'acier,
 C'onques mais ne trovames tel gent a acointier.
 Mieus vaut amis en voie que argent ne or mier."
 [2.51] Qant Alixandres vint, grant mestiers en iert lors;
 Emenidus d'Arcage estoit navrés el cors
 Et Filote abatus et navrés Licanors
 Et Caulus retenus, Aristés et Salors,
 Et Sanses mors getés, et li quens Sabilors.
 N'issoient mais du pas bruns ne bauçans ne sors.
 S'auques tardast li rois, ja preïssent tel mors
 Que de lor set cens homes n'en fuissent dis estors.
 Lors josterent li Grieu as Gadrains et as Mors.
 [2.52] Iluec ou li Grigois sont as Gadrains josté
 Veïssiés un estor molt felon et douté;
 Durement s'i perdirent li hardi desarmé.
 Li rois point Bucifal, qui li cort de son gré,
 Et mist lance sor fautre s'a premerains josté.
 Fiert Calot de Nubie, si com l'a encontré,
 Q'entre les bras des boucles sont li escu troué
 Et li cheval sous aus derriere aquatroné.
 Calos brise sa lance qu'iert de fraisne plané,
 Et li rois le fier si que l'auberc a fausé,
 Fer et fust et enseigne par mi le cors passé
 Et l'arçon de la sele derrier li a quassé;
 Toute plaine sa lance l'abat en mi le pré,
 Si que par mi le cors l'a en terre espeé.
 Puis cria Mascedoine, s'a le branc recovré
 Et feri Calion, un duc de Balöé,
 Par desous la mamele li a le pis caupé.
 Li dus Betys l'esgarde si a le chief croulé,
 Et dist: "Se cist vit longes, malement ai ouvré."
 Il et cinq chevalier sont cele part torné,
 Li quatre le ferirent en son escu bouclé
 Et li quins sor le hiaume, que tout l'ont estonné,
 Et desus Bucifal ont le roi enversé.
 Es vos a la rescouse Cliçon et Tholomé,
 Et ont en lor compaignie maint chevalier armé.
 La veïssiés des brans maint ruiste cop donné;
 Au chaple des espees sont li Grigois outré,
 Cil de Gadres s'esmaient et sont tuit reüsé;
 Li dus vit le meschief si a son frain tiré.
 [2.53] Gadiffer de Larris, ou croissent li paumier,
 Qui la terre d'entour a toute a justicier,
 El roiaume d'Egypte n'ot mellor chevalier

N'ome qui par son cors feïst tant a proisier,
 Ne si bien se seüst en un estor aidier
 Et les siens maintenir, les autres damagier,
 Les tornés de la place si de pres enchaucier
 Q'il n'avoient loisir de nului empirier,
 Belement sot fuïr qant il en ot mestier,
 Et qant il vit son lieu, faire bel recovrier;
 Les sieues bones teches font bien a reprochier,
 Biaus iert et avenans si tint son cors molt chier
 Et larges et cortois, n'i ot que ensegnier;
 Ou que il vit le bien, sel vaut molt avancier
 Et vilaines paroles et lais dis abaissier,
 Toutes les bones gens lever et ensaucier,
 Les orgueilleus abatre et les felons plaissier.
 Qant vit ces rens fremir et l'estor commencer
 Et la noise lever et les cris engregnier
 Et les dolereus plains des navrés acoisier,
 Car la mort ques destraint les fait assouploier,
 Il sist a ce besoing sor le mellor destrier
 Que li rois de Nubie li peüst envoyer,
 Qui des mellors du siecle avoit tout le dangier;
 Par les costés le point des esperons d'acier.
 Ne veut pas por joster le chief des rens cerchier,
 Mais en la gregnor presse ou il vit l'encombrier
 Fait le chief du cheval et l'escu adrecier.
 Le conte Sabilor ala Tyr chalengier
 De par Dayre de Perse, son segnor droiturier,
 Sel feri de la lance ens l'escu de quartier,
 Que par mi le blason fist l'auberc desmaillier,
 Et le cors du vassal d'outre en outre percier;
 Tant roisdement l'estut a terre trebuchier
 Qu'il li fist tous les membres et le cors esmier
 Et l'eschine et le bras et la cuisse brisier.
 En piece ne peüst par seul lui redrecier.
 Et des autres refist tels trois deschevalchier
 Dont li pires est preus por ses armes baillier;
 Ja mais ne vauront gaires por lor segnor aidier.
 [2.54] Pirrus voit Gadifer qui se melle as Grigois,
 Qui a molt cest afaire entrepris sans gabois;
 Mort lor a Sabilor, un preu Mascedonois,
 Et des autres lor a deschevauchié tels trois
 Dont li pires peüst par proëce estre rois.
 Et Pirrus laisse corre le baiet gasconois,
 Ne s'i tenist chevreus qant il ist de deffois.
 Un neveu Gadiffer qui venus est tous frois,
 Molt richement armés sor un cheval norois,
 Vait ferir a bandon sor l'escu sapinois,

Que par mi le blason ront de l'auberc les plois;
 El cors li mist le fust et l'ensegne a orfrois,
 Mort l'abat des arçons a fin or espanois.
 Cil ne resambloit mie Provençiaus ne Basclois,
 Ains quidissiés qu'il fust uns natureus François.
 Emenidus s'en rist et dist un mot cortois:
 "Cil li a tost apris de ses gieus alenois,
 A mellor chevalier ne josta il des mois."
 [2.55] Del conte Sabilor, qui ert mors a dolor,
 Sont li Grigois dolent et demaint tel plor
 Que desous les ventailles s'en pasment li pluisor.
 Assés i a de cels qui trambent de paor;
 Qant de tant riches armes esgardent la brunor,
 Et li solaus qui done as armes grant luor,
 Lors sont en esmaiance de soustenir l'estor,
 L'angoisse et les destrois i suefrent li mellor.
 Et Gadifer ot ire, onques mais n'ot gregnor,
 Por son gentil neveu qui iert fieus d'aumaçor.
 Espris de lui vengier broche le missaudor,
 Le branc nu en sa main d'une brune color,
 Et fiert si un Grigois par mi son elme a flor
 Qu'il li trenche en parfont de la teste plain dor;
 Desi qu'en l'os du col fait couler le rasour.
 Cil chaïmaintenant si perdi la vigor.
 De lui n'avront secors mais Grigois a nul jor.
 Por qant n'iert mie fieus de povre vavator,
 Ains iert en Alenie sires de mainte tor,
 A justicier en ot la richese et l'onor.
 Pirrus iert apelés et si iert de Monflor
 Et niés Emenidun et fieus de sa seror.
 Ainc ne fu tels vallés, ce content li actor;
 De neveu por neveu prist eschange le jor.
 Se Emenidus puet de lui avoir laïssor,
 Il en avra merite comme de tel labor;
 Ja savront li Gadrain a cest premerain tour
 S'entre lui et l'enfant avoit bien grant amor.
 [2.56] Emenidus d'Arcage vit son neveu morir,
 De cui avancement iert en molt grant desir
 De mostrer sa proëce et de son cors tehir;
 Mieus l'amoit entor soi as durs estors souffrir
 Que tous les mieus vaillans que on peüst choisir.
 Et cil iert ententieux a son oncle servir,
 Et tos iert ses corages a faire son plaisir.
 Molt le resambloit bien de prouece et d'aïr,
 De cors et de corage iert ses niés sans mentir,
 Car ançois se laïssast tous les membres tolir
 Ou reçoivre tel mort qui ne fust por honir

Qu'il vausist laidement d'un afaire partir.
 Et Dieus! qui le veïst en l'estor esbaudir
 Et au destroit besoing trestorner et guenchir
 Del mellor chevalier li peüst sovenir,
 Fors seulement le roi qui les rens fait fremir
 Et son oncle vers qui je ne l'os aatir,
 Dont mais devés bons vers en riche cort oïr;
 Or est mors, c'est grans deus de tel home perir.
 Emenidus en pleure, ne s'en pot astenir;
 Si grant duel en demaine ja n'en cuide garir.
 C'est avis qui l'esgarde que il doive fenir,
 Et l'ire quil destraint le fait taindre et noircir.
 Après la grant dolor se prent a resbaudir,
 Qu'il vit ses compaignons de toutes pars gander
 Derous et desconfis por l'afaire guerpier;
 Si s'afiche es estriers les fers en fait croissir,
 Ja seront li Gadrain trop tart au repentir
 De lui et son neveu par armes departir.
 A l'espee trenchant les vait si envair
 Ne consieut chevalier qui son caup puist souffrir,
 Tant se sache enbuschier ne de l'escu covrir,
 Q'il n'en face le sanc de molt parfont issir
 Ou la teste voler ou le cervel boullir.
 Ne n'osent envers lui autrement escriemir
 Ne mais par eschiever et de ses caus fuïr.
 [2.57] Li dus Betys de Gadres ne se vaut pas refraindre
 De la gent Alixandre damagier et contraindre;
 Ains le vespre le cuide si par armes destraindre
 Q'en sa prison fera le plus orgellous maindre.
 Duel ot Emenidus, ne s'en sot mais ou plaindre
 Qant vit ses compaignons de toutes pars ataindre,
 Les pluisors abatus et en la presse estraindre.
 Lors descendi li dus por son cheval restraindre,
 Puis remonte en la sele, de riens ne se vaut faindre.
 L'escu pris as enarmes ou bien se sot açaindre,
 Mieudres vassaus de lui ne pot espee çaindre
 Fors le roi Alixandre, que nus ne puet ataindre.
 Emenidus laist corre qant les siens ot complaindre
 Et se plonge en l'estor ou la presse estoit graindre
 Et fiert si Gadifer que l'escu li fait fraindre
 Ou il ot deus lions fait novelement paindre;
 El cors li a baignié son espié a l'enpaindre,
 Si que du penon fait le blanc en vermeil taindre.
 Cist gieus ne puet hui mais sans grant perte remaindre.
 [2.58] Dolens s'en vait li dus, coreçous et iriés,
 Car onques mais ne fu de nul besoing chaciés,
 N'il ne vint en estor d'armes apareilliés

Que suens ne fust li chans, tant par iert resoigniés
 Et de bons compaignons et d'amis enforchiés.
 Or a ire molt grant s'est el cors molt blechiés;
 Se li torne a anui, ne vos esmervelliés,
 Car ses mieudres compains, Gadiffer, n'est pas liés,
 Mais assés plus dolans qu'oisiaus desaairiés
 Ne hom desiretés ne a tort forjugiés.
 La color li noirci, car el cors fu plaiés,
 Mais ne fait nul samblant qu'il en soit esmaiés
 Ne il ne se contient comme hom estoutoiés.
 Derriere tous s'est mis es estriers afichiés,
 D'orguel et de fierté sous le hiaume enbronchiés,
 Roisde lance en son poing dont li fers n'est pas viés.
 La trestorne sovent ou il est aprochiés.
 Ses compaignons delivre, car trop les voit charchiés;
 De sa lance est li fus durement paumoiés.
 Cil en est bien ferus ou il est adreciés,
 Maint en laist après lui de la mort angoissiés,
 De frois et de pasmés et des bien essaigiés,
 Com cil qui n'en doit estre de nului blastengiés,
 Se n'est d'aucun musart de maudire aguisiés
 Et de folie plus que de sens enpraigniés;
 Mais par oevre d'estoire devroit estre essauciés
 Se ja mais por bien faire doit nus estre proisiés.
 Corineus li escrie, qui vient tous eslaissiés:
 "Vassal, car retornés, por coi vous aviliés?
 Laidement en alés, quant les vos i laissiés;
 Hui nos avés sovent de molt pres essayés,
 Or estes, ce m'est vis, auquetes refroidiés
 Et vostres pris dechiet quant si vos en fuiés.
 N'avés droit en la manche dont si vos cointoiés."
 Gadifer le regarde, qui molt fu corouciés,
 Et dist par maltalent: "Ja fust cis mos vengiés
 Et cis dis orgelleus fierement chalengiés
 Se ne fuisse d'autrui que de vos seul coitiés.
 Por qant mes maltalens en est si engregniés
 Tel chose en ferai ja dont preu n'iere aaisiés.
 Certes la joste avrés se vos ne me failliés,
 Ja sera tot a un se ne vos en fuiés."
 A un fais li trestorne, de bien faire haitiés;
 Et cil revint molt tost, sous l'escu enbronchiés,
 Qui iert cortois et preus et molt outrecuidiés
 Et chevaliers molt bons et molt bien afaitiés;
 Se tant ne parlast d'armes, trop fust bien ensegniés.
 Entreferir se vont, les gonfanons baissiés,
 Et par mi les blasons ont les escus perciés.
 De la lance au Grigois est li fus peçoiés,

Cil que Gadifer tint n'est ne tors ne brisiés,
 Ains est si ruistement li siens caus emploiés
 Que tous en est vermaus li gonfanons frengiés,
 Li foies entamés et li pomons perciés,
 Et li fers d'autre part en est outre essiauiés,
 Li cors du chevalier a terre trebuchiés
 Et de l'ame et du sanc est a cel cop vuidiés.
 Puis li dist par contraire: "Frere, un poi vos targiés.
 Hom qui trop est grevés est tost contraliés;
 Ce seut dire la gens: sorparlers est pechiés.
 Por cest et por les autres en estes engigniés,
 Car trop estiés preus, s'orgelleus ne fuissiés.
 D'ui cest jor en avant cest passage gaitiés,
 S'en prenés le treü qant foire iert ou marchiés.
 Vostre enemis morteus s'est a vos acointiés,
 Gadiffer de Larris, ne sai sel connoissiés.
 Par vos nen iert hui mais mes fuïrs reprochiés,
 Vers Gadres m'en irai delivres, ce sachiés,
 Se par mellor de vos ne sui deschevalchiés."
 [2.59] Or s'en vait Gadiffers, qui les Gadrains en maine,
 Por son lige segnor est entrés en grant paine,
 Bien li puet souvenir de dolente semaine.
 De tel home haster est la mort trop vilaine,
 Que il s'en vait tous sains, or en a tel estraine
 Qu'ele le claime tout por son home demaine.
 Mais ses sans ne vient mie de trop malvaise vaine,
 Seürs est com s'il fust en sa grant tor hautaine;
 Assés mieus se deffent et de mellor alaine
 Que ne fait a brohons ors betés en chaiene.
 Cil qui chacent après la valee soutaine
 Truevent des abatus la voie toute plaine.
 Alixandres meïsmes vint poingnant par l'araine,
 Lance roisde sor fautre s'ot gonfanon en graine.
 Bucifal esperone qant la joste ot prochaine,
 Et fiert sor Gadifer com sor une quintaine,
 Que de l'escu li trenche la pene premeraine.
 La lance vole en trous au fort roi mascedaine,
 Q'ainc maile n'en rompi de la broingne esclavaine
 Ne ne mut le vassal de la sele gadraïne;
 Ains encontre en son tor une route commaine,
 Le segnor en ocist et mist a terre plaine,
 Puis s'en vait les galos sor le destrier aufaine.
 Li gentieus chevaliers a la chiere certaine,
 Qui n'out lasche le cuer ne la pensee vaine,
 La trestorne souvent ou force les en maine,
 Cui il encontre bien de son orguel le saine,
 Tous les plus desreés de l'enchaucier afraine.

[2.60] Bien s'en alast sans perte Gadifer, ce cuidons,
 A ce qu'il estoit preus et ses chevaus si bons,
 S'il vausist o les autres ferir des esperons,
 Mais autresi encharche tous seus ses compaignons
 Com fait beste sauvage por le leu ses faons;
 Estre cuide et voirs est la lor deffensions,
 Et s'il est mors ou pris, si faut lor garisons;
 N'a mie por fuïr si torné les talons
 Que sovent ne lor soit reguenchis ses blasons;
 Menüement trestorne, car or en est saisons
 Que la proëce paire dont teus est li renons,
 Deus Grigois en l'estor lor i a fait paons;
 L'un ot trenchié le cuer et l'autre les regnons.
 Puis dist entre ses dens: "N'i perdrai hui arçons
 Por nul que je i voie, tant soit haus ses renons,
 Ains m'en irai a Gadres maugrés tous les glotons,
 Se par celui ne chié qui n'est pas des garçons;
 Ses escus est a or et vermaus ses lions,
 Et ses chevaus Ferrans, qui tous vaut les gascons,
 Ne seroit esligiés por cent mile mangons.
 Hui me fist du cheval gesir a ventrellons,
 Autresi estendus comme por orisons.
 Lui ne ruis encontrer desproiés ne semons,
 C'onques teus chevaliers ne gousta de poisons;
 Il trenche par mi fer, os et ners et braons.
 Bien en doit li rois faire segnor de ses maisons,
 Que par lui seul est ce que nos le champ voidons."
 [2.61] Ne porent li Gadrain plus l'estor maintenir,
 Ou il veullent ou non, la lor estuet guerpier.
 Li forrier les en virent tous desconfis partir;
 Lor cheval furent las de longement souffrir,
 Por qant de l'enchaucier ne se porent tenir;
 A esperon les sieuent covoteus de ferir,
 Emenidus devant, qui les rens fait fremir
 Et la pierre esgruner et la terre bondir.
 Gadifer aconsieut a un gacel issir,
 Et cil s'est regardés, qui tost l'oïvenir;
 Puis dist: "Haute chose est de preudome norrir,
 Et qui faire nel veut bien s'en doit repentir.
 Cist seus en oseroit quinze mil envair,
 Maint fil de franche dame nos a hui fait morir;
 Les meres n'en seront a piece sans souspir.
 Nostre grant joie a fait a grant duel revertir.
 Ne sai q'en avendra ne Dieu iert a plaisir,
 Ne li quels s'en devra ou doloir ou joïr.
 Il covient l'un de nos envers l'autre escremir;
 Mieus veul metre mon cors du tout au covenir

Que faire por paor dont me doive honnir;
 Plus criem et redout honte que je ne fais morir."
 [2.62] Gadifer fu molt preus, d'un arrabi lignage,
 En berrie iert norris et cil de son parage;
 Par prouece entreprenent sa perte et son damage.
 N'en prist mie conseil a son droit seignorage;
 Se Betys le veïst, il le tenist a rage,
 D'un seul home vers lui li tornast a outrage.
 Ne guenchist mie a loi de fol vilain ombrage,
 Mais sa lance baissie, ou ot fer de Cartage,
 Enbrunchiés ens l'escu, plains de grant vasselage.
 Et tant com li chevaus puet corre par l'erbage,
 Laist corre a esperon comme hom de fier corage.
 Ferrans, qui fu norris en riche pasturage,
 Revint assés plus tost d'un esprevier ramage;
 Molt sont pres de joster, qui que tourt a damage.
 Ja n'en seront doné ne pleges ne ostage,
 Ne fiance rompue ne deguerpi homage,
 Ains cuit bien q'au partir laira li uns le gage.
 [2.63] Fier furent li vassal et de grant estoutie,
 Prouece et maltalens et fiertés et envie
 Les esmuet et semont de grant chevalerie.
 L'uns laist corre vers l'autre, q'autrement nel deffie,
 Car il n'avoit entr'aus amor ne drüerie.
 Gadifers vint molt tost, qu'il n'a talent qu'il rie;
 En son bras ot lacie une manche s'amie,
 Qui n'estoit mie garce ne povrement norrie,
 Mais riche damoisele, fille au roi d'Aumarie.
 Si fiert Emenidus en la targe florie
 Desous la boucle a or li a fraite et croissie;
 De tel vertu l'enpaine et de tel baronie
 La guige en est rompue et l'enarme faillie;
 En mi le champ l'en porte sor l'erbe qui verdie.
 Por qant Emenidus ne se muet ne ne plie,
 Ains a la sieue lance droite voie choisie,
 Que par devers la targe a or encoulourie
 Le feri ens la broigne en deus doubles sartie,
 Les mailles trenche et ront la ou li aciers brie,
 El cors li fait sentir le fer de Romenie,
 Si q'assés pres du cuer est la lance croissie;
 De lui et du bon bai sevrà la compaignie.
 Alixandres chaçoit devers destre partie,
 Vit le caup du baron et la joste furnie.
 Vers lui s'est retornés, hautement li escrie:
 "Vos en doins ge le pris, et s'en port garantie
 Par vos est desconfite la pute gent haïe.
 Ne vos pueent souffrir ne la vostre envaïe,

Car après vostre main ne done entrais aïe;
 Se cist garist ja mais, molt avra sage mie."
 Et cil jut estendus en qui n'ot point de vie.
 La plaignent li Grigois lui et sa cortoisie
 Et la tres grant proëce qu'il avoit acuellie.
 Emenidus meïsmes de l'enfoir les prie,
 Que laidement ne soit la sieue char perie.
 Deus est de sa proëce qui si tost est fenie:
 "Por un peu ne m'en poise, se Dieus me beneïe,
 Mais tel chose m'a faite qui molt me contralie."
 Et li rois fu venus, qui l'uevre ot esjoïe,
 Rist soi de la parole que il a bien oïe,
 Puis a dit: "Molt est voirs que frans cuers s'umelie,
 Molt sai bien de felon que il nel desist mie."
 [2.64] Cil ot feru grant caup qui doné en ot maint.
 Ou est nus hom tant fiers qui refuser nel daint?
 Car s'il l'encontre bien en sele ne remaint,
 Petit dure es arçons que il par force enpaint,
 Jus l'en convient aler se lance ne li fraint.
 Au sanc qu'il ot perdu et au chaut quil destraint
 S'est pasmés sor cheval, car travaus le sorvaint.
 Et li rois l'aperçut, qui joie dont souffraint,
 Ses deus poins fiert ensamble et doucement le plaint:
 "Gentieus, se vous morés, je me tieng por ataint
 Ne ne cuit que ja mais mes cuers joie demaint.
 Onques teus chevaliers ne porta escu paint
 Ne ne trencha de lance vernis ne autre taint."
 Et li Grieu s'i aünent, n'i a celui ne l'aint;
 La mainent tel dolor que la chace remaint,
 Et Betys se garist qui d'aler ne se faint.
 Li rois son melor mire rueve c'on li amaint
 Si tost que li chevaus d'aigre sueur se baint.
 Cil savoit tant de plaie n'estuet c'on li ensaint;
 Lava la bonement et atorne et restraint,
 D'une bende de porpre par mi le cors le çaint.
 Molt li poise du roi qui si dolens se plaint,
 Ne veut qu'il se gramisse ne s'ire li engraint,
 A tous le fait entendre bien est fis qu'il le saint.
 [2.65] Sor une coute pointe de paile d'auqueton,
 Forree espesement et plaine de coton,
 Qant l'orent desarmé et bendé environ,
 Le couchierent souef li rois et si baron;
 Et Licanor o lui, son gentil compaignon,
 Qu'iluec fu aportés pasmés sor un blason,
 Car Betis l'ot feru d'une lance a bandon
 Delés le costé destre, que on vit le pomon;
 Li rois fait desor aus tendre son pavellon.

Li mires du garir i mist grant espison,
 Q'ains vint jors les rendra si sains comme poisson;
 Par tans porra porter chascuns son gonfanon
 Et chevaliers ferir d'eslais et de randon;
 Et se faire nel puet, mar avra raençon
 Ne n'en soit pris ostages se de la teste non.
 Tel joie en ont par l'ost tout oubliënt Sanson
 Et Pirrus de Monflor o la gente façon,
 Car li grans desconfors estoit d'Aimenidon.
 Lors se firent logier li Grieu par contençon,
 Assés en poi de terme fichierent maint paisson;
 Qui n'ot tente ne tref de rains fist sa maison.
 Icele nuit passerent a poi de livraison.
 [2.66] Cel soir jurent li Grieu el val a la froidor.
 Lié furent, qant la nuit virent mellee au jor,
 Por le serain recevoir qui chiet a la brunor,
 Car de chaut et de soif sont grevé li pluisor
 Et las et annuié li destrier coreour.
 Li navré furent vain, qui sentent la douleur,
 Et li cheval charchié de poudre et de suour.
 Lié furent du repos qant en orent laissor,
 Petit orent viande, mais il ont bon segnor,
 Si la prirent commune li grant et li menor
 Entresq'a bien matin qu'il choisirent le jor;
 Lors font tentes et tres charchier a grant vigor.
 Droit vers Gadres s'en vont li noble poingneor,
 N'avra mie Betys, ce m'est vis, lonc segor.
 Et li rois devant aus fait drecier l'oriflor,
 Tuit li Grieu qui l'esgardent chevalchent sans peor.
 [2.67] Li rois porsieut le duc, qui de sejour n'a cure,
 Droit vers Gadres s'en vet la pleniére ambleüre,
 Trespasse ruistes puis et grans vaus a droiture.
 Molt manace le duc qu'il li fera laidure,
 Que de son connestable et de sa bleceüre
 Et des autres navrés qui sont en aventure
 Est dolens en son cuer s'en a ire et rancure.
 A Betys ne manace autre desconfiture
 Fors la teste a tolir et sa creance en jure
 Que ja ne l'en garra chastiaus ne fremeüre
 Ne ne li pardonroit icele forfaiture
 Por la moitié a perdre de sa grant teneüre.
 Li forrier vont souef la petite ambleüre
 O celui qui le fais au grant besoing endure,
 Bien sept cens chevalier, tuit eslit par mesure;
 Li plus ierent si home et de sa norreture,
 Cil aiment plus le duc que nule creature.
 Li mires du garir forment les asseüre,

Par entrait l'a gari de raanle et d'ardure,
 Armes porra porter s'on lor fait desmesure,
 Vin boivre, char mengier quant qu'il vaut a mesure,
 Car bien le garira de trestote enfleüre.
 [2.68] Après eure de tierce, un poi devant midi,
 Ot li rois tant erré et chevauchié ensi
 Qu'il furent grans cinq lieues des forriers departi;
 Et cil ont lor chemin vers le fleuve acuelli.
 Li cheval ont beü et li home autresi,
 L'eaue estoit nete et clere, or s'i sont tuit gari.
 Lors troverent Betaine et un païs garni;
 Tost furent li chastel brisié et assailli
 Et li pains et li vins et la chars recuelli;
 Assés en ont mengié, qu'il l'orent deservi.
 Tantost comme li cuers la viande senti,
 Si resont tuit armé et de guerre esbaudi
 Et Betys maneciés et lor autre enemy.
 De tel chose se sont par lor gas aati
 Qui tornera a certes ains le vespre acompli;
 Se Dieus ne lor aïe, mort sont et escharni.
 [2.69] Quant voit li dus Betys Alixandre et s'ensaigne,
 Qui si est orgelleus et sa gent si grifaïne
 Qu'il ne trueve chastel ne cité qu'il ne fraïne
 Ne terre ne païs que par force ne praïne,
 Tout par fin estouvoir li tolent la champaigne,
 Tant par est li dus fiers et si a grant compaigne
 Que souffrir ne les puet ne fuïr ne lor daïne;
 Menbre li del reprueche que cil dist qui bargaigne,
 Que malvais achat fait qui plus pert qu'il gaïne.
 Sa gent dedevant lui s'en vait toute une plaingne
 Et li Griu les enchaucent, n'i a nul qui se faïne.
 Li dus s'est arestés el chief d'une montaigne
 Et commande a sa gent que s'alit et estraïne.
 Tels vait entr'aus joster qui en son sanc se baïne;
 Molt se set bien garder qui ne muert ou mehaïne.
 [2.69b] El chief de la montaigne josterent li Gadrain.
 Li tertre furent haut et li val sont soutain,
 Ne crient fors devant a l'entree d'un plain;
 Ilueques se retienent li mellor deerrain,
 Teus i vait por joster qui change son lorain.
 As dars et as saietes que cil traient certain
 I perdent li Grigois, qui de joster sont sain,
 Des chevas et des armes i perdent li prochain;
 Durement se combatent el val de Guisterain.
 Onques ne regardastes chevreul ne cerf ne dain
 Si tost corre par lande com Dans Clins fait par plain;
 Et feri Dant Nassal de la terre au soutain.

Merveilleus caus se donent, car il murent lointain,
Li escu de lor caus ne lor valent un pain,
Par mi toutes lor armes fauserent li clavain.
Dans Clins brise sa lance, le trous tint en sa main;
Au torner de sa joste ne sambla pas vilain,
Si grant caup li dona desor son elme a plain
Que tout l'a adenté sor l'arçon deerrain.
Dejoste lui s'acoste sel saisi par le frain,
Autresi pris l'en maine com li ostoirs l'aubain,
Et dist a Alixandre: "Cest prison vos amain."
Li rois de Mascedoine le prist par le chaufrain,
Aprés le commanda Masidor et Galain,
A deus barons de Gresse qui sont cousin germain,
Et cil li offre ostages de mil mars au demain.
[2.70] A molt grant seürtance torna li dus Betyz
Qant en tel fremeté se sont entré et mis
Ou ja ne perdra gaires par home qui soit vis;
Mais de Nassal le conte est dolens, qui est pris;
S'ainsi quite l'en mainent, n'iert pas bien ses amis.
Il broche le cheval si s'est fors au plain mis,
Et voit en sa bataille tels quatre cens de pris
N'i a nul ne soit preus et en armes penis.
Et li dus vait avant, de bien faire pensis,
Molt gentement l'en porte li bons chevaus de pris;
Assés en petit d'eure sera de lui eschis:
Par un baron de Gresce fu puis le jor conquis,
Tholomés l'en mena, ses morteus enemis,
S'en abati le duc, voiant dis mile Gris,
Que li elmes a or en fu en terre mis
Et ses escus bouclés enpiriés et malmis
Et hurterent a terre toutes les flors de lis;
Puis l'en mena o lui en maint lointaing païs,
Li rois de Mascedoine l'ot le jor, ce m'est vis,
Qant il fist la bataille ou Porrus fu ocis.
[2.71] Molt ot li dus grant ire et li plais fu molt maus
De Nassal qui fu pris, uns siens amis charnaus.
Il point le vair destrier, qui plus tost cort par vaus
Et par tertres agus que autres par egaus;
Onques tels n'en fu nus ne mais que Bucifaus.
Tholomés point le brun, qui en lui fu bien saus,
Si grans caus s'entredonent es escus a esmaus
Que par mi les haubers ont trenchié les cendaus.
Ja fust a ambesdeus ceste joste mortaus
Et retornast a perte a lor amis charnaus,
Qant les lances peçoient ensamble communaus;
Si forment s'entrehurtenant li escu des vassaus
Que les boucles peçoient, ains n'i remest cristaus,

Tous les vis se depiecent et froissent les nasaus;
 Li oel lor estincelent si rompent lor frontaus,
 Frains, estriers ne enarmes n'i vaut un denier faus,
 Les arçons ont brisiés et rompent les poitraus,
 Sor les crupes s'enversent ambedui des chevaus.
 [2.72] Molt se furent malmis li vassal au joster,
 Onques nus n'oïplus deus homes estoner;
 Ains eüssiés loisir d'une traitie aler
 Que onques nisuns d'aus se peüst recovrer.
 Tholomés se redrece premerains comme ber;
 Ançois c'onques li dus se peüst relever
 De l'espee qu'il tint li vait tel caup doner
 Q'en son le hiaume a or trenche le chapeler.
 El blanc hauberc du dos fist le caup devaler-
 Ne sai qantes des mailles en fist au branc voler-
 Et l'acier de l'espee en la teste embarer
 Et a mont vers les nues les deus talons lever
 Et le cuing de son elme en la terre couler.
 Par les regnes a or vait le cheval conbrer,
 Onques por ciaus de Gadres ne l'en laisse a mener.
 Li dus crie s'ensaigne por ses gens aüner;
 Lors veüssiés Gadrains molt forment recouvrer
 Et issir des montaignes et iluec assambler.
 Entre aus et les montaingnes outrent li douze per
 Et commandent as Griens les destrois a garder,
 Que li Gadrain ne puissent arriere retourner.
 Desor le duc Betys veüssiés si chapler,
 Tant poing et tante teste a chevalier voler
 Se li dus ot paor ne fait mie a blasmer.
 Tres bien cuida li dus que il deüst finer,
 Car de si grant estor n'oïmais nus parler.
 [2.73] Molt fu grans la bataille par les plains d'Orius
 Et l'estors perilleus ou li dus fu cheüs.
 Dylas, uns quens de Perse, et Pons et Liagus
 Et Madés l'orgelleus et Carraus de Lerus
 Desor lui fu li chaples as espees tenus,
 Li branc d'acier tentissent sor les hiaumes agus.
 Guimadochés d'Aufrique lor a dit tels salus:
 "Or penst chascuns de soi, car l'estors est vaincus."
 [2.74] Le duc Betys remontent si home natural,
 Mais ançois i ot fait as espees maint mal.
 La bataille Alixandre vint armee un egal,
 Ilueques veüssiés tant nobile vassal
 Et tante riche ensaigne vermelle de cendal.
 Li rois vint premerains armés sor Bucifal,
 Les langes de l'ensegne li batent contre val,
 Molt par vint gentement la compaigne roial;

Cil feront a court terme le duc müer estal;
 S'as espees se truevent, ja vuideront cheval.
 [2.75] Li dus voit Alixandre sor le cheval armé,
 Onques n'ot en cest siecle home tant redouté;
 Por Sanson le redoute que il ot mort geté,
 Bien set, s'il le puet prendre, que il a mal ouvré.
 Et li rois le manace et jure le grant Dé,
 S'as pouns le puet baillier, malement a ouvré;
 Por trestout l'or du siecle, tant l'a cuelli en hé,
 Nel laisseroit il vivre un seul jor ajorné.
 Sa lance gete a terre s'a l'escu adossé.
 [2.76] Molt par fu grant la perte, ce nos raconte Estace,
 Des mors et des navrés qui gisent en la place.
 Li dus voit Alixandre, qui forment le manace,
 S'as pouns le puet tenir ne laira nel defface.
 La peor qu'il en a li fait müer la face,
 A la fuie s'est mis, or gart chascuns qu'il face.
 Clins les voit desconfis si s'est mis a la chace
 Et choisist un Gadrain c'on apele Dicace,
 Qui sist sor un destrier c'on clame Boniface,
 Nus chevaus envers lui ne cort ne que limace.
 S'or l'en laisse mener, ne se prise une agace,
 Autresi le tient pres comme faus la becace,
 Ne li puet eschaper ne q'au Lombart sa mace.
 Devant lui s'en traverse au destroit d'une trace
 Sel feri de sa lance, ou li gonfanons lace,
 Que sor le costé destre li a fait tel crevace
 Ja tant com ses cors vive n'iert mais jors qu'il nel hace.
 Lieve le des arçons, contre terre l'esquace,
 Assés en petit d'eure fu si frois comme glace.
 Dans Clins vint au cheval, par les resnes l'enbrace,
 Li fieus Caduit l'en maine, qui qu'en poist ne qui place,
 Puis l'ot es desers d'Ynde et el regne Candace.
 [2.77] Li dus fu desconfis et sa gent ot perdue,
 Droit vers Gadres s'en fuit toute une voie herbue.
 Alixandres les sieut, qui tint l'espee nue,
 Et li dus vait avant, qui de fuïr s'argüe.
 Quatre jors et demi a la fuie tenue
 A tant petit de gent com lui est remasue;
 Par mi la maistre porte est en Gadres ferue,
 A l'entrer de la vile mainte teste ot tolué.
 Se tost ne fust la porte couleïce abatue,
 Ja fuissent tuit après par mi la maistre rue;
 Mais la vile est si fors q'a paines iert rendue,
 Ne crient assaut de gent ne perriere qui rue.
 Qui ot tente ne tref si l'a entor tendue.
 [2.78] Li dus fu desconfis et sa terre gasteé.

L'ost grigoise s'i fu quatre jors sejournee.
 Tost fu ceste novele de Gadre a Tyr alee;
 Uns messagers s'en torne par main une ajornee,
 Qui la mesaventure lor a toute contee
 Comme lor gent est morte et si desbaretee
 Que ja mais ceste perte ne sera restoree;
 Par grant loisir lor a la parole contee,
 Onques par nisun home ne li fu destorbee,
 Que la gent Alixandre s'en estoit toute alee
 En la terre de Gadres, ou ele iert arestee,
 Fors celi du chastel qui est lai ens entree.
 Li dus Balés de Tyr a sa gent apelee:
 "Qui savroit bon conseil ne parole senee,
 Ne nous devoit mie estre a cest besoing celee.
 S'Alixandres nos prent, nostre mors est juree,
 N'en prendroit raençon d'or ne d'argent pesee;
 Et li Grigois m'ont si ma terre desreubee
 Que n'i puis recovrer une seule denree.
 Veés la cel chastel qui garde cele entree,
 Qui l'aïde de mer nos a toute sevrete,
 C'onques puis n'i ot nef ne galie arivee.
 Qui avroit cele tor peçoïe et quassee,
 A pis et a perrieres en maint lieu effondree,
 Si que la gent soit morte et la tor craventee
 Ançois que l'ost grigoise fust ci avironee,
 L'aïde de la mer avrions recovree,
 Ja mais ceste cités ne seroit afamee.
 Une partie soit de nos gens desnüee,
 S'ait chascuns pic d'acier ou crochiere aceree
 Et traient les quarriaus de cele tour muree
 D'a val devers le pié si comme ele est fondee."
 Si com li dus lor a la parole contee
 Li fu bien par ses homes otroïe et graee.
 [2.79] A l'aube aparissant, quant il dut esclairier,
 Li dus Balés commande ses perrieres drecier,
 Et a fait son atrait molt tost apareillier.
 Adonques veïssiés ses perrieres lancier
 Et tous ses mangouniaus geter et perrier
 Et cele tour de pierre en maint lieu peçoier
 Et esmier et fondre la chaus et le mortier.
 Et li Grieu se contienent comme noble guerrier,
 Durement se deffendent par traire et par lancier,
 Mais encontre perrieres ne se pueent aidier.
 Une partie font de lor gent despoullier,
 S'a chascuns pic de fer et crochiere d'acier.
 Adonques veïssiés ces Tyriens plongier
 Et traire les quarriaus et de la tor sachier

Et revenir a mont et sovent repairier,
 Que li home Alixandre ne s'en sorent gaitier.
 Cis assaus lor dura trestout le jor entier
 Tant qu'il font le chastel chaoir et trebuchier
 Et les gens Alixandre tous perir et noier.
 Uns messages s'en torne sel vait au roi noncier;
 En la terre de Gadres n'i a que courecier.
 Il a dit a ses homes: "Entendés, chevalier,
 J'ai perdue ma gent et mon chastel des ier;
 Aler m'estuet a Tyr ceste honte vengier.
 Li dus Balés est mors s'as poins le puis baillier,
 Sous ciel n'a home en terre quil poïst respitier."
 Qant li Grieu entendirent cest mortel encombrier,
 Lors sont cuelli li tref et charchié li somier,
 Tout droitement a Tyr pensent de repairier.
 [2.80] Li rois de Mascedoine en est venus a Tyr,
 Son chastel vit fondu et en la mer gesir,
 Ainsi com il li firent le pié desous tolir.
 Alixandres le plaint et geta maint souspir:
 "Baron, ce dist li rois, molt me devés haïr,
 Je vos fis en cest regne aveuques moi venir;
 Or quant je vos deüsse vos services merir,
 Si vos ai fait lai ens a tel glave morir.
 Mais ja Deus ne me laist de mes membres joïr,
 Se je puis le duc prendre et a mes mains tenir,
 Se nel fais pendre en haut ou en un fu rostir.
 Or ferai la cité en tous sens si ordir
 Que par mer ne par terre n'en porra nus issir."
 [2.81] Molt a li rois grant duel de sa gent qu'est perie,
 A lui en apela Licanor et Elie:
 "Cerchiés, fait il, les pors de trestoute Surie,
 N'i laissiés nef ne barge ne chalant ne galie."
 Cil a fait son plaisir qui forment s'umelie,
 Et si mena o lui de Grigois grant partie
 Assés en poi de terme, qu'il ne targierent mie.
 Lor veïssiés a Tyr amener grant navie;
 As murs devers la mer lor font tele estableie,
 Que ja mais cil dedens n'en istront a lor vie,
 Ne secors n'i venra, s'il vient, c'on ne l'ocie.
 Li dus voit Alixandre et sa grant baronie,
 Q'il li a de tous sens sa cité si hordie
 Que par mer ne par terre de l'issue n'a mie.
 Molt i a de sa gent ou il preu ne se fie,
 Ne mais de nule part n'atent secours n'aïe.
 [2.82] Icel jor sejournerent les compaignes le roi,
 Tresq'au matin a l'aube reposent et sont coi.
 Alixandres a fait sa proiere endroit soi:

"Baron, dist Alixandres, segnor, entendés moi.
 Ceste vile est molt fors, bien le sai et le voi,
 Ja ensi nen iert prise se n'en prenons conroi.
 Mais faisons faire engiens, perrieres et berfroï;
 De la devers la mer ai assis mon navoi,
 Par la n'en istra nus qui ait cure de soi.
 De ceste part sor nes lor ferai un berfroï;
 Qant la mer sera grosse, si menront li ondoi
 L'engien desi q'au mur sans nul autre conroi.
 En celui n'avra home fors Damedieu et moi,
 Ne ja plus n'i avrai fors armes et conroi."
 "Sire, dist Tholomers, non feras, je t'en proi.
 Que porriens nos faire s'il mesavient de toi?"
 Et respont Alixandres: "Jel ferai, par ma foi,
 Je nel lairoie mie por qanque as ieus voi;
 De ça devers la mer en seront drecié troi,
 Nous assaudrons ensamble belement sans desroi
 Et toutes nos perrieres geteront de ravoï
 Et metrons ciaux dedens en si pesant effroi
 Que d'aus et de la vile abatrons le bufoi."
 [2.83] Au matin par son l'aube, quant li jors lor esclaire,
 Li rois fist ses engiens et ses perrieres faire,
 Et qant furent drecié, ses fist as murs atraire.
 Et li Grigois s'armerent, qui ne tarderent gaire
 D'assaillir la cité por ciaux qu'en veulent traire;
 La veïssiés sachier mainte pelice vaire.
 Li rois les vit armés, tous li cuers li esclaire,
 Et monter es engiens qui forment li pot plaïre.
 Il en vient au berfroï qui des autres iert maïre,
 Premiers i est montés por commencer l'afaïre;
 Qant la mer fu enflee, sovent as murs repaïre.
 Les ondes quil demainent font le berfroï si braïre
 Que cil cuident quil voient que il doïe deffaïre,
 Et cil dedens s'aïdent de lancier et de traïre.
 Li dus vit Alixandre el berfroï ou il ere,
 Molt le het en son cuer, car en champ l'ot fait taïre.
 Ançois qu'il en descende li fera tel contraire,
 Se il puet exploitier, ne verra son repaïre.
 [2.84] Li dus vit Alixandre, bien l'a reconneü,
 Tout seul le vit monter seur le berfroï tendu;
 S'or s'en pooit vengier, bien li aroit vendu
 La honte qu'il li fist quant en champ l'ot vaincu.
 Encontre lui s'estut et tint un dart molu,
 Lors li lance li dus si le fiert par vertu,
 Mais n'a pas Alixandre en l'auberc conseü.
 "Par ma foi, dist li rois, tu m'as adesentu;
 S'un autre cop me dones, bien m'avras deceü."

Lors li lance Alixandres un dart qu'il tint molu,
 Que la targe a percie et son hauberc rompu
 Et tres par mi le pis son acier enbatu;
 Les deus jambes a fraites et peçoié le bu
 Et la teste fendue, le cervel expandu.
 Li rois le vit lai ens en la cite cheü,
 Bien set se cil est mors li autre sont vaincu.
 Oés dont se porpense li rois de grant vertu:
 Ja fera hardement a tous jors menteü,
 Dont parleront encore li grant et li menu;
 De son chastel li poise qant l'en est sovenu.
 Molt a bien Alixandres li rois son dart segu,
 Qant du berfroï ou iert, de si haut com il fu,
 Est saillis tous armés, a son col son escu,
 Sor les murs de la vile si que tuit l'ont veü.
 Et cil de la cité furent si esperdu,
 Por iceste aventure furent tuit coi et mu,
 Que plus d'une louee ont ainsi esteü
 C'onques n'i ot par aus ne lancié ne feru.
 Li rois saut en la vile, onques teus hom ne fu.
 Qant cil de Tyr le voient entr'aus seul enbatu,
 Tost le cuident avoir ou mort ou retenu.
 Tres en mi la cité ot un arbre foillu;
 Alixandres s'i traist desous un arc volu,
 Ilueques se deffent a son branc d'acier nu.
 Mais cil de Tyr li sont de toutes pars venu,
 Son elme li detrenchent et caupent son escu
 Et l'ont par quatre fois a genous abatu;
 Se par tans n'a secors mal li est avenu.
 Et li Grieu s'escrierent tuit ensamble a un hu:
 "Or après, chevalier, le roi avons perdu."
 Sor les murs de la vile sont li pont abatu,
 Li mur et les batailles sont de Grigois vestu.
 Cil qui dedens saillirent sont as portes couru,
 Et cil qui defors ierent en sont dedens venu.
 Tout le premerain home que li rois a veü,
 Qui vint por lui aidier, c'est Aristé son dru;
 Et dist entre ses dens, mais ne l'a entendu:
 "Li premerains fievés de ma gens seras tu."
 S'il le dist, il le tint et bien li a tenu,
 Car par ceste aventure li est si avenu
 Que puis l'en dona toute la terre au roi Porru.
 Ynde fu sieue et Caspes, puis l'en a revestu,
 Bastres et Oriant tresq'a Occeanu.
 Ilueques veïssiés un estor maintenu;
 Cil qui sont pris a force sont destruit et pendu,
 Et cil orent merci qui sain se sont rendu.

[2.85] Li rois prist la cité par itel vasselage
 Que du berfroï el mur sailli par itel rage
 Ains nus ne l'esgarda nel tenist a folage;
 Mais nus hom ne pot onques atemperer son corage,
 Que de tous les felons vaut abatre l'outrage
 Et vers la sieue gent ot le cuer humle et sage.
 Li rois ama molt Tyr, qui sist sor le rivage;
 Antipater la done et mist ens en estage;
 Il en ot en la fin trop dolereus damage,
 Car il l'enpoisona com hom de mal corage.
 Au quint jor mut li rois et mena son barnage,
 Tout droitement vers Gadres acueilli son voiage.
 Or sache bien Betys n'i metra autre gage,
 Se li rois le puet prendre ne lui ne son barnage,
 Que la teste au partir li laira en ostage.

[2.86] Qant li rois mut de Tyr, bele compaigne en maine
 Et trespasse Sulie, une terre soutaine.
 Alixandres resgarde vers une roche hautaine
 En la combe d'un val et a veüe Araine,
 Une cité molt fort et plenteïve et saine
 Qui estoit de grant gent et de richece plaine.
 Environ la cité avoit mainte fontaine,
 Dedens n'avoit segnor fors la gent citoiaine.
 Alixandres apele Caulon de Mascedoine:
 "Veés en quel país aventure nos maine?
 Sire en serai clamés ains que past la semaine,
 Ou j'abatrai les murs de mortier et d'araine."
 Cil respont tel parole qui ne fu pas vilaine:
 "Molt me seroit plus bel se la rendoient saine."

[2.87] Alixandres asist la cité environ,
 Es plains desous la vile tendi son pavellon
 Et mist a une porte Tholomer et Cliçon;
 Licanor et Filote, Aristé et Caulon
 Ra mis a deus des autres, avec aus maint baron.
 Alixandres meïsmes apele Antiocon:
 "Alés ent or endroit a tout un compaignon,
 Dites a ciaux lai ens que nos les assaudrom;
 Se par tans ne se rendent, a force les prendrons,
 Ja n'en baillerai un qui viegne a raençon."
 Et cil li respondi: "Vostre plaisir feron."
 Antiocon s'en torne s'en maine Antigounun,
 Et vienent en la vile errant a esperon.
 As citoiens parolent et metent a raison:
 "Alixandres vos mande, et nos le vos disom,
 Rendés li ceste vile, la tor et le dongon;
 En cel plus haut estage metra son gonfanon.
 Et se nel volés faire volentiers sans tençon,

Ja ne s'en tornera ne nos n'en partirons
 Devant qu'il l'avra mise en fu et en charbon;
 Ja n'en prendra un seul qui puis ait garison."
 Et cil li respondirent: "Vos parlés en pardon.
 Nos ne somes si home ne de lui ne tenom
 Ne ja n'avra du nostre vaillant un esperon.
 Se li rois nos manace, et nos le deffion,
 Et se il nos assaut, et nos nos deffendrons.
 Se ainsi nos demaine, dont somes nos bricon."
 Li mes s'en sont torné qant ont dit lor raison,
 Tresq'au tref Alixandre n'i ot arestison.
 [2.88] En la tente Alixandre s'en sont li mes entré
 Et content tout l'afaire si com il ont mandé:
 Que de la vile rendre ne sont pas porpensé,
 Car ançois en seront mil escu estroué,
 Et des nos et des lor maint plaié et navré.
 Alixandres demande: "Sont il ja deffié?"
 Ce dist Antigonus: "Par mal somes sevré."
 Lors commande li rois que tuit soient armé,
 D'assaillir et de prendre garni et apresté;
 Alixandres meïsmes a son cors conreé.
 Son cheval li amaint Caulus et Aristé,
 Alixandres monta par son estrier doré.
 Lors veïssiés les Griens dedevant la cité,
 Ja avoient porprise la dove du fossé.
 Tost fust prise la vile et li mur effondré,
 Qant cil de la dedens sont a conseil alé.
 A une part se traient li prince et li chasé:
 "Cil Griens sont de bataille hardi et aduré,
 Nes puet contretenir ne chastiaus ne cité.
 S'Alixandres nos prent, mal avomes esré;
 Nen prendroit raençon, qu'il le nos a mandé.
 Mais car faisomes pais a nostre salveté,
 Si que nos n'en soions honi ne vergondé."
 As batailles des murs sont cil dedens alé
 Et dient Alixandre qu'il s'en aille a son tré
 Et sa gent traie arriere, car il ont devisé
 Qu'il iront a sa tente faire sa volenté,
 Et si li porteront les cles de la cité.
 Et respont Alixandres: "Ce me vient molt a gré;
 Mieux la veul avoir saine que il soient gasté."
 [2.89] Li rois vit la cité qui envers lui se plie,
 Et q'ençois la rendront qu'ele soit agastie.
 Droit a son tref s'en torne o sa grant compaignie,
 A pié est descendus entre la baronie;
 Molt ot environ lui bone chevalerie.
 Alixandres les voit, ne puet müer n'en rie.

Uns chevaliers persans du resne de Nubie
 Devant lui s'agenolle, molt docement li prie:
 "Sire rois Alixandres, cui tous li mons sousplie,
 Chevaliers sui prisons por alongier ma vie,
 Et sui venus a toi, mestier ai de t'aïe,
 Que tu me doingnes don selonc ta seignorie,
 Que ta grant largece ait ma poverté renplie."
 Li rois fu encombrés de sa broigne sartie,
 Sa teste li desarment, por ce ne respont mie,
 Mais la raison celui ot bien par cuer oïe.
 Es vos les pers d'Araine par mi la praerie,
 Et chevalche chascuns un mullet de Sulie.
 Devant lui s'agenollent desor l'erbe florie,
 Les cles li ont rendues et la vile en baillie.
 Alixandres les prent, mais son prison n'oublie,
 D'autre part s'est tornés si apela Elye:
 "Ou est li chevaliers qui me queroit aïe?"
 Cil est venus avant, qui forment s'umelie.
 "Amis, dist Alixandres, bonement sans boisdie,
 Tien, je te doins Araine et la terre en baillie;
 Ja n'en perdras plain pié en trestote ma vie."
 "Va avant, chevalier, dist Dans Clins, sel mercie."
 Et cil li respondi: "Par foi, je n'en quier mie."
 [2.90] "Chevaliers, dist li rois, vien avant si avras
 Ceste bone cité et de moi la tenras
 Et la terre environ, ja plain pié n'en perdras."
 Et cil li respondi, qui molt ot le cuer bas:
 "Rois, done me autre chose, or ou argent ou dras,
 La cité ne me plaist ne je ne la voil pas
 Ne ja de li deffendre n'esteraï un jor las."
 Alixandres respont: "Se devient droit en as;
 Je ne sai qui te tient ne le cuer que tu as,
 Mais itel sont li don au roi mascedonas."
 Alixandres s'en rist s'apela Filotas,
 Sor un paile de fautre s'est assis de Damas.
 Del chevalier se rient et demainent lor gas:
 "Qui n'a cuer d'assés prendre mieus aime un don eschars,
 Ja malvais hom n'iert riches, qui li donroit Baudas."
 La cité fist garnir et mist ens satrapas.
 Au prisonier commande a doner cinq cent mars;
 Ce fu li menres dons au roi macedonas.
 [2.91] Qant cil orent la vile Alixandre rendue,
 Li rois la fist garnir et autres gardes mue.
 Au quint jor est meüs, du siege se remue,
 Tout droitement vers Gadres a sa voie tenue.
 Que ja mais ens sa vie ne li sera tolue.
 Li dus Betys a bien cele chose seüe,

Et mande par sa terre et secors et aiue
 Et tramet en Aufrique por une gent cremue;
 La gent persant et more en est a lui venue,
 Et envoie en Betaine pour une gent boçue;
 Dens ont grans et pies les, grans est et parcreüe,
 Et porte chascuns hache ou tinel ou maçue;
 Qui uns d'aus fiert a cop mervelle est se nel tue.
 Tant chevalchent a force que la vile ont veüe,
 Qui ot tente ne tref el pré l'a estendue.
 [2.92] Li Grieu assirent Gadres et devant et derriere,
 Li rois as maistres portes mist de sa gent plus fiere,
 Et les autres barons rassist en lor maniere,
 Si com chascuns est mieudres et sa gent plus entiere.
 Licanor et Filote a mis en la premiere,
 Tholomé et Cliçon mist en la plus corsiere,
 Por ce que lor bataille est tous jors costumiere
 De souffrir gregnor fais et en l'estor premiere.
 Et li Grigois porprenent le plain et la riviere,
 Et prenent la vitaille par la terre pleniere,
 De ciaus qui la deffendent i ot fait mainte biere.
 Qant il furent garni, si s'en revont arriere,
 Ja tant com il i soient n'en sera mais l'ost chiere.
 [2.93] Li dus Betys de Gadres ot molt le cuer dolant
 Qant vit gaster sa terre et livrer a torment,
 Et espandre par l'ost le vin et le forment,
 Ainsi com li forrier les mainent malement.
 Au roi en a tramis un message briement
 Q'isse fors de sa terre, il li fera present,
 Trente soumiers charchiés entre or fin et argent;
 Et se cis plais ne vient Alixandre a talent,
 Si mande tel parole Tholomer coiement
 Dont il seront encore maint chevalier dolent.
 Li mes ist de la vile, au tref le roi descent
 Et conte sa parole bel et cortoisement:
 "Li dus Betys vos mande pais et acordement,
 Que issiés de sa terre, il vos fera present.
 Tant vos donra avoir que tout serés manant."
 Alixandres respont: "Je n'en ferai noiant.
 Jou ai la vile assise s'i serrai longement
 Ançois que ne la pregne, se on ne la me rent.
 Je m'en sui ja vantés oiant toute ma gent,
 N'est pas rois qui se fause ne sa raison desment."
 Et li mes prent congié, vers Tholomé s'estent:
 "A le matin vos mande li dus tornoiement,
 Devers la vostre porte s'en istra coiement."
 Et respont Tholomers: "Bien l'otroi et creant;
 Tous soie je honis se je ne l'i atent,

Molt iert fors ses haubers se ma lance nel fent."
 [2.94] Li mes se part de l'ost s'est a Gadres venus,
 Au duc Betys retourne, de cui il iert meüs,
 Et dist: "Li rois vos mande qu'il n'est pas vostre drus,
 Ja por torner du siege n'iert ses tres destendus
 Tresq'avra pris la vile et les murs abatus,
 Se ne li est rendue et li palais fondus."
 Et li dus respondi pensis et irascus:
 "Dehais ait, se Dieu plaist, qui sera vis vaincus,
 Mieus veul estre mors pris que vis estre rendus."
 "Dans Tholomé vos mande qu'il n'est pas esperdus,
 De tornoier as tentes serés bien atendus,
 De sa lance savrois com est roisdes li fus."
 Et li dus respondi: "Bien nos ont conneüs."
 Toute nuit s'eschargaient tant que jors fu parus,
 Sonent cors et buisines et ces grailles menus.
 Main montent cil de Gadres et prenent lor escus,
 As tentes Tholomé fu li tornois tenus.
 [2.95] Cil de Gadres s'armerent et montent par matin,
 Li dus s'en est issus par la porte Ludin,
 Et ot en sa compaignie maint conte palasin.
 Es vos Bigos, Buigués, Saboués et Chatin,
 Et Madés l'orgellous et Carraut de Lerin,
 Et ont en lor compaignie maint jovincel meschin
 Por commencer l'afaie fier et fort et enclin.
 Et li Grieu les encontrent orgelleus et de brin,
 Contre le vent fremissent cil gonfanon porprin.
 Lors josterent ensamble les gens de maint latin,
 Escus et haubers rompent, froissent cist fust fraisnin,
 Sor les hiaumes tentissent cil bon branc acerin.
 Li hardi desarmé furent tost a lor fin,
 De ciaus qui sont a terre veüssiés grant traïn.
 [2.96] Cil de Gadres s'en issent tuit rengié et serré,
 Et li Grieu les encontrent orgelleus et armé.
 Qant voit li dus Betys le vairet abrievé
 Dont li compains Cliçon l'abati en un pré,
 Molt durement l'en poise, car maint jor l'ot gardé;
 Se li haubers nel tient, ja sera comperé.
 Si grans caus s'entredonnent li dus et Tholomé
 Que sous les boucles d'or sont li escu traué;
 Les lances sont brisies, mais li fer sont outré.
 Et li hauberc se tienent, si sont fort et serré.
 Si forment s'entrehurtent que tuit sont estoné
 Et par desus les crupes des chevaus enversé;
 Au redrecier d'aus deus i ot maint caup doné.
 Et Dans Clins ses compains a Dilas encontré,
 Un prince de Persie, de Galenie né,

Que des chevaus se sont a la terre porté.
 [2.97] Dans Clins fu a la terre entre lui et Dilas.
 Li fieus Caduit se drece, mais cil ne ressort pas,
 Car molt fu estonés et des armes iert las,
 Et par mi les herberges s'en fuit ses chevaus cras.
 Dans Clins sache l'espee qui ja fu Eneas,
 Au siege devant Troie la conquist Atenas,
 Sel fiert par mi le hiaume qu'en trois lieus le fist quas.
 Devant li a trenchié le nasel a compas,
 Ja l'eüst mort ou pris, nel tenés mie a gas,
 Qant la bataille au duc vint armee le pas.
 Cil voit sa demorance si s'est ferus el tas,
 Puis lor fist grant damage d'un parent Perdicas.
 [2.98] La noise fu levee et li mort sont confus,
 Lor vint par mi le champ poignant Antioqus,
 Et sist sor Cervadoine, qui fu le roi Otrus,
 Ja por cinq lieues corre n'iert estans ne confus.
 Es rens des tornoians va joster a Gebus,
 Toutes plaines lor lances se portent a reüs.
 Li Persans saut en piés, mais li Griens fu ains sus
 Sel fiert par mi le chief qu'il le rabati jus;
 Ja en preüst la teste se n'i venist li dus;
 Et fu en la bataille Abilans de Lerus.
 [2.99] Li renc sont espessié et la gent estormie,
 Et li Grigois s'armerent qant la noise ont oïe.
 E vos la gent boçue, felensse et hardie,
 Par une autre posterne lor ont fait asaillie
 Et porte chascuns hache ou grant fust qui ne plie;
 Cui uns d'aus fiert a caup laidement le chastie.
 Cil ont si la bataille Tholomé envaïe
 Que tresq'as pavellons est arrier resortie.
 Ja tornast as Grigois laidement la folie,
 Qant Emenidus point, qui sa compaigne guie,
 Entr'aus et la cité l'a açainte et hordie.
 Cil se vont regardant et li dus lor escrie,
 La veüssiés sachier mainte espee forbie.
 De deus pars l'ont enclose, es la vos esbahie,
 Tuit ont l'estor guerpi et la fuie acuellie,
 Et li Griens les ferirent, qui nes espargnent mie,
 En fuiant en ont mort une molt grant partie.
 Par mi la maistre porte rest en Gadres flatie,
 Cist ne feront hui mais as Grigois envaïe.
 [2.100] Li Griens ont desconfit la pute gent boçue,
 Par mi la maistre porte est en Gadres ferue,
 Molt par l'ont au ferir laidement descreüe.
 Mais Dilas l'orgelleus, qui siet sor Noireneue,-
 Un destrier de grant pris que li dona sa drue,

Armés fu et couvers d'une porpre volsue,
 Desi q'as poins li bat une ensegne frengüe,-
 Sovent cerche les rens et molt bien s'i aiue,
 A un baron de Gresce a la teste tolue.
 Dans Clins point Boniface, qui sovent se remue,
 Molt li poise du Grieu qui la teste ot perdue,
 Ja sera d'ambesdeus la mellee tenue.
 Ambedui laissent corre par une voie herbue,
 Si grans caus s'entredonent sans nule retenue
 Q'il n'i ot si fort targe ne soit fraite et fendue;
 Les lances sont brisies mais nus ne s'en remue.
 Dans Clins se traist vers lui et tint l'espee nue,
 Sel fiert par mi le hiaume, qui fu fais a Valrue,
 Que les estriers li taut de la sele volsue;
 Li agus de son elme fiert en l'erbe menue;
 Dans Clins prist le cheval, qui de corre s'argüe.
 Es vous la grant bataille fors de Gadres issue,
 Et la gent Tholomé est encontre venue.
 [2.101] Matin leva li rois et ot fait s'orison,
 Et entendi la noise a la porte Cliçon.
 Molt durement l'en poise et tint le chief enbron,
 C'onques as premerains ne josta se il non;
 Ses armes fait venir devant son pavellon.
 Tant durement se haste qu'il fist grant mesproison,
 N'ot que lance et espee, escu et gonfanon,
 Si saut en Bucifal qu'en croissent li arçon,
 Tout droit en la bataille en va a esperon.
 Dieus garisse Alixandre de mort et de prison,
 Hui recevra tel caup par le conte Pinçon
 Dont en l'ost as Grigois ploreront maint baron.
 Autresi com la grue fuit devant le faucon,
 L'en porte Bucifal par l'estor de randon.
 Devant la maistre porte va joster a Porçon.
 El cors li met le fer a tout le gonfanon,
 Toute plaine sa lance l'abat mort el sablon.
 Cil conurent le roi a l'escu au lion,
 Tuit ensamble se traient vers la porte Mabon
 Et dient que hui mais ne feront se mal non.
 [2.102] Cil de Gadres se traient vers la porte Mabin;
 A tant es vos le prince, qui sist sor Seraphin,
 Un destrier de Castele courant outremarin,
 Et connut Alixandre qui des lor fait traïn.
 En sa main tint un dart dont le fus fu de pin,
 Alixandre le lance par le las a or fin
 Si que par mi les pans du bliäut ostorin
 Li enbat ens la cuisse tout le fer acerin;
 Desous fiert en la sele coverte de porprin.

Alixandres s'enbronche et tint le chief enclin,
 Del sanc qui ist du roi i ot plain un bacin.
 Li Grieu virent la plaie du prince palasin,
 Environ lui s'arestent li viel et li meschin;
 La ot mené grant duel et desrompu maint crin,
 Et cuident d'Alixandre que il aut a sa fin.
 [2.103] Li Grieu sont en grant ire por le roi lor segnor,
 Durement se dolousent li grant et li menor,
 Mais li rois les conforte, com hom de grant valor,
 Et dist qu'il garra bien, ne soient en error.
 Alixandres ot mires, ainc ne furent mellor,
 De l'ongement i mirent qui porte grant vigor,
 Et garissent la plaie et traient la dolor;
 Ains n'en laissa ses armes a porter icel jor.
 Or sache bien li princes, s'ui mais point par l'estor,
 Se del roi s'escremist, molt savra de trestor.
 [2.104] Cil de Gadres sont lié de la plaie le roi,
 Molt en mainent grant joie, mais ne sevent por coi.
 Dans Clins et Tholomés ne furent mie qoi,
 O cinq cens chevaliers commencent un tornoi,
 Des qels as commençailles morurent plus de troi.
 Emenidus d'Arcage i vint poignant par soi
 O la sieue bataille maintenir le tornoi.
 A tant es vos le prince, qui sist sor Serafoi,
 Un destrier de Castele qui cort a grant desroi,
 Molt par ot riches armes et avenant conroi.
 Alixandres li vait poignant tout un chaumoi,
 La lance sor le fautre, le gonfanon d'exploï,
 Ja comperra la plaie uns de ces deus, ce croi.
 [2.105] Li princes fu molt fiers, de petite persone,
 La ou voit Alixandre durement s'abandone,
 Et li rois, qant le vit, molt forment esperone.
 Alixandres le fiert qui de riens nel saone;
 Ne li valent ses armes une paille d'anone,
 Autresi les perça com se fust une gone,
 El cors li mist le fust et le fer d'Escalone.
 Alixandres l'enpait, qui si grant caup li done
 Et tant forment l'abat que la terre en resonance.
 [2.106] Pinçons jut a la terre en mi le champ pasmés,
 L'ame s'en est alee, assés tost est finés.
 Li Grieu prinrent le cors, ne lor fu mie ses
 Q'a tant peu de vengeance s'en fust li rois tornés;
 A fors roncins li ont tous les membres noués,
 A corioies de cerf les ont fort acouplés,
 Par devant ciaux de Gadres fu li cors traïnés,
 Si que bien en pot estre veüs et esgardés.
 Lors tirent et desrompent, sempres fu deschirés,

Tost li orent les membres fors du cors dessevrés.
Cil des murs l'esgarderent, de qui il est amés,
La ot paumes batues et cheveus detirés,
Cist plais a ciaus de Gadres durement effreés.
[2.107] Molt ot li dus grant ire de la mort de Pinçon,
En la terre de Gadres n'avoit mellor baron;
De soi meïsmes atent autretel guerredon.
S'Alixandres le tient, n'i metra raençon,
Qui li combleroit d'or et d'argent un dongon,
Tant durement le het por la mort de Sanson.
Et vit la sieue gent morir a contençon,
Entor lui les ocient, n'a mais bon compaignon.
Lors voit bien et conoist la grant destrucion
Qui sor lui est tornee et la confusion,
Et maudist les Grigois et qui lor fist cel don,
Car contre lor effors ne puet garir nus hom.
Vers la porte moiene baissent lor gonfanon,
A la fuie se metent chevalier et paon;
Et li Grieu les enchaucent a coite d'esperon,
Par mi la maistre porte se metent a bandon.
Aveuc aus ens la vile, qui qu'en poist ne qui non,
A entré des Grigois, ce sachiés, a foison.
La oïssiés des hiaumes et des brans tel tençon
D'une lieue et demie en oïst on le son.
[2.108] Ensamble o ciaus de Gadres se sont li Grigois mis,
En la vile par force ont tout le borc espris
Et le baile defors, et pris le duc Betys.
Ains quel tiegne Alixandres, l'ont li Grigois ocis,
Car tant fort se deffent desous son escu bis;
Bien set que Alixandres est tant ses enemis
Por la mort de Sanson, qui tant fu ses amis,
Et por le grant damage qu'il li ot fait des Gris,
Mieus veut morir a glave que devant lui aut vis.
Molt ot li rois grant joie qant le regne ot conquis,
Il a mises ses gardes es fremetés Betys.
[2.109] Qant li rois ot pris Gadres et saisi les deffois,
Por la terre garder i laissa des Grigois.
Des bachelers du regne, des chevaliers cortois,
Qui ont les beles armes et les riches conrois,
Qui ferront aveuc lui es estors de manois,
En mena Alixandres plus de deus mile et trois;
Tant par l'ont aamé por ce qu'il est cortois,
Et les avoires lor done et les arrabiois,
Les chevaus et les armes et les mulspanois.
Quatre jors sejournerent et au quint mut li rois,
Des or sache bien Dayres et Porrus li Yndois
Teus affaires lor sort qui n'est mie a gabois.

[2.110] Au quint jor mut li rois, il et si chevalier;
 El premier chief devant sont li gonfanonier,
 Tout droit vers Escalone prinrent a chevalchier.
 La vile vaura prendre et la terre essillier,
 Mais encontre lui vienent li dus et li princier
 Si devienent si home et si lige terrier,
 Et li rois les reçut de bon corage entier;
 Cel jor i ot doné maint drap de soie chier.
 L'endemain mut li rois, ne vaut plus atargier;
 Par la terre s'espandent quatre mile forrier,
 Qui ne laissent chastel ne mur a peçoier.

[2.111] Alixandres trespasse le regne de Surie,
 Droit vers Jherusalem a sa voie acuellie,
 Q'il veut la cité prendre et avoir en baillie.
 Bien tost l'eüst destruite et la terre gastie,
 Mais la gent citoiaine envers lui s'umelie, [2440]
 Contre lui est venue molt gente compaignie,
 De dras religieus fu toute revestie.
 La loi li apoterent du tans saint Jheremie;
 Dieus li sires du mont, qui tout a en baillie,
 Le dona Moÿsés el mont de Synaïe
 Et vaut que ele fust par son pueple estableie.
 Alixandres l'oneure et encline et sousplie
 Et vit humle le pueple, sans orguel, sans folie,
 Et que il li mostrerent amor et segnorie;
 Si grans pitiés l'en prent q'a tous jors lor afie
 Et pais et quiteé lor pramet a sa vie.
 Lors fu li pueples liés et forment l'en mercie,
 Grans presens li porterent, mais li rois nes prist mie.
 Outre s'en est passés et s'amor lor otrie
 Et s'autre gent les grieve il lor fera aïe.

[2.112] Alixandres chevalche, c'onques puis ne fina,
 Tresq'en la terre Dayre onques ne s'aresta,
 Mais la gent felenesse confondi et gasta;
 Et qui vers lui se tourne quitement le laissa
 Et qui Dayron avoe malement li esta.
 Ens en la terre Daire li rois se herbrega,
 Ses tentes fist fichier et sa gent ralia,
 Ja mais n'avra grant joie tant com vif le savra.
 Et qant Dayres l'ot dire, durement l'en pesa,
 Lors demande conseil comment le destruira.
 Un present li envoie li rois dont s'apensa,
 Par tant li est avis qu'il l'espoëntera.

[2.113] D'une chose fist Dayres que preus et que cortois,
 Qu'il prist graine novele menue de pavois,
 Douce a mengier et blanche autresi comme nois,
 Plus que ne portast mie uns mulés espanois,

Si l'envoie Alixandre, le roi mascedonois,
 Et commande as messages et conjure lor lois
 Qu'il dient Alixandre fierement sans gabois
 Que Dayres a plus homes, que Persans que Yndois,
 Q'il n'a grains en la charche a chascun deus ou trois;
 S'il vienent en l'estor qu'il ferront de manois,
 En bataille nomee les troveront tous frois.
 Mais Dayres ne sot mie q'Alixandres li rois
 Mosterra tel parole as messages ançois
 Q'il tornera son conte le chief devant detrois.
 [2.114] Li mes s'en est tornés qui le present en maine,
 Tant chevalche et esploite q'ains que past la quinsaine
 En vint a Alixandre, le roi de Mascedaine,
 Si le trova seant en sa tente demaine.
 Et vit environ lui tant prince, tant chastaine,
 Et ot en sa compaignie maint fil de chastelaine.
 Li mes l'a salüé et dist chose certaine:
 "A toi m'envoie Dayres et tramet ceste graine.
 Entrés es en sa terre, qui de richece est plaine,
 O ta gent q'as conduite de Gresce mascedaine,
 Mais torne t'en arriere si te gete de paine,
 Car Dayres a plus hommes, que chasés que demaine,
 Q'il n'a grains en la charche n'en mer pierre d'araine,
 Q'il avra tous mandés en une qarentaine.
 Autresi com l'alose engloutist la balaine,
 Vos conquerront en champ, vostre mors est prochaine;
 La terre dont venistes vos samblera lointaigne."
 Qant l'entent Alixandres, de respondre se paine
 Et a dit tel parole qui molt par est soutaine.
 [2.115] Alixandres s'oi devant soi manecier
 Et vit le present Daire, qui gaires ne l'ot chier,
 Qui lui veut et ses homes par itant esmaier.
 Li rois prist de la grene le pesant d'un denier
 Si la mist a sa bouche, que tout vaut ensaier;
 Il la trova molt douce et bone por mengier.
 Alixandres parole et dist au messagier:
 "Ceste chose est molt simple et molt fait a proisier.
 Est Dayres ausi humles et il et si guerrier?"
 "Oïl, fait li mes, sire, et tuit si chevalier."
 Alixandres respont a loi de bon princier:
 "Dont sont il en bataille a destruire legier.
 A ce que li Grieu sont en estor dur et fier,
 Ja ne porrés garir encontre lor acier;
 Se nos avons poi homes, il sont tout costumier
 D'autre gent desconfire et desrompre et chacier."
 Li rois fait apeler son maistre despensier,
 Tout plain son gant de poivre li fait apareillier.

[2.116] Li rois fait aporter tout plain son gant de poivre.

"Oés, fait il au mes, que vos vuel amentoivre:
Si com cist tans de poivre est or plus fort a boivre
De vostre graine douce, bien le pöés perçoivre,
Est ma gens fors et dure por fort estor reçoivre,
La vostre gent menue est legiere a deçoivre.
Ausi com li lyons prent et ocist l'atoivre,
Qui est haus et creüs comme rains de genoivre,
Vos conquerrons en champ et vostre gent atoivre;
Quant partirés de nous, des testes serés soivre."

[2.117] Quant orent li message lor besoigne furnie
Et voient q'Alixandres ne s'en tornera mie,
Mais la richece Dayre et sa grant segnorie
Et sa gent et sa terre veut avoir en baillie,
Lors demandent congié si s'en vont en Persie
Et reconterent Dayre sans nule felonie
La parole trestoute si com il l'ont oïe;
Et dient du present toute l'alegorie
De la graine et du poivre, que chascuns senefie,
Et com li rois de Gresce lor mostra la maistrie.
Et prisent Alixandre et sa grant compaignie,
Q'en tout le siecle Dieu n'a tel chevalerie,
Et li rois est si preus et de tel baronie
Qu'il vaurra tout avoir du mont la segnorie.
Quant Dayres l'entendi, tous li sans li formie;
Lors fait faire ses chartres et ses messages prie
Q'il semongnent le regne qui vers lui s'umelie
Que tuit viegnent par force a Dayre a l'ost banie;
Et ciaus qui n'i venront de s'amor les deffie,
Car cil qui n'i venra n'i perdra que la vie.

[2.118] Dayres a fait semondre le regne d'entor soi
Et trestoute la gent qui maintient sa loi,
Ciaus qui tiennent de terre demi pié ne plain doi;
Et qui or n'i venra a Dayre ment sa foi,
Et gart que nus n'i viegne n'ait armes et conroi.
Quant furent assamblé par les plains d'Eleroi,
Si furent plus par esme de cinc cens mil et troi.
Iluec ne veïssiés pré ne plain ne chaumoi
Ou il n'eüst cors d'ome, cheval ou palefroi
Ou harnois d'autre guise, la n'estoient pas coi;
Cel jor i veïssiés maint gonfanon d'esploi.
D'aler contre Alixandre ierent tuit en effroi.

[2.119] Quant Dayres ot josté les gens de ses regniés,
A plus de cinc cens mile les ont le jor prisiés.
Et Alixandres fu d'autre part herbregiés
Sor l'eaue de Gangis, dont parfons est li biés.
Les os furent si pres que tres bien veïssiés

De l'un pavillon l'autre, tant les ont aprochiés.
 Li Grieu saillent as armes, lors les veïssiés liés;
 Ilueques veïssiés gonfanons desploiés,
 Mais desi au matin fu l'estors respitiés
 Por sorveoir les Grieus a lor tentes logiés.
 [2.120] Par mi les pres de Paile s'est Dayres ostelés,
 Et Alixandres ot devant tendu ses tres
 Sor l'eaue de Gangis, dont parfons est li gues.
 Por ce fu icil pres de Pailles apelés
 Que Dayres i fist tendre sa richece en ces pres,
 Cendaus et ostorins et bons pailles fresés,
 Or et argent et dras et autres richetés,
 Et dist qu'il est du mont li plus riches clamés.
 Et Alixandres fu d'autre bien porpensés:
 Cel jor li mostra tant de chevaliers armés,
 Atornés de lor armes, sor les destriers montés,
 De qoi Daires se tint le jor por fol provés
 Et dist qu'avoirs n'est preus qui trop par est gardés,
 Mais beneois soit cil dont on est alosés.
 Pire est riches malvais que povres honorés,
 Bone chevalerie est molt grans richetés.
 [2.121] Cele nuit sejournerent les os sans assambler,
 Car les compaignes firent ambesdeus a douter.
 Et Dayres li Persans fist ses barons joster,
 Dus et contes et princes en sa tente assambler.
 "Baron, ce dist li rois, je vos ai fait mander
 Por ce que je vos veul un conseil demander.
 Le rois de Mascedoine voi en ma terre entrer
 Et ma gent essillier et mon país gaster,
 Qui mes hom deüst estre quitement sans fauser.
 Ses pere et ses ancestres ne l'oserent penser,
 Mais l'orguel qu'il demaine le fait outrecuider.
 Or se veut de mon regne faire sire clamer,
 Mais je ne redoi mie du tout a mal garder,
 Car li sages doit estre por le fol assener,
 Et li fol se repainent des sages gens meller.
 J'ai une fille bele qui molt a le vis cler,
 A mollier li otroi sel me volés loër,
 Et vaurrai de mon regne l'une moitié doner
 Et la terre conquise toute quite clamer.
 Par itant nos porroit en país laissier ester."
 Et cil li respondirent: "Nel vos devons blasmer;
 Ci a bon mariage quil porroit atorner."
 [2.122] Dayres a pris messages, des mellors de sa gent,
 Des barons de sa terre, atornés richement.
 Son message lor conte et charche sagement
 Ses envoie Alixandre par son l'aube aparant.

Desi q'au tref le roi sont venu erramment,
 A l'entree des cordes descendent en estant
 Et ont trové le roi en sa tente seant,
 Ou faisoit atachier une enseigne pendant
 En sa lance de fraisne a cleus qui sont luisant,
 Qui a roisde le fust et le fer si trenchant
 Qui bien en iert ferus de mort n'avra garant.
 Li mes le salüerent bel et cortoisement
 De par Dayre de Perse, que on clame soudant.
 [2.123] Devant le roi s'esturent li Persant en estage,
 De la part lor signor conterent le message.
 "Alixandre, font il, molt as divers corage.
 Ses que te mande Dayres, li sires de parage?
 Entrés es en sa terre par merveilleus outrage,
 Onques hom de ta terre ne pensa tel folage;
 Tu dois estre ses hom quitement par usage,
 Tes pere et tes ancestres firent au sien homage;
 Mais Dayres est si humles et si a le cuer sage
 Qu'il ne veut esgarder a orguel ne a rage.
 Une fille a molt bele, si a cler le visage,
 A mollier la t'otroie au los de son barnage;
 La moitié de son regne avras a mariage,
 Et la terre conquise t'otroie en heritage,
 Car ne veut pas que tort li païs a damage,
 S'en seront avancié tout cil de ton lignage."
 [2.124] Li rois vit les mes Dayre et entent lor raisons,
 Un respit lor demande, mais ne fu mie lons,
 Tant seulement qu'il ait parlé a ses barons;
 En un tref s'en entra qui fu fais a girons.
 "Savés, dist il as siens, dont Daires m'a semons?
 Doner me veut sa fille, qui a gentes façons;
 Et demie sa terre o la feme prendrons
 Par itel convenant que nos deviserons
 Que n'en soit de la guerre mais chauciés esperons,
 Ains irons en rivieres et porterons faucons
 Et si verrons voler nos gens esmerillons.
 Par le conseil de vos en iert fais li respons."
 Premier li respondirent Tholomers et Clinçons:
 "Sire rois Alixandre, desor vos le metons.
 Se volés, faites pais, se volés, guerroyons;
 Le quel que volés faire et nos l'otrierons."
 "Sire, dist Perdicas, molt par est biaux li dons,
 Mieux vaut demie en pais la terre, ce savons,
 Qu'ele ne feroit toute a guerre et a tençons."
 Qant l'entent Alixandres, si fu mus et embrons;
 Après li respondi, iriés comme lyons:
 "Perdicas, fait li rois, vostre cuers est garçons,

Ja le vostre conseil, se Dieu plaist, ne crerons,
 Ains en iert en maint cors baigniés mes gonfanons
 Et en serai en sanc trestous tresq'as talons
 Que ja compaignon aie ne partis soit mes nons."
 [2.125] Li rois a la raison des deus barons oïe
 Et entent la parole dont Perdicas li prie;
 Si forment le regarde que cil tous en fremie.
 Alixandres l'apele, forment le contralie:
 "Se fuisse Perdicas, ne lairai ne vos die,
 Ja eüsse otroié molt tost ceste partie,
 Mais je sui Alixandres si ne le ferai mie;
 Ne per ne compaignon n'avrai ja en ma vie."
 Puis a dit as messages: "Ceste pais est faillie.
 Ralés vos ent et dites a Daire de Persie
 Face sa gent armer, que mes cors le deffie,
 Et la moie iert molt tost conr[e]ee et garnie.
 Ne veul avoir sa fille o sa terre demie,
 Ou ele iert toute moie ou je ne l'avrai mie.
 Ja n'avrai compaignon, soit savours, soit folie,
 Ains iert, se Dieu plaist, moie du mont la seignorie."
 [2.126] Li message de Perse revienent a Dayron,
 La parole Alixandre li dient trusq'en son:
 "Ou li resnes iert suens trestous en abandon
 Ou il n'en tenra ja vaillant un esperon,
 Ja nul jor de sa vie n'en avra compaignon;
 Sires du mont doit estre sans autre partison."
 Et qant Dayres l'entent, si craula le menton;
 Lors furent a conseil mandé tuit li baron.
 Li rois estut en piés devant son pavellon
 Et a dit a ses homes: "Segnor, quel le feron?
 Molt par truis Alixandre orgellous et felon,
 N'i puis amor trover ne q'aigniaus en lion.
 Par mi ceste bataille nos entrepasserom;
 Se li dieu nos aïdent, voirement la vaintrom."
 Et cil li respondirent: "Vostre plaisir ferom."
 [2.127] Au matin qant il virent le soleil esclairier,
 Dayres li rois de Perse monta sor un destrier,
 Et furent avec lui si mellor conseilier.
 Lors fist crier par l'ost et hucent cil banier
 Que tost soient armé sergant et chevalier.
 Qant furent atorné neïs li paonnier,
 Si furent bien ensamble soissante et dis millier.
 Dayres connut les Griens qu'il furent bon guerrier,
 Et li rois orgelleus et de corage fier,
 Et en toutes batailles sont de ce constumier
 Q'autre gent ne garist encontre lor acier;
 Ne veut pas ses eschieles joster au chaploier,

Car durement se doute de sa gent empirier.
 Lors fist ses courres prendre et bien apareillier,
 Les chevaliers dedens armer et haubregier,
 Et portent trenchans faus por les Grieus damagier,
 Les olifans ques mainent ne set nus hom prisier.
 El champ de la bataille les a fait arengier
 Iluec ou li estors se devra commencier.
 Après lor commença molt bien a ensegnier
 Que qant il se devront o les Grigois lier
 Que poingnent quatre pars par mi l'estor plenier
 Et fierent o les faus por les Grieus detrenchier
 Et la ou il iroint facent le champ vuidier,
 Que contre lor effort n'ait deffense mestier;
 Par itant les porront desconfire et chacier.
 Alixandres meïsmes les oïdesrainier,
 Qui en l'ost se fu mis a guise d'escuier,
 Puis s'en revint as Grieus si coiement arrier
 C'onques cel jor nel porent conoistre n'acointier.
 [2.128] Qant li rois vit Dayron ses corres deviser
 Et les chevaliers ens haubregier et armer
 Et lor commande a tous faus trenchans a porter
 Et a ses olifans fait les curres mener,
 El champ de la bataille les ot fais arester,
 Et li avoit oïagement deviser
 Que qant il se devroient o les Grigois meller
 Q'il feïssent les curres par quatre pars aler
 Por la gent Alixandre trespercier et branler,
 Alixandres commence contre ce a penser.
 Les douze pers de Gresce fait devant soi mander,
 Puis si lor commanda douze eschieles guïer
 Et fait Emenidon cele devant mener,
 Por ce qu'il est tous jors as premiers caus doner.
 Puis si lor commença sagement aconter,
 Qant il verront vers eus les olifans aler,
 Ciaus qui doivent les curres o les roees mener,
 Q'il se partent en crois et les laissent passer,
 Si bien que en l'estor nes puissent encontre;
 Et qant il les verront par mi les rens outrer,
 Lors se metent après qu'il ne puissent torner,
 Si qu'il facent lor curres contre terre verser;
 Puis s'aïrent sor aus et pensent de chapler,
 Si que ja nus de ciaus ne puisse relever.
 "Par itant les porrons desconfire et mater."
 [2.129] Qant Alixandres ot ordené en tel guise
 Ses batailles a poindre, en après lor devise
 Que la compaigne Dayre qui es curres s'est mise
 Poindra par la bataille si com chose est enprise;

Gart que si bien l'açaingnent que tote soit surprise
Et se ele puet estre detrenchie et occise,
Puis reviegnent a l'autre qui el champ est assise,
Et se tant pue[e]nt faire q'a la fuite soit mise,
As espees trenchans soit fierement requise.
Autresi com la noif est par le chaut remise
Iert hui la force Daire par la soie conquise,
Hui prendront li Grigois des Persans la justice.
[2.130] La bataille est jostee des Grigois et des lor.

Ainsi com Dayres ot devisé celui jor
Sont li curre meü et courent par l'estor;
Li olifant ques mainent vont de si grant fieror
Que nus ques encontrast n'eüst vers aus vigor.
Mais li Grieu s'en partirent sagement sans folor,
Que gaires n'i perdirent li grant ne li menor;
Et qant il furent outre, n'eurent tant de laisser
C'onques en la bataille repreïssent puis tor,
Car li Grieu o les ars ne sont mie a sejour,
En courant les ocient o les brans de coulor;
D'olifans et de cures lor ont fait tel atour
Tout ocïent a glaive et metent a dolor.
Cis plais torna a joie au roi mascedonor,
Et Dayres li Persans en ot duel et iror.

[2.131] Qant Dayres vit ses cures chaoir a tel martire
Et les chevaliers ens trebuchier et ocire,
Fiert sa main a sa cuisse si taint et s'esprent d'ire,
Tant redoute les Grieus que forment les remire,
Les regnes de son fraim a ambedeus mains tire,
Vers senestre se torne, sor son escu se vire,
Lors regarde ses homes, sous son elme souspire.
Quarante et deus batailles a ordené a tire,
As barons de sa terre les commande a conduire
Et apele ses homes si lor commence a dire:
"Qui or iert chevaliers de m'amor sera sire,
Car molt ai grant paor de perdre mon empire."

[2.132] Molt fu liés Alixandres et ses gens plus haities
Qant il orent des cures les batailles vuidies
Et a ciaux qui ens furent ont les testes trenchies.
Vit les batailles Daire toutes apareillies,
Qui venoient vers aus le pas, lances drecies.
Li rois ra douze eschieles jostees et rengies,
As douze pers de Gresce les a par non baillies.
Adont les veïssiés venir bien arengies,
Chascune devant l'autre, duites et afaities,
Si com li maines rois les avoit ensegnies.
Les enseignes au vent ont li Grieu desploïes,
Onques jusqu'au ferir n'i ot resnes sachies.

La ot molt grant meschief, mais les gens sont proisies,
 Qant a quarante eschieles se sont douze apoïes,
 Mais, s'Alixandres puet, anqui seront percies
 Et les compaignes Daire matees et brisies.
 [2.133] En la premiere eschiele, Emenidus d'Arcage,
 Vint li rois tous armés, espris de vasselage.
 El chief de la bataille vit le roi de Cartage,
 Qui la premiere eschiele Daire ot par segnorage.
 Alixandres le fiert par le hardi corage;
 Tous li conrois qu'il porte ne li vaut un fromage.
 Si grant caup li dona que trestout le sorborge,
 Toute plaine sa lance l'abat mort en l'erbage.
 Puis a traite l'espee, fors du fuerre la sache,
 Au torner de sa joste fiert Balot de Valage,
 Que la teste li trenche par desous le visage.
 Et li Grieu les ferirent qui sont cortois et sage;
 La veïssiés morir la gent Dayre el rivage,
 Autresi les ocïent comme beste salvage.
 De la premiere eschiele lor ont fait tel damage
 Quatre cens en ont mort a dolor et a rage.
 Et qant Dayres le voit, a poi que il n'esrage.
 [2.134] L'eschiele Tholomé vint après la premiere
 A une autre bataille Dayron grant et pleniére;
 Perchael la conduit, qui fu nes de Valmiere,
 Et portoit en sa lance l'oriflambe baniere.
 Les deus batailles hurtent par si faite maniere
 Ce n'est mie mençoigne que chascuns bien n'i fiere,
 De sanc et de cervel est tainte la bruiere;
 Mais la gent Tholomé estoit hardie et fiere
 Et li Persant bahif comme cerf en gaschiere,
 Et li Grieu les feroient comme gent costumiere,
 Derompue l'en maintent sor les autres arriere.
 Ce fu une aventure que Dayres n'ot pas chiere.
 [2.135] Après la Tholomé joint l'eschiele Cliçon
 A une autre bataille merveilleuse Mabon,
 Tant i ot des armés que je n'en sai le non;
 Onques tresq'au joster n'i ot arestison.
 Dans Clins fiert le premier, qui tint le gonfanon,-
 De s'ensegne porter li a fait Daires don,-
 Par mi toutes les armes li trencha le raignon.
 Cil voient lor baniere chaoir et lor guion
 Et les autres batailles desconfire environ;
 Onques puis cele eschiele n'i fist arestison,
 Desrompue s'en torne fuiant a esperon.
 Licanor et Filotes, Aristé et Caulon,
 O lor quatre batailles qu'il maintent a bandon,
 A quatre des eschieles josterent a Dayron;

Hauberc rompent et fausent et percent li blason,
 Des hiaumes, des espees oïssiés grant tençon,
 Le veïssiés gesir tant vassal el sablon.
 Les eschieles de Persse n'i font se perdre non,
 Toutes desbaretees les mainent sor Dayron.
 Lors josterent les os si hurtent li dragon,
 Or n'i avra parlé mais se de ferir non.
 [2.136] Les deus os sont jostees, li Persant et li Gri;
 Qant les lances baissierent, si leverent li cri.
 Li rois point Bucifal et ot mort Salatri;
 Mist l'escu devant soi et tint le branc forbi,
 Car sa lance ot perdue el cors d'un Arrabi,
 Et consieut Perchael en son elme burni.
 L'espee fu trenchans et li rois le fiert si
 Que desi es espaulles le trencha et fendi;
 Plus de set chevaliers lor a mort autresi.
 Emenidus d'Arcage i fu preus, jel vos di;
 Molt grant pris en porterent Tholomés et Dans Clin;
 Perdicas le cortois i tienent a hardi.
 Les compaignes se mellent et li renc sont fremi,
 Li douze per de Gresce ne sont mie en oubli,
 As espees trenchans lor ont un gieu parti
 De quoi li desarmé se tinrent por traï.
 En la melee furent li couart estordi,
 Au deffendre lor testes i sont preu li hardi.
 [2.137] Par mi les pres de Paile fu fiere la bataille;
 La ou les os s'encontrent, n'est mie devinaille,
 N'i ot ne ris ne gieu ne parlé de gasaille;
 Li couart s'en dessoivrent com li grains de la paille.
 Filardos sist armés sor ferrant de Navaille,
 N'ot plus fier chevalier desi q'en Cornouaille,
 Devant entredeus ieus el front sous la ventaille
 Avoit plain pié de lé, molt cuide que il vaille;
 Tant damage les Griens, nel tenés mie a faille,
 Que autresi l'eschievent com l'ostor fait la quaille;
 Qui il fiert de son branc n'i a oés mecinaille,
 Si l'ocist a un caup que gaires n'i travaille.
 Alixandres le fiert de l'espee qui taille,
 Tout le cors li fendi desi q'en la coraille;
 Et li Griu li escrient: "Ferés i! Dieus i vaille!
 La mort de Filardos la lor gent anoaille."
 [2.138] Li rois s'en passa outre qant ot mort Filardos,
 Et fiert Silocien, qui sire iert des Herlos,-
 Une gent feleneuse, orgelleuse et enpos,
 Qui ierent du lignage de Gos et de Magos,-
 Que l'espaule li trenche, puis li a dit trois mos:
 "Nous conoistrons hui mais de vos bien les esclos,"

Et lui et son cheval abati en un flos;
 Emenidus d'Arcage ra ocis Quinargos.
 Les compaignes se mellent et fremissent les os,
 Or se gart bien chascuns q'au partir ne soit sos,
 Ne remandra sans perte et des lor et des nos.
 [2.139] La bataille fu fiere, n'i ot ne ris ne gas;
 Li douze pers de Gresse ne s'aseürent pas,
 As espees trenchans vont departir le tas.
 Tholomés fiert Lion et Dans Clins Gaudias;
 Licanor, Osident et Filotes, Pilas;
 Perdicas, Bosien et Leoinés, Glinas;
 Aristés, Passien et Caulus, Sathanas;
 Aridés, Sarpetus; Antigonos, Corbas;
 Et Antiocus fiert et Gaugis et Brias;
 Emenidus d'Arcage joint o Corberias;
 A terre les abatent des chevaus qui sont cras.
 La ot elmes trenchiés et maint fort escu quas;
 Sor hiaumes des espees i oïssiés grans glas.
 [2.140] Durement se combatent li Grieu et li Persant.
 Alixandres estoit el premier chief devant,
 A l'espee d'acier vait la route fendant.
 Dans Clins et Tholomés vont la presse partant,
 N'encontrent chevalier qu'il n'aillent abatant,
 Ausi poignent ensamble com dui faucon volant.
 Emenidus d'Arcage a ocis Pagorant.
 Tholomés fiert un roi qui sire iert de grant gent
 Et ot trente cités devers soleil levant,
 La coraille li perce o sa lance trenchant,
 Mort l'abati a terre, la ot un duel pesant.
 Desor lui s'aresterent li petit et li grant;
 Karidés d'Ethyope le regrete forment,
 Ambedui ierent frere et d'un regne tenant.
 [2.141] Karidés d'Ethyope a son frere esgardé
 Qu'il vit mort a la terre sor son escu bouclé,
 Durement le regrete qant bien l'ot dolousé.
 S'or le pooit vengier, molt li venroit a gré;
 Et cuide de Cliçon que ce fust Tholomé
 Por ce que d'unés armes estoient atorné,
 Li elme sont d'un cuing et li escu bendé.
 Devers sa lance a destre a Cliçon encontré,
 Si grant caup li dona que tout l'a estouné;
 Li chevaus li chancele, car trop l'avoit lassé;
 Cliçon et son destrier abat en mi le pré.
 Plus de set chevaliers sont sor lui aresté,
 La li furent d'espee ne sai qans caus doné,
 Mais Dans Clins se redrece si a l'escu levé
 Et a par quatre fois Mascedoine escrié.

Es vos a la rescousse Caulon et Aristé,
 Emenidus d'Arcage et Filote abrievé;
 Au chaple des espees ont Cliçon remonté.
 A icele rescousse ot feru et josté
 Et vassal abatu et chevalier armé.
 Karidés d'Ethyope i ot le poing caupé,
 Et maint bon chevalier i furent afolé.
 [2.142] La bataille a duré tant que vespres fu tart;
 Dayres vait par l'estor tous armés sor Liart,
 Plus de quarante dus ot de chascune part,
 Quatre roi soustenoient devant lui l'estandart.
 Alixandres l'esgarde plus iriés d'un lupart,
 Par mi la gregnor presse est venus cele part,
 Autresi s'en aproche com faucons de mallart;
 Dayre le roi de Perse fiert sor le coënant,
 Par mi toutes ses armes li a trenchié le lart.
 Qant Dayres vit son sanc, n'a oel dont il l'esgart,
 De paor s'esvanist s'apele Satumart
 Et trois rois d'Orient et d'Egypte le quart;
 A la fuie se metent vers le val de Pinart.
 La gent Dayre s'en fuit toute ensamble une part,
 Et li Grieu les enchaucent, qui ne sont pas couart,
 Autresi les abatent com vilains son essart.
 [2.143] Dayres fu si navrés tous s'encline et chancele,
 Li sans vermaus li raie sor l'arçon de sa sele,
 D'une bende s'estraint, car il crient sa boiele,
 Fuiant s'en est tornés sor Liart de Castele;
 La gent Dayron s'en fuit vers le val de Pinele.
 Sa mere i a perdue et sa feme la bele
 Et sa fille au cler vis, qui iert gente pucele.
 Alixandres les prist si les maine et chadele,
 A sa tente de paille les chierist et dansele,
 Gement les honore et molt bel les apele.
 Dayres en ot tel duel qant en ot la novele
 Que ses cheveus derront et debat sa maissele.
 [2.144] Molt fu bele aventure Alixandre avenue
 Qant Dayre ot desconfit et sa gent derompue,
 Par effors d'armes l'ot en bataille vaincue.
 Mais Dayres n'ot tel duel de perte q'ait eüe
 Com il ot de sa mere qu'il ot el champ perdue
 Et sa fille et sa feme, que maint jor ot tenue.
 Molt redoute Alixandre qu'il n'en face sa drue;
 Por ce mande sa gent la grant et la menue
 De par toute sa terre ou poil d'erbe est creüe;
 Il en jure ses dieus et sa teste cheneue
 S'il en i remaint nus qui ne viegne en s'aiue
 Les talons avra cuis et la plante fendue.

Nel laissera, ce dist, par la loi q'a creüe,
 Que ne soit Alixandre ceste honte rendue.
 [2.145] Molt fu liés Alixandres et ses pris est montés
 Qant il ot les Persans de bataille getés
 Et Dayron desconfit, qui el cors fu navrés.
 Li avoires qu'il i prist ne puet estre nonbrés,
 Li ors ne li argens ne la grans richetés
 Que Dayres i perdi qant du champ fu getés
 Et sa feme et sa fille, qui orent grans biautés,
 Et sa mere meïsme dont il iert molt amés;
 Alixandres les prist ses en maine a ses tres.
 D'une chose fist bien et que cortois provés
 Que les dames commande a deus de ses chasés,
 Et chascuns d'aus l'en est et plevis et jurés
 Que ja nus hom en terre n'en iert tant lor privés
 Que Dayres soit par lui honis ne vergondés.
 Ne tarda après gaires de ce que vous öés
 Que morte fu la dame et ses cors deviés,
 La moillier le roi Dayre, dont par force iert sevrés.
 Alixandres meïsmes en fu dolens assés,
 Et qant Dayres le sot s'en fu si adolés
 Il a ses poins destors et ses cheveus tirés
 Et maudist toute l'eure que il onques fu nes.
 Puis a dit a ses homes: "Segnor, nel mescreés,
 Ne pot souffrir la dame les maus ne les viltés
 Qu'il li voloient faire et des hontes assés,
 Par itant si est morte et ses cors deviés;
 Mais par tous les roiaumes dont je sui roi clamés,
 Se ne veng ceste honte, ne sui rois coronés."
 [2.146] Dayres fu por sa feme coureceus et pensis.
 Estes vos un prison qui vint de l'ost des Gris,
 Estors de la bataille ou avant ier fu pris;
 Voiant toute sa gent a Dayre a raison mis:
 "Eschapés sui au roi a larron et fuitis.
 Vostre mollier est morte, dont est grains et maris;
 Molt la tint a honor tant com ses cors fu vis,
 Onques par nisun home ne li fu honte quis.
 Mais vostre fille est bele si a molt cler le vis;
 S'il veut, si la prendra au los de ses amis,
 Et s'il ne la veut prendre, ja ne l'en fera pis;
 Donra li a segnor duc ou conte ou marchis."
 Qant Dayres l'entendi, si en a fait un ris.
 "Alixandre, fait il, molt en avras grant pris;
 Molt es humeles guerriers et feeus enemis,
 De l'onor que m'as faite m'en as si bien conquis,
 Se pais voloies faire, par foi le te plevis,
 Que mes cors t'ameroit plus q'ome qui soit vis,

Et durement m'en poise qant de moi es eschis."
 En icele contree sor l'eaue de Gangis,
 La ou fu la bataille des Persans et des Gris,
 Avoit une cité que on apeloit Sis;
 Les tours estoient hautes et li murs fu antis.
 Li rois la prist par force, qu'il n'i a gaires sis,
 Dedens s'en est entrés o l'eschec qu'a conquis.
 Tant ot entor la vile des mors qu'il ot ocis
 Q'a merveilleuse paine i duroit nus hom vis.
 [2.147] Grieu et Mascedonois sont en la vile entré.
 Por ce q'en l'estor furent travellié et pené,
 Se sont molt volentiers quatre jors sejourné.
 A la mere au roi Dayre vienent dui si privé
 Si li ont conseillié belement a celé
 Que la hors de la vile sont troi baron trové
 Qui estoient haut home et de son parenté
 Et furent ens l'estor ocis et decopé.
 "Si requier Alixandre par grant humilité
 Q'il te donast congié qu'il fuissent enterré."
 Et la dame respont, qui le cuer ot sené:
 "Li vainquierres du mont fait tant ma volenté
 Que ne li os requerre noient outre son gré."
 Mais cil li ont tant dit et proié et mostré
 Qu'ele en a Alixandre le congié demandé.
 Et li rois li respont bonement et de gré:
 "Por la vostre amor, dame, ne vos iert ja veé.
 Faites prendre des mors a vostre volenté
 Et soient par mes homes hautement honoré."
 Puis li a cuitement rendue la cité
 Si c'onques n'en retint ne tour ne fremeté.
 [2.148] Molt par fist Alixandres que frans rois de bon aire,
 Qant il ot la bataille vaincue es pres de Paile,
 Q'il rendi la cité a la mere au roi Dayre.
 Mais sa fille estoit bele et ot cler le viaire,
 Sa colour samble rose et soleil qui esclaire;
 Aveuc soi l'en mena, q'en deüst il el faire?
 D'aler après Dayron ne tardera mais gaire,
 Ne li vaura laissier ne chastel ne repaire.
 Au quint jor est meüs si fait son ator faire.
 [2.149] Qant li rois ot conquis Sulie et les cités
 Et Dayre desconfit et ses homes matés,
 Por aler après lui est au quint jor montés,
 Ja mais ne finera s'iert l'uns desiretés.
 Tresq'en la terre Dayre ne s'est asseürés,
 Molt la trova garnie de bones richetés,
 De gentes praeries, de vignes et de bles.
 Il a dit a ses homes: "Segnor, or esgardés

Qels regnes si garnis nos est ci destinés,
 La terre sous les nues toute est vostre herités.
 Mais d'une riens me poise dont me sui porpensés
 Q'en si estroite roche est li mondes formés;
 Dieus a fait trop poi terre a un prodome assés."
 De ceste chose rirent Caulus et Aristés;
 N'a home en sa compaignie qui n'en soit effreés.
 Les douze pers de Gresse a li rois apelés:
 "Sor l'eau de Gangis faites tendre vos tres
 Et g'irai en riviere o mes faucons müés."
 Et cil li respondirent: "Si com vos commandés."
 A quinze compaignons s'en est li rois tornés;
 Aristotes ses maistres en est o lui alés.
 Qant li solaus torna et midis fu passés.
 A sa tente de paille est li rois retornés.
 Alixandres nos dist, qui de Bernai fu nes
 Et de Paris refu ses sornons apelés,
 Que ci a les siens vers o les Lambert jostés. [3100]

Le Roman d'Alexandre III

[3.1]Or entendés, segnor, que ceste estoire dist.
 De Dayre le Persant qu'Alixandres conquist,
 De Porron le roi d'Ynde qu'il chaça et ocist
 Et de la grant vermine qu'es desers desconfist
 Et des bonnes Artu qu'il cercha et enquist,
 De Gos et de Magos que il enclost et prist,
 Que ja mais n'en istront jusqu'au tans Antecrist,
 Ainsi com Apellés s'ymage contrefist,
 Du duc de Palatine qu'il pendi et deffist,
 La roïne Candace qu'en sa chambre le mist [10]
 Et de la vois des arbres qui de sa mort li dist,
 Ainsi com Aristotes l'entroduist et aprist,
 La verté de l'estoire, si com li rois la fist,
 Uns clers de Chastiaudun, Lambers li Tors, l'escrist,
 Qui du latin la traist et en romans la mist.
 [3.2]Qant repaire Alixandres du deduit des faucons
 O son maistre Aristote et o ses compaignons,
 Il li a commencié un livre de sarmons:
 Dist li qu'il n'ait sergans covoteus ne larrons,
 Les bons retiegne o soi et hee les felons, [20]
 Ne ne croie ses sers d'encuser ses barons,
 Les povres chevaliers sequere par biaux dons;
 Envers les gentieus homes soit de molt dous respons
 Et envoit a lor femes mantiaus et peliçons,
 Car se besoins li sort, grans iert li guerredons:

Cil soffriront por lui et ires et tençons
 Et de gaster les terres et ardoir les maisons.
 "Dayres a fait en Gresce grans persecucions,
 Molt en a avoir pris et or et raençons.
 Or est tans du vengier, chauce tes esperons, [30]
 Car heent le de mort toutes ses regions
 Por ce q'a mis sor aus sergans issi felons,
 Des noaus de sa terre, des fieus a ses garçons.
 Cil n'ont cure de Dieu ne de ses orisons,
 Ciaus qui ne se raiembent getent en lor prisons,
 Li avoires de la terre est tous lor abandons.
 Li pueples prie a Dieu et fait afflictions
 Q'ançois viegne seur aus male confusions
 Q'il ne soient vengié du roi et des gloutons."
 "Maistre, fait Alixandres, bien otroi vos sarmons, [40]
 Mes homes ferai riches d'avoir et de mangons;
 Ce que Dayres a pris n'avra mie en pardons:
 S'il en a une oeille, j'en avrai deus moutons.
 Por aler desor lui sont ja li Grieu semons,
 Sor l'eaue de Gangis tendent lor pavellons
 Et cil qui remandront seront cuit es talons.
 Nes puet garir chastiaus ne cités ne dongons
 Ne soient pris ou mort sans autres raençons."
 [3.3] Aristotes se gist a dens seur un tapis
 S'entroduist Alixandre comme son aprentis. [50]
 Dist li: "Ja fustes vos tant franchement norris,
 Ja cuivers losengiers ne soit par vos oïis.
 Se tu ne crois tes sers, ja ne seras honis;
 Ja sers ne sera bons qui sovent n'est aflis,
 Au tierc an ou au quart soit ses avoires partis.
 Li sages Salemons le dist en ses escriis:
 A paine a on bon arbre de malvaise raïis.
 Nule riens n'est si male comme sers enrichis;
 Qant il a son segnor tous ses avoires froïis
 Portés en autre terre, et de sous lui fuïis, [60]
 L'avoir, se li sers muert, a cil qui'n est saisis;
 Ja n'en avra ses sires vaillant une pertris.
 Par ses malvais sergans est princes malbaillis,
 Qui tolent les avoires as grans et as petis,
 Par coi il est de Dieu et du pueple haïis;
 Li pechiés l'en remaint, cil en est enrichis,
 Et s'il veult de l'avoir, bien en est escondis.
 Assés voit on de ciaus qu'ont lor segnors traïis,
 Ques ont empoisonés ou as coutiaus murdris;
 Ton conseil ne lor di ne en aus ne t'afis." [70]
 Lors respont Alixandres com hom de sens garnis:
 "Or m'en irai, biaux maistre; de vos sarmons floris

Se ja un en trespas, dont soie je honis;
 Le jor soie je pires que sers rachateis
 Que uns en soit par moi alevés ne franchis;
 Ne por losenge dire, s'il estoit si hardis
 Qu'il venist devant moi, tous en iroit maris.
 Li douze compaignon que vos m'avés eslis
 Ont ja tendu mon tref sor l'eau de Gangis.
 Des maus q'a fait en Gresce n'est pas Dayres garis; [80]
 S'a pris ça en arriere vaches, bués et brebis,
 Or nous en vengerons o nos espiés forbis.
 Nel puet garir chastiaus, tant soit clos de palis,
 Fossés ne murs ne tors, dongons ne plaiseis.
 Ja ne remanra mais la noise ne li cris
 Tant que li qués que soit en soit mors ou honis."
 A tant demande l'eau si est en piés saillis.
 [3.4]Li mengiers est tous pres, que li quieu l'ont hasté,
 Puis sont li siege fait et li tapit geté.
 Li chevalier s'assieent qant il orent lavé
 Et on lor a le vin en hanas aporté.
 Li seneschal, li quieu, li vallet du regné [90]
 Les servirent des mes tout a lor volenté.
 Qant il orent mengié et il s'en sont torné,
 Aristotes a dont Alixandre apelé:
 "Biaus sire damoisiaus, il me vient en pensé
 Tel chose vos veul dire qui me vient molt a gré."
 Alixandres respont: "Je l'ai molt desirré."
 Es le vos en gisant delés lui acosté.
 [3.5]"Alixandres, fait il, dire te veul novele; [100]
 Qant tu l'avras oïe, ne te sera pas bele.
 Dayres, li rois de Perse, de servage t'apele:
 Tes peres est ses sers et ta mere s'ancele.
 Qant treü te demande, malement se revele;
 Li briés en fu leüs par devant la chapele.
 Tu n'i as que targier, mais fai metre ta sele."
 Alixandres l'escoute, sa main a sa maissele,
 De maltalent et d'ire rougist et estincele.
 "Maistre, fait Alixandres, je ne sui pas pucele,
 Je n'ai soing s'il fait chaut ou s'il pluet ou s'il gele; [110]
 Or le veul revider, qar folement favele.
 Sel puis en champ trover, la vengeance iert isnele,
 Ne li vaudra haubers une tenve gounele,
 Mon espié li metrai par desous la mamele;
 A mon buen branc d'acier, dont trenche l'alemele,
 Li trancherai la teste s'espandrai la cervele."
 [3.6]Ce fu el mois de may, un poi devant l'issue,
 Que l'erbe reverdist et ele point menue,
 Q'Alixandres li rois a sa gent esmeüe

Por aler deseur Dayre a la teste chenue. [120]
 Sor l'eaue de Gangis la riviere ont tenue,
 Portent girfaus, gruiers, faucons de quinte mue;
 N'i remest sor la rive cigne ne bone grue
 Qui ne soit as faucons et prise et retenue.
 Li rois vait a sejour, ne veut sa gent menue
 Lasser ne travellier, car tost l'eüst perdue.
 Tant les mena souef que l'ost est enbatue
 En la terre au roi Dayre, por qui ele est meüe;
 Et puis que ele fu en la terre ferue,
 Courent par la contree, qu'il troverent vestue; [130]
 Peçoient bours et viles et chastiaus a grant rue,
 Deus cités i ont arses et la tierce fondue,
 Prenent vin et forment et ferine molue
 Et pain et char salee veulent ou cuite ou crue,
 Or et argent et dras et monoie batue.
 Riens qu'il veullent avoir ne lor est detenue
 Et par la ou il vont la terre est confondue.
 Dayres ot la novele; qant il l'a entendue,
 Fremist et devint noirs, tous li sans li remue,
 De maltalent et d'ire la parole a perdue, [140]
 Que il ne pot parler ne c'une beste mue,
 Ains arst d'ire et esprent, tous li cors li tressue.
 Et qant l'ardour li fu un poi escoureüe,
 Si manda Alixandre que folement l'argüe,
 Car se tant l'ose atendre que sa gent soit venue,
 Savoir puet de verté sans faille et sans treslue
 Que rois Dayres li mande que de riens nel salue.
 S'il ançois ne s'en fuit ou il ne se remue,
 Bataille puet avoir, ainc tel ne fu veüe;
 Del duel esragera se la desconvenue [150]
 Que fait li a el champ ne li est chier vendue.
 [3.7]Dayres tramet ses mes au fort roi Alixandre
 Et cil i sont alé, ne l'oserent offendre,
 Et sont venu au roi par main a un devenir.
 Noncent li la bataille, se Dayron ose atendre,
 D'iluec en onze jors, lors penst de soi deffendre;
 Car Dayres a juré, se il le pooit prendre,
 Q'il li feroit le col a une hart estendre
 Et a unes grans forches par mi la goule pendre,
 Et menace ses homes que chier lor cuide vendre [160]
 Sa terre qu'il li gastent et tel merite rendre
 Que n'estordra de l'ost li graindres ne li mendre.
 [3.8]Par briés et par messages qant Dayres ot appris
 Q'Alixandres s'estoit de la guerre entremis,
 Par toute sa contree envoia ses corlis
 Et mande a tous ses homes que bien soit chascuns fis

Qui ne venra a lui desi qu'a quinze dis
 Que il perdra les membres, ne l'en seroit plaidis
 Li ors ne li argens que ot Semiramis.
 Et quant ot assemblé les gens devers Tigris, [170]
 Si ot trente tans d'omes q'Alixandres n'ot Gris;
 Mais por ce fu vaincus et ses regnes conquis
 Qu'es fieus de ses garçons estoit ses consaus mis
 Q'avoit fait de sa terre seneschaus et baillis,
 Donees gentieus femes et es honors asis.
 Cil li ont tous ses homes afolés et malmis,
 Les vilains confondus et les borgois aquis,
 Les povres chevaliers ciaux ont tenus si vis
 Q'assés sont plus dolent que se il fuissent pris,
 Et hontes et contraires ont tant fait as gentis [180]
 Q'il n'a home en sa terre qui ne li soit eschis.
 Quant vint au grant besoing sor l'eau de Gangis,
 Si dist li uns a l'autre: "Ja n'ait il Paradis
 Qui por malvais segnor se laist navrer el vis
 Ne qui'n avra colee desor son escu bis;
 Combatent soi li serf que il a enrichis,
 Qui nos avoires nos tolent et font clamer chaitis;
 Ja cil n'avra la terre qui nos en face pis."
 Lors s'en torna chascuns tout droit en son país.
 Dayres remest el champ com home sans amis, [190]
 Vit en aler ses homes, qui s'en tornent fuitis.
 Puis a dit a ses sers: "Cest mal m'avés vos quis.
 N'a baron en ma terre ne soit mes enemis,
 Tant lor avés fait mal et desor aus conquis;
 Assés le m'ont mostré, ainc droit ne lor en fis.
 Or m'en poise forment, mais tart sui repentis,
 De vos me vengerai s'en puis estordre vis."
 Por ce l'ont en la fin li serf meïsme ocis.
 [3.9]Des que Dayres sot bien que c'estoit verités
 Q'Alixandres s'estoit de la guerre mellés [200]
 Et la noise et li cris en est par tout levés,
 Porrón manda en Ynde par ses briés seelés
 Q'Alixandres ses hom est vers lui revelés.
 Or viegne lui aidier a mil de ses privés,
 Ja n'en i venra nus qui ne soit bien loués;
 Il avra a son oés, s'en iert asseürés,
 Quatre cens mile mars de fin or esmerés;
 Les armes Alixandre, qui est outrecuidés,
 Li donra il ançois que cist mois soit passés,
 Et Bucifal meïsme, qui tant par est löés. [210]
 Honis est li cuivers quant a lui est mellés,
 Nel garra bors ne vile ne chastiaus ne cités
 Que il nel sieue tant qu'il iert desiretés.

Li mes li dist a bouche qui les briés ot portés
 Que se il i aloit ce seroit foletés,
 Car tant est Alixandres orgellous et desvés
 Que tantost comme il iert de Daire dessevrés
 Sempres venra sor lui, ja n'en iert trestornés.
 Porrus ot la novele s'en fu si effreés
 Qu'il n'alast en l'aïde ou il estoit mandés, [220]
 Qui li donast tout l'or de quarante cités.
 En la fin de sa terre a ses homes mandés,
 Q'il ne soit par les Griens surpris ne afolés
 Tous jors est de bataille garnis et conreés.
 Au messagier respont: "Arriere tost alés
 Et dites au roi Dayre que molt sui encombrés,
 A garder ai ma terre si ai a faire assés,
 Ne feroie por lui deus deniers moneés."
 [3.10]Qant Dayres li Persans, qui si se desmentot,
 Oï du roi Porron que venir n'i osot, [230]
 De par toutes ses terres tous ses barons mandot;
 Mais il iert tant haïs que poi en i alot,
 Por ses felons sergans que sor aus enposot;
 Ainc n'i vint se cil non qui remanoir n'osot.
 Et qant il ot mandé qanque assamblar pot,
 Por qant si ot tant gent de ciaux qu'il assamblot
 Que trente tans ot d'omes q'Alixandres nen ot;
 Vait encontre Alixandre com plus tost onques pot.
 Et qant vint au besoing, l'uns l'autre regardot,
 Et diënt tuit ensamble: "Musart somes et sot [240]
 Qui ci somes o Dayre, qui nos desheritot
 Et tant nos tenoit vieus et si nos abaissot
 Que ses malvais sergans deseur nos alevot;
 Et qant uns de ses sers a nous se coureçot,
 Pres ne nos batoit bien, vilment nos laidengot.
 Cil qui estoit honis et Dayre le mostrot,
 Il l'ooit volentiers et molt bien l'escoutot,
 Mais ja nus n'eüst droit qui des sers se clamot."
 Chascuns baisse sa lance, en son païs tornot.
 Dayres voit qu'il s'en vont, a poi qu'il ne desvot, [250]
 Et a dit a ses sers: "Garçon, vos m'avés mort;
 Mi home me guerpissent, tant lor avés fait tort."
 Uns saudoiers li dist, qui o lui s'en alot,
 Que de pres s'esleece qui de loins se gardot;
 N'avoit pas a droit terre ne pas bien nes amot
 Qui seur ses gentieus homes ses cuivers alevot;
 Ja ne verrés nul home qui en la fin s'en lot.
 Pire est orguel de serf que venin de crapot.
 Dayres jure son chief et ses dieus q'aourot
 Que d'aus se vengera se il vis en estort. [260]

Ce que Dayres a dit Liabatanas l'ot
 Et Besas ses compains, qui les lui chevalchot.
 Ambedui li glouton, qui ierent d'un complot,
 En fuiant l'ont ocis por ce ques menaçot.
 [3.11]Qant Dayres vit ice qu'il iert a mort navrés,
 Alixandre manda par deus de ses privés
 Q'il le viegne veoir ains qu'il soit deviés.
 Li rois fist que cortois, poignant i est alés.
 "Sire, ce li dist Dayres, cinc cens mercis et gres,
 Qant vos plaist ça venir et pitié en avés; [270]
 A morir devant vos m'est grans confors assés.
 Une fille ai molt bele, se prendre la volés
 Ma terre et mes avoires vos iert abandonés
 Si vos en servira trestous mes parentés
 Et si serés du mont tous li mieus mariés;
 Avant ier la preïstes el champ ou fui navrés.
 Et se cest mariage a vostre oés ne volés,
 Je vos proi par franchise que mari li donés,
 Que selonc son parage soit ses cors honorés.
 Ne creés vos cuivers ne ne vos i fiés; [280]
 Se clamor vos en vient, du droit nes deportés,
 Car molt vos en harroit du ciel la maiestés.
 Li mien que je avoie essauciés et levés
 A dolor me font vivre, si com veoir pöés.
 Cil qui d'aus se clamoit estoit bien escoutés,
 Mais ja droit n'en eüst cil qui s'en fust clamés.
 Li maus et li damages en est sor moi tornés;
 En traïson m'ont mort, Dieus lor en rende gres!
 Si feront vous li vostre, se vous ne vos gardés."
 [3.12]"Sire, ce li dist Dayres, ne vos en quier mentir, [290]
 Si sui a mort navrés noiens est du garir.
 Grans mercis vos en rent qant ça vos plot venir,
 Car il m'est grans confors devant vos a morir.
 Une fille ai molt bele qui molt fait a chierir,
 Nus hom ne puet plus gente en tout le mont choisir;
 A moillier la prenés s'il vos vient a plaisir.
 O ma feme porrés mon roiaume tenir;
 Ne devés pas par force ne prendre ne tolier
 Ce que pöés par droit et avoir et tenir.
 Ne vos chaut vos cuivers essaucier ne chierir, [300]
 Ja de riens ne jorrés qu'il vos puissent tolier
 Et tous jors vos vauront engegnier et traïr.
 Li mien, qui me devoient honorer et servir,
 A dolor me font vivre et ma vie fenir.
 Qant il m'orent navré, si prinrent a fuïr;
 Por la dolor des plaies que il m'estuet souffrir
 N'en poi onques un seul connoistre ne choisir;

De si grant felonie nes laist ja Dieus joir."
 Por la mort quil destraint a geté un souspir;
 L'arme s'en est alee, li cors prist a noircir. [310]
 Alixandres li rois le fist bien sevelir
 Et hautement plorer et plaindre et costeir.
 [3.13]"Segnor, dist Alixandres, avenus m'est gens cols;
 Cil qui Dayre ont ocis m'ont mis en grant repos
 Et acreü m'onor et essaucié mon los.
 S'il l'osoient gehir, jes metroie en repos,
 Que ja des parens Dayre n'i aroit un tant os,
 Se riens lor forfaisoit, nel tormentasse a clos.
 Es bras avront ornicles et torques en lor cols;
 Ges leverai plus haut, qui qu'en ait le cuer gros, [320]
 Qu'ome de ma compaigne, tant sache avoir grant los,
 Et seront amirable as sages et as fols."
 [3.14]Qant li serf ont oïla promesse le roi,
 Devant lui sont venu, dient lui en secroi:
 "Sire, nos l'avons mort, sel t'afions par foi;
 Bien volons que tu saches que fait l'avons por toi."
 "Segnor, dist Alixandres, or entendés un poi.
 Qant vostre segnor lige avés ocis por moi,
 Selonc vostre servise le guerredon vos doi.
 De riens que pramis aie nen enfreindrai ma loi [330]
 Et torques et ornicles avrés, si com je croi,
 De vos lever en haut ferai prendre conroi."
 [3.15]Li rois en apela Tholomer et Cliçon,
 O ces deus sont venu li autre compaignon.
 "Segnor, dist Alixandres, entendés ma raison.
 Ambesdeus ces cuivers me metés en prison,
 Dayre, lor segnor lige, ont mort en traïson.
 Por ce que fait l'avoient en murdre et en larron,
 Le voloient celer li traïtor felon.
 Qant je por le gehir lor pramis guerredon [340]
 Et torques et ornicles avroient a bandon
 Ses leveroie en haut, qui pesast ne qui non,
 Et seroient plus haut que trestuit mi baron,
 Por ce qu'en ma parole n'ait point de mesproïson
 Les bras en lieu d'ornicles de cordes lierom,
 El col en lieu de torques de hars les pouserom,
 Por plus lever en haut as forches les pendron."
 [3.16]La ou Dayres fu mors, tres dedevant les portes,
 Les fist li rois mener a deus de ses coortes.
 Les bras en lieu d'ornicles leur fist lier de cordes, [350]
 Es cols leur fist lacier les hars en lieu de torques,
 Desi q'en son les forches les fist traire a reortes.
 Sor l'eaue de Gangis, dont les rives sont tortes,
 Fist les chars sevelir des gloutons qui sont mortes.

[3.17]Qant li rois ot ensi destruis les traïtors
 Et tormenté as forches et fait tels deshonzors,
 De toutes les contrees a mandé les contors,
 Les princes, les demaines et tous les vavasors.
 "Segnor, dist Alixandres, car me rendés vos tors,
 Les chastiaus et les viles, les cités et les bors, [360]
 Et je vos en croistrai trestoutes vos honors."
 Cil le font volentiers, qui orent grans paors;
 Li rois commande a estre ciaux que li plaist segnors.
 [3.18]Qant or furent destruit ambedoi li glouton
 Et selonc lor merite orent le guerredon,
 Alixandres ot Perse en sa subjection,
 Ses prevos i a mis itels com li fu bon.
 Puis s'en torne li rois, et il et si baron,
 En uns desers entra ou ot molt grant arson;
 Il n'i avoit point d'erbe ne de bos un buisson, [370]
 La terre iert toute seche et agu li perron.
 La souffrirent li Grieu grant persecucion,
 Car n'i avoit de gent nule habitacion,
 Ains i conversent tygre et lupart et lion,
 Li cerastre cornu et li escorpion
 Et vautoir et califfre et enpené grifon
 Et bestes et oisiaus de diverse façon.
 Outre s'en vait li rois et sa gent a bandon;
 Qant fu fors des desers, si a mandé Cliçon
 Et cil i vint poignant, o lui si compaignon. [380]
 "Baron, dist Alixandres, entendés ma raison.
 Mainte terre ai conquise et mainte region,
 Romain firent par force vers moi acordoison,
 Puis mis Puille et Calabre en ma subjection
 Et conquis toute Aufrique a coite d'esperon,
 Hermins et Suliens, ou vausissent ou non;
 Maint prince et maint chastaine ai tenu en prison,
 Assés i ot de cels dont nus n'ot raençon."
 [3.19]"Segnor, dist Alixandres, je ai molt conquesté:
 Cil de Jherusalem firent ma volenté, [390]
 Ciaux de Tyr destruis je por lor grant cruauté,
 Maint chastel ai conquis et mainte fremeté,
 Dayre le roi de Perse ai je a ce mené
 Que si home meïsmes l'ont mort et affiné.
 Or vous veul aconter que jou ai en pensé:
 Assés ai par la terre et venu et alé,
 De ciaux de la mer voil savoir la verité,
 Ja mais ne finerai si l'avrai esprové."
 Si home li ont dit: "Tu as le sens desvé,
 Ce que nus penser n'ose ce as tu devisé. [400]
 S'il nos meschiet de toi, tout somes afoolé,

Ja ne revenrons mais la ou nos fumes né."
 "Por noient, dist li rois, en avés tant parlé,
 Car por tout l'or du mont ne seroit trestorné."
 Qant il virent le roi issi entalenté,
 Tout ce que bon li fu li ont acreanté.
 [3.20]Tout ont acreanté si com il plot au roi.
 Molt bons ouvriers de voirre avoit aveques soi,
 Qui savoient ouvrer le voirre a itel loi
 Que il ne pooit fendre ains le metent en ploi. [410]
 Li rois les a mandés et si lor dist por coi:
 "Segnor maistre, fait il, or entendés a moi.
 Faites moi un vaissel de voirre, je vos proi,
 Si grant que largement i puissent entrer troi.
 Se vos bien le me faites, grant loier vos en doi
 Et jel vos donrai bon par les ieus dont vos voi."
 Et dist li uns des maistres: "Sire, tres bien vos oi.
 Se vos bien me trovés ce q'estuet au conroi,
 Tel vaissel vos ferai qui bons sera, ce croi,
 Bien i porront doi home ensamble entrer ou troi. [420]
 Se ensi nel vos fais, ma teste vos otroi."
 [3.21]Li ouvrier li ont fait un molt riche vaissel,
 Tous iert de voirre blanc, ainc hom ne vit si bel.
 De meïsmes font lampes environ le tounel,
 Qui la dedens ardoient a joie et a revel,
 Que ja n'avra en mer tant petit poissoncel
 Que li rois bien ne voie, ne agait ne cembel.
 Qant il fu entrés ens et li dui damoisel,
 Autresi fu seürs comme en tor de chastel.
 Li notonier l'en portent en mer en un batel, [430]
 Que il ne puist hurter a roche n'a quarrel.
 Ens el pommel desus ot fondu un anel,
 Iluec tient la chaene, dont fort sont li clavel.
 [3.22]Li touniaus fu en l'eaue en un batel portés
 Et fu de toutes pars a plonc bien seelés.
 Alixandres li rois i fu soi tiers entrés
 Et fu des notoniers en haute mer menés,
 Et commande a ses homes que il soit devalés.
 Et qant li touniaus fu la dedens avalés,
 Des lampes qui ardoient fu molt grans la clartés. [440]
 Assés fu li touniaus des poissons esgardés,
 Ains n'i ot si hardi n'en fust espoëntés
 Por la grant resplendor dont n'iert acostumés.
 Alixandres li rois les a bien avisés [153]
 Et vit les grans poissons vers les petis mellés;
 Qant li petis est pris sempres est devourés.
 Qant ce vit Alixandres, adont s'est porpensés
 Que tous cis siecles est et peris et dampnés.

[3.23]Alixandres li rois ne fu mie esbahis,
 Bien a tous les poissons esgardés et choisis, [450]
 Mais onques n'i ot un qui ains fust si hardis
 Vers le tounel de voirre n'alast molt a envis.
 Il vit les plus petis des gregnors envaïs;
 Qant il un en prenoient, lors estoit trengloutis,
 Et qant pooit tant faire qu'il s'en iert departis,
 Adonques li estoit autres agais bastis
 Tant que pris iert par force et par engien traïs.
 Qant ce vit Alixandres, molt s'en est esjoïs,
 A ciaux qui o lui ierent en vint tous esbaudis
 Et dist: "Se la sus iere a ma gent revertis, [460]
 Ja mais n'iere de guerre engigniés ne aflis.
 Je voi ces mons, ces vaus, ces plains et ces laris,
 De grans poissons de mer bien estruis et garnis:
 Qui bien se puet deffendre des autres est garis."
 [3.24]Alixandres li rois o les deus chevaliers
 Est el fons de la mer, dont clers est li graviers,
 Ens el vaissel de voirre qui bons est et entiers.
 Ardent les lampes cler, car ce lor est mestiers;
 Onques poisson n'i ot, tant fust ne gros ne fiers,
 Qui osast aproismier, car n'en iert coustumiers. [470]
 Alixandres resgarde les grans et les pleniens
 Qui les petis trengloutent, itels est lor mestiers;
 Autresi comme el siecle est chascuns justiciers,
 Autresi vit il la lor prevos, lor voiers;
 Sor les petis tornoit tous jors li encombriers.
 Qant ce vit Alixandres, si s'en rist volentiers
 Et dist as damoisiaus: "Por un mui de deniers
 Ne por toute la terre tresq'as puis de Riviers
 Ne vausisse je mie que cis miens desirriers
 Fust targiés ne remés por besans dis sestiers." [480]
 [3.25]Li rois est en la mer lai ens el plus parfont,
 Les poissons vit aler et a val et a mont;
 Por les lampes qui ardent issi grant paor ont
 N'i osent aprochier, mais arriere s'en vont.
 Li grant, li plus hardi, cil sont el premier front;
 Qant prenent le petit, sempres trenglouti l'ont,
 Et se il lor eschape, tantost agait li font.
 Li plus fors prent le feble si l'ocist et confont;
 Qant li petit eschapent a val la mer s'en vont.
 Tout ce vit Alixandres, qui le poil avoit blont, [490]
 Puis a faite l'ensaigne a ciaux qui lassus sont
 Q'il lievent la chaene sel traient contre mont.
 Cil l'en traient bien tost, car assés orent dont;
 Enpensé sont du roi, se vif le troveront,
 Par son non l'apelerent, et il lai ens respont

Q'il n'est mie noiés, ja mar en douteront.
 Cil orent molt grant joie de ce que oïl'ont,
 Puis ont le vaissel trait el batel sel deffont;
 Alixandres meïsmes a ses mains le derront.
 [3.26] Alixandres li rois est du tounel issus, [500]
 De ce qu'il fu en mer n'est il pas irascus,
 Molt est liés des poissons que il a si veüs.
 Qant il vint a la rive, molt fu bien receüs;
 Si baron li ont dit: "Bien soiés vos venus."
 Et il lor respondi encontre cent salus.
 "Segnor baron, fait il, bien me sui perceüs
 Que tous cis siecles est et dampnés et perdus;
 Covoitise nos a tous surpris et vaincus,
 Certes par avarisse est li mons confondus.
 Je vi as grans poissons devorer les menus, [510]
 Ainsi as povres homes est li avoires tolus."
 "Sire, dist Tholomé, sauve soit ta vertus;
 S'ore fuissiés noiés, grans maus nos fust venus,
 Car plus est vostres cors et doutés et cremus
 Que nous ne somes tuit, tant estes conneüs."
 "Tholomé, dist li rois, grans estors ai veüs.
 Par la foi que vos doi, qui molt estes mes drus,
 Ja mais ne finerai si serai combatus
 A Porron le roi d'Ynde qui ja s'est aparus
 Ens el chief de sa terre a tout cent mil escus." [520]
 [3.27]"Sire, dist Tholomé, ne lairai ne vos die:
 Ne sai noient de roi qui n'a soing de sa vie,
 Vos ne chaut de la vostre quel eure soit fenie.
 Qant vous en mer entrastes, ce fu grans desverie;
 Se vous fuissiés noiés, vostre gent fust perie."
 "Tholomé, dist li rois, se Dieus me beneïe,
 Ce sachiés por tout l'or qui est tresq'a Pavie
 Remés ne vausisse estre, ne vos celerai mie,
 Car molt i ai appris sens de chevalerie,
 Comment guerre doit estre en bataille estable [530]
 Aucune fois par force et autre par voisdie,
 Car force vaut molt peu s'engiens ne li aïe.
 Ne sai noient de roi puis qu'il fait couardie,
 Mais soit larges et preus et ait chiere hardie.
 Tholomé, ce covient, la letre le vos crie,
 Ja parole de roi ne doit estre faillie.
 Sachiés que mainte terre est sovent apovrie
 Par malvais avoué qu'en a la seignorie.
 De Porron le roi d'Ynde ai tel novele oïe
 Q'ens el chief de sa terre a sa gent estable; [540]
 Le matin i movrai o ma grant compaignie."
 [3.28]"Sire, ce dist Dans Clins, molt fait a merveille

Qant en l'eaue de mer vos alastes plongier.
 S'il vos mesavenist de vostre cors noier,
 Trestuit fuissomes mort, n'i eüst recovrier,
 Car il n'i a chemin ne voie ne sentier
 Par ou en nos païs peüssons repairier,
 Car maintes gens nos heent des testes a trenchier."
 "Dans Clins, ce dist li rois, bien fait a otroier,
 Mais li rois est molt fols et peu fait a proisier [550]
 Qui toutes ses besoignes fera par conseillier-
 Puis qu'il a tant de sens, qu'il se sache targier-
 Et a autrui s'atent; bien le puis afichier
 Que il n'est mie rois ne ne vaut un denier,
 Ains est espoëntaus q'on seut en champ drecier
 Qant li vilains en veut les oisiaus manecier,
 Il ne set ne ne puet ne traire ne lancier.
 Baron, de ma proëce n'avrés ja reprovier,
 Ne sui pas li vilains qui la veut envoier
 Et la hue son chien ou il n'ose aprochier. [560]
 Laissons ester a tant, donés moi a mengier
 Et après si m'irai reposer et couchier;
 Par matin leverai, car je veul ostoier.
 De Porron le roi d'Ynde m'ont dit mi messagier
 En la fin de sa terre est venus des l'autr'ier,
 Et sont ensamble o lui troi cens mil chevalier
 Qui bien se sevent d'armes et en estor aidier;
 Mais por ce ne vos chaut de riens a esmaier,
 Ne sevent point de guerre, car n'en sont costumier.
 S'or estoient ensamble de sa gent dis millier [570]
 Et seulement i fuissent de Grigois mil archier,
 Si lor feroient il molt tost le champ vuider.
 S'iere sor Bucifal armés sor mon destrier
 Et Tholomé eüsse, cest mien confanonier,
 Les douze pers veïsse lor batailles rengier,
 Toute la terre Dieu vauroie chalengier.
 Je n'ai soing de fuir mais tous tans de chacier."
 [3.29]"Baron, dist Alixandres, on m'a dit a veüe
 Que Porrus a mandé molt grant gent en s'aiue;
 N'a gaires chevaliers, mais molt a gent menuë. [580]
 Malvaisement armee a sa mort est venue,
 Tels dis mil en i a, n'est nes de dras vestue,
 Ne porte tous li mieudres ne mais c'une maçue,
 Ne sevent de bataille, mieus sevent de charue.
 En la fin de sa terre est de ça vers l'issue,
 Dient que as Grigois sera bien deffendue.
 Se je puis exploitier, ele li iert tolue;
 Ja par tel gent nen iert bataille bien ferue."
 A tant laissent ester, Alixandres mengüe.

L'endemain par matin la grans ost s'est meüe [590]
 Et passe une montaigne qui d'erbe iert toute nue.
 Après s'en sont alé les une roche agüe;
 La terre fu molt seche et li chaus les argüe.
 Icel jor fu molt l'ost lassee et confondue;
 Se longes lor durast, toute fust recreüe.
 [3.30]Ce fu el mois de may qu'il se sont combatu,
 Que li rois Alixandres ot Dayre en champ vaincu
 Et ot en son demaine le regne retenu,
 Les prevos ordenés, tels com ses plaisirs fu,
 Qui par tout Orïent li cuellent le treü. [600]
 Set jors ont sejourné, a l'uisme sont meü,
 Si com isoit jugnés en Ynde sont venu.
 Porrus en estoit rois, uns hom de grant vertu,
 Et ot o soi mandés tous ciaus de Galeru;
 Tresques en Ethyope n'a home remasu,
 Garimantés i vindrent, qui por le chaut sont nu.
 Grans quatorze lieuees en sont li champ vestu;
 Ja ne remandra mais que il n'i ait feru.
 [3.31]Porrus ot une fille qu'il avoit molt amee;
 Por ce l'avoit plus chiere et mieus l'avoit gardee [610]
 Que sa mere en fu morte le jor qu'ele fu nee.
 Vit la gent de sa terre por sa guerre effr[e]ee,
 Ne set qui la commant, crient ne li soit emblee,
 Car s'il perdoit s'onor et ele i fust trovee,
 Des que li Grieu l'avroient vilment seroit menee,
 Ja mais segnor n'avroit tant seroit avilee.
 Candace la roïne, qui estoit sa privee,
 Mandé que viegne a lui par chartre seelee,
 Et ele i est venue garnie et conreee
 O cinc cens chevaliers des mieus de sa contree. [620]
 Porrus prent la meschine por qui l'avoit mandee,
 O merveilleus avoir si la li a livree.
 A son fil le menor, ou il l'a marïee,
 La roïne s'en va, ses fieus l'a esposee.
 Porrus part de sa fille par itel destinee
 C'onques puis ne la vit que ele en fu menee.
 La crieme de sa fille puis qu'il l'a trespassee,
 En la fin de sa terre a sa gent ordenee.
 Li Grieu sont aprochié, la guerre est afilee,
 Ja mais sans grant damage ne la verra finee. [630]
 [3.32]Molt par fu grans la gent que Porrus ajostot,
 Onques rois d'Oriant gregnor avoir ne pot,
 A grant effors i vint cil qui onques l'amot.
 Entre les dessemmons et ciaus que il mandot,
 Trente mil et quarante, ce m'est vis, en i ot,
 Si ot trente milliers de ciaus de Mont Escot.

En un mirable curre chascuns de ciaus estot,
 Grans faus ont atachiees environ au charrot.
 Qant se movoit la beste qui le curre menot,
 Qant qu'encontroit la faus avant li detrenchot, [640]
 Qant pot consivre l'ome maintenant l'afolot.
 Chascuns de ciaus dedens arbaleste portot,
 Dieu avoit a garant qui de ciaus eschapot.
 [3.33]De ciaus qui a pié sont n'est nus qui nombre en die.
 Des chevaliers de Parte et de ciaus de Sulie,
 Qui la ierent venu faire chevalerie,
 Cent mil en ot o soi Porrus de tel baillie
 Que il n'i a celui qui n'ait targe flourie
 Et bon cheval courant et broigne a or sartie.
 Alixandres les voit, tout ce tient a folie [650]
 Et a dit a ses homes: "Ne vous esmaïés mie;
 Cele gent que veés n'est pas amanevie,
 Ja ne se tenra point se bien est envaïe.
 De l'or et de l'argent qui par ces vaus formie
 Sera riche clamés tos les jors de sa vie
 Qui bien les conquerra a l'espee forbie.
 Le matin i movrons, qant l'aube iert esclarcie."
 Qant l'ot Emenidus, ne puet müer ne rie.
 [3.34]A l'aube aparissant d'ambes pars sont monté
 Et furent de bataille garni et conreé. [660]
 Quarante et deus eschieles a li rois ordené:
 Toute la premeraine commanda Aristé,
 La seconde Filote, la tierce Tholomé,
 A chascune des autres a bon conduit livré.
 Dant Cliçon et Filote a li rois commandé
 Que qant Porrus iert hors a trestout son barné
 Que cil a pié se metent entr'aus et la cité;
 Devant la geude soient mil chevalier armé,
 Que n'en torment arriere Persant ne Filisté.
 Molt par fu grans la presse la ou il sont josté, [670]
 Malmis i sont li ort et li vergié quassé,
 Les vignes derompues et craventé li blé.
 La peüssiés veoir tant escu estroué,
 Tant hauberc derompu et tant elme quassé
 Et tant pié et tant poing a la terre caupé;
 En lor sanc se devautrent li chevalier navré.
 Garimantés s'esmaient, car trop furent grevé;
 Por ce que il sont nu, fuiant s'en sont torné.
 [3.35]La bataille fu grans et la gens fu grifaïne,
 Des vignes et des bles ont perdu la gaaïne. [680]
 Garimantés s'en fuient droit a une montaigne,
 Cil de Parte autre part, n'i a nul qui remaigne;
 Li maines rois les sieut o sa ruiste compaigne.

La veïssiés trenchier tant pis et tant entraigne,
 Et tant chevalier mort gesir par la champaigne,
 De sanc et de cervele fu coverte la plaigne.
 Porrus vit le damage et le mal qui engraigne,
 Ne fuir ne s'en veut ne ne set com remaigne;
 Sa cité a perdue sans nule recovraigne,
 Li Grieu qui sont devant li soufflent la chastaigne. [690]
 Maudist le roi de Gresce, qui sa gent li mehaigne,
 A piece n'iert mais jors que de lui ne se plaigne.
 [3.36]Emenidus fu preus et fu nes de Valterne,
 N'ot millor chevalier trusqu'en fine posterne.
 Il sist el cheval noir que on clame Pierne,
 Sel tramist Alixandre uns princes de Salerne.
 O l'eschiele des Grieus qu'il conduist et governe
 El cuer de la bataille encontra Oliferne,
 Rois iert de la montaigne entre bise et galerne.
 Emenidus le fiert, que de riens ne l'espergne; [700]
 Ne li vaut li escus le fons d'une lanterne,
 Tout son hauberc li ront qui fu fais a Lierne,
 Par mi le cors li mist l'ensegne de Palerne,
 Si que mort le trebuche les une viés cisterne.
 L'ame en portent maufé en la fosse d'enferne.
 [3.37]Sichem de Valebron vit Oliferne mort,
 Il broche le destrier, le gonfanon destort.
 Sor l'escu de quartier va ferir Licanort,
 Si que l'anste peçoie, qui fu de sacremort.
 Filotes, qui traverse, le ra feru si fort [710]
 Que jambes enversees l'abati en un ort;
 Li chevaus fu braidis, arriere se resort.
 Porrus vint a l'escousse si li fist tel confort
 Ne laisse por les Grieus que triés soi ne l'en port,
 Et fu ensamble o lui Abiüs de Gomort.
 [3.38]Assael sist armés desor un cheval rous,
 N'encontre chevalier qu'il ne face angoissous;
 Porrus le vait ferir, qant Sichem ot rescous,
 Enpaint le de vertu, des estriers le fait blous.
 D'un margas ou il chiet est ses elmes terous. [720]
 De meïsmes la la pointe fiert Joab l'orgellous
 Et Joab refiert lui, qui molt fu airous,
 Que d'ambesdeus les hanstes volent a mont li trous
 Et jambes renversees s'abatent en l'erbous.
 Li chevals Joab fu felons et estorcous,
 Ses resnes traïnant s'en fuit tot un perrous.
 Cil resailent en piés irié et vergoignous,
 O les brans acerins se fierent coureçous.
 Sempres vient apoignant el destrier ravinous
 Abiüs de Gomort, ques depart ambesdous, [730]

Porrion rent son cheval, qui'n estoit besoignous.
 Andui s'en s'ont torné et Joab remest sous.
 [3.39]Moab, uns rois d'Aufrique, sist sor une gazele
 Qui plus cort de ravine que ne vole arondele.
 Vait ferir Tholomé, qui les autres chadele,
 Enpaint le par vertu, que tout le desasele.
 Dans Clins point cele part le destrier de Castele
 Et vait ferir Moab en l'escu de roële,
 Que sous la boucle a or li fraint et eschantele
 Et la broigne li trenche, le pis et la forcele, [740]
 Q'as douilles de l'espié le cuer li esquarterle;
 Devant sor son arçon li chaïla boële.
 Dans Clins enpaint Moab sel lieve de la sele;
 Cil chaïmors a dens desor l'erbe novele.
 [3.40]Moab ot un neveu de novel adoubé,
 Onques en nule terre ne vi plus bel armé.
 Aminadap l'apelent Persant et Filisté
 Et fu dus de Caspois, d'une grant richeté,
 Une terre garnie de trestout le bien Dé.
 Qant il vit mort son oncle, Moab le fil Taré, [750]
 Ne fu mie merveille s'il ot le cuer iré.
 Sist sor un cheval blanc qui fu destre comé,
 Qui plus cort de ravine qant on l'a esfreé
 Que faus ne sieut aloe qant il a geüné.
 Ses lorains et ses armes valent une cité:
 La sele fu d'ivoire, li frains d'or esmeré,
 Ses haubers fu legiers si ot molt grant bonté,
 Ne crient caup de saiete ne de dart enpené;
 Li hiaumes de son chief getoit molt grant clarté,
 En son ot un topace a esmaus neelé; [760]
 Li escus de son col estoit d'or envausé,
 L'anste de son espié fu d'un fraisne plané,
 En son ot un penon d'un vert paille rôé.
 Il point entre deus rens le blanchet afile,
 A haute vois escrie Dant Clin et Tholomé
 Si lor demande joste, car molt l'a desirré.
 Qant Tholomés l'entent, si l'en a regardé,
 Le chief de l'auferrant a vers lui trestorné,
 Et li dus point a lui, ne l'a pas redouté;
 As fers de lor espiés se sont entr'encontré, [770]
 Toutes plaines lor lances se sont entreversé.
 Porrus point au rescourre si a son duc monté,
 Et Tholomés saut sus quant se sent aterré;
 Ains que Porrus tornast li a tel caup doné
 Que por un seul petit qu'il ne l'a affolé,
 Sor le col del destrier l'a trestout aciné.
 Alixandres le voit si l'a forment löé,

Par la resne li maine le destrier abrievé,
 Et Tholomé i monte par son estrier doré.
 [3.41]Ne sai que vous alasse toute jor acotant: [780]
 O eus joint Alixandres a l'aube aparissant,
 Ains fu pres miédis que onques fu issant.
 Sardeus, uns rois de Parte, sor un cheval corant
 Aloit par la bataille s'ensengne desploiant,
 Mascedonois et Griens va forment menaçant,
 Alixandre demande, por joindre vait querant,
 Ebarion a mort et Seruc et Erlant.
 Quant Alixandres l'ot, tous taint de maltalant,
 Il broche Bucifal et met l'escu avant,
 De l'espee qu'il tint li dona un caup grant, [790]
 La ou plus haut le vit, desor l'elme luisant;
 Par l'escu de son col ne pot avoir garant,
 Li haubers c'ot vestu ne li valut un gant,
 Desi que es arçons le vait tout porfendant;
 Il a estors son caup, mort l'abat a itant.
 Quant l'ot mort abatu du destrier auferrant,
 Li rois crie s'ensegne, sa gent vait raliant.
 O vint mil de ses homes s'en vait Porrus fuiant
 Tout droit as desers d'Ynde, qui sont vers Orient.
 Eschec i ot tel pris nus hom ne vit si grant, [800]
 Car retenu i furent quatre cens olifant
 Qui portoient les tours ou li archier erant.
 [3.42]Sados vint d'outre Egipte, rois fu de Salemandre.
 Ne torne cele part des Griens ne face escandre
 Por Sardeus, qu'il vit mort gesir sor la lavandre.
 Sor son hauberc derrier vait ferir Alixandre,
 L'anste vola en pieces, qui fu de Coroandre.
 Emenidus fiert lui, qui sist el cheval d'Andre,
 Si que l'elme li trenche, qui fu au roi Evandre;
 Le sanc et la ceruele li fist a terre expandre. [810]
 [3.43]Sidras de Babiloine desor son auferrant
 Vet forment Alixandre et les Griens menaçant,
 A Tholomé veut joindre si vait esperonant,
 Por venir a l'encontre broche tout un pendant.
 Dans Clins, li fieus Caduit, le fiert en trespassant,
 Si que le hiaume trenche et la ceruele espant,
 Et cil chiet jus a terre si fu mors en itant.
 Puis saisist par la resne le bon cheval courant
 Si l'a rendu Joab, qui mestier en ot grant;
 Sous son elme s'en vait a Tholomé riant. [820]
 Porrus voit sa compaignie qui vait affebloiant
 Et les Griens qui s'afichent et les vont ociant
 Et la male aventure qui sor eus vait chaant.
 De torner a la vile ne font nesun semblant,

La chastaigne li soufflent li Grieu qui sont devant;
 A vint mil de ses homes s'en va Porrus fuiant
 Tout droit as desers d'Ynde, qui sont vers Orient.
 [3.44]Astaros de Nubie voit que Porrus s'en vait,
 De torner a la vile nesun semblant ne fait.
 Il escrie s'ensaigne, a une part se trait, [830]
 Onques de tous ses homes ne pot avoir que set.
 A un baron de Gresse vait doner tel gamait
 Que l'escu de son col li a percié et frait,
 Tres en mi la poitrine le gonfanon li lait;
 Si com il s'en passe outre, cil trebuche el garait.
 Il n'a nul compaignon qui autretel n'ait fait.
 Tholomé l'esgarda de la ou il estait,
 Or se tient a honi s'ainsi aler l'en lait.
 [3.45]Astaros de Nubie ne fine ne ne cesse,
 Quatorze chevaliers lor a mors en la presse, [840]
 De ses set compaignons un trestout seul n'i lesse.
 Tholomé vait encontre, vers Astarot s'eslesse,
 Tel cop li done en l'elme que tout li fent et plesse,
 Sor l'arçon premerain por le grant cop s'abaisse.
 Por Tholomé ferir chascuns des set s'eslesse,
 O les brans acerins li donent tel confesse
 Sempres fust afolés ne fust Dans Clins d'Aresse.
 [3.46]Dans Clins vit Tholomé qui iert en tel trepoi,
 Ne que deus compaignons n'avoit ensamble o soi.
 Pour Tholomé rescorre poignent tout a desroi [850]
 Et vont joindre a ces set et si ne sont que troi.
 O les brans acerins les metent en effroi;
 Si lor ont abatu l'orguel et le boufoi
 N'i a nul qui de vivre sache prendre conroi;
 Li cheval vont courant par mi le sablonoi.
 [3.47]Astaros voit ses homes gesir par le sablon
 Et sait que ja par aus n'avra rescoussion.
 Il fu forment navrés el pis sous le menton
 Et du senestre bras ot trenchié un braon.
 Ce n'est mie merveille se il quiert garison, [860]
 Nel puet mais endurer, fuit s'ent a esperon.
 Li destriers de Nubie l'en porte de randon
 Et Tholomé l'enchaucé, il et si compaignon.
 Plus tost s'en vait poignant devant par un gason
 C'uns fors arbalestriers ne traisist un bougon.
 Tholomé dist as siens: "Car nos en retornom;
 Trop nos est eslongiés, ja mais nel baillerom."
 Qant il furent arriere tout le petit troton,
 Si fu li chans vaincus et livrés a bandon
 Q'ainc puis n'i ot feru d'arme ne de baston. [870]
 [3.48]Qant vit li maines rois que li chans fu vaincus,-

Tout droit as desers d'Inde s'en vait fuiant Porrus,
 O vint mil de ses homes s'en vait escombatus,
 Molt par chevalche tost, ja mais n'iert conseüs,-
 Li rois retourne arriere, ens el champ est venus
 Et a saisi l'avoir, ains tels ne fu veüs,
 Et muls et olifans que Porrus ot perdus.
 Li bons rois Alixandres d'iluec s'est esmeüs,
 La cité prent par force s'est el palais venus.
 Les portes sont d'ivoire, onques n'i toucha fus, [880]
 Par toutes les parois est li fins ors batus.
 Li rois en entra ens o quinze de ses drus,
 Trusq'a trente pilers a de tel or veüs
 Qui por bien afiner fu quatre fois fondus.
 "Dieus! dist li maines rois, dont est cist ors venus
 Et si tres grans avoires ou fu aconseüs?
 Par le mien ensient, il est du ciel pleüs,
 Car du fin or d'Arrabe qui çai ens est fondus
 Porroit on massis faire cinquante mil escus.
 Qui or en veut avoir por quoi se fait il mus? [890]
 Ja en donrai je tant as grans et as menus
 Ja mais au mien espoir n'en iert uns confondus."
 Quant l'entendent si home, dient que sa vertus
 Soit salve et essaucie de Dieu et de ses drus.
 [3.49]Quant ot pris Alixandres le palais principal,
 Por parler a ses homes s'arestut el portal.
 Par un sien chevalier manda au seneschal
 L'eshec de la bataille departe par ingal,
 Celui qui vait a pié gart que il ait cheval
 Et face livrison a chascun a l'ostal. [900]
 Lai ens s'en est entrés, devant soi Bucifal,
 A un piler l'atache devant un dois royal.
 Au chief de cele table trueve une chambre ital
 Tous jors i sont tempré li baing emperial
 Qui d'a mont par conduit descendent contre val
 Et montent en la tour la desus par chanal.
 Li basmes qui cort ens par conduit de cristal
 Raplenist si le lieu d'odour esperital
 Que onques Dieus ne fist icel home carnal
 Qui tant fust engrotés d'enfermeté mortal, [910]
 S'il i peüst baignier un seul jor a jornal,
 Q'il ne fust tous garis en meesme l'estal
 Ne ja puis en tout l'an sentist dolor ne mal.
 Li chaalit qu'i sont ne sont pas de metal,
 Ains sont tuit de fin or a uevre natural.
 Sor chascun pecoul ot fremé un tel esmal
 Que plus cler reflamboient que ne font estaval.
 [3.50]Au chief de cele chambre truevent un sousterin

Ques maine en une trelle qui fu faite a or fin.
 D'Ethyope la firent orfevre barbarin [920]
 Si com lor enseignierent quatre clerz sarrasin;
 Toute l'uevre qu'i fu entaillierent Hermin,
 D'ebenus sont les forches, li chevron cipressin.
 Une vigne i ot mise par issi grant engin,
 Les fuelles sont d'argent, ce truis el parchemin,
 De jagonces les vis, de cristal li roisin;
 Ce samble ques esgarde qu'il soient plain de vin,
 De jaspes, d'esmeraudes i ot si grant traïn.
 [3.51] Qant ot assés la trelle esgardee et joïe,
 Vait entor le palais par une herbeuse vie, [930]
 Par le pan du mantel les lui Licanor guie,
 Car veoir veult de l'uevre com ele est estable.
 Ains Dieus ne fist cel arbre qui entailliés n'i sie
 Ne maniere d'oiseil n'i soit a or sartie,
 Et ont or en lor ongles, en lor bes margerie.
 Par un huis est entrés en la boutellerie,
 De mil et set cens nes la trova si garnie,
 Peu en i ot d'argent, toute l'uevre est chancie,
 Bien a mil ans passés c'une n'en fu emplie.
 D'iluec en est entrés en la mahomerie, [940]
 Des ymages as dieus i ot grant estable,
 D'un jor et d'une nuit n'est hom qui nombre en die;
 N'en i a une seule ne soit grans et fornie
 Et ne soit de fin or massivement bastie;
 Un vaissel tint chascune ou on li sacrefie.
 "Dieus! dist li maines rois, com faite manandie!
 Com ert poissans li rois qui ce ot en baillie,
 Car trestoute la terre qui est adesertie,
 Si com la mer l'enclot qui environ tornie,
 De l'or qui est çai ens puet estre raplenie." [950]
 [3.52] La nuit jut Alixandres, molt fu grans ses barnés,
 De lui ne fu a dire nisune richetés.
 A l'aube aparissant fu premerains montés,
 Dis mil somiers a pris d'or et d'argent troussés,
 Tant en done a ses homes qu'a chascun fu assés.
 Ains qu'il fuissent tuit hors, fu li solaus levés,
 Qui reluist es escus de fin or adoubés,
 Es haubers acerins et es elmes gemés;
 Grans quatorze lieues en dure la clartés.
 De joie qu'ot li rois si s'en est arestés [960]
 Et fait soner un graille, es les vos aünés.
 Qant les vit tous ensamble, si les a merciés:
 "Segnor mascedonois, molt vos ai ahanés,
 Je criem ne vos anuit que tant vos ai lassés.
 Faites m'avés batailles et conquis mains regnés,

Moie en est la loënge et vostre en est li gres.
 Ç'a fait vostres vertus et vostres grans bontés,
 Car par toutes les terres sui rois des rois clamés.
 Bien le me dist mes cuers et bien sai qu'est vertés:
 S'un petit de travail por moi souffrir volés, [970]
 Porron me porrés prendre, s'un petit vos hastés,
 Ains qu'il soit o ses homes es desers d'Ynde entrés."
 Et respondent si home: "Si com vos commandés!
 Nel puet garir desers ne nule fremetés,
 Les esclous le sieurons se bon conduit avés."
 [3.53]Qant Alixandres voit sa gent entalente
 De sa volenté faire si comme il l'a pensee,
 Au plus tost que il pot l'a quatre jors menee.
 En Caspois sont venu a la quarte jornee
 Si l'ont si plenteïve de trestous biens trovee [980]
 Que toute cele gent tient a boneüree.
 Por ce que veut li rois que soit aseüree,
 A soi mande les princes de toute la contree,
 Les sains fait apporter si la li ont juree.
 Puis lor a demandé qels est outre l'estree;
 Cil li ont respondu: "Terre est desiretee,
 Car l'ardor du soleil l'a issi eschaufee
 N'i a se serpens non dont ele est abitee."
 Tout ce tint Alixandres a mençoigne provee,
 Cuide richece i ait qui li doive estre emblee [990]
 Et que por ce li aient la verté trestornee.
 Ja soit ce que la voie li soit destalentee
 Et que trestuit si home li aient desloëe,
 Il en jure sa teste qui d'or est couronee
 Ains esteroit tous jors qu'il ne çaindroit espee
 Ne voie la merveille dont Ynde est abitee
 Et com li solaus l'a o sa cholor gastee.
 Ains que li rois eüst sa raison definee,
 Por seoir au souper fu l'eaue demandee.
 Par tous les pavellons est la novele alee [1000]
 Q'a l'aube aparissant soit toute l'ost montee,
 Por entrer es desers garnie et conreee.
 [3.54]La nuit jut Alixandres tant que fu clers li dis.
 Cent cinquante duitors par la contree a quis,
 Itels com les eslirent li baron du païs,
 Quil conduiront en Bastre, dont Porrus est marchis.
 Por ce que li rois veut de tous ciaux estre fis
 Et que nus ne s'en face de bien mener eschis,
 Por sauf conduit lor a molt grant avoir pramis
 De meïsme le jor, si com je l'ai apris; [1010]
 Aos estoit entrés qant es desers s'est mis.
 Mais cil se pendent plus devers ses enemis

Ques mainent es desers qu'il plus sevent chaudis,
 Qui sont d'eaues ameres et de serpens porpris,
 Ja n'en bevera cil hom qui ne perde le ris;
 Mieus veulent il morir c'uns en estorde vis.
 [3.55]Qant Alixandres mut, des cors fu grans li glas.
 Montés est en un tertre c'on clame Lolifas
 Por esgarder ses homes dont tout li val sont ras.
 Entre muls et chameus et dromadaires cras [1020]
 Qui portent pavellons, chandelabres et dras,
 Escüeles d'or fin et coupes et henas,
 Plus ot d'or en lor frains de trente mile mars;
 A l'autre garison ot bien quatre cens chars
 Et plus de mil charettes qui menoient les dras.
 De bestes por occire ne mainent mie eschars,
 Quatre lieuees durent qant passent a espars.
 Del chaut et de la voie sont si home tout las
 A ce qu'il sont chargié et d'armes et de dras,
 Ses angoisse la soif ne pueent faire un pas. [1030]
 Li traïtor ques guient sont plain de Sathanas,
 Ques mainent es desers qui du soleil sont ars,
 N'ont cure que de l'ost retort ne haus ne bas,
 Mieus veulent il morir que li rois ne soit quas.
 [3.56]Molt fu l'ost icel jor confondue et matee,
 Du chaut et de la soif por poi ne fu desvee. [1036a]
 Cil qui pot avoir eaue sa bouche a atempree [1036b]
 Et qui goute n'en ot a sa broigne engoulee,
 Por la froidor du fer a la soif trespassee.
 D'eaue du ciel pleüe contre une henepee
 En une chieve pierre a Zephirus trovee, [1040]
 Grant talent a de boire, n'en a goute adesee,
 Ains la qeut en son elme, le roi l'a presentee.
 Alixandres la vit si l'a molt esgardee,
 Porpense, s'il la boit, ja iert sa gent desvee,
 Car se chascuns n'en a, sa soif li iert doublee.
 Il l'a devant lor eus a la terre jete;
 Et qant si home virent qu'il a l'eaue rüee,
 Aussi com chascuns d'aus la soif a enduree,
 La volentés du boire leur en est trespassee.
 Une coupe d'or fin a li rois demandee [1050]
 D'uevre galasciène et par pans neelee,
 Cent livres i eüst s'ele fust moun[e]ee.
 Qant ot son bon servise et s'amor molt loëe,
 Por guerredon de l'eaue l'a Zephiron donee.
 Et li home et les bestes sont lié de l'avespree,
 Por la froidor de l'air qui cort a la rosee;
 N'i a cel qui de soif n'ait la bouche crevee.
 Mal ait la garisons qui la nuit fust goustee;

Chascuns devant son tref se gist geule bae
 Et reçoit le serain qui chiet a la vespree. [1060]
 A l'aube aparissant fu toute l'ost montee.
 [3.57]A l'aube aparissant fu toute l'ost meüe,
 Li solaus fu levés, li chaus molt les argüe. [167]
 Li maines rois esgarde les une roche agüe,
 N'a gaires loing de soi a une eaue veüe;
 D'un pui ou l'ost estoit est a val descendue.
 Qui ot tente ne tref el pré l'a estendue;
 Dementres que chascuns de herbregier s'argüe,
 Descent li maines rois de sa mule crenue,
 Il s'est agenoilliés desor l'erbe menue [1070]
 Por estaindre sa soif qu'il a si grant eüe.
 Plus iert amere l'eaue, quant li rois l'ot beüe,
 Que suie ne fauterne n'aluisne ne ceüe.
 Tel angoisse ot li rois tous li cors li tressue
 Et voit que sans travail n'en bevroit beste mue,
 Si l'a a toute l'ost v[e]ee et deffendue,
 Puis fait ses tres cuellir s'a sa voie tenue.
 Les la rive de l'eaue une sente a seüe
 Tresq'a une freté qui li est aparue
 En une ille entre ros plus loins c'uns ars ne rue. [1080]
 La gent qui iert dedens estoit demie nue,
 Ainc puis n'en parut uns qu'il orent l'ost veüe.
 [3.58]Li rois vint a la rive o trestout son barné,
 N'i trueve pont ne planche ne navie ne gué,
 Et li champ de defors sont tout ars et bruslé,
 De l'ardor du soleil menüement crevé;
 Puis que premierement ot Dieus le mont formé,
 De trestoutes anones n'i ot plain poing semé.
 Li rois cline vers terre si a un poi pensé,
 Et qant il se redrece, s'apela Tholomé, [1090]
 Sor sa senestre espaule li a son bras geté,
 Puis li dist en riant: "Veïs ainc tel freté?
 Cil qui lai ens estont sont molt boneüré,
 Il n'erent ne ne sement ne pas ne cuellent blé
 Ne n'issent du chastel ne yver ne esté.
 Nus ne set lor convine ne dont il ont plenté
 Ou s'il vivent du vent ou de la gloire Dé.
 S'a force nes puis prendre, petit pris mon barné.
 Quatre cens chevaliers belement a celé
 Lor trametrai anuit ains qu'il soit avespré. [1100]
 Se il au plain se prenent, mort sont et afolé,
 Tout en ferai fors traire qanq'i arai trové,
 Ja n'i remandra hom, tant soit de grant aé.
 Cil sevent les desers, car par tout ont alé;
 Se il bien ne nos guënt et a grant salveté

Et l'eaue ne nos mostrent, ars seront et venté."
 [3.59]Grans fu l'eaue et parfonde et li marés fu maus.
 D'ambes pars de la rive fu parcreüs li rox,
 Trente piés ot de haut et trois toises de gros
 Et fu itant espés tous se tint a un dox; [1110]
 Il n'a freté en Ynde ne chastel n'en soit clos.
 Quatre cens chevaliers du mieus et des plus ox
 Et qui en sa compaigne avoient meillor lox
 I fait li rois entrer, les haubers en lor dox.
 Onques cil n'i entra qui ne feïst que fox,
 Car unes bestes ot entre les trous repox,
 Li païsant les claiment les ypopotamox.
 Mil en issent ensamble, ques prenent par les cox,
 Mengüent lor les chars et defroissent les ox;
 Nes puet garir haubers, tant soit serrés a clox, [1120]
 Ne grans escus bouclés qui de trois cuirs soit vox
 Q'autresi nes tranguoutent comme fuelle de chox.
 [3.60]Qant voit li maines rois sa gent ainsi morir,
 Por aidier a ses homes vait ses armes saisir.
 Courant vint a la rive, qu'il voloit ens saillir;
 Dans Clins et Tholomés le courent retenir,
 Ireement li dient: "Rois, por coi veus morir?
 Car te membre du saut que tu feïs a Tyr.
 Se muers en autre terre, quel part porrons fuïr?
 N'a home en ta compaigne qui te doive servir, [1130]
 Ençois q'en son païs puisse ja revenir,
 Que tout ne soit seüirs de la teste tolier."
 Li rois clina vers terre et geta un souspir.
 Les traïtors ques guient fait devant lui venir,
 Il en jura ses dieus mar le vaurent traïr.
 [3.61]Cil ierent cent cinquante qui les doivent guïer;
 Les cent fist li rois prendre et en l'eaue geter.
 Ypopotamos saillent qant les virent noër,
 Plus q'a l'autre feïe quident proie trover,
 Tant en issent ensamble que nus nes puet esmer, [1140]
 Si que tout cil de l'ost les courent esgarder.
 Onques icele nuit ne porent reposer,
 Por les bestes de l'eaue ques veulent afoler.
 Molt fu liés Alixandres qant il vit ajorner,
 Il a dit a ses homes: "Ci fait mal converser.
 Que nous porfiteroit ici a sejourner
 Ne hebreger les l'eaue dont ne poons gouster?"
 Puis fist cuellir ses tentes si s'en prist a aler.
 Il garda devant lui, car li solaus luïst cler;
 En mi le fil de l'eaue vit deus homes ester [1150]
 En un chalant de ros, cent homes puet porter.
 En yndïen langage les a fet salüer,

Eaue douce por boire lor a fait demander,
 Et s'il veulent avoir, viegnent la li mostrer;
 Quatre tans lor donra qu'il ne porront porter.
 [3.62]Cil li ont respondu: "Nos n'avons d'avoir cure,
 Que marchié ne faisons de nule creature;
 Ensi com a ces bestes est commune pasture,
 Prent l'uns l'avoir a l'autre sans conte et sans mesure.
 Mais por ce que fait estes a la nostre figure [1160]
 Et veons que de soif souffrés si grant ardure,
 Vous enseignerons eaue ou a ombre et froidure.
 Veés vous la cel tertre a cele desjointure?
 Tres en mi ces desers a une grant couture,
 Uns estans d'eaue douce sourt iluec par nature,
 Il n'en a plus en Ynde, si com dist l'escripture.
 Iluec a un sentier qui tresq'a l'estanc dure;
 Se voie nel vos taut ou grant mesaventure,
 Ains none i porrés estre a petite aleüre."
 [3.63]"Savés, font il, segnor, que vous volons mentoivre, [1170]
 Por ce que de noient ne vos volons deçoivre?
 Qant venrés a l'estanc, troverés grant aboivre;
 Pins i a et lauriers, oliviers et genoivre,
 Dont nous cuellons la graine por mesler o le poivre;
 Molt est grans li herbages que paissent li atoivre.
 Gardés n'i deschargiés un point de vostre atoivre,
 Qu'il n'a merveille en Ynde la nuit n'i viegne boivre;
 Se serpent vous i truevent, des ames serés soivre."
 [3.64]Or s'en torne li rois, l'oriflambe levee,
 Tout droit a la crevace que cil li ont mostree; [1180]
 Et qant furent tout outre contre une arbaleestree,
 Si ont a main senestre une voie trovee
 Qui d'ours et de lions iert freschement alee.
 Li traïtor ques guient la li ont meserree
 Et ont a ensient la voie trestornee.
 Onques ne fina l'ost dusq'en une valee,
 Et truevent une pierre qui estoit coverclee;
 Desous gisoit une orse de novel faounee.
 Qant el senti la friente, s'a la teste levee,
 Ses faonciaus crient perdre si est toute desvee. [1190]
 Si com l'ost aproisma, si saut geule bae
 Si a en mi sa voie une mule encontree
 Qui estoit de ferine et de forment torsee.
 De cele destre poe li dona tel colee
 Que la senestre espaulle li a du bu sevre.
 La mule chiet a terre, la ferine est versee;
 Tout droit a ses faons s'en est l'orse tornee.
 Uns chevaliers de Gresse ot sa lance levee
 Et vient poignant a l'orse toute s'esperonee,

Si la fiert par les flans qu'il l'a a mort navree. [1200]
 Un tel brait gete l'ourse, qant se sent esgenee,
 Q'il n'a beste el convers qui n'en soit effr[e]ee;
 Chascune fait tel brait et gete tel criée
 Que oïr les puet on bien pres d'une jornee.
 N'i remest nule beste qui n'i soit assamblee;
 La bataille commence de haute relevee.
 N'i a Grieu qui ne fiere ou de lance ou d'espee,
 La ou li lion hurtent est l'os desbaretee,
 Nes puet garir haubers ne grans targe listee
 Q'il ne boivent le sanc et traient la coree. [1210]
 Ainsi com la nuit vient se depart la meslee,
 Car chascune des bestes est a son lit alee;
 Et s'encore i eüst du jor une lieuee,
 Toute s'en alast l'ost confondue et matee.
 [3.65]Qant les bestes departent, au roi vint Licanors:
 "Sire, del hebreger que vos dit vostre sors?"
 Et respont Alixandres: "Ja n'en iert pris confors."
 Les navrés met en biere et fait ardoir les mors.
 Encontre le prinsome s'en est tornee l'os,
 Et qant il s'en tornerent, tant fait soner de cors, [1220]
 Tant i ot des buisines que li sons fu si fors
 Que par tous les desers les ot on dusq'as pors.
 Ne remaint es desers coluevre ne crapos
 Ne guivre ne choans qui tant s'i soit repos
 Por la freschor du sanc ne sieue les esclos.
 Cil qui ist hors de route molt par i fait que sos,
 De cent pars est saisis et traïnés es cros.
 [3.66]Tholomé vait avant, li preus et li senés,
 Tout un antif sentier et rengiés et serrés.
 Cil qui ist hors de route ne fait pas que senés, [1230]
 Car les bestes lor saillent et devant et delés:
 Ours, lions et lupars et grifons enpenés.
 Sor les chevaus les prenent ses en portent armés,
 Nes puet garir haubers ne fors escus bouclés
 N'en menguent les chars et rompent les costés.
 [3.67]Avant vait Tholomé, qui toute l'ost conduit.
 Ne mangierent la nuit ne pain ne char ne fruit,
 Mais chascuns en alant un poi de forment cuit.
 L'arrieregarde fist Dans Clins, li fieus Caduit,
 N'a home en sa compaigne qui forment n'en anuit. [1240]
 La vermine les pince qui derriere as dos bruit;
 Tel paor a chascuns par poi qu'il ne s'enfuit,
 Qant Dans Clins lor escrie: "Arestés vos trestuit.
 Ne vos esmaïés mie se la vermine bruit,
 Mais chascuns chevaliers sor sa lance s'apuit.
 Se ceste arrieregarde poons bien faire anuit,

Grant gré nos en savra Alixandres, ce cuit."
 [3.68]Cil de l'arrieregarde sont chevalier honeste,
 Trestout tornent ensamble la ou Dans Clins s'areste.
 Ou truevent grant serpent, si li coupent la teste, [1250]
 La ou il est petis, sel defoule la beste.
 Au trestorner qu'il firent lor ont fait grant moleste,
 Car il n'i a serpent, tant soit de grant poëste,
 Ne s'en voist molt bleciés ou en queue ou en teste.
 [3.69]"Segnor, ce dist Dans Clins, savés par quel mesure
 Nos dut anuit venir ceste mesaventure?
 Qant la vermine vint qui nos fist cele ardure,
 Se fuissons vers l'ost tant comme uns arpens dure
 Por que l'ost retornast ne perdist s'aleüre
 Et seüst Alixandres ceste desconfiture, [1260]
 La fuie nos tornast a molt grant forfaiture,
 Ja mais jor de sa vie nen eüst de nos cure."
 [3.70]Contre la mienuit, ains que chantent li gal,
 Issi l'ost d'une combe s'entrent en un ingal.
 Li choan et les nuitres qui issoient d'un val
 Lor firent toute nuit paine et travail et mal,
 Car en trestoute l'ost n'a home si vassal,
 Se il ist hors de route por torner a estal,
 Que li choan n'en portent ou lui ou son cheval.
 Alixandres apele son maistre mareschal, [1270]
 Dist li qu'il li aport un grant paile roial,
 Por crieme des choans fait covrir Bucifal;
 Qant il li ont lacié as boutons du poitral,
 N'en parut chiés ne queue ne li esperonal.
 [3.71]Li choan des desers sont gregnor de vautoirs,
 Graindre est une des eles que n'est uns covertoirs.
 Qant il volent sor l'ost, en l'air donent tel crois
 Cil qui ist hors de route molt par i fait que mois.
 S'uns des choans le voit, ja vers lui n'avra frois;
 De lui ou du cheval n'en vait il mie blois. [1280]
 Toute nuit jusq'a l'aube lor dura cil tabois.
 [3.72]A l'aube aparissant vinrent chauves souris,
 Menors sont de corneilles et gregnors de pertris.
 N'a chevalier en l'ost, tant soit d'armes garnis,
 Se pres de lui li vole, n'en soit tous esbahis;
 Del soumeron de l'ele si le fiert el cervis
 Que grans quatre lieuees en remaint estordis.
 Tant lor dura cis maus qu'il ne fu departis
 Que li jors fu tous clers et solaus esbaudis.
 Es les vous au sentier qui ersoir fu guerpis. [1290]
 [3.73]Molt sont lié cil de l'ost du sentier c'ont veü,
 Toute la matinee se sont si tost meü
 Que grant piece ains midi sont a l'estanc venu;

Entre le bos et l'eaue ont tuit lor tref tendu.
 Qant furent refroidié, si ont un poi beü,
 Puis ont derrier lor dos tout le bos abatu;
 Qant vint eure de none, sachiés et grellés fu.
 Il metent le fu ens, si art a grant vertu.
 Par ice se sont auques des serpens deffendu.
 [3.74]Ainsi com li jors prist o le vespre a meller, [1300]
 Deus mile lampes d'or fait li rois alumer,
 Puis fait soner un graille por l'eaue demander
 Et il et tuit si home sont assis au souper.
 Et qant furent assis, ses en estut lever,
 C'onques de garison n'i oserent gouster,
 Car cil les escrierent ques devoient garder,
 Qui voient les meruelles des desers assamblar;
 Cil qui premiers les vit sel vait au roi conter.
 Li rois clina vers terre si commence a penser,
 Et qant il se redrece, si fait sa gent armer. [1310]
 [3.75]Tout premerainement lor vinrent blanc lion,
 Le fu truevent ardant si ceurent environ
 Por ce qu'il ont de soif si grant destrucion;
 Par mi le fu ardant se metent a bandon.
 Mais li home Alixandre ne sont mie garçon,
 Chascuns tient son espié devant son pavellon,
 Qui bien ne se deffent de mort n'a garison,
 Des blans lions ont fait molt grant ocision;
 Ne por qant boivent l'eaue, ou il veullent ou non.
 Cil qui d'aus eschaperent tornent a esperon [1320]
 Tres par mi les desers a lor conversion.
 Après vinrent ceraste et li escorpion,
 Chascuns drece sa coe et trait son aguillon;
 Qui bien ne se deffent si se tient por bricon.
 Qui tient lance n'espee, gavelot ne baston,
 Des herberges les getent et font grant tuïson.
 [3.76]Ne demora puis gaires, yndienes souris
 Vinrent boire a l'estanc, gregnor sont de goupis.
 Qanque mordent sans home si est sempres fenis,
 Mais li hom en est tost respassés et garis. [1330]
 Des somiers et des bestes les ont molt desgarnis.
 Se auques lor durassent, tout fuissent desconfis,
 Mais el fu les engetent, si com dist li escriis.
 [3.77]Contre la mienuit la vermine est venue,
 Onques en nule terre si grans ne fu veüe,
 Del chaut et de la soif lassee et confondue;
 Par mi le fu se metent por la soif ques argüe.
 La grans passe bien outre, li fus art la menue.
 Mais la gent Alixandre dont la rive est vestue
 Qanque del fu eschape as maus ocit et tue [1340]

Ne mais la grant vermine qui estoit parcreüe,
 Qui iert et longe et lee et grosse et estendue,
 Qui par aus ne pot estre tüee ne vaincue;
 Cele s'en retorna quant ot l'eaue beüe.
 [3.78]Des crués de la montaigne de la voisineté
 Enprés la mienuit vinrent serpent cresté,
 Si grant comme colombes, qui se sont devalé.
 De deus chiés ou de trois sont li pluisor armé;
 Li un sont pers et ynde et li autre doré,
 De blanc et de vermel menüement listé; [1350]
 Li oel lor reflamboient, qui sont envenimé.
 Par mi le fu se metent si l'ont tout enbrasé.
 Qant cil de l'ost les voient, si ont le hu levé,
 Et li home Alixandre lor sont encontre alé.
 De ciaus que li fus n'art sont li pluisor tüé;
 Et cil de l'ost s'en tornent si l'ont le roi conté
 Que il ont vint sergans et trente sers dampné,
 Qui tuit sont des serpens ocis et devoré.
 [3.79]Entor quatre lieuees devant l'aube aparant,
 Estes vos une beste qu'on claime Dentirant; [1360]
 Bien ot le front armé de trois cors qui sont grant.
 Qant ele voit le fu, si muert de maltalant,
 Les pavellons esgarde si vait entor courant
 Et vient droit as herberges par mi le fu ardent.
 Mais li home Alixandre li sont venu devant,
 Qui la fierent d'espees ou de lance trenchant
 Ou de hache esmolue ou de dart en lançant.
 Trestout canqu'il li font ne prise mie un gant,
 Vint et set chevaliers lor a mort en boutant,
 Et mehaignié i furent cinquante et dui sergant; [1370]
 Dedens l'eaue s'est mise par force lor veant.
 [3.80]"Segnor, dist Alixandres, n'en adesés mais mie;
 Une riens vos dirai, n'est hom qui m'en desdie:
 Besoins et maltalens fait toute riens hardie;
 Laissiés la beste boivre tant que soit refroidie,
 Et qant avra beü, si iert acouardie,
 Ja ne se deffendra s'on l'assaut ou escrie;
 Je la requerrai primes o l'espee forbie."
 [3.81]La gent qui iert en l'ost de Sidoine s'areste;
 Que la beste n'en isse, qui le rivage guete, [1380]
 De l'une part l'escriënt si li ont paor fete.
 Vers ciaus qui mot ne dient s'est el rivage trete,
 Qu'il s'en cuida raler par force et par poëste;
 Chascuns de bien ferir au mieus qu'il puet s'afete,
 Li rois qui iert avec de bien faire les hete.
 A maus et a cugnies li peçoient la teste,
 Que trestuit en resonent et li val et li tertre;

Au roi et a ses homes a molt grant paor fete.
 [3.82]Es vos ciaux d'Ethyope sor la rive arestés;
 Que Dentirans n'en isse qu'il ne soit afolés, [1390]
 De l'une part l'escriënt si s'est espoëntés.
 Corant vint a la rive s'est un poi reüisés
 Et commença a boire, tant par est abrievés.
 Qui preus fu et hardis premerains est armés.
 Adonques l'asaillirent environ de tous les
 D'espees et de lances et de dars enpenés;
 Onques par iteus armes ne pot estre dampnés;
 A maus et a cugnies fu Dentirans tüés,
 Et puis l'ont escorchié, s'en fu li cuirs lavés,
 Et veulent qu'a merveille soit par tout esgardés, [1400]
 Que le poil a si bel qu'il semble estre dorés.
 Li cuirs o la char blanche fu au roi presentés,
 Devant son tref l'estendent sor l'erbe vert des pres;
 Cent chevalier i gisent, tant par est grans et les,
 Qant il geuent as tables, as eschés et as des.
 Plus en vaut l'ossemente de quatorze cités;
 Dieus ne fist chevalier, tant soit el cors navrés,
 S'il en avoit beü ne fust sempres sanés
 Ne ja puis en tout l'an n'avroit mal en ses les.
 De ce fu Alixandres molt malement menés [1410]
 Que les os de la beste ont en l'eaue getés.
 [3.83]A l'aube aparissant vinrent niticorace,
 Bleu sont et piés ont noirs et bes comme becace
 Et crestes comme cos et queue paounace
 Et luisent assés plus que ne fait une glace,
 Gregnor sont de vautoirs plus de demie brace.
 De l'estanc ont porpris la riviere et la place
 Et fait chascuns tel noise com saas qui saace.
 En l'ost ont tel paor ne sait chascuns qu'il face,
 Car nus ne dist un mot ne autre n'i menace, [1420]
 Ains dist li uns a l'autre qu'il s'acoist et se tace.
 [3.84]Des poissons de l'estanc font li oisel ravace,
 Et qant sont saoulé, si en revont lor trace.
 Qant cil de l'ost le voient, n'i a nul qui ne place,
 Car plus les redoutoient que nul oisel sauvace.
 Des poissons de l'estanc ont assés devoré,
 Et n'i avoit poisson n'ait demi pié de lé-
 De trois piés ou de quatre sont de lonc mesuré-
 Que li oisel ne l'aient autresi tranglouté
 Com la geline fait un petit grain de blé. [1430]
 Hueses font de lor cors, car trop ont geüné,
 Bien estendent lor cols menüement el gué;
 N'i estuet ja peschier home de mere né,
 Car il i peschent bien chascun jor ajorné.

Qant ont assés mengié, arriere sont alé,
 Tout ainsi com il vinrent s'en sont il retorné.
 Mais li home Alixandre, qui ce ont esgardé,
 Ainc ne furent si lié qant il sont eschapé,
 Car plus les redoutoient que serpent ne malfé.
 Maint tempest ont eü es desers et trové, [1440]
 Ainc n'en douterent nul tant com cest ont douté,
 N'i ot nul si hardi n'ait de paor tramblé;
 Trestout cuidierent estre et mort et afolé.
 Je cuit, se li oisel fuissent vers aus torné,
 Que il fuissent trestuit honi et vergondé,
 Car des maus qu'ont eüs sont vaincu et lassé.
 Li oisel ierent grant, hideus et sejorné,
 Et ierent molt orible et molt desfiguré.
 [3.85]Ains que les os se fuissent de l'estanc remüees,
 Lor vinrent grans compaignes de coluevres bendees. [1450]
 Visages ont de femes, molt sont lait figurees,
 Sor lor espaulles gisent lor grans crines dorees;
 Chascune d'une pierre sont toutes estelees,
 En mi le front lor sieent, molt i sont bien posees,
 Mais plus grant clarté rendent que maisons embrasees.
 Nus hom n'est tant navrés de lances ne d'espees,
 Se deus de celes pierres i fuissent adesees,
 Sempres ne fust garis et ses plaies sanees.
 A lor brans acerins en ont mil decaupees;
 Mais ce tint Alixandres a merveilles provees: [1460]
 La ou les pierres gisent, si se sont rassamblees
 Et par mi les desers sont en fuies tornees.
 Li rois ne vausist mie por d'or cinc cens charees
 Que deus ou trois des pierres n'i fuissent recovrees.
 [3.86]Qant virent le soleil et le jor esclarier,
 A l'estanc s'ont disné sergant et chevalier.
 Menbre lor du conduit qui les dut engignier,
 Dont li rois fist les cent en l'eaue trebuchier
 Dedevant la freté as bestes por mengier.
 Les autres commanda li rois a estoier, [1470]
 Par le mien ensient il s'en vaura vengier.
 Il les a commandés tous nus a despollier,
 Par derriere les dos lor fait les mains lier,
 Puis a fait a chascun les cuisses peçoier.
 Lors leur a dit un mot qui semble reprovier:
 "Vous remanrés ici por garder cest vivier;
 Selonc vostre service avrés vostre loier."
 A tant s'en est tornés ses commande a laissier.
 Lors derrompent le fu si s'en vont li somier.
 [3.87]Qant Alixandres muet et les heberges vuident, [1480]
 Tant fait soner de cors tout li desert en bruient.

Li serpent des montaignes por la noise s'en fuient,
 Es crués et es crevaces se mucent et enduient.
 Molt se vont dementant cil qui d'aler s'anuient,
 La cholor est si grans que jor vivre ne cuient,
 Un val ont devalé et un grant tertre puient.
 Qant il furent en son, seur lor lances s'apuient,
 Virent les pres de Bastre et les eaues qui bruient
 Et les gaaigneries et les dras qui essuient
 Et les pastors qui geuent et les bestes qui muient. [1490]
 Ciaus devant fait armer li rois qui l'ost conduit.
 [3.88]Cel jor por Alixandre firent li dieu vertus,
 Car grant piece ains midi est des desers issus.
 Encor n'estoit Porrus de cel convers meüs,
 Dejuste les desers sejournoit o ses drus,
 Las iert de la bataille ou ot esté vaincus.
 Garda vers la montaigne si a les Grieus veüs,
 Bien connut as ensaignes des bons espieus molus
 Que ce est Alixandres, qui n'est pas recreüs;
 A mervelles le tint com il estoit venus, [1500]
 Comment et par quel voie les avoit si seüs.
 Molt fu grans li herbages sor l'eaue de Calus;
 La vint li maines rois, a pié est descendus.
 Sor la rive de l'eaue ont lor grans tres tendus
 Et par la praerie les pavellons menus.
 [3.89]Porrus esgarde l'ost contre soleil levant
 S'a veü les Grigois qui se vont hebregrant
 Et o leur pavellons tous les pres porprenant,
 Donques ot si grant ire onques mais n'ot si grant.
 Par quatre chevaliers et par son drugemant [1510]
 A mandé Alixandre trop le vait enchauçant,
 Por poi ne l'a souspris, trop pres le vait sieuant;
 Vint jors li doinst de trieues, s'en avra pris molt grant,
 Tant que il ait mandé por sa gent d'Oriant;
 Lors avra la bataille, mar la querra avant.
 Qant Alixandres l'ot, si respont en riant:
 "Je li donrai les trieues par itel convenant
 Q'a ses homes de Bastre face dire et commant
 Que marchié nos aportent sel donent avenant."
 Les trieues sont donees, et fait li acreant. [1520]
 [3.90]Donees sont les trieues et fait li serement.
 La ou li rois sejourne et la bataille atent
 Fu li marchiés criés communs a toute gent:
 De toute icele riens qui a vitaille apent
 Qui vaura si achat et pregne et doinst argent.
 Porrus est a la porte, ou noveles aprent,
 A ciaus qui de l'ost viennent enquiert priveement
 Le covine Alixandre et son contement;

Il li dient trestuit qu'il n'en sevent noient.
 Uns Griens le conte au roi, qui volentiers l'entent; [1530]
 Qant l'oïAlixandres, saut sus isnelement,
 Por aler au marchié monta sor un jument,
 Si li furent changié si roial vestement.
 [3.91]Montés est Alixandres, au marchié veut aler
 Desor une jument, nus hom ne vit sa per.
 N'estoit noire ne blanche; ne vos sai deviser
 De quel poil ert la beste, onques ne sot ambler.
 Qant li rois fu desus et il s'en veut torner,
 El n'ala mie avant, ains prist a reculer.
 Des esperons la fiert li rois qui tant fu ber, [1540]
 Et ele commença molt fort a regiber,
 En travers a saillir et des piés a geter.
 "Comment! dist Alixandres, dont ne voit ele cler?"
 "Oïl, dient si home, mais ele veut jouer."
 Un boucel et un sac fait derier soi trosser,
 A un sergant l'a fait une piece mener.
 Alixandres s'en torne, ainc ne fina d'errer
 Jusque la ou Porrus se faisoit sejourner
 En la cité de Bastre, qui molt fait a loër;
 Porrus le vit venir sel rueve a lui torner. [1550]
 Alixandres respont: "Ne me loist demorer;
 Chambellens sui le roi si veul cire achater
 Dont nos li ferons cierges anquenuit au souper,
 Et chanestiaus et vin, se point en puis trover."
 Et qant Porrus l'entent, sel commande arester:
 "Amis, descent un poi si vien a moi parler.
 Tout qanque tu vas querre avras sans achater,
 Et te ferai encore de mon avoir doner
 Se tu oses mes letres Alixandre porter;
 Et je les ferai faire, choses li veul mander. [1560]
 Di moi tout son convine, ne te chaut riens celer."
 Et respont Alixandres: "Se volés escouter,
 Dirai vos quels il est, ja l'orrés deviser."
 [3.92]"De vos letres porter tant vos dirai, Porreu,
 Que bien le savrai faire, se je i voi mon preu;
 Ce sachiés vos por voir, jel vos afi et veu.
 Il n'a si privé home ne chambrelenc ne queu;
 Assés, qant je me veul, me gap a lui et geu.
 De son privé conseil itant vos en desneu:
 Tous jors se muert de froit, ja n'iert en si chaut leu. [1570]
 Qant tornai des herberges, desor un paile bleu
 S'estoit li rois assis acoutés sor Cauleu,
 C'est uns des douze pers, qui sont hardi et preu.
 Deus mantiaus affublés se chaufait a un feu."
 [3.93]"Di, va! ce dist Porrus, et ja est il estés

Et fait si grant cholor com vos veoir pöés;
 Qant il ore se chauffe, molt est frais et alés."
 "Voire, dist il meïsmes, pieç'a que il fu nes,
 De viellece est ses cors tous frois et engelés,
 Si est auques enfers et trestous condomés. [1580]
 Trop a perdu de sanc, tant a esté navrés,
 Il ne vivra mais gaires, vieus est et radotés.
 Molt est fel et entulles, nus n'en puet avoir gres."
 [3.94]De ce fu molt Porrus et halegres et clers
 Q'Alixandres est vieus, et il est bachelers.
 Il fait ses letres faire en langage des Gres,
 Molt manace Alixandre et blastenge ses des.
 "Trop a esté frarins et tous jors iert ités.
 Por coi ne se repose, qant vieus est et remés?
 Mar vit sa covoitise et ce qu'il iert avers. [1590]
 Se jel pooie prendre, il seroit du chief res,
 N'en porteroit la teste Dans Clins ne Tholomés,
 Ja mais ne verroit Gresce nisuns des douze pers."
 [3.95]Alixandres s'estut les un piler marbrin,
 Assés s'oïclamer et dolent et frarin;
 Qant Porrus le manace, si tient le chief enclin.
 Il a prises ses letres o le seel d'or fin,
 Puis monta el jument qu'il mena por roncïn.
 Assés en porte cire et chanestiaus et vin,
 Onques ne li costerent vaillant un angevin. [1600]
 De la porte est issus si entra el chemin,
 Des marcheans de l'ost a sieui le traïn.
 Si home li demandent: "Dont venés vos en fin?"
 Et il lor respondi: "Jou alai hui matin,
 Por Porron escharnir me sui mis en tapin."
 [3.96]Alixandres repaire s'a son boucel trossé,
 D'une malvaise sele son jument enselé;
 Li estrier furent tuit et rompu et noué.
 Bien resamble mendis, si drap furent usé.
 Qant il vint pres de l'ost, encontre sont alé [1610]
 Tuit li mellor baron qui li sont plus privé.
 Qant vinrent devant lui, en riant ont crié:
 "Sire, bien vegniés vos, et q'avés achaté?
 Dites de vos noveles, com vos avés erré."
 Alixandres respont: "Molt ai bien escouté
 Que Porrus m'a laidi, avillié et blasmé
 Et chaitif et frarin oiant moi m'a clamé.
 D'Alixandre demande qels est, de quel aé.
 Je li dis que vieus iert, maint jor a trespasé,
 N'onques ne fait si chaut ne yver ne esté [1620]
 Que il n'ait tous jors froit, tant n'avra afublé;
 Les ieus a chacïeus, tout sont esborbelé,

Molt est fel et entulles, nus n'en puet avoir gré,
Tout le mont veut avoir desous sa poësté.
Et il me respondi: 'Cortois iés par verté,
Qant tu de tout son estre ne m'as noient celé.
De ce le tieng je molt por viellart radoté
Que il cuide conquerre si vilment mon regné;
Ja ançois ne verra un mois entier passé
Que il avra le chief desor le bu caupé.' [1630]
Qant il ot assés dit et j'oi tout escouté
Si pris congié de lui, parfont l'ai encliné.
'Amis, dist il a moi, pren cest brief seelé
Sel me porte Alixandre, le viel, le radoté.'
Et je li respondi: 'Volentiers et de gré.'
Ves ci le seel d'or que j'en ai aporté,
Chanestiaus, cire et vin que il m'a achaté."
Qant si home l'oïrent, grant joie en ont mené,
Grans gas en font entr'aus, assés s'en sont joué
De Porrun le roi d'Ynde que il avoit gabé, [1640]
De lui se vont gabant deci q'au maistre tré.
La descent Alixandres, au pié li sont alé
Et prince et duc et conte qui molt l'ont honoré.
Le jument a fait rendre la ou l'ot emprunté,
Au povre home qui fu a bon loier doné.
Le vin, les chanestiaus ont primes destrossé,
Nus hom ne vit trossel plus fort desbaraté;
L'uns tire, l'autres boute, le sac ont deschiré,
Assés se sont iluec detrait et detiré;
Molt estoit Alixandres tenus en grant chierté. [1650]
Au departir la cire ot maint home enversé,
Les chanestiaus mengüent, senpres furent gasté.
"Segnor, dist Alixandres, molt ai bien marcheé,
Malvais est mes gaains, car tout m'avés robé;
Laiiés moi vieus le vin que j'ai ci aporté
Si le bevrons ensamble, car il n'a riens costé,
Et mengiés aveuc moi trestout par par amisté."
Ce dient li baron que molt a bien parlé.
Li vins revint avant qu'avoient destorné,
Par rens se sont assis si ont iluec disné. [1660]
Plus que ne vos diroie a li mengiers costé,
Ilueques ot beü maint vin et maint claré.
Celui qu'il aporta n'ont il mie oublié,
Car ançois fu beüs que d'autre i ait gosté.
Li rois s'en fait molt liés, grant joie i ot mené.
[3.97]Molt s'en rist Alixandres ains que le brief desplit,
Et qant l'ot desploié et l'escripture vit,
Lores s'en gabe plus et quatre tans s'en rit,
Et a dit a ses homes: "Entendés un petit.

Porrus molt me manace et me tient en despit, [1670]
 Mes oreilles oiant m'a hui molt honte dit.
 Or sai bien son corage par bouche et par escrit,
 Que, s'il me pooit prendre qu'il m'eüst desconfit,
 Il me tauroit la teste, n'en avroie respit."
 "Sire, dient si home, n'a droit qu'il vos afit,
 Que seul de cele treille que l'autr'ier vos guerpit
 Li avés vos tolu grant joie et grant delit."
 [3.98]Porrus de la bataille n'a talent qu'il se faigne,
 N'ameroit Alixandre por trestout l'or d'Espaigne.
 Il a mandé ses homes en Bastre la souveraine,- [1680]
 N'i remest a semonre plains ne vaus ne montaigne,-
 Neïs le manovrier qui la terre gaaigne,
 Et tous ciaus d'Oriant, que uns seus n'i remaigne,
 Si q'au vintisme jor sans nule demoraigue
 Entre Ynde et les desers soient tuit en la plaigue.
 Il en jure ses dieus et sa teste et s'entraigne
 Mar en remanra uns nis en terre grifaigue;
 Et s'il fait tel folie que par orguel remaigne,
 Ja n'iert si riches hom ne de si grant compaigne
 Que nel face escorchier ou les os ne li fraigne. [1690]
 [3.99]Or a semons en Bastre tous ses homes Porrus
 Et tous ciaus d'Oriant, que n'i remaigne nus.
 Cil des desers i vinrent dusq'as bonnes Artus;
 Gos et Magos i vinrent de la terre de Tus,
 Quatre cens miles d'omes amenerent et plus.
 Il en jurent les mors que porsieut Nereüs
 Et la porte d'enfer que garde Cerberus
 Que l'orguel Alixandre torneront a reüs.
 Qant li vintismes jors fu passés et esclüs,
 Furent trente et set roi si ot cinquante dus, [1700]
 Chascuns a tel effors com il avoir pot plus.
 Cinquante olifans prent, un chastel lieve sus;
 O sa gent i entra li rois de Jostarus,
 Molt i fist pierres metre por tüer ciaus dejus.
 [3.100]Qanque Porrus a fait li rois a esgardé
 Et vit bien le chastel qu'avoit iluec levé;
 S'il venoit sor ses homes tost seroient tüé.
 Entor les olifans a fait faire un fossé,
 Cent piés ot de parfont et trois toises de lé.
 Or sont li olifant si pris et enserré [1710]
 Que ja mais n'en istront se il n'en sont geté;
 Lors a veü Porrus com il l'ont malmené,
 Que son chastel li ont clos et avironé.
 Ses batailles conroie dedesous en un pré;
 Entre contes et dus et rois q'ot ajosté
 Et les barons de pris qui la sont aüné,

Estre les paoniers, qui ne sont pas nonbré,
 Furent par cent feïes cinquante mil armé.
 [3.101]Alixandres regarde le fons d'une valee,
 Vit la grant gent Porron, qui s'arme par la pree. [1720]
 Dont a li maines rois la soie ost devisee,
 Ses batailles conroie, sa gent a ordenee
 Et ses eschieles faites, chascune a commandee.
 Puis vesti une broigne dont la maille iert serree,
 Après laça un elme Justin de Valferree,
 Puis a çainte a son les une molt bone espee
 Et a mis a son col sa grant targe roëe;
 Monta sor Bucifal a la longe alenee.
 Cele part ou il torne ne va mie a celee,
 Tos jors i a cent grailles qui sonent la menee; [1730]
 Qant il vient en bataille et sa gent est lassee,
 Lors s'en repaire as cors, nen est mie esgaree.
 Li rois monte en un tertre s'a sa gent esgardee.
 "Ahi! franche maisnie, gentil et honoree,
 Comme estes por m'amor de tous biens porpensee
 Et tante estrange terre en avés trespassee
 Et tant fain et tant soif, tante paine enduree.
 Se Dieus me laist tant vivre que viegne en ma contree,
 L'amor qu'avés vers moi vos iert gueredonee,
 Trestoute ma richoise vos iert abandonee." [1740]
 Ançois que il eüst sa raison definee,
 Astaros de Nubie a l'angarde montee,-
 Et sist el cheval noir que li dona la fee,
 C'estoit une pucele qu'il avoit molt amee,
 Por cui amor passa un bras de mer salee,-
 Et dist une raison qui bien fu escoutee:
 "Alixandre, fait il, trop as ta gent menee,
 Hui est venus li jors qu'ele iert desbaretee,
 Car la premiere joste m'en a Porrus donee.
 Envoie cui tu veus por recevoir colee, [1750]
 S'il n'en vait l'escu frait et la broigne fausee,
 Qanque je tieng de terre en la moie contree
 Claim cuite mon segnor, n'en quier avoir denree."
 Qant Dans Clins l'entendi, s'a la teste levee,
 Oïe a la parole qui pas ne li agreee,
 Et saisi Alixandre as renges de l'espee:
 "Rois, done moi la joste que cil a demandee,
 Ja ne ferai mais autre se ceste m'est v[e]ee."
 [3.102]"Rois, done moi la joste, ce li a dit Dans Clins,
 Pres sui que me combate por toi et por les Gris, [1760]
 Je ferai la bataille, vers lui m'en aatis;
 Se tu ne la me dones, tout ton fié te guerpis."
 Alixandres l'esgarde si li a fait un ris;

Des douze pers apele li rois tresques a sis:
 "Segnor, dire vos veul ce qu'il m'en est avis.
 Astaros de Nubie nos a molt pres requis,
 Dans Clins fera la joste, car ainsi le devis,
 Gardés que il ne soit ne retenus ne pris."
 Li douze per respondent: "Ja n'ait il Paradis
 Qui vous faut ne Dant Clin por tant com il soit vis." [1770]
 Qant Dans Clins entendi que de la joste est fis,
 Il vait prendre ses armes com hom volenteis,
 Et monta el destrier que il avoit conquis
 En la desconfiture ou Daires fu ocis.
 La lance sor le fautre es grans galos s'est mis,
 La ou voit Astarot s'a le tertre porpris;
 Astaros de Nubie li vint en mi le vis.
 [3.103]Astaros de Nubie fu molt bons chevaliers,
 Liés est de la bataille si apela premiers:
 "Dites moi, biaux amis, estes vous saudoiers [1780]
 Ou uns des douze pers q'Alixandres a chiers?"
 "Vassaus, ce dist Dans Clins, trop par estes legiers;
 Je sui drus Alixandre et ses gonfanoniers
 Si m'a ci envoieé et g'i ving volentiers.
 Se je mon non vos çoil, viegne moi enconbriers;
 J'ai non Dans Clins d'Aresse, iteus est mes mestiers,
 Ja en court ou je soie n'amerai losengiers.
 Tu avras la bataille, puis que tu la requiers,
 Faisons que devons faire et laissons nos plaidiers."
 Ce respont Astaros: "Molt avés dit que fiers." [1790]
 Lors se sont deffié si brochent les destriers.
 [3.104]Il se sont deffié et si entreferu
 Que les lances peçoient et fendent li escu;
 Onques poitraus ne cengle n'en a un retenu,
 Tant com hanstes lor durent se sont entrabatu.
 Qant il furent a terre, n'i ont gaires geü,
 Ains resailent en piés com home de vertu.
 Dans Clins sot d'escremie si l'a premiers feru,
 L'espee li descent entre cors et escu,
 Le bras a tout le poing li a sevré du bu; [1800]
 A l'autre caup l'eüst ou mort ou retenu,
 Qant cil d'Ynde et de Bastre de la terre Porru
 I poignent tuit ensamble si ont levé le hu.
 Alixandres le voit, paor ot de son dru
 Et dist as douze pers: "Ja avrons Clin perdu."
 Li douze per respondent, qant il l'ont entendu:
 "Li domages est nostres, li vassaus mar i fu."
 Lors poignent tout ensamble, n'i ont plus atendu,
 O les espees nues l'ont molt bien securu.
 Meïsmes Alixandres li a Bauçant rendu, [1810]

Puis li dist en après de soie part: "Salu!
 De m'amor vos fais don, car tuit avons veü
 Que blecié l'aviés et son cors retenu."
 [3.105]Qant furent de deus pars jostees les batailles,
 Li escu de lor cols ne valent deus maailles,
 Des lances s'entrefierent tres par mi les corailles.
 Puis traient les espees, qant les lances font failles,
 Tous les elmes detrenchent et des haubers les mailles.
 Du fer et de l'acier dedevant les ventailles
 Vole plus espés fus que par vent ne font pailles. [1820]
 Ciaus qui bien ne feroient tenoient por frapailles,
 Li un fierent les autres sans nules repentailles.
 [3.106]Qant Alixandres vit la bataille en la pree,-
 Molt par fu grans la presse qant ele fu jostee,-
 Il sist sor Bucifal a la longe alenee;
 Et vit un duc de Bastre qui ot traite l'espee,
 D'un Grieu que il ot mort fu toute ensanglantee.
 Qant le vit Alixandres, s'a la color müee;
 Il broche Bucifal toute une randonee
 Et vait ferir le duc sor la targe roëe, [1830]
 Que il li a trestoute peçoïe et quassee,
 Et tres par mi le pis a la broingne esfondree,
 Entre les deus espaulles li trenche l'eschinee;
 As doilles de l'espié en geta la coree,
 Tant com hanste li dure l'abat mort en la pree.
 La gent a icel duc s'en fuit si effr[e]jee
 Que ja mais par nul home ne sera rassambee.
 Bos, li rois de Cartage, a sa gent amenee,
 Et furent bien vint mil de noire gent barbee.
 Il sist el cheval noir que li tramist la fee [1840]
 Por cui amor passa un bras de mer salee;
 Une ensegne de paile a sa lance ot fremee.
 Il broche le destrier toute une randonee
 Et vait ferir un Grieu en la targe listee,
 Que voiant Alixandre en a l'ame getee.
 Alixandres le voit s'a s'ensegne escriëe,
 Bucifal point et broche, toute en fremist la pree,
 Et vait ferir le duc en la targe bende;e;
 Tel caup li a doné du trenchant de l'espee
 Que la teste o le hiaume li a du bu sevrée. [1850]
 Cil de Bastre s'en fuient si depart la mellee,
 Molt a bien Alixandres sa gent reconfortee.
 [3.107]Li rois retint ses resnes, sor les estriers s'apuie,
 Le branc qui fu d'acier tert du sanc et essuie,
 Et qant il fu bien ters, en son fuerre l'estuie
 Et commande Aristé que sa gent li conduie.
 Puis pris un espié, por ce que joindre cuie,

Porron quiert par le champ, car il crient qu'il s'esduie,
 Por ce que l'autre fois torna si tost en fuie;
 Qant il nel pot trover, molt forment li anuie, [1860]
 N'encontre chevalier ne laist la sele vuie.
 De la noise des cors et de la gent qui huie
 Ne torne cele part que tous li chans ne bruie;
 Li dart que li Grieu lancent vont plus espés que pluie.
 Il n'encontre compaigne qu'il n'ocie et destruite.
 [3.108]Li cuens Aristés maine la compaigne roial.
 Il garde vers senestre s'a veü Rodoal,
 Que Porrus amoit plus que nul home charnal,
 Il l'avoit adoubé a une feste anval.
 D'un Grieu q'ot abatu en menoit le cheval; [1870]
 Se il nel puet rescorre, tient soi a desloial.
 L'ensegne qu'il portoit commande au seneschal;
 Encontre Rodoan broche tot un ingal,
 De l'espee qu'il tint tel li done el nasal
 La bouche et le menton li abat contre val.
 Le destrier ou il sist trenche dusqu'al poitral
 Et celui qu'il menoit prist au sosmentonal
 Si l'a randu au Grieu a guise de vassal.
 Alixandres le vit, por ce le tint a mal
 Qu'il a guerpi l'ensegne por nul home charnal. [1880]
 "Sire, dist Aristés, onques mais n'oïtal,
 Ne veul qu'il ait du vostre nisun esperonal."
 [3.109]Es vous Emenidus sor un cheval liart,
 N'encontre chevalier qui n'ait de mort regart,
 Et vit un duc de Bastre qui des Grieus fait essart;
 Il broche le destrier, venus est cele part.
 Li dus ne l'atent mie a guise de coart,
 Tel li done en l'escu ou ot paint un lupart
 Que plain pié et demi li mist el cors le dart.
 Qant il se sent navrés, de maltalent tous art; [1890]
 S'or ne se puet vengier, tenra soi por couart.
 Li dus s'en est tornés, mais trop est meüs tart,
 Emenidus le fiert en l'elme d'un fausart,
 Desi que es arçons par l'eschine le part.
 Cel cop vit Alixandres, qui iert en son esgart.
 [3.110]Or vait Emenidus navrés par la bataille,
 Et vit un duc de Bastre, ne laira ne l'assaille.
 Tel caup li a douné el pis sous la ventaille
 Le fer de son espié li mist en la coraille,
 Tant souef l'abat mort que gaires ne travaille; [1900]
 Cel caup vit Alixandres, ne puet müer n'i aille.
 Qant il le vit navré, dolens en fu sans faille
 Et dist d'Emenidon por voir sans controvaille
 Qu'il ne set chevalier qui par son cors le vaille.

Ses plaies li estoupe por le sanc qu'il n'en saille,
 D'un bendel li estraint par dedesus l'entraille,
 Puis apela un mire, por tost saner li baille.
 [3.110]Litonas sist armés deseur un cheval noir
 Que li rois Alixandres li dona l'autre soir,
 Gos li rois d'Outremons vit seur le brun soir. [1910]
 Ensemble vinrent joindre, ne lor peüst chaloir,
 Ambedui s'entrefierent par issi grant pooir
 Onques escus ne broigne ne lor pot riens valoir,
 Par mi les cors se font les bruns espiés paroir.
 Gos fu li plus bleciés si s'est laissiés chaoir,
 Si home l'en porterent, de ce firent savoir;
 Et Litonas se pasme, ne se puet astenoir.
 Alixandres l'ot dire si l'est alés veoir;
 Qant il li vit le sanc jusques as piés chaoir,
 Dejuste Emenidon le rueve aler soir; [1920]
 Puis si a dit au mire que tout a son voloir,
 Mais qu'il bien le garrisse, li donra grant avoir.
 Li mires li respont: "Je vos afi por voir
 Q'il porront porter armes tel di com fu ersoir."
 [3.112]Filotes sist armés el cheval espanois,
 Qui fu destre comés et si blans comme nois,
 Et ot en son sa lance un gonfanon turquois;
 Il n'ot en toute l'ost chevalier plus cortois.
 El cuer de la bataille vit un duc et deus rois
 Qui le gregnor damage faisoient des Grigois; [1930]
 Il broche le destrier si vait joster as trois.
 Cil le ferirent bien, mais ne lor vaut un pois,
 Car il ne l'abatissent entresi q'a un mois.
 Les deus en abat mors et le tiers prist manois
 Si le rent Alixandre par les resnes d'orfrois.
 Margos, li compains Gos, sist el cheval norois,
 A la loi de sa terre fu armés comme rois;
 La ou il s'entrencontrent se fierent de manois.
 Margos le feri bas en l'escu vienois,
 Au costé li a joint la hanste de garrois; [1940]
 Et Filotes fiert lui com chevaliers de prois,
 Tout li trenche l'escu et la guige d'orfrois,
 Par mi la destre espaulle li mist le fer grigois,
 Del gonfanon pert outre ne sai deus piés ou trois,
 Tant com hanste li dure l'abat mort el chaumois.
 [3.113]Desor un destrier vair Perdicas sist armés,
 Et vit un duc de Bastre qui de l'ost iert sevrés,
 Le cheval en menoit d'un Grieu qui iert navrés;
 S'or ne le puet rescorre, ja sera forsenés,
 A tant point le cheval, cele part est alés; [1950]
 Li dus le vit venir si li est retornés.

Merveilleus caus se donent es escus painturés,
 Desor les boucles d'or les ont frais et troués;
 Li hauberc sont si fort que nus n'en est faussés,
 Les lances sont brisies et li fer tronçonés.
 N'i a nul qui chaïst, car chascuns est provés,
 De grant chevalerie est chascuns renomés.
 Li dus le sent hardi, fuiant s'en est tornés,
 Por un seul petitet ne li est eschapés.
 Perdicas li escrie: "Vassal, car m'atendés! [1960]
 Molt iert bons li chevas se ainsi m'eschapés."
 Et il broche le sien, s'est après lui alés
 Et vint plus tost a lui c'uns faus ne fust volés;
 De l'espee le fiert qui li pendoit au les,
 Desi qu'en la cervele li est li brans coulés.
 Ne li valut li hiaumes deus deniers moneés,
 Li haubers c'ot vestu est rompus et faussés,
 L'eschine li fendi par entredeus costés.
 As alves de la sele est li brans arestés,
 L'une moitiés du cors est a terre versés, [1970]
 L'autre moitiés chaïa la terre delés.
 Ce diënt cil de Bastre: "Cil Grigois est desvés,
 As diables soit hui li siens cors commandés."
 Il a pris le cheval, arriere est retornés,
 Alixandre le rent par le frain qu'est dorés.
 [3.114]Porrus vait par le champ et sa gent molt enorte,
 La ou voit le besoing si aïde et conforte,
 Sovent crie s'ensegne, que sa gent ne resorte;
 Et voit Salatiël, un fort roi de Marorte,
 Qui tant s'est combatus toute s'espee est torte; [1980]
 Une eschiele des Griens le tenoit en reorte.
 Il broche le destrier, brandist l'espié qu'il porte,
 Vait secorre le roi, qui besoigne en a forte.
 Si bien i fiert chascuns de l'espee qu'il porte
 Que le roi ont rescous et l'autre gent ont morte.
 [3.115]Qant Porrus ot rescous le roi Salatiël,
 Il broche le destrier, tint l'escu en chantel.
 Encontre Licanor, qui seoit sor Morel,
 Sel feri de l'espee dont trenchent li coutel
 Que jambes enversees l'abati du poutrel. [1990]
 De meïsmes la pointe vait ferir Samüel,
 Tout li trenche l'escu qui fu fait a neel,
 De l'auberc desrompi la maille et le clavel,
 Si qu'el ventre li brisent de l'espié li coutel;
 Qant il le trait a soi, s'en chieent li boiel.
 Puis regarde sor destre si vit un jovencel
 Qui fu drus Alixandre adoubés de novel;
 Un sien baron ot mort, ne li fu mie bel.

Il broche le destrier, qui molt le porte isnel,
 Tel caup li a doné de l'espee a neel [2000]
 Que mort l'a abatu sans nisun contrapel.
 Après lui por garder vont poignant cent dansel
 Qui trencent pié ou poing ou espandent cervel;
 Des vavasors de Gresse ont mors a lor revel,
 Tels cinquante en i ot n'i a nul n'ait chastel.
 Porrus jure son dieu qu'on claime Lucabel,
 S'il encontre Alixandre, le viellart, le mesel,
 Ne li vauront ses armes que il porte un chapel,
 Que le chief a tout l'elme ne li mete el putel.
 Ce dient cil de Bastre: "Molt avons bon chadel." [2010]
 [3.116]Licanors saut en piés, comme hom de grant vertu,
 Porrus s'en passa outre qu'il l'avoit abatu.
 Poise li de Morel, qu'il ot ainsi perdu;
 Qant ne se puet vengier, dolens et iriés fu.
 Un duc qui fu de Bastre a devant lui veü,
 Tel caup li a doné du branc d'acier moulu
 Que trestout en travers le trenche par le bu.
 Il saisist le destrier et traist avant l'escu,
 Le mautalent qu'il ot li a molt chier vendu.
 Set chevaliers a mors et un duc retenu, [2020]
 Tant a quis Alixandre que il li a rendu.
 [3.117]Litonas sist armés deseur un cheval noir,
 Un duc ot mort de Bastre, ne li peüst chaloir.
 Dui roi le vont ferir qui ont si grant pooir
 Que tres par mi son cors font lor espiés paroir,
 De canque il l'enpaignent nel pueent pas movoir;
 Se or ne se vengast, jal veïssiés ardoir.
 Le branc qui fu d'acier lor fait si fort paroir
 Qu'ansdeus les chiés des bus fait a terre chaoir.
 Cel caup plut Alixandre si l'est alés veoir; [2030]
 Et qant il vit le sanc dehors le cors plovoir,
 Dejuste Emenidon le ruede aler soir,
 Et puis a dit au mire trestout a son voloir,
 Se il bien les garist, donra lui grant avoir.
 Li mires li respont: "Je vos afi por voir
 Que il seront tout sain tel di com hui au soir."
 [3.118]Es vos Aminadap, qui fu rois d'Alenie.
 Por ce que sa gent iert combatans et hardie
 L'avoit Porrus mandé et semons par banie;
 O soissante mil homes iert venus en s'aïe. [2040]
 Devant tote sa gent requiert chevalerie,
 Et porte en son bras destre une manche s'amie;
 Qant li solaus i fiert, bien luist et reflambie.
 Por sa gent rehaitier a haute vois s'escrie
 S'il encontre Alixandre ne laira ne l'ocie.

Antigonus l'entent si li torne a folie,
 Hurte des esperons le sor de Tabarie,
 Grant caup li va doner en la targe florie;
 Ja soit ce que la lance li soit torte et croissie
 Por qant sel met a terre voiant sa baronie. [2050]
 Du cheval ou il sist a la resne saisie,
 Qui que poist ne qui non, par la presse l'en guie.
 Por chevalier estrange nel perdra hui mais mie.
 Alixandres le voit, ne puet müer n'en rie,
 En son cuer en est liés assés plus que ne die.
 [3.119]Aminadap saut sus au plus tost que il pot,
 Por ce qu'il fu cheüs molt grant vergoigne en ot,
 De son cheval li poise que li Grieus en menot;
 Vit un baron de Gresce qui devant lui passot,
 Tel caup li a doné du branc que il portot [2060]
 Que l'elme li fendi et le cercle trenchot;
 Desi que ens es dens li aciers li coulout,
 Si l'a mort abatu que onques ne dist mot.
 Puis saut sor le destrier que estrier n'i baillot,
 De ce li fu molt bel que Porrus veü l'ot.
 Le caup que il ot fait ainc cil hom ne le sot
 Qui de chevalerie forment nel prist et lot.
 [3.120]Porrus vait par le champ, des Grieus fait grant maçacre,
 De sanc et de cervele est coverte la place.
 Et qant Dans Clins le voit, si broche Boniface, [2070]
 Puis a drecié l'espilé, le fort escu enbrace.
 Porrus le vit venir sel feri d'une mace,
 Que son escu li fent com se il fust de glace
 Et lui et son cheval abat en mi la place.
 Et Dans Clins refiert lui, qui de mort le manace,
 Sel fiert en mi le pis que l'auberc li deslace;
 Enpaint le de vertu, a terre le crabace.
 Li chevaus chiet sor lui ens en une crevace.
 [3.121]Dans Clins sailli en piés, qant a terre se sent;
 Ains que Porrus se liet, par le nasal le prent. [2080]
 Porrus crie s'ensegne por ralièr sa gent,
 Et cil i sont venu plus de mil et set cent.
 Et li home Alixandre ne resont mie lent,
 Chascuns au mieus qu'il puet du retenir content;
 Cil fierent de deus pars mainte communalment.
 Porrus sache l'espee qui au costé li pent
 Si fiert Dant Clin sor l'elme, que trestout le porfent
 Et tout le chapelèr du hauberc li desment;
 Del caup fu estordis, q'a la terre s'estent.
 Ja s'en alast Porrus, qant Tholomés descent, [2090]
 Ne s'en ira hui mais se estor ne li rent.
 O les brans acerins se fierent si forment

Tous les escus detrenchent, qui sont a orpieument.
 Porrus chaïa terre, molt ot grant maltalent.
 [3.122]Porrus sailli en piés, qant il fu abatus.
 Il escrie s'ensaigne por raliier ses drus
 Et il i sont venu o les espiés molus.
 Et li Grieu se raliient, molt est grans lor vertus,
 Reclament Alixandre o les grailles menus;
 Alixandres l'entent, cele part est venus. [2100]
 Lors refu li estors fierement maintenus,
 Quatre cens chevaliers i ont les chiés perdus.
 Desor trestous les autres Alixandre est cremus;
 Il traist la bone espee as bruns coutiaus molus,
 Tranche les las des hiaumes, les testes et les bus.
 Li Grigois i feroient, qui molt sont irascus,
 Et departent la presse as brans qu'il portent nus,
 Quinze dus i ont pris et set rois retenus;
 Aminadap fu pris et li orfrois perdus.
 La bataille aclaroie, car li chans est vaincus, [2110]
 Cil de Bastre s'en fuient vers l'eaue de Calus.
 Porrus est entre Grieus, ou il s'est combatus,
 Assés lor a malmis et elmes et escus,
 O le branc acerin s'est si d'aus deffendus
 Q'il n'i a si hardi del prendre ne soit mus,
 Car ains que il fust pris se fust molt chier vendus.
 La ou vit Alixandre, si s'est a lui rendus;
 Bien le connut as armes ou li ors fu batus
 Et a la grant compaignie dont li chans fu vestus.
 Qant voit par la ventaille les blons cheveus quernus, [2120]
 Dont sot cil l'ot gabé, si s'est aperceüs,
 Qui li dist qu'Alixandres estoit vieus et chenus.
 [3.123]Porrus voit qu'il est pris si l'estuet sousploier,
 Et voit ses homes mors, que n'i a recovrier.
 Qant autre ne puet estre, ne s'en veut esmaier,
 La ou voit Alixandre rent lui son branc d'acier
 Et dist en son langage que il l'avoit molt chier.
 Alixandres l'entent sans autre latimier,
 Car de tous les langages s'estoit fais ensegnier;
 Et qant il tint l'espee, sel prist a manecier [2130]
 Por ce qu'il l'ot tant fait lasser et travellier;
 L'auberc li fait fors traire et l'elme deslacier.
 Porrus vit Alixandre armé sor son destrier,
 Envers lui s'umelie se li prent a proier
 Que il nel face ocirre ne son cors laidengier,
 Car sol de bele garde en puet avoir d'or mier
 Plus que ne porteroient quatre mile soumier;
 Prist le par l'estriviere, le pié li vaut baisier.
 Pitié ot Alixandres sel fist sus redrecier,

Rent lui toute sa terre et commande a baillier, [2140]
 Ses prisons li amaine ses a fait deslier.
 Et qant Porrus le vit, prist s'en a merveillier
 Et dist que il nen iert nus hom fieus de mollier
 Qui osast un tel don faire ne commencier.
 Alixandres li rueve conduit aparellier,
 Es desers veut entrer, car molt les veut cerchier,
 Car veoir veut les bonnes, se il n'a encombrier,
 Que Artus avoit fait en Oriant fichier.
 [3.124]Qant Porrus fu rendus, Gos et Magos s'en vont.
 Ne fu si crüel gent puis que Dieus fist le mont, [2150]
 Ja n'avront bien ne joie le jor que mal ne font,
 Manacent Alixandre que dolent le feront.
 Li maines rois l'ot dire, a poi de duel ne font.
 Il les sieut tost après, et dist ja ne garront,
 Tout droit as mons de Tus, dont li val sont parfont
 Et li tertre sont droit envers le ciel a mont.
 La les a bien enclos por le mal que il font,
 Tant que Antecris viegne que ja mais n'en istront.
 [3.125]Gos et Magos s'en vont, perdu ont de lor gent.
 Dis mil en furent mort et navré quatre cent, [2160]
 Porter les font en biere, molt s'en vont laidement,
 Manacent Alixandre qu'il le feront dolent,
 Fil a putain le claiment, né par enchantement.
 Li maines rois l'ot dire si s'en ire forment;
 Il en jure ses dieus et canq'a lui apent
 Que de ça la montaingne les ardra s'il les prent.
 Il les enchaue tost et molt isnelement.
 [3.126]Tout droit as mons de Tus s'en fuit Gos et Magos
 Et li rois Alixandres s'est mis en lor esclos.
 Ains qu'il fuissent as mons, s'est a aus si apos [2170]
 Que plus de trente mile en a que pris que mors;
 Li autre passent outre, eschapé sont as nos.
 De l'ire q'ot li rois enfremist toute l'os,
 Et fait de la montaigne si bien cerchier les cros
 Qu'il n'en i remest nus qui tant i soit repos.
 [3.127]Li pui de Tus sont haut envers le ciel tout droit.
 N'i a de tous passages ne mais c'un seul destroit,
 Par iluec s'en passe outre la gent qui Dieu ne croit.
 Molt en poise Alixandre qant eschaper les voit,
 Vit la terre parfonde et le pertuis estroit. [2180]
 Ja se meist après, qant Tholomés disoit
 Que se il passoit outre grant folie feroit,
 Desvoiabletés est, ja n'en retourneroit;
 Plus les destraindroit il et mieus se vengeroit
 S'a chaus et a ciment les pertuis estopoit,
 Que ja mais n'en istroient tresque la fins seroit.

[3.128]Arestés s'est li rois et fait le ciment faire.
De chaus et de mortier ains ne fu veüs maire,
Ja n'iert mis en cel lieu que la jointure i paire,
Il l'ont fait itant fort que nus nel puet deffaire; [2190]
A clorre le pertuis ne demorerent gaire.
Lendemain par matin en Ynde s'en repaire;
Porrus li vait encontre qui son cuer li esclaire,
Tous les tresors qu'il a li fait mostrer et traire.
[3.129]"Sire, ce dist Porrus, primes te veul semondre
Que voies mes tresors, dont je ne sai le nombre,
Que mi ancissor firent desous terre repondre.
Tant en done a tes homes que nus ne puisse grondre,
Si facent vaissiaus d'or, bellons come concombre,
Ou il se puissent bien rere, baignier et tondre. [2200]
Tant en pren a ton oés que nus nel puist apondre,
Et por bien afiner le fai quatre fois fondre.
Le don que tu m'as fait ne porroit nus espondre,
De ta volenté faire nule riens ne m'enconbre,
Mieus aim je ton servise que par grant cholor ombre."
[3.130]Alixandres respont com hom de grant pooir:
"Laisse ester tes tresors, ne t'en quier nul movoir,
Car jou ne tuit mi home n'avons cure d'avoir;
Ja n'en prendrai denree ne rien n'en quier avoir.
Ses que dist Salemons el livre de savoir? [2210]
Bons rois adrece terre si la fait bien seoir,
Li avers la destruit et fait gaste manoir.
Qui rien ne veut doner quels homes cuide avoir?
Cil ou il mieus se fie le met en nonchaloir.
Se je t'ai rien doné, or le me fai paroir,
Condui moi es desers, se riens m'i pués valoir;
A chascun fai porter tant de son estovoir
Que ja nul de mes homes n'estuece remanoir."
"Sire, ce dist Porrus, ce t'afi je por voir:
Mieus te veul obeïr et faire ton voloir [2220]
Que a mes malvais dieus, qui m'ont laissié chaoir."
[3.131]"Sire, ce dist Porrus, en ce oi grant damage:
Qant Dayres fu ocis sor Gangis el rivage,
Assés me fu mandé par briés et par message
Q'ainsi te demenoit fors avarisse et rage.
Onques si nobles hom n'issi de ton lignage;
Se seüsse si bien ta vie et ton corage,
Ja de toute ma guerre ne fust percie targe,
En pais sans contredit t'alasse faire homage.
Tu vas querant proëce, segnorie et barnage; [2230]
Qui la te contendra molt fera grant folage,
Nel puet garir chastiaus ne fors cités marage
Que tu nel sieues tant que tu li fais damage.

Ce que tu as conquis par force et par barnage
 Dones tu volentiers, n'en fais nului salvage;
 Humilités te vaint et fait rendre ton gage.
 Onques si larges hom ne fu de nul parage,
 Plus as tu hui doné et moi et mon lignage
 Que ne se raembroit l'amiraus de Cartage."
 [3.132]"Porrus, fait Alixandres, assés t'a on conté [2240]
 Que combatant m'aloie tous jors par averté.
 Avers hom ne puet mie conquerre autrui regné,
 Ains pert molt de sa terre, q'ainsi veulent li dé.
 Ses com m'aiment mi home par ma grant largeté?
 De ma volenté faire se sont tous jors pené,
 Et jou ai a chascun itant du mien doné
 Que mieus vaudroient estre trestuit ars et venté
 Que riens eüssent fait contre ma volenté.
 Tant m'aiment en lor cuers et si sont aduré
 Que mieus vauroit avoir chascuns le chief caupé [2250]
 Que vers mon enemy eüst le dos torné.
 Qant il sont devant moi sor lor chevaus monté,
 Canque je voi as ieus tout m'est abandoné.
 Par lor grant vasselage ai je pris tel fierté
 Que se tuit cil du mont estoient assamblé
 Ne me tauroient il ne chastel ne cité."
 [3.133]"Porrus, fait Alixandres, savoir dois et enquerre
 En quel sens rois avers destruit et confont terre.
 Dehors l'ardent et ro bent tuit cil qui li font guerre,
 Et taille ciaux dedens, acuse et fait enquerre. [2260]
 Povres est et chaitis qui entor lui reperre,
 Car son avoir li taut et en prison l'enserre;
 S'il li crie merci, il n'i puet riens conquerre.
 Qant il puet eschaper, si pleure et son duel merre,
 Ses enfans a son col s'en fuit et vait pain querre."
 [3.134]"Porrus, fait Alixandres, n'est mie devinaille:
 Rois avers crient tous jors que ses avois li faille;
 Qanque il puet trover tout met en repostaille.
 Puis que il l'a repost et mis sous la moraille,
 Ja puis n'en donra tant que un seul denier vaille. [2270]
 De ses homes confondre croit bien sa cuivertaille,
 A tout le plus felon sa terre acense et baille,
 Et cil li amenuise et confont et travaille
 Et mengüe la gent desi q'en la coraille;
 S'il emprunte et acroit, ja n'en saudra maaille.
 Les uns semont de droit et as autres fait taille;
 Qant il n'i puet plus prendre, si en porte la paille;
 La povre gent s'en fuit et la terre anoaille.
 Qant li sires l'ot dire, sel tient a controvaille;
 Por ce que il ne l'aiment, fait semblant ne li chaille, [2280]

Des que li sers n'i pert vaillant un oef de quaille.
 Puis devient il si fel quelque part que il aille
 Q'il n'encontre provoire ne moine qu'il n'assaille."
 [3.135]"Porrus, ce sachent bien li bas hom et li haut
 Q'avers hom est plus seus que hermites en gaut;
 Tresqu'il n'a bien ses homes, tost est venus au saut,
 N'a voisin en sa terre ne li toille et retaut.
 Puis qu'il le tient a honte, ses avoires que li vaut?
 Avers hom veut tous jors que on paine et travaut
 Et face son servise et riens du sien ne baut; [2290]
 Cil ou il plus se fie au grant besoing li faut.
 Puis qu'il n'a preu en lui, quel part qu'il veut si aut,
 Et s'il pert riens du sien, dehais ait qui en chaut,
 Car molt sont fol li home qui d'avoir se font baut;
 Mains hom en est getés en compiang por le chaut."
 [3.136]"Porrus, dist Alixandres, mon conduit m'aparelle,
 Entrer veul es desers ou a tante merveille.
 Puis revenras en Ynde, ou tu feïs la treille,
 Et tes dieus qui musissent forbis et aparelle.
 Je conquerrai Egipte jusq'a la mer vermelle [2300]
 Et prendrai Babilone se ma gens le conseille,
 Car avoir veul la tor qui vers le ciel torelle
 S'ocirrai le serpent q'on dist qui tous jors veille."
 [3.137]"Sire, ce dist Porrus, je fais aparellier
 Les bestes toutes vives que menrons por mengier.
 Et l'autre garison porteront li somier;
 Ja n'i avra en l'ost sergant ne chevalier,
 Lecheor ne putain, garçon ne escuier,
 S'il se veut es desers rere ou tondre ou baignier,
 Que vaissel de fin or n'i puisse aparellier; [2310]
 Ne ja por la cholor ne li estuet laissier
 Ventouser ne se face ou de vaine saignier.
 Et toutes les herberges fais si aparellier
 Nis la coute de paille n'iert a dire au couchier."
 "Porre, dist Alixandres, molt te doi avoir chier,
 Qant par ton bel servise me veus eslosengier."
 [3.138]Or se sont cil de Bastre semons et bani tuit
 Qu'il soient es desers tresq'a mardi a nuit
 Et portent vin et eaue, sel, ferine et pain cuit,
 Pois, feves et lentilles, poivre, commin et fruit [2320]
 Et soient de faucilles et d'autre chose estruit;
 Menront l'ost Alixandre et Porron quil conduit.
 Porrus jure le ciel, l'eaue et le vent qui bruit
 Que cil qui remanront seront ars et destruit;
 Ja ne porront garir ne par jor ne par nuit.
 [3.139]Or est li os meüs a joie et a baudour;
 Cil de Bastre les guient par issi grant amor

Cil qui vaut eaue froide si l'ot por la cholor.
 Ne fuissent li serpent, dont il ont grant paor,
 Ja nus d'aus en sa terre ne fust a tel honor. [2330]
 Porrus sert Alixandre, que il tient a segnor;
 Il ne trueve es desers herbe de bone odor
 Q'il ne face cuellir et aporter la flor,
 Le tref le roi en jonchent q'en sente la flairor;
 Les maus pas lor eschieve qu'il n'i aient dolor.
 D'un home des desers font lor adreceor,
 Si q'as bonnes Artu vinrent au sesme jor.
 [3.140]Qant li rois vit les bonnes, molt fu joians et liés,
 Deus ymages d'or vit, dont molt s'est merveilleés.
 "Sire, ce dist Porrus, de ça vous hebregiés,[2340]
 Ne passés ces ymages, car ce seroit pechiés;
 Onc Artus ne Libers n'orent avant lor piés,
 Desvoiabetés est, tost serés foliés.
 La mer qui terre clot a les mons si perciés
 Et l'ardor du soleil a si les crués sechiés
 Assés i a teus lieux ou molt tost charriés.
 Les la rive de l'eaue est si parfons li biés
 Entresque en abisme tost seriés noiés
 Et du peril de l'eaue se vos eschapiés
 Et si q'a ferme terre la outre venissiés, [2350]
 Li perieus est si grans ja n'en revenriés;
 On ne set qu'il i a, tost seriés mengiés."
 [3.141]"Qant Artus et Libers vinrent en Orient
 Et orent tant alé qu'il ne porent avant,
 Deus ymages d'or firent qui furent de lor grant.
 En tel lieu les poserent que bien sont aparant
 Et que mais a tos jors i fuissent demorant;
 Ainc outre les ymages nen ot home vivant.
 Rois, fai lor sacrefise qu'il n'aient maltalant,
 Que tuit s'en aillent sain li petit et li grant, [2360]
 Si com firent cil dui qui ierent dieu poissant."
 Qant Alixandres l'ot, si respont en riant:
 "La gent de ceste terre sont fol et mescreant,
 Qui croient ces ymages et les vont aourant,
 Qui n'oient ne ne voient ne d'aler n'ont talent.
 Qui les geteroit ore ens en un fu ardant,
 Il n'ont tant de vertu ja mais en ississent.
 Le matin irai outre trestous vos eus voiant."
 [3.142]La nuit jurent iluec tant qu'il fu ajorné,
 Grans piece fu de jor ains qu'il aient trossé. [2370]
 Puis sont venu a l'eaue, dont parfont sont li gué;
 Tant i ont cloies faites, ros et raime geté
 Q'a merveilleuse paine sont outre trespasé;
 Par devant les ymages sont el mollain entré.

Qant Alixandres vit ses gens a seürté,
 De la joie qu'il ot a Porron apelé,
 Et Porrus vint a lui s'amena Tholomé.
 Sor la senestre espaulle li a son bras geté,
 Puis li dist en riant: "Car nos fuissiens disné!
 Devant nos gardons bien, car derrier sont li dé, [2380]
 Ne se fierent gaires en lor grant deïté
 Qant por un seul mal pas furent espoënté,
 Qu'il ne passerent outre, ains s'en sont retorné;
 Nous n'avons cel roncín qui n'i ait traversé."
 [3.143]Tholomé s'ait avant por le maingier haster;
 Qant fu aparelliés, si fait l'eaue doner
 Et sont par toute l'ost tuit assis au disner.
 Qant il furent assis, si les estut lever,
 C'onques de garison ne lor i lut gouster,
 Car cil les escrierent ques devoient garder [2390]
 Q'il voient les mervelles des desers assembler,
 Et dient Alixandre; "Fai ta gent tost armer!
 Tant veons d'olifans nus hom nes puet esmer,
 Ja serons malbailli s'il nos pueent trover."
 Cil qui primes les vit le vait au roi conter.
 Li rois cline vers terre si commence a penser,
 Et qant il se redrece, si fait sa gent armer.
 Alixandres commande ses chevaliers monter
 Et ciaux qui sont a pié les herberges garder,
 Et fist par toute l'ost ses buisines soner, [2400]
 As chevaus por henir fait les yeves mostrer
 Et les truies fait prendre et batre por crier,
 Les homes por noisier fait durement hüer,
 Tant que les olifans fait en fuies torner.
 Qant il voit qu'il s'eslongent et s'esforcent d'aler,
 Ses rieve as chevaliers o les lances bouter;
 Lors veüssiés les bestes deus et deus crevanter,
 Nuef cens et vint et set en ont fait enverser.
 Les dens en a fait traire et tous les os oster;
 Mieus valut li yvoires que il en fist porter [2410]
 Que qanque Sersés pot d'or et d'argent trousser.
 [3.144]"Sire, ce dist Porrus, ceste terre est molt fiere,
 Molt est deshabitee, ne sai avant que quiere.
 Se nos passons encore une autretel riviere,
 Noiens seroit ja mais du retourner arriere.
 Tant com vostre compaignie est si saine et entiere,
 Ains que vostre maisnie perdés en la fouchiere,
 Si nous en retornons toute nostre chariere.
 La palus est si mole et desous si pleniere
 Qui en istroit plain pié de la voie corsiere [2420]
 Ne seroit mais veüs en nisune maniere."

"Porrus, dit Alixandres, jel fais par ta proiere."
 [3.145] Iluec se hebregerent dejoste le marois,
 Un poi de fosse firent devant aus por deffois.
 La nuit se reposerent, l'endemain furent frois,
 Arriere s'en retornent cil d'Ynde et li Grigois;
 Tres devant les ymages s'est arestés li rois.
 Por ce q'a cel jor fu la kalende du mois,
 Porrus et Alixandres sacrefient manois,
 Et ot al sacrefice vaches soissante et trois. [2430]
 Les laus du sacrefice chanterent en yndoïs,
 Qui ierent revestu, doi chapelain cortois.
 [3.146] Qant ont de la kalende celebree la feste,
 La devise du mois lor anonça li prestre.
 Puis s'en tornent ariere devers Ynde a senestre,
 Li conduis les en guie une voie champestre.
 Une seche palu troverent a main destre,
 Par lieus estoit si mole q'erbe n'i pooit nestre.
 De diverse maniere lor sailli une beste;
 Le poil ot gros et dur et poignant com areste, [2440]
 Ne crient fer ne acier, tant est de fiere geste.
 Qant cil de l'ost la hüent, de maltalent s'areste,
 Au retor qu'ele fist lor a fait tel moleste
 Trente et set chevaliers lor ocist et tempeste.
 Li Grieu corent entor tuit a vive poëste,
 A maus et a cugnies li peçoient la teste.
 [3.147] Qant il furent tuit outre, soirs et bas vespres fu.
 La nuit se hebregerent dejoste le palu;
 Li solaus fu couchiés quant li tref sont tendu,
 Auques seürement se sont la nuit geü. [2450]
 A l'aube aparissant, ains que fuissent meü,
 Liotifal lor sont dedevant l'ost venu,
 Ja mais autretel home n'ierent, je cuit, veü.
 Douze piés ont de haut, grant sont et parcreü,
 Ja n'avront fil de drap affublé ne vestu,
 Quelque tans que il face, tous jors vont ainsi nu
 Et sont par tout le cors comme bestes pelu.
 Bien sont un mois sous eaue, ja ne seront veü;
 Tant com il i conversent, vivent de poisson cru.
 Qant revienent sor terre, si resont d'el peü, [2460]
 Car il vivent d'encens et de bon balsamu.
 Cil legier bacheler por traire i sont couru.
 Qant virent les saietes, fuïson et perdu;
 Molt en poise Alixandre quant il ne sont seü,
 Mieus en amast il quatre qui fuissent retenu
 Que cent somiers chargiés d'or et d'argent molu,
 Car plus prenent poissons, qant il sont esmeü,
 Q'oïseleor ne font menus oisiaus a glu;

Et fust par tout le mont a merveille tenu
 Comment il porent estre ne pris ne retenu. [2470]
 [3.148]Ce fu après esté, si comme yvers entra,
 Que li rois Alixandres icele gent trouva,
 Et fu a un matin si comme il ajorna;
 Li jors fu biaux et clers et li solaus leva,
 De l'ardor du soleil toute l'ost eschaufa.
 Et qant vint après tierce, li jors se heriça
 Et devint si ennubles que tous li airs torbla,
 Molt par fist grant froidure, assés plut et nega;
 Et qant vint au midi, li solaus esclaira.
 Qant li rois sot d'antone et du tans qui changa, [2480]
 Lors fait soner ses grailles et par l'ost commanda
 Ses tentes a cuellir, lors monte si s'en va;
 Puis a monté un tertre et un val avala.
 La pree fu molt gente et l'erbe verdoia,
 Onques hom en nul tans plus bele n'esgarda.
 La montaigne fu haute et li val reonda,
 Devant ne truevent voie, car un point n'en i a;
 Onques n'i ot si sage, quant il se regarda,
 Qui peüst pas savoir par ou il i entra.
 A exploit chevauchierent, ainc nus d'aus n'aresta, [2490]
 Toute jor vont entor, onques l'os ne fina
 Dusq'a eure de none, que li solaus torna;
 Lors revoient lor trace ensi com l'os ala.
 Alixandres meïsmes forment se mervella,
 Qui tant a hui alé et noient exploita,
 De maltalent s'encline et du cuer souspira;
 Son pavellon fait tendre et l'os se hebrega.
 Cliçon et Tholomé et Caulon apela,
 Li uns d'aus conte a l'autre la merveille qu'il a.
 [3.149]"Segnor, dist Alixandres, mal nos est avenu, [2500]
 Par le mien ensient tuit somes confondu.
 Veés ici nos traces que nos avons tenu,
 Ainsi comme l'os a trestout cest plain seü;
 Des l'eure que nos fumes en cest val descendu
 N'avons nos exploitié la monte d'un festu.
 Ci n'a mestier proëce ne lance ne escu,
 En tout le mont nen a si bon destrier crenu
 Qui peüst plus aler d'un ronci recreü.
 Les montaignes sont hautes et li pui sont aigu
 Et la terre si basse que tuit somes perdu. [2510]
 Par le mien ensient, si com je l'ai veü,
 N'en istroit uns oisiaus, tant volast de vertu;
 Perdu avons l'entree par ou somes venu.
 Li dieu nos veulent mal, tuit somes deceü,
 De ci n'istront ja mais ne joene ne chanu."

Lors ont par toute l'ost un si grant duel meü
 C'onques de nule gent mais ausi grans ne fu,
 Qu'il en sont a la terre tel set mile cheü
 Qui rompent lor cheveus et ce qu'il ont vestu;
 Maint bon peliçon gris ot ilueques fendu [2520]
 Et maint bliäut de soie deschiré et rompu.
 [3.150]Segnor, la veïssiés grant duel et grant iror,
 Ainc le soir n'i mengierent li grant ne li menor;
 La nuit jurent el val tant qu'il virent le jor.
 A Alixandre vinrent li prince et li contor
 Et demandent conseil que devenront li lor.
 Il lor a respondu belement par amor
 Et dist comme bons rois: "Or entendés, segnor!
 Je chercherai le val bonement sans freor
 Savoir se troveroie ne voie ne destor [2530]
 Par ou nous ississiens de cest val tenebror."
 Il monte en Bucifal, son destrier coreor,
 Onques en nule terre nen ot cheval mellor.
 Qant li rois fu assis es arçons pains a flor,
 Des esperons le broche et cil vait par vigor.
 Tant a cerchié le val Alixandres entour
 Que il trueve une pierre du tans ancienor
 Ou il avoit escrit grant duel et grant tristor;
 Les letres sont el mabre qui content la dolor,
 Ja nes verra cil hom qui n'ait de mort paor. [2540]
 [3.151]Qant li rois vit les letres, n'i ot ne gieu ne ris.
 Ce conte l'escriture qui est el marbre bis
 Que se tuit cil du mont s'estoient el val mis,
 Por trestout l'or du siecle n'en istroit uns seus vis
 Se uns hom de son gré n'i remaint a tous dis.
 Qant li rois entent ce, si enbroncha son vis,
 De maltalent et d'ire est sor le marbre assis.
 Lors plora Alixandres por duel de ses amis,
 Griés est de Babilone, dont li mur ne sont pris;
 Damedieu reclama, qui maint en paradis, [2550]
 Qu'il le giet du torment ou il ert entrepris.
 "Haï! rois Alixandres, com par estes conquis!
 Ici morrons de fain, n'en estordra uns vis."
 [3.152]Dolens fu Alixandres de ce qu'il ot trouvé,
 De maltalent s'acline, du cuer a souspiré.
 Devers destre partie a son chief retorné,
 A une part du marbre a li rois regardé.
 Ce conte l'escriture du tans d'antiquité
 Que se tuit cil du mont ierent el val entré,
 Des le premerain home que Dieus ot figuré, [2560]
 N'en istroient il mais en trestout lor aé,
 Se uns seus n'i remaint bonement de son gré;

Et se uns i remaint, li autre erent sauvé
 Et par un tout seul home seront tuit delivré.
 Qant li rois l'entendi, n'i a plus demoré,
 Il monte en Bucifal par son estrier doré,
 Deci q'a l'ost de Gresse n'i a estal doné.
 Si home li demandent ou il a tant esté;
 Encontre lui alerent Dans Clins et Tholomé,
 Emenidus, Filotes, Caulus et Aristé, [2570]
 Et demandent noveles comment il a erré.
 Et li rois lor a dit toute la verité,
 Ainsi comme les letres li avoient mostré.
 [3.153]Alixandres lor conte la persecucion,
 Si com il a cerchié le val tout environ:
 "N'i a voie ne fraite par ou nos en isson,
 Si com dient les letres que trovai el perron
 Qui ains furent escrites q'en mer eüst poisson.
 Ja mais n'istrans du val par nul entencion,
 Ains i serons tous jors, se n'i remaint uns hom, [2580]
 Et par un tout seul home avrons tuit garison.
 Maus est se par un home perissent tant baron."
 Lors veïssiés en l'ost si grant estrivoison,
 Ainsi comme chascuns se deffent par tençon,
 Et dist ne remanra ja seus en tel prison
 Dont il ne puisse avoir a nul jor raençon.
 "Segnor, dist Alixandres, entendés ma raison:
 Or vos en alés tuit par tel devison
 Que ja de moi n'avrés ne blasme ne tençon,
 Et jou remanrai ci tous seus sans compaignon. [2590]
 Vos avés mis vos cors por le mien a bandon;
 Se ne vos en puis faire plus riche guerredon,
 Mieus est que seus i muire que nos tuit i moron;
 Ne vos veul engin faire ne mal ne traïson."
 Li douze per s'escrïent et dis mil a un ton:
 "Sire, se tu nos faus, chaitif, que devenrom?
 Rois, maine ent ta maisnie, autrui i laisserom;
 Se n'iert vostre proëce, ja jor ne vivriom."
 Alixandres s'encline et baisse le menton,
 Puis a juré son chief et mist sa main en son [2600]
 Que ja n'i remanra nus autres se il non.
 Lors pleure Tholomé et fent son siglaton
 Et tel quatorze mil s'en pasment el sablon
 N'i a nul ne desrompe son hermin peliçon.
 [3.154]Emenidus voit l'ire et le grant destorbier
 Qui lor estoit venus, ne s'en sorent gaitier.
 Dolens en fu li ber, n'i ot que corrocier,
 De lermes li convint le visage mollier,
 En plourant vint au roi sel prent a araisnier.

[3.155]"Gentieus sire, fait il, qui tant m'eüstes chier, [2610]

Sor toutes riens avés amé bon chevalier,

Ne onques a nul jor ne convint a proier

Un povre home le riche por envers vos aidier,

Car a chascun donastes ce dont il ot mestier.

Que nos porfiteroit sans vous a repairier,

Qant tuit ne vaudriom la monte d'un denier?

Se vous ci remanés, je l'os bien afichier,

Trestuit somes perdu, n'i a nul recovrier.

Mais tant sai vostre cuer et orguellous et fier

Nus hom ne vos feroit vos dis desotroier." [2620]

"Gentieus rois, fait li dus, ne puet nus trestorner

Que a lor jor ne muirent et viel et bachelier;

C'est dolors des auqans qui peüst amender,

Et de vous la plus grant que on sache conter;

Mais certes de trois choses vos pöés bien vanter:

C'onques plus hardis hom ne pot armes porter

Ne si larges de cuer ne cortois por doner,

Ne segnor de tel foi ne poroit nus trover.

Li hardemens parut a Tyr desor la mer,

Qant du berfroï salistes el mur sor le piler, [2630]

Que nus hom terriens fors vos n'osast penser,

Et as bestes de l'eaue ou vausistes entrer,

Qant por vos gens aidier vos corustes armer;

Por qant je ne vi onques home haubregié noër.

Si avés plus doné que on n'osast rover,

Les grans tresors que firent autre roi amasser

Et terres et honors et tout sans demander.

La vostre bone foi ne se pot pas celer,

Qant l'ardure vos fist cele bouche crever

Et Zephirus vos vint le hiaume presenter; [2640]

De l'eaue qu'ot trovee si n'en vaut point goster,

Ains la vos presenta et si fist molt que ber;

Por qant s'iert il seürs du bien guerredoner,

Onques hom ne vos vit de guerredon fausser;

Sire, vos l'esgardastes, n'en vausistes goster,

Voiant aus l'espandistes por aus mieus atremper

Et que chascuns pensast o vous de l'endurer.

Ci volés seus remaindre por ces autres sauver,

Molt sera grant merveille sel poons esgarder;

Ou seus i veul remaindre ou o vos demorer, [2650]

Car bien doivent ensamble si bon ami finer."

"Amis, ce dist li rois, d'el vos convient penser.

Ainc ne m'oïstes mot de la bouche soner,

Fust a gas, fust a certes, nel feïsse averer;

De cestui, se Dieu plaist, ne me verrés fausser.

Por Dieu, de ceste gent vous veul merci criër;

Vous savés bien qu'entr'aus sont envïeus li per,
 Et puis que il n'avront ques soloie garder,
 Ses verrés par envie tencier et ramprosner;
 Se por vos ne remaint, que tuit doivent douter, [2660]
 Je ne cuit ques veés quatre jors sans meller.
 Por Dieu, desq'en lor terres les en faciés mener,
 Ja mais ne vos cuit riens proier ne commander."
 Lors ot li dus tel duel ne pot sor piés ester,
 Li cuers li esvani si le convint pasmer,
 Et tels quatorze mil n'en sai un seul nomer
 Ensamble povre et riche prirent a dolouser
 Et lor gentil segnor tant fort a regreter.
 "Ahi! gent desconfite, quel part porrons aler?"
 Segnor, molt ot grant duel quant vint au dessevrer, [2670]
 Molt pleurent et regretent le roi li douze per.
 "Ahi! gent desconfite, quel part porrons torner,
 Qant hui perdrons celui qui nos devoit guïer?
 Ahi! vaus perilleus, tant faites a blasmer,
 Qui nos taus hui le roi qui se faisoit douter
 Et soloit les honors tenir et conquerer
 Et nos soloit a tous l'or et l'argent doner,
 Les destriers arrabis, les pailles d'outremer.
 Onques plus hardis rois ne pot lance porter,
 Tout le mont avant lui soloit faire trambler." [2680]
 Tuit li criënt ensamble li baron et li per:
 "Sire, que ferons nous, et ou porrons aler?
 Qui nous porra ja mais de cest duel conforter?"
 "Segnor, dist Alixandres, car me laissiés ester;
 Pis me fait la dolor que je vos voi mener
 Que la mort que j'atent, dont ne puis eschaper.
 A cel Dieu que j'aor vos puisse commander,
 Que il vos doinst honor et bon segnor trover
 Et bonement tenir et terre conquerer."
 A cest mot sont pasmé trestuit li douze per. [2690]
 Qant li rois vit içou, si commence a plourer,
 Si grant duel a el cuer ne puet a aus parler.
 A une part du val s'en est alés ester
 Et commence sa gent forment a regreter,
 Prent sa manche de paile por son vis esconser,
 Car ne pooit ses homes veoir ne esgarder.
 Tel duel mainent li Grieu, qant il durent monter,
 Que li vaus perilleus commença a trambler.
 Par mi une montaigne commencent a errer,
 Tuit furent hors du val qant il dut avesprer. [2700]
 En une longe plaine les un regort de mer,
 Les un bras d'eaue douce qu'il virent bel et cler
 Tendent lor pavellons trestuit por osteler,

Mais onques nule joie n'i varent demener.
 [3.156]Qant li rois fu remés et li os s'en repaire,
 Maintenant après ce, que il ne tarda gaire,
 Si commence a touner et foudroie et esclaire,
 Li mons prist a crauller, li vaus desous a braire,
 Et gete une puor dont li rois sent la flaire.
 A ciaux qui s'en tornerent n'avint il nul contraire [2710]
 Fors de lor bon segnor qui remest a mal traire;
 Por celui font tel duel ja mais ne sera maire,
 Cel jor i ot rompu mainte pelice vaire.
 Desus un mabre bis, dont estoit plaine l'aire,
 Sist li rois qui tous dis fu de biens essamplaire.
 La paor quil destraint li change le viaire,
 Car qui de mort se crient bien est drois qu'il i paire,
 Tous en est enpalis, car il ne set que faire.
 [3.157]Qant li rois vit la terre en plusors lieux ardoir,
 Les montaignes crauller et les roches movoir, [2720]
 Et sovent esclistrer et les pierres chaoir,
 Se li rois ot paour ne fait a mentevoir.
 Ses compaignons regrete par merveilleus savoir,
 Emenidon sor tous, en cui ot son espoir.
 "Ha! gentieus chevaliers, de nobile pooir,
 Sages, preus et cortois, humeles et dous por voir,
 Car onques a nul jor ne me poi percevoir
 Que orgeus vos creüst por richece d'avoir
 Ne soufrait meüst vostre oevre en nonchaloir.
 Je ne poi par mon cors plus d'un home valoir, [2730]
 Mais vestres grans barnages se fist tous jors paroir
 Et moi segnor de terre et largement tenoir,
 Et je refis molt bien tout a vostre voloir.
 Ce que je part de vos me fait le cuer doloir.
 Ahi! franc compaignon, dolent par estovoir,
 Com vos est grans dolors venue des hersoir.
 Hier fustes vos en joie, hui est de blanc en noir.
 Sans segnor repariés, ci m'estuet remanoir
 Dolans et esgarés, pres de mort recevoir."
 [3.158]Qant li rois fu remés, tous seürs de morir, [2740]
 Maintenant commença li jors a obscurcir,
 Li solaus a changier et li tans a noircir,
 Forment a esclistrer et li cieus a partir.
 Li mons prist a crauller et li vaus a fremir,
 Et gete unes teniebres o flairor de püir.
 Bucifal ne se pot en estant soustenir,
 Ne li rois en estant, ains le convint gesir.
 Ainc Dieus ne fist merveille dont li puist sovenir,
 Fiere, laide et hideuse, que on doie cremir,
 Dont ne voie entor soi grans batailles tenir: [2750]

Les dragons fu getans qui font l'erbe bruïr
 Et grans serpens volans qui font l'air escroissir
 Et maufés rechingnans quil veulent assaillir
 Et font as cros de fer samblant de lui saisir.
 Lors n'ose Bucifal ne grater ne henir,
 Sous le mantel le roi met son chief por covrir,
 Q'il nes ose veoir ne ne queroit sentir,
 Et ne por qant li rois s'apense du ferir.
 Onques de cel deduit ne li vaurent faillir
 Entresque au matin que il vit esclarcir. [2760]
 En tant d'eure c'on puet un oel clorre et ovrir
 Ne sot il que devinrent ne n'en pot un choisir;
 Ne por qant molt fu liés qant le vaurent gerpir,
 Car de lor compaignie ne pooit il joïr.
 Molt par sera grans joie s'encor en puet partir,
 Encor feroit li rois barnage resbaudir.
 [3.159]Ses gentieus compaignons Alixandres recoie
 Et dist que de bien faire les avoit mis en voie.
 "Se fortune ne fust qui les choses desvoie,
 La terre, icel petit que Dieus en fist, fust moie, [2770]
 Car puis q'Emenidon a mon costé avoie
 Ou devant ou derrier pres de moi le savoie,
 Force de nule gent el siecle ne cremoie;
 Se ici ou aillors de lui parler ooie,
 Bien sai que grant dolor ne mal ne sentiroie;
 S'il el bien se maintient que veoir i soloie,
 Tous iert sires du mont et mes cuers li otroie.
 Las! ne l'en puis aidier, car cis vaus me guerroie
 Et li dieu qui m'ont pris, dont je ne me gardoie.
 Se g'iere en ingal cort et mes armes avoie, [2780]
 De laide traïson trestous les proveroie,
 De l'ire que j'en ai sor aus me vengeroie."
 [3.160]Alixandre est el val, ne se set conseillier,
 Il ot la terre bruire, si craullent li rochier;
 Bien set de l'eschaper ne li est pas legier,
 Ses gentieus compaignons prist molt a recoier.
 Li Grieu, qui sor la mer s'estoient fait logier,
 Onques la nuit ne vaurent ne boire ne mangier,
 Ains regretent et pleurent lor segnor droiturier,
 Le bon roi Alixandre, qui tant fist a proisier, [2790]
 Et depriënt les dieus et vont sacrefier
 Q'Alixandre garissent de mort et d'encombrier.
 Et li rois fu el val, n'i ot que corecier,
 Il ne set en quel guise se doive conseillier,
 Comment de la prison se puisse deslier.
 Il regarda a mont si vit l'air espessier
 Et les nues torbler et le tans a changier,

Ne fu mie a seür qant il vit tel tempier.
 S'il ot peor ne doute, ne fait a merveille,
 Bonement commença les dieus a deproier [2800]
 Qu'il li soient garant, car il en a mestier.
 Du pan de son hermine covert d'un paile chier
 Envolepe sa teste et tint son branc d'acier
 Et tint bien par la resne Bucifal son destrier.
 Au matin commença li solaus a raier;
 Lors saut en Bucifal Alixandres d'Alie
 Et commença li rois tout le val a cerchier.
 Joste une grant montaigne commence a chevauchier
 Et vit une cisterne qui resamble celier.
 El n'estoit mie ouvree de chaus ne de mortier, [2810]
 Mais li dieu l'orent faite en la roche entaillier.
 En mi ot un perron qui plus iert durs d'acier,
 Lai ens sous cele pierre avoit un aversier
 Felon, qui cuidoit faire tout le mont perillier.
 Li rois i est entrés, la croute veut cerchier,
 Qu'il veut toutes les choses prover et ensaier.
 N'i vit home ne feme ou se puisse acointier.
 Icele male chose le prist a araisnier,
 Sous la pierre ou estoit commença a huchier:
 "Sire, rois Alixandres, car me venés aidier, [2820]
 Et je t'ensegnerai or endroit le sentier,
 Comment porras issir de cest val de legier,
 Si que ja n'i perdras la monte d'un denier."
 Li rois entent la vois, prist soi a merveille,
 Paor ot de la mort, molt se crient d'engignier.
 [3.161]Li rois ot grant paor quant la vois ot oïe,
 De toutes pars esgarde, de celui ne vit mie.
 La vois de l'aversier le resemont et prie:
 "Se tu ies Alixandres, cui tous li mons sousplie,
 Torne moi ceste pierre qui tout le cors me brie, [2830]
 Qui m'a en tel destroit et en si grant baillie
 Que ne puis eschaper a nul jor de ma vie,
 Et je t'ensegnerai loiaument sans boisdie
 Com istras de cest val ou ies sans compaignie,
 Si que ja n'i perdras la monte d'une alie."
 Et respont Alixandres, qui de riens ne s'oublie:
 "Ainsi com je sui rois, li miens cors le t'afie,
 Ensegne moi la voie droite sans felonie,
 A la pierre torner te ferai puis aïe."
 Li diables respont, qui fu de grant voisdie: [2840]
 "Outre cele posterne verras la praerie,
 Puis troveras la voie, qui tout est enhermie."
 Alixandres i vait, qui point ne s'i detrie;
 Qant voit le faus sentier, bien set c'est tricherie,

Puis dist a l'avresier: "Faus est qu'en toi se fie,
 Assés en petit d'eure m'as or ta foi mentie."
 Qant l'entent li diables, ne puet müer n'en rie.
 "Alixandre, fait il, molt es plains de voisdie,
 Ne te puet engignier ne savours ne folie,
 Et qui faire le cuide si pense vilonie. [2850]
 Vois tu la cele porte qui faite est par maistrie?
 Bien connoistras les letres, car tu ses de clergie."
 Alixandres i vait, qui les felons chastie,
 Et a desus la porte l'escripture choisie.
 [3.162]Qant li rois vit les letres, molt s'en est esjoïs,
 Par loisir les regarde comme hom de sens garnis
 Et recorde les letres, qu'il ne soit escharnis.
 Puis a cerchié le val ou mains hom est peris
 Et trueve le sentier el costé d'un larris
 Quil menra hors du val, si com dit li escriis. [2860]
 Qant la voie ot aprise et il en fu bien fis,
 Au diable revint, ne s'est mie desdis,
 Ains sousleva la pierre sous qui iert enfoïs.
 Li diables saut sus si a jeté deus cris;
 El siecle n'a cel home, s'il les eüst oïs,
 Ne cuidast tout por voir estre mors ou traïs.
 Alixandres meïsmes s'en est molt esbahis,
 Por un seul petitet qu'il n'est du sens maris,
 Mais il se raseüre com chevaliers hardis
 Et monta el cheval, a tant s'en est partis. [2870]
 Entrés est el sentier, de riens n'i est faillis,
 Quil menra hors du val ains que jors soit fenis.
 [3.163]Li rois ist de la porte et si point Bucifal,
 Il n'ot en sa compaignie ne mais que son cheval.
 Qant auques ot alé, si esgarde le val.
 "Ahi! val perilleus, plains de dolor mortal,
 La vostre compaignie me dut torner a mal,
 Qui ainc ne pot bone estre a nul home charnal."
 Alixandres chevalche et monta el costal
 Et esgarde sor destre et choisi en l'egal [2880]
 Plus de mil pavellons a or et a cristal.
 Ens en mi lieu des autres vit le sien a esmal;
 Les cordes sont de soie, li païsson de roal,
 Desus un escharboucle luisant comme estaval,
 Et samble de clarté l'estoile matinal.
 Dedens sont li baron, qui mainent tel jornal
 Tous jors plaignent et pleurent lor signor natural.
 Li rois vint cele part, entr'aus a pris estal,
 Si home vont encontre ensamble communal.
 Plus de quatorze princes qui tout furent chasal [2890]
 Le prinrent tuit par mains que par bras que par al,

Tout li ont desrompu son bliaut de cendal;
 Ja mais por un seul prince ne verrés joie tal.
 La nuit ot Alixandres assés mellor ostal
 Que s'il fust en la roche au perilleus portal.
 [3.164]Au matin par son l'aube monterent li baron,
 Li conduis les en guie droit a Occeanon.
 Une merveille virent tel com nos vos diron:
 Sor la rive de l'eaue el ros et el sablon
 Lor aparurent femes, mais il ne sorent dont, [2900]
 Car plus de cinc jornees d'entor et d'environ
 Ne peüst on trover ne borde ne maison
 Ne chastel ne cité ne habitacion;
 En l'eaue conversoient a guise de poisson
 Et sont trestoutes nues si lor pert a bandon
 Qanque nature a fait enfresi c'au talon;
 Li chevel lor luisoient com pene de paon,
 Ce sont lor vesteüres, n'ont autre covrison.
 Tant par estoient beles et de gente façon
 Que de la biauté d'eles ne sai dire raison. [2910]
 [3.165]Qant virent cil de l'ost que si beles estoient
 Ne por paor des homes pas ne se reponoient-
 Qant trop en i aloit en l'eaue se metoient,
 Et qant il retornoient si se raparisoient,
 Les petites compaignes tres bien les atendoient,
 Qant il ierent o eles volentiers i gisoient-
 Cil les covoitent tant qu'a paines s'en partoient.
 Qant il ierent si las que faire nel pooient,
 Volentiers s'en tornassent, mais eles les tenoient;
 Celes levoient sus, en l'eaue les traioient, [2920]
 Tant les tienent sor eles qu'eles les estaingnoient.
 [3.166]Quatre s'en eschaperent qui au roi sont venu,
 Le convine des femes content qu'il ont veü
 Et de lor compaignons com il sont retenu;
 Ne repaierront mais, noié sont et perdu.
 Qant cil oient le conte que li quatre ont rendu,
 Por la biauté des femes se sont si esmeü
 Volentiers i alaissent s'il ne fuissent tenu,
 Mais Alixandres jure qanqu'est et canque fu
 Que tuit cil qui iront, s'il sont aperceü, [2930]
 Ja nes amera tant qu'il ne soient pendu;
 Ainc puis n'i ala nus que il l'ot deffendu.
 [3.167]Des noveles se vont li baron mervellant
 Des puceles de l'eaue, com lor est convenant.
 Ne demora puis gaires que il virent plus grant,
 Dont plus se mervellierent nis li petit enfant.
 A la tierce lieuee, devant l'aube aparant,
 Es vous par devant l'ost quatre viellars errant,

Et ot trestous li mendres quatorze piés de grant.
 Velu sont commë ours, poil ont dur et poignant, [2940]
 Cornes ont comme cerf en mi le front devant,
 Et sont noir comme meure et lor oel sont luisant.
 En l'ost nen ot destrier fors Bucifal l'amblant
 Q'en peüst un ataindre, si tost s'en vont fuiant.
 Li rois point après aus, s'en vait un ataignant,
 Par les cheveus le prist si li dist en riant:
 "Estés ici, biaux maistres, n'irés hui mais avant,
 Ançois me conterés com vos est covenant,
 Qui estes, dont venés et que alés querant."
 Qant cil se senti pris, forment vait glatissant, [2950]
 Et li troi se regardent, au roi vienent poignant.
 Chascuns tint en sa main une roche pesant,
 Grans caus li vont doner sor son escu devant.
 Tout li ont defroissié, mort l'eüssent a tant,
 Qant Filotes i vint sor son destrier courant;
 L'un en feri el cors de son espié trenchant.
 Et li vieus prent la lance, vers lui vient brandissant,
 Le destrier prist au frain, en mi le front devant
 Li dona un tel caup du poing destre en boutant
 Sor la hanche l'asiet a terre maintenant. [2960]
 Filotes saut en piés, du fuerre trait le brant;
 Estes vous Licanor après lui acourant,
 Tholomés et Dans Clins vienent esperonant.
 Chascuns saisist le sien, bien les vont justiçant
 Et les mains trier le dos de corioies liant,
 Deus et deus comme chiens par les caus acouplant.
 Vers le tref Alixandre vont grant joie faisant
 Et a lor pavellons s'en revont li auquant.
 [3.168]Li viellart furent pris et li rois s'en repaire,
 A son tref descendi, en toute l'ost n'ot maire. [2970]
 Qant fu tans de disner, si firent le fu faire;
 Qant il orent mengié et on dut napes traire,
 Ses sergans commanda que facent sa gent taire.
 Les viellars apela s'en jura son viaire
 Que ja li conteront de trestout lor afaire:
 Dont sont, ou vont, dont vienent, quel mestier sevent faire.
 Se il voir ne li dient, il lor fera contraire;
 Se mençoigne li dient, il les fera deffaie
 Ou ardoir ou rostir ou a chevaus detraire.
 [3.169]Qant li viellart oïrent du roi le serement, [2980]
 En estant se drecierent et parlerent briement.
 Li ains nes a parlé tout premerainement:
 "Sire rois Alixandres, un petit nos entent.
 Nous somes quatre frere si somes d'Orient,
 Par les desers alons ensi priveement.

Ça en arriere fumes a une feste aiglent
Et de pluisors contrees i furent li jovent.
Uns astrenomiens nos dist veraiement
Que en ceste contree fontaines i a cent;
Les trois en sont faces, jel sai a ensient. [2990]
Hom qui a set vins ans, de noient ne vos ment,
Se en l'une se baigne et en l'eaue descent,
En l'aé de trente ans revient hastieusement."
[3.170]"Sire rois Alixandres, se toi vient a plaisir,
La seconde fontaine devés tres bien oïr;
Li dieu la firent sordre et de terre venir.
Qui en cele se baigne ne puet puis pas morir;
Ne la puet on en l'an que une fois choisir.
Bon conseil te donrai, se tu veus assentir,
Por ce que de noient ne te volons mentir. [3000]
Ta maisnie feras en pluisors lieux partir,
S'aucuns par aventure i pooit avenir."
"E! Dieus, dist Alixandres, se me volés souffrir
Que baignier m'i peüsse, car riens tant ne desir,
Sacreifice feroie tout a vostre plaisir."
[3.171]"Rois, la tierce fontaine refait molt a loër.
Qui voit mort son ami, ne fait mie a douter,
S'il le puet a cele eaue conduire et amener
Et entor la fontaine quatre jors sejourner
Et un petit de l'eaue dedens le cors geter, [3010]
Au quint jor le fera de mort resusciter."
Qant Alixandres l'ot, si commence a parler:
"Se tu icés noveles me fais en voir ester,
Plus te donrai chevaus, or fin et argent cler
Qu'entre toi et tes freres n'oserés demander."
Li viellart saillent sus si li vont affier.
[3.172]Ce fu el mois de mai, que li tans renovele,
Que li viellart ont dit au roi ceste novele;
Alixandres l'entent, joians li fu et bele.
Sempres fist traire napes et fist metre la sele, [3020]
Li rois et tuit li autre chevalchent la praele,
Les lui vont li viellart, docement les apele.
La nuit se hebregerent les une fontenele
Dont li ruissiaus iert clers et blanche la gravele.
La descendi li rois qui tout le mont querele,
D'une part fu ses tres et d'autre sa chapele.
[3.173]Qant il dut avesprer, s'assieent au mengier.
Le mengier font haster, car il veulent couchier,
Matin veulent lever por lor voie exploitier;
Gent qui ont tant a faire ne doivent pas targier. [3030]
Li poisson furent cuit et mis por refroidier,
Ainc n'en sot mot li quieus, si vinrent doi levrier,

As poissons atouchierent ses ont fait trebuchier
 Ens en la fontenele dededens le gravier.
 [3.174]Qant li poisson sentirent l'eaue a aus abiter,
 Sempres vinrent en vie si prenent a noër
 Et par la fontenele l'uns l'autre a debouter.
 Qant li quieus l'apercut, au roi l'ala conter;
 Li rois et tuit li autre les courent esgarder.
 "Segnor, dist Alixandres, sel me volés loër,[3040]
 Ci ferai une tour bone et haute fremer,
 Se mestiers nos en est qu'i puissons rasener."
 Li baron dient tuit: "Bien fait a creanter."
 La nuit jurent seür desi a l'ajorner,
 Par les tentes se lievent viellart et bacheler.
 En l'ost n'ot gentil home n'i voist pierre porter,
 Une tor i ont faite qui molt fait a loër,
 Par dedesus la firent a civoire vouter
 Par engien merveilleus qu'il firent tresgeter,
 Et misent une roe que li vens fait torner. [3050]
 La fontenele firent sus en la tor monter,
 La cuve ou ele chiet firent entor plomer,
 Por ce l'ont fait ainsi que mieus puisse durer.
 Qant li rois ot ainsi la tor fait afiner,
 L'endemain par son l'aube commence a cheminer.
 [3.175]A l'aube aparissant fu toute l'ost montee,
 A exploit chevalchierent toute la matinee,
 Li rois et tuit li autre chevalchent par la pree;
 Droit a eure de tierce ont une eaue passee.
 Trestoute l'ost en est en une cave entree, [3060]
 Trois jors ont chevalchié ains qu'il l'aient outree.
 Une fontaine truevent a la tierce jornee,
 Ainc puis qu'il vient la ne s'est l'os remuee,
 Por ce que ele estoit travellie et lassee,
 Et fu eure de none et traist a la vespree.
 Environ la fontaine s'est la gent ostelee
 Desi q'a l'endemain, que l'aube fu crevee,
 Que li solaus luist cler par toute la contree.
 Alixandres li rois a sa gent apelee,
 A cinc cens de ses homes la parole a mostree, [3070]
 Dist lor que il alaissent sans point de demouree
 Querre l'autre fontaine tant qu'il l'aient trovee,
 Et qui la trovera sa teste en a juree
 Que se il ja s'i baigne ains qu'il li ait mostree,
 Ja ne morra de mort si l'avra comperee.
 [3.176]Li rois remest iluec, si eslit vont avant
 Et vont par les desers la fontaine querant,
 Par vaus et par montaignes se vont molt dementant.
 Enoc, uns riches hom, en est alés avant,

La fontaine trova ains le midi passant. [3080]
 Uns hom li raconta qu'il i trova baignant
 Que c'estoit la fontaine qu'il aloit demandant,
 A cel jor estoit l'eure qu'el s'aloit demostrant.
 [3.177]Enoc descent a pié, en l'eaue se baigna,
 Mais de ce fist folie que son chief i plonga,
 Encor venra tele eure qu'il s'en repentira.
 Qant il se fu baigniés, vesti soi et chauça,
 Sor son destrier courant isnelement monta,
 Desq'au tref Alixandre esperonant en va,
 Dist li de la fontaine comment il la trova [3090]
 Et que devant un an nus mais ne la verra
 Ne hom qui l'aille querre trover ne la porra.
 Li rois fu coreciés, durement souspira
 Por ce que la fontaine mais ne recouvrera.
 Sa teste vit mollie, pres de soi l'apela,
 En la fosse du col a sa main li tasta,
 De ce qu'il fu baigniés tout mollié le trova.
 Demanda li por coi tant longes demora,
 Puis li dist que cest baing molt chier achatera.
 [3.178]"Enoc, fait Alixandres, ne te puis tormenter, [3100]
 Occire ne te puis, ardoir ne afoier,
 A dolor te ferai toute ta vie user."
 Ses maçons apela si fist faire un piler
 Et dedens le piler fist Enoc seeler;
 Tant com li siecles durt ne l'en puet nus geter.
 Puis cuellirent lor tentes, avant veulent aler,
 Les puis de Falicost commencent a monter.
 [3.179]Alixandres chevalche les puis de Falicost.
 Roisde fu la montaigne, ne porent aler tost,
 A grant paine souffrirent la cholor et le rost. [3110]
 Il ne truevent tant d'ombre ou uns seus hom s'acost
 Ne ne truevent biau lieu ou nus d'aus se repost.
 Qant vinrent au pertuis que Artus li ber clost,
 Çoinocifal lor saillent des desers de Rimost,
 Testes orent de chien, molt son lait et enpost,
 A grans pierres puignans viennent arochier l'ost;
 Li archier i vont traire, qui armé furent tost.
 Qant virent les saietes, fuïson et repost;
 Li archier s'en retornent, q'Alixandres nes chost.
 [3.180]Li rois monta un tertre qui de hautece vaint [3120]
 Et vit Oceanon, qui tout le mont açaint,
 Et le mont d'Ethiope et le val qu'il estraint.
 A poi que toute l'ost d'angoisse ne remaint,
 Car li chaus les argüe et la sois les destraint.
 Cil d'Ynde li ont dit d'aler avant ne paint,
 N'est qui la voie sache ne qui la lor ensaint,

Que l'ardor est si grans ja seroient estaint,
 Car en trente jornees, c'est en l'estoire paint,
 N'a tant d'umilité dont nule riens enpraint.
 [3.181]Molt fist bien Alixandres qant ciaus d'Ynde a creüs, [3130]
 Toute la matinee s'en est li rois meüs
 Por retourner arriere la dont il iert issus,
 En la fastiene Ynde dont il estoit venus.
 Ja estoit li fus grans, et li rois descendus
 A un estanc qu'il truevent entre tertres agus
 Qui tous estoit plains d'eaue, mais sempres fu beüs
 Des chevaus et des bestes que avoit recreüs
 Li chaus qui du soleil estoit si grans cheüs.
 D'autre part de la rive ot homes parcreüs,
 Chascuns iert par le cors dusq'au nombril fendus [3140]
 Et environ le dos comme bestes velus.
 Des Griens se merveillierent qant il les ont veüs;
 Molt par les veüssiés dolens et irascus
 Qant veü ont teus homes, qu'il n'ont pas conneüs;
 Vers aus vinrent corant, molt fu grans lor vertus.
 Ainc ne vestirent drap qui fust fais ne tissus,
 Tuit ensamble lor lancent pierres et peus agus,
 Plus de cinc cens sergans lor i ont mors rendus.
 Cil de l'ost s'estormissent ses eüssent seüs,
 Qant uns estorbells lor est devant venus [3150]
 Qui tres et pavellons lor i a abatus,
 Les somiers trebuchiés et de tisons ferus;
 Peligons et mantiaus i ont assés perdus,
 Entresi vers le ciel en porte lor escus.
 Après icest damage lor est autres creüs:
 Ensement comme noif est fus du ciel pleüs,
 Que toute arst la contree ensement comme fus.
 Or dient tuit par l'ost: "Libers est irascus,
 Ou il ou Erculés font ore ces vertus,
 Par la consence as dieus nos est cis maus venus." [3160]
 [3.182]Qant li vens fu cheüs et li estorbells,
 A mont envers le ciel en guise de tisons
 Virent venir les rais ardans comme brandons.
 Cil de l'ost s'estormissent, qui criement les charbons,
 De lor escus se cuevrent, ce fu lor garisons;
 Et cil qui nul n'en orent se tinrent por bricons,
 Brullees ont les testes et barbes et grenons.
 Qant du ciel fu cheüe la rougor et l'arsons,
 A negier commença de l'air qui fu enbrons;
 Ne demora puis gaires qu'en vint si grans foisons [3170]
 Que li flocel chaoient si grant comme toisons,
 La noif iert sor les tres haute comme dongons.
 Alixandres commande a trestous ses barons

Que ne remaigne en l'ost escuiers ne garçons
 Qu'il mainent les bestes par tous les pavellons
 Et abatent la noif a peus et a bastons.
 Por la cholor des bestes fu grans remetoisons,
 La noif qui iert remise chaucha comme sablons.
 Après lor vint de pluie si grant sorjonsions
 Que tout en porte a val la noif et les glaçons. [3180]
 Li estans rempli d'eaue, qui iert et grans et lons.
 [3.183]Quatre jors fu li rois que d'iluec ne se mut,
 Et fist molt grant froidure, assés nega et plut;
 Ainc l'espoisse de l'air por ice ne descrut.
 Alixandres demande a ciaus d'Ynde que dut
 Q'après si grant cholor si grant froidure mut,
 Mais onques por le dire nus d'aus ne s'aparut.
 [3.184]Deus viellars yndiens ont es desers trovés
 Qui ont longes les barbes jusqu'au neu des baudrés.
 Li rois lor a enquis: "Qui estes, ou alés?" [3180]
 Cil li ont respondu: "Ci est nostre regnés,
 Des desers de Rimost est nostre naités.
 Li qels est Alixandres? Et car le nos mostrés,
 Car veoir le volons plus qu'ome qui soit nés,
 Por ce que sor tous homes est cremus et doutés."
 Li chevalier lor dient: "Toute l'ost esgardés,
 A celui qui mieus samble segnor si vos tenés."
 Cil esgardent le roi, qui fu gros et quarrés,
 Large ot l'enforcheüre si fu bien figurés;
 Autresi le connurent com s'il lor fust mostrés. [3200]
 "Sire, font li viellart, se en nos vos fiés,
 As arbres vos menrons que vos tant desirrés,
 Qui vos diront noveles de la mort q'atendés."
 Qant Alixandres l'ot, ses en a merciés,
 Riches conrois lor done et bons muls sejoinés.
 [3.185]"Segnor, dist Alixandres, je vos commant et reu:
 Remuons nos herberges et querés autre leu,
 Car je voi molt le ciel et pale et ynde et bleu.
 Il ne nos promet mie ne seürté ne geu,
 Ains sont irié li dieu qui nos ont mis en freu, [3210]
 Tel chose m'ont hui faite dont ai au cuer grant neu,
 Car set vins chevaliers, qui molt estoient preu,
 I avons hui perdu de la noif et du feu.
 Sevelissons les mors et si lor faisons veu;
 Por le maingier haster voisent avant li queu."
 [3.186]Les mors ont sevelis, li Grieu s'en sont torné.
 Li quieu s'en vont avant, le mengier ont hasté;
 D'un grant tertre ou il ierent ont un val avalé
 Et truevent as herberges le mangier apresté;
 A pié s'en vont deduire quant il orent disné. [3220]

Desous une grant roche truevent un lieu cavé
 Ou Artus et Libers avoient conversé;
 Et orent icel lieu beneoit et sacré,
 Que puis n'i entra hom qu'il s'en furent torné
 Q'on n'eüst au tierc jor ça dehors mort trové;
 Alixandres mescroit qu'il n'i ait enferté
 De serpent ou d'oiseil qui l'ait envenimé.
 Ains nel creïli rois des qu'il l'ot esprové,
 Entrer i fist quatre homes qui bien furent armé,
 Au tierc jor furent mort tout quatre hors trové, [3230]
 En travers l'un sor l'autre a la terre geté.
 Alixandres les voit, longement a pensé;
 Por ce qu'il n'i pert caus ne il ne sont navré,
 N'en pot onques savoir li rois la verité
 Comment il ierent mort et iluec aporté.
 Les viellars yndiens, qui du païs sont né
 Et avoient grant piece el païs conversé,
 A fait li rois venir si lor a demandé,
 L'un des deus avant l'autre a forment conjuré,
 Que de cele merveille qui l'a si effreé [3240]
 Li dient ambedui toute la verité:
 S'en la cave a fantosme, serpent ne enferté
 Qui si soutainement a cest lieu deserté.
 Li dui viellart respondent, qui sont de grant aé,
 Que Artus et Libers par lor grant deïté
 Entoschierent le lieu si l'ont enfantosmé.
 Li rois ot les viellars qui ce li ont conté,
 Por le païs qu'il sevent a molt grant volenté
 Li rois d'aus retenir, car par tout ont alé;
 Et dist que des or mais seront molt si privé [3250]
 Et molt seront par lui servi et honoré.
 Li viellart l'en mercient si li ont afié
 Que par tout le menront a molt grant salveté.
 [3.187]Qant li vens fu cheüs et la noif fu fondue
 Et li estans fu plains de l'iaue qu'iert cheüe
 Et de la grant merveille qui du ciel fu pleüe,
 Qui par icel convers fu ainsi expandue
 Et de trestoutes pars en l'estanc acourue
 Deus piés plus haut la rive de cele qu'iert beüe,
 Ja qui la lor contast par aus ne fust creüe [3260]
 Se il apertement ne l'eüssent veüe.
 Li jors fu biaux et clers et fist ombre sous nue.
 Alixandres monta, toute l'ost se remue
 Et monterent un tertre dont la roche est agüe.
 Onques mais n'i ot sente ne chariere batue,
 Por l'angoisse du chaut tous li plus fors tressue.
 Li viellart vont avant qui la terre ont seüe,

Et ont el cuing du val une forest veüe
 Qui bien estoit dedens et garnie et vestue
 De toute icele riens qui a cors d'ome aiue. [3270]
 [3.188]Lors descendent du tertre si sont venu el val.
 Molt furent travellié li home et li cheval,
 La chalors du soleil lor fist le jor grant mal.
 Alixandres les guie, qui sist sor Bucifal,
 Et en l'arrieregarde a mis son seneschal;
 Li armé vont avant qui guient le costal.
 Des crués de la montaingne saillent Liotifal,
 Molt sont grant et hideus, onques hom ne vit tal,
 Plus lor luisent li oel que pierre de cristal.
 Chascuns tint en son poing une pierre puignal; [3280]
 Devers le haut du tertre lor livrerent estal,
 O les roches cornues les trebuchent a val.
 Et li archier i traient ensamble communal
 Et cil a pié les hüent et font grant batestal.
 Molt menerent grant joie quant furent en l'ingal.
 [3.189]La forest sist molt bien dejoste une riviere,
 Verdoians fu et gente et reonde et entiere.
 Arbres i ot plantés de diverse maniere,
 Ainc n'en fu uns trenchiés ne devant ne derriere,
 Ja n'iert hom si hardis qui un seul caup i fiere. [3290]
 On ne demande espice ne nule herbe tant chiere
 Q'on n'i puisse trover, qant la flors naist premiere
 En avril ou en may qant li biaux tans s'esmiere.
 La mandegloire i naist, q'a trover n'est legiere,
 De croistre en la forest estoit bien costumiere;
 Ja n'iert hom si hardis qui la remut ne quiere
 Ne l'estuece morir d'une mort itant fiere
 Ja ne porra aler ne avant ne arriere.
 [3.190]El bois ot un vergié de grant antiquité,
 Poires i ot et pumes et fruit a grant plenté [3300]
 Et dates et amandes et yver et esté,
 Cherubins et nardiens, mil arbres de bonté;
 I vinrent par nature, ainc n'i furent planté,
 De la forest tenoient une lieue de lé;
 Et entre les devises du vergié ot un pré
 De toutes chieres herbes garni et asasé.
 Hom ne demande herbe ne ne vient en pensé
 Dont iluec ne trovast tout a sa volenté.
 Il n'a sous ciel cel home tant enferm n'engroté,
 De poison ne de poudre tant fort envenimé, [3310]
 De dolor ne de mal tant fort enraciné
 Ne le cuer entoschié ne le foie entamé,
 Se il pooit tant faire qu'il en eüst gousté
 Et le col en eüst un petitet passé

Et un poi i eüst dormi et reposé,
 Que il ne s'en alast tous liés et en santé
 De la flairor des herbes et de la santé.
 N'a sous ciel damoisele, tant ait ris ne joué,
 S'ele a a son ami son gent cors presenté,
 Entre ses bras tenu, baisié et acolé, [3320]
 Se une seule nuit i avoit reposé
 Et son cors trestot nu sor les herbes posé,
 Au main ne fust pucele s'eüst sa chasteé
 De l'odour des espices et de la douceté.
 [3.191]Molt fu biaux li vergiers et gente la praele,
 Molt souef i flairoit riquelisse et canele,
 Garingaus et encens, citouaus et tudele.
 Tres en mi lieu du pré sort une fontenele
 Dont la dois estoit clere et blanche la perrele,
 A rouge or espanois pesast on la gravele. [3330]
 De fin or tresgeté i ot une ymagele
 Sor deus piés de cristal, qui ne chiet ne chancele,
 Qui reçoit le conduit qui vient par la tuiele.
 El vergié lor avint une merveille bele,
 Car desous chascun arbre avoit une pucele,
 Il n'en i avoit nule chamberiere n'ancele,
 Mais toutes d'un parage, chascune iert damoisele.
 Les cors orent bien fais, petite la mamele,
 Les ieus clers et rians et la color novele.
 Plus iert esprís d'amor qui veoit la dansele [3340]
 Que s'il eüst le cuer broïd'une estincele
 Et plus li saut el cors que destriers de Castele.
 A Alixandre en dient li viellart la novele;
 Qant li rois l'a oïe, joiant li fu et bele,
 Canques il a alé ne prise une cenele
 Se il nes voit de pres; les deus viellars apele:
 "Conduisiés moi ceste ost delés cele vaucele,
 Car desq'en la forest n'iert ostee ma sele."
 [3.192]Alixandres commande l'ost amener avant
 Car el bois as puceles veut aler deduiant. [3350]
 Son seneschal apele Tholomé en riant,
 Les noveles li dist que cil li vont contant.
 Et les puceles issent de la forest chantant,
 Vestues comme dames, molt bel et avenant.
 Qant voient ciaux de l'ost, encontre vont jouant
 Tant com li ombres dure, car ne pueent avant,
 Ja si poi nel passaissent que mortes chaïssent;
 Mais plus aiment les homes que nule riens vivant,
 Por ce q'en cuide avoir chascune son talant.
 Cil de l'ost les conjoient si s'en vont mervellant, [3360]
 Car de si beles femes ainc mais ne virent tant,

Ne ne fuissent trovees desi qu'en Oriant.
 Es pres les la fontaine Alixandres descent,
 Qui plus flaire souef que odors de pieument.
 [3.193]Alixandres descent, iluec s'est arestés,
 Ses compaignons apele si est el bois entrés.
 Quant il vit les puceles, molt en est effreés
 Et de la biauté d'eles est issi trespensés
 Q'il en jure son chief, qui d'or est corounés,
 Que ne s'en movra mais si iert quars jors passés. [3370]
 "Je commant, biau segnor, por Dieu, or esgardés!
 Veïstes mais si beles en trestous vos aés?
 Eles ont cler le vis plus que n'est flors de prés,
 Les ieus vairs et rians plus que faucons müés.
 Veïstes onc tels nes ne si amesurés?
 Les bouches ont bien faites, ja mais teus ne verrés
 A baisier n'a sentir, en cel país n'irés,
 Et ont les dens plus blanches qu'ivoires reparés
 Ne que la flor de lis q'amaine li estés.
 Bien sont faites de cors, grailles par les costés, [3380]
 Mameles ont petites et les flans bien mollés.
 Les unes sont vestues de bons pailles rões,
 Les pluïors d'ostorins et li mains de cendés;
 Toutes ont dras de soie tout a lor volentés.
 Nule riens ne lor faut, ains ont de tout assés
 Fors compaignie d'omes et si'n est grans plentés.
 Or sejornons o eles, molt nos ont desirrés."
 [3.194]Dedevant la forest ot un pont torneïs
 Sor l'eaue de Clarence, qui vient de Valbrunis,
 Les estaches du pont sont de marbre voutis [3390]
 Et les solives sont toutes a or massis
 Et les planches d'yvoire a bons esmaus treslis.
 De l'autre part du pont ot un tresgeteïs,
 Deus enfans de fin or fais en molle fontis;
 Li uns fu lons et grailles, l'autre gros et petis,
 Membres orent bien fais, vis formés et traitis.
 Si com l'os aprisma et il oënt les cris,
 Chascuns saisist un mail, li pas est contredis.
 Desor aus ot deus briés, que uns clers ot escrits,
 Qui les fait par augure deffendre au passeïs. [3400]
 Alixandres descent du destrier arrabis
 Et monte sor le pont si s'est outre escuellis.
 Qant vit les deus enfans qui ont les mals saisis,
 Il se retraist arriere, qu'il cuide estre peris.
 [3.195]Qant li rois vit les deus qui se vont deffendant,
 Ses compaignons apele si lor dist en riant:
 "Je voi outre cel pont une merveille grant:
 A l'entree de la deus enfans en estant.

N'i cuit ja mais passer en trestout mon vivant,
 A deus grans mals d'acier se vont escremissant." [3410]
 Qant li baron l'oïrent qu'iluec sont atendant,
 En la place ont guerpi maint destrier auferrant
 Et montent sor le pont qui plus tost puet courant,
 Vont veoir la mervelle que li rois vait contant.
 A tant i sont venu li dui viellart persant
 Qui par tous les desers vont le roi conduisant
 Et toutes les mervelles de la terre mostrant.
 Alixandres lor dist: "Segnor, venés avant.
 Dites par quel maniere sont ici cist enfant."
 Li ains nes li a dit que por lui fera tant [3420]
 Q'il fera remanoir trestout l'enchantement.
 [3.196]Li viellars li a dit qu'il lor fera laissier
 Les mals et l'escremie dont il sont constumier.
 Alixandres li prie qu'il penst de l'exploitier,
 Plus li donra fin or qu'il ne porra baillier.
 "Sire, dist li viellars, ne vos chaut a coitier;
 Laissiés moi belement atoner mon mestier.
 Je en ferai ja un en l'eaue trebuchier,
 Que vostre oel le verront a un poisson mengier,
 Et l'autre en porteront diable et avresier." [3430]
 [3.197]Pres de l'enchantement s'est cil agenolliés
 Et saut du pont en l'eaue si revient sor ses piés.
 Ses mains tendi en haut, contre mont s'est dreciés,
 Puis se rabaisse a val, deus fois s'i est plongiés.
 Et a la tierce fois, qant il fu essiauiés,
 Voiant tous ciaux de l'ost s'est li enfes bronchiés
 Par tel air en l'eaue que tous est depeciés,
 Voiant les ieus le roi est d'un poisson mengiés.
 Puis que li uns d'aus fu en l'eaue perilliés,
 Ne puet durer li autres, c'or li failli li piés. [3440]
 Uns diables l'en porte, qui forment en fu liés,
 Les gambes li peçoie, les bras li a brisiés.
 "E! Dieus, dist Alixandres, par les toies pitiés
 De canque tu me dones soies tu grasciés;
 Cil qui fist ces enfans fu molt outrecuidiés."
 Les mals que cil avoient ont iluecques laissiés;
 Alixandres i cort si s'i est ensaiés,
 Il n'en meüst un seul por estre detrenchiés.
 [3.198]Aprés le roi i courent tuit li per ensaier;
 De folie se veulent pener et travellier, [3450]
 Le menor ne peüssent quatre buef charoier.
 A tant s'en passent outre sergant et escuier
 Et dansel et geudon et turcople et archier,
 Qui estoient venu en l'ost por gaaignier;
 Aprés passent les bestes qu'il mainent por mengier.

Quant il furent tuit outre, si dut solaus couchier.
 [3.199]En la forest s'est l'os cele nuit ostelee,
 Il n'ont autres osteus mais chascuns sa ramee.
 Les puceles n'i firent plus longe demoree,
 Chascune prist le sien sans nule recelee. [3460]
 Qui sa volenté vaut ne li fu pas veee,
 Ains lor fu bien par eles sovent amonestee.
 Cil legier bachelier qui tant l'ont desirree,
 Qui pieç'a sont issu hors de la lor contree,
 Chascuns n'i ot sa feme ne s'amie amenee,
 Trestoute icele nuit ont grant joie menee
 Tant que biaux fu li jors, clere la matinee.
 Quant il varent mengier, la viande ont trovee,
 A quarante mil homes la truevent conreee;
 Il demanderent l'eaue si lor fu aprestee. [3470]
 Il vont a la margele, qui par lieus iert trouee
 Et iert par artimaire molt menu tresgetee
 Et reçoit le conduit qui vient par la baee.
 Puis estendent les napes sor l'erbe a la rousee,
 Sous ciel n'en a devise la ne soit a portee,
 Chascuns a son talent la trueve asavoree.
 Après mengier se vont deporter en la pree;
 Qui vaut fruit de maniere ne chiere herbe loëe
 Assés en pot avoir sans chose dev[e]ee.
 En la forest s'est l'ost si trois jors sejournee, [3480]
 Tant que ce vint au quart, qu'ele s'en est tornee.
 Alixandres regarde desous une cepee
 D'un vermel cherubin qui ot la fuelle lee
 Et iert a oisiaus d'or menüement ouvree.
 Une pucele vit, bele et encoloree
 Ainsi come nature l'avoit enfaçonee.
 Onques plus bele feme ne fu de mere nee,
 La char ot blanche et tenre comme noif sor gelee;
 La biauté de son vis durement li agreee,
 Car la rougor estoit avec le blanc mellee. [3490]
 Quant li rois l'ot choisie et tres bien avisee,
 Lors a dit a ses homes: "Une chose ai pensee:
 Qui ceste feme avroit de cest convers getee
 Tant que il la tenist en la soie contree
 Bien en devroit on faire roïne coronee."
 Dans Clins, li fieus Caduit, l'a sor un mul montee,
 Ainsi com au roi plot ja l'en eüst portee.
 Cele s'en voit porter, molt est espoëntee,
 De la paor qu'ele ot quatre fois s'est pasmee,
 Et regarde Alixandre, merci li a criée: [3500]
 "Gentieus rois, ne m'oci, franche chose honoree,
 Car se g'iere plain pié de la forest getee,

Qu'eüsse une des ombres seulement trespassee,
 Sempres seroie morte, tels est ma destinee."
 Alixandres l'esgarde, plus iert bele que fee;
 Por ce qu'ele ot plouré ot la color müee.
 Mervelleuse pité l'en est au cuer entree,
 A terre la fist metre, a Dieu l'a commandee.
 Cele s'agenolla, a terre s'est clinee,
 Molt demaine grant joie qant se vit delivree, [3510]
 En la forest arriere s'en est tost retornee.
 Puis ont une parole entr'eles porparlee,
 Que l'ost convoieront belement a celee
 Tant com l'ombre du bos porra avoir duree.
 Cil de l'ost se mervellent, qui l'orent esgardee,
 Torner varent arriere, quant au roi fu contee
 Noveles que sa gent iert el bos retornee,
 Mais li rois Alixandres a sa teste juree
 Que se nus i remaint demie arbaleste, [3520]
 Q'il le fera ardoir en fournaise enbrasee.
 [3.200]Alixandres apele les viellars ses conjure
 Par cel dieu qui forma trestoute creature
 Si lor a demandé: "Par com faite aventure
 Sont en cel bos ces femes? Est ce lois ou droiture?
 Dont viennent et que vestent? Qui lor livre pasture,
 Qant a trestoute m'ost ont trové forniture?
 Font en eles as dieus nisune forfaiture?
 Ou ont eles trové jovent qui tant lor dure,
 Qant je n'i ai trové tombe ne sepulture?"
 Cil li ont respondu, qui sorent lor nature: [3530]
 "A l'entree d'yver encontre la froidure
 Entrent toutes en terre et müent lor faiture,
 Et qant estés revient et li biaux tans s'espure,
 En guise de flors blanches viennent a lor droiture.
 Celes qui dedens naissent s'ont des cors la figure
 Et la flors de dehors si est lor vesteüre,
 Et sont si bien taillies, chascune a sa mesure,
 Que ja n'i avra force ne cisel ne costure,
 Et chascuns vestemens tresq'a la terre dure.
 Ainsi comme as puceles de cest bos vient a cure, [3540]
 Ja ne vaudront au main icele creature
 Q'eles n'aient au soir, ains que nuit soit oscure."
 Et respont Alixandres: "Bone est lor teneüre;
 Ainc mais a nule gent n'avint tele aventure."
 [3.201]Li rois issi du bos et si home ensement,
 Les puceles les guient tant com li ombres tent.
 Qant ne porent avant, si souspirent forment,
 A terre s'agenollent voiant toute la gent
 Et clinent Alixandre du chief parfondement,

A Dieu le commanderent qui le maint sauvement. [3550]
 Li dui viellart les guient par un adrecement
 Entre quatre montaignes par un val freolent;
 Chascun an par nature i naissent cinc serpent
 Qui getent fu et flambe, la terre art et esprent.
 En icele valee se combatent li vent,
 En tous tans i a froit et gele si forment
 Onques solaus n'i luist, se li livres ne ment.
 Iluec ot malvais siecle qui ot froit vestement,
 Unes piaus i vausissent set mile mars d'argent,
 Car tout li mieus vestu trembloient dent a dent. [3560]
 Puis truevent les mervelles des desers d'Orient,
 Couluevres et serpens qui mordent aigrement.
 Qui la ot bones armes nes donast son parent,
 Ains les tint pres de soi et son cors en deffent.
 N'i vausist chascuns estre por l'or de Bonivent,
 Car la terre sous aus peçoie et craulle et fent
 Et li cheval i entrent tresq'a l'afeutrement;
 Tuit li mellor destrier i devenoient lent.
 Iluec fist grant folie qui a pié i descent,
 Car la terre lor faut desous lor piés et ment; [3570]
 Le jor en i remerent, ce m'est vis, plus de cent.
 Par mi une montaigne choississent un torment,
 Quatre nues vermelles par devers Occident
 Qui menaient entr'eles un tel tornoieement,
 Tel noise et tel bataille et tel tanbuissement
 Et plevoient le sanc ensi apertement
 Que les goutes vermelles chaoient sor la gent.
 N'i ot nul qui n'eüst sanglent son vestement,
 Trestous li plus hardis i mua son talent.
 Li rois en apela Tholomé son parent, [3580]
 Cliçon, le fil Caduit, et Perdicas le gent.
 "Segnor, fait Alixandres, par le mien ensient
 Cis signes senefie molt grant destruiement.
 Li dieu nos volent mal, trop alons folement."
 Li dui viellart ques guient li ont dit belement
 Qu'il face l'ost remaindre si voist priveement
 Por veoir les deus arbres devins isnellement
 Et la chiere fontaine et l'eaue de jovent,
 La ou renjoenissent toute la vielle gent
 En l'aé de trente ans, por voir sans doutement, [3590]
 Qui quatre fois s'i baigne et contient sagement;
 Mais bien se gart de plus et de mains ensement,
 Car qui le devié passe n'i gaaigne noient;
 Molt en a grant meruelle li rois quant il l'entent.
 Alixandres en jure les dieus ou il s'atent
 Ne laira por mal pas ne por perillement

Ne voie la fontaine se Dieus le li consent.
 [3.202]Qant li rois mut de l'ost, lors pleurent li pluisor,
 Car forment se cremoient de perdre lor segnor;
 Molt se fient el roi et il forment en lor. [3600]
 Alixandres chevalche, qui ainc n'ama sejour,
 Et ot en sa compaingne maint fil de vavassor,
 De ciaus ou plus se fie et ou plus a amor;
 Li dui viellart ques guient sont en molt grant freor.
 Entrent en une terre qui trois fois arst le jor,
 Qui n'en set la constume tost en a le pior;
 A eure de midi fait li solaus son tor,
 Adont sentirent tuit une si grant chalor
 Que li chevel lor brullent de destrece et d'ardor;
 Ainc n'i ot si hardi qui n'eüst grant paor. [3610]
 Mais li solaus s'abaisse devers Terre Maior,
 Lors ont par l'ost sentie atempree froidor.
 Issent de cele terre si vienent en mellor
 Et entrent en une autre qui est de grant valor,
 Ou ja la flor novele ne perdra sa coulor.
 Voient les praeries dont l'erbe est en verdor
 Et la chiere fontaine et l'eau de douçor
 Qui la gent rajonist quatre fois chascun jor.
 De molt chiers arbrissiaus iert close tout entor,
 La estoient les herbes qui sont de grant flairor, [3620]
 D'une lieue et demie en sentissiés l'odor.
 Il n'i entre nus hom tant espris de dolor
 Que ançois qu'il s'en isse ne soit en sa vigor.
 [3.203]Segnor, de la fontaine vos dirai mon pensé.
 Close est de riches arbres de si grant dignité
 Q'a l'issue d'yver a l'entree d'esté,
 Qant la flor renovele de droite naïté,
 Tele odor ist du bos, ce sachiés de verté,
 Plus souef eult d'encens quant on l'a enbrasé.
 Par devant la fontaine ot un lion geté [3630]
 Qui estoit trestous fais de fin or esmeré.
 Cel lioncel gardoient quatre serpent cresté
 Et dui dragon volant de si male fierté
 Q'avoient le païs d'entor si aquité
 Que nus hom nen osoit entrer en cel regné
 Baignier a la fontaine ne atouchier el pré;
 Por un fil de dieuesse q'orent envenimé
 Furent trestuit ensemble d'une foudre tüé.
 En cel lioncel d'or du tans d'antiquité
 Dedens ot un conduit sagement devisé, [3640]
 Ensi com l'orent fait enchanteor letré,
 Dont li degous des arbres dont je vos ai conté
 Descendent el conduit du lion d'or formé,

Qui iert en la fontaine de si grant richeté,
 Et fors par mi la boche li issoit a plenté,
 Si com fu par estude richement compassé.
 Onques Dieus ne fist home, se la avoit esté,
 De venin ne de poudre tant fort envenimé,
 S'un petit i avoit dormi et reposé
 Et eüst de cele eaue un petitet gousté, [3650]
 Ne s'en alast halegres et trestous en santé.
 [3.204]La fontaine sordoit en mi la prairie,
 Close iert de riches arbres, de petre, de tubie,
 L'odour en sentissiés d'une lieue et demie,
 Ja mais de tel fontaine nen iert novele oïe.
 El mont n'a chiere pierre, meraude ne sardie,
 Jagonce ne turcoise ne topasce esclarcie
 Dont iluec nen eüst ainsi grant manantie;
 Tant en ot environ que l'eaue reflambie.
 Alixandres descent sor l'erbe qui verdie, [3660]
 Et tout environ lui estoit sa baronie.
 Li conduis vient avant, molt doucement li prie
 Que nus a la fontaine ne face roberie,
 Qui en porteroit rien sempres perdroit la vie;
 Et gart se bien chascuns de faire vilonie.
 Qant Alixandres l'ot, ses homes en chastie,
 Mais del jovent de l'eaue ne puet il croire mie
 Ne ja n'en iert seürs des que la prueve die.
 Antigonus i entre, qui la teste ot florie,
 Qui tant avoit vescu que tous li cors li plie; [3670]
 Trois fois s'i est baigniés, mais de ce fist folie,
 Q'a tant s'en vaut issir, por un poi qu'il ne nie.
 Sempres i fust peris quant li conduis li crie:
 "La quarte fois s'i baint, si iert l'uevre acomplie."
 Qant il issi de l'eaue, ce sachiés sans boisdie,
 Plus biau chevalier n'ot dedens lor compaignie,
 Tous revint en jovent de sa bachelerie
 En l'aé de trente ans, plains de chevalerie.
 Alixandres le voit, ne puet müer n'en rie.
 [3.205]La fontaine sordoit d'un flun de Paradis, [3680]
 De l'eaue d'Eufratés, qui depart de Tigris.
 Trestous li pavemens est a cristal assis,
 A listes de fin or i sont li quarrel mis,
 Et li piler sont tout de blanc marbre et de bis.
 En la fontaine entrerent li viel home de dis,
 Ensemble en i baignierent plus de quarante et sis.
 Quant il issent de l'eaue, par foi le vos plevis,
 Bien ressembloient tout chevalier de grant pris,
 En l'aé de trente ans ont tout müés lor vis.
 Alixandres les voit, de joie en a souris. [3690]

[3.206]Li viellart qui le roi aloient conduisant
 Et totes les mervelles de la terre mostrant
 Sont venu devant lui si li dient itant:
 "Rois, bone est la fontaine que t'alions loant,
 Baignié i sont ti home et müé li auqant.
 Veés com somes viel et chenu et ferrant?
 Cent ans avons passé et plus pres d'autretant;
 Ja nos verrois müer tout en autre samblant."
 En la fontaine entrerent ambedui soi veant,
 Quatre fois s'i baignierent par le droit covenant. [3700]
 Qant il issent de l'eaue, par le pré vont joiant,
 Dedevant Alixandre revinrent en estant;
 A paines les connut, tant ierent avenant.
 Li rois en apela Tholomé son parent,
 Cliçon, le fil Caduit, et Perdicas le grant:
 "Segnor, ce dist li rois, molt me vois mervellant.
 C'est la graindre merveille de cest siecle vivant
 Que cist sont si müé qu'il sont joene et enfant."
 Il les fist revestir d'un paille escarimant.
 Quatre jors sejournerent par le pré verdoiant [3710]
 Por la chiere fontaine ou s'aloient baignant
 Et por les bones herbes dont il i trovent tant.
 [3.207]Au quint jor mut li rois, n'i vaut plus sejourner;
 En la fastiene Ynde s'en voloit retorner,
 Qant vit par les desers deus päisans aler.
 Li rois lor vait encontre si lor fait demander
 Se ja nule merveille li savroient conter
 Qui fust bone a oïr et digne a ramenbrer.
 Cil li ont respondu: "Se nos veus escouter,
 Ja te dirons merveilles ses porras esprover. [3720]
 La sus en ces desers pués deus arbres trover
 Qui cent piés ont de haut et de grosse sont per.
 Li solaus et la lune les ont fais si sacrer
 Qu'il sevent tous langages et entendre et parler
 Et tout dient a home quanque il veut penser
 Et qu'avenir li est et qu'il a a passer."
 "Par Dieu, dist Alixandres, la me convient aler.
 Se vos m'i conduisiés, plus vos ferai doner
 De l'or moulu d'Arrabe que ne porrés porter."
 [3.208]"Sire, font li viellart, ce nos fait esmaier; [3730]
 Se menés si grant gent, ne porrons exploitier.
 Se tu veus tost aler et par tans repairier,
 Ja mar iront o toi que seul cent chevalier."
 Alixandres l'oï, prist soi a courecier;
 Cuida qu'il le vausissent autresi engignier
 Com li cent et cinquante que il eslist l'autr'ier,
 Qant le durent en Bastre conduire et adrecier,

Qui par tous les desers le firent foloier,
 Dont les cent fist li rois en l'eaue trebuchier
 Dedeuant la freté as bestes por mengier. [3740]
 Ansdeus les a fait prendre et commande a lier,
 Demain les fera pendre ou les testes trenchier.
 [3.209]Peour ont li viellart du roi qui se marit,
 Por amor Dieu li prient qu'il escout un petit.
 Or sont prest qu'il li jurent et que chascuns l'affit
 Que il nel dirent onques por mal ne por despit.
 Il li diront tout l'estre, metre face en escrit,
 Et s'il nel trueve ainsi com il li avront dit,
 Ardoir les face ou pendre, ja mar avront respit;
 Car cinc cens chevaliers, mais qu'il soient eslit, [3750]
 Conduiront o le roi a joie et a delit;
 L'autre gent s'en retort et Porrus les en guit.
 "Par Dieu, fait Alixandres, assés avés bien dit."
 Or a ce qu'il demande, de joie s'en sourit,
 A Tholomé commande ques gart et ques delit.
 [3.210]Alixandres apele Porrun, qui estoit rois,
 Dist lui qu'il li conduie la grant ost Grigois,
 Chameus et olifans et tout l'autre harnois,
 Et si l'atende en Ynde ou en terre caspois,
 Car si com li ont dit li doi viellart yndoï, [3760]
 Qui li ont dit des arbres le convine et les lois,
 Entr'aler et venir n'i metra que un mois.
 Ne laira por mal pas ne por autre deffois
 Qu'o quarante mil homes de chevaliers cortois
 Qu'il n'aut veoir les arbres q'on claime d'Ibronois.
 [3.211]Au quint jor mut li rois, li viellart vont avant
 Et chevalche chascuns un bon mulet amblant
 Por ce qu'il vont souef et tout a lor talant.
 Plus aiment Alixandre que nul home vivant,
 De lui mal engignier ne font mie samblant, [3770]
 Dient li q'a ses homes prit a tous et commant
 Que il facent grant noise et si voisent cornant,
 Si s'ira la vermine des desers defuiant;
 Les maus pas lor eschievent, que nus d'aus n'i ahant.
 Tres par mi les grans tertres les vont si adreçant
 Qu'a quatorze jornees avalent un pendant
 Et se sont herbregié tout de soleil luisant.
 Le mengier aparellent li quieu et li sergant,
 Assirent au souper si firent joie grant;
 Entr'aus et les deus arbres n'a de terre un quadrant. [3780]
 [3.212]Qant li rois ot soupé a grant joie et a gas,
 Vint desq'au lieu des arbres, qui fu fais a compas,
 Et ot en sa compaigne trois cens Mascedonas.
 Uns prestres lieve sus qui ne fu mie ras,

Velus fu commë ors et esnüés de dras;
 As orelles li pendent li onés et topas
 Et pierres prescïeuses de l'eaue d'Eufratas;
 Et ot dens comme chiens, noirs fu com charbons ars,
 Et ot bien de hautece grans quinze piés eschars.
 Alixandres l'esgarde, cuida fust Satanas, [3790]
 De la paour qu'il ot ne fist avant un pas.
 Tel chose dist li prestres qui ne fu mie gas:
 "A vallet n'a meschine se tu geü nen as,
 Tant pués aler avant q'as arbres toucheras.
 Et se tu nen ies chastes, ça dehors t'esteras,
 Tu et ti compaignon qu'aveuc toi amenas.
 De ce que veus enquerre en ton cuer penseras
 Et de tout ton pensé la verité orras,
 Et si que de ta bouche un seul mot ne diras."
 Qant li rais de la lune fu par les rains espars, [3800]
 La vois qui ist des arbres dist au roi: "Que feras?
 Onques ne fus vaincus ne ja ne le seras,
 Et si criems morir d'armes, ja mar en douteras.
 A un an et set mois en Babilone iras;
 Mais enterra li mois quant tu i parvenras
 Ne ja outre cel mois un seul jor ne vivras.
 Sires seras du mont et a venim morras."
 Li rois ot la parole si tint le chief en bas,
 Fremist et devint noirs et de parler fu quas,
 Ne pot sor piés ester, tant fu de paor las. [3810]
 Si compaignon font duel et descirent lor dras,
 Il n'i vausissent estre por tout l'or de Baudas.
 [3.213]La nuit veilla li rois, molt fu grans la froidors,
 A l'aube aparissant commença la chalors.
 Qant des rais du soleil feri es rains l'ardors,
 La vois qui vint des arbres a dit au roi: "Acors!
 Ta mere fist ton pere hontes et deshonors,
 De laide mort morra, de li n'iert dels ne plors,
 Toute dessevelie gerra es quarrefors,
 Ne la verra cil hom qui n'en pregne paors, [3820]
 Nis li oisel de l'air la mangeront et ors.
 Mais n'ira mie ainsi de tes beles serors,
 Ains seront bones femes si prenderont segnors
 Si lor porteront foi et morront es honors.
 Aristotes tes maistres, qui des autres est flors,
 Avra tous jors grant los comme sages doctors.
 D'aler en ton país te prent molt grans tenrors,
 Tu n'i enterras mais, vaine est ceste douçors;
 Ja ne verras de Gresce les palais et les tors,
 Morras en Babilone, ce sera grans dolors." [3830]
 [3.214]Qant li rois ot oïle respons du matin,

Tant que la lune luist atendi le serin;
 Paor ot de la mort si tint le chief enclin.
 La vois qui ist des arbres dit au roi en latin:
 "Tu ne fus onc vaincus, ja ne perdras ton brin,
 Et criems molt morir d'armes, mais tout el en devin.
 A un an et uit mois est termes de ta fin,
 Iras en Babilone sus el palais marbrin,
 Cil dont tu mains te gardes t'ocirront a venin.
 Je ne te dirai plus, va t'en tout ton chemin, [3840]
 Car se je te disoie de ta mort le traïn,
 Ocirre les feroies a un tien barbarin
 Et mau gré m'en saroient tuit li dieu infernin,
 Car destorné avroie par mon sermon devin
 Ce qu'il ont esgardé de toi et de ton lin."
 [3.215]Li rois s'en va plorant et ses cheveus detire,
 Fremist et devint noirs et remet comme cire.
 De la paor qu'il a parfondement souspire,
 N'a home en sa compaigne qui ait talent de rire.
 Si baron le confortent si li dient: "Biau sire, [3850]
 On ne gaaigne riens en courous ne en ire.
 Mangiés un petitet, ne vous chaut a defrire,
 Car ce savés vos bien et l'avés oïdire
 Que de la mort n'eschape li mieudres ne li pire;
 Mors est Adams meïsmes que Dieus fist a sa tire.
 Se vos savés le terme, nel devés contredire,
 Car or deviserés com iert de vostre empire,
 Sel manderés en Gresce si le ferés escrire."
 Et respont Alixandres: "Dit m'avés grant remire."
 [3.216]Li rois voit ses barons environ lui plorer [3860]
 Et lor cheveus desrompre et lor dras descirer.
 Por sa gent esbaudir se prent a conforter;
 Puis a demandé l'eaue s'est assis au disner.
 Et a dit a ses homes: "Cest duel laissiés ester,
 La mors n'est pas teus chose que on puist eschiver,
 Ains la convient a tous souffrir et endurer,
 Car deci a mon terme ne m'estuet riens doter.
 Aincois (l. Ainçois) que li jors viegne qu'avés oïnomer
 Seront mort dis mil homes qui tuit sont bacheler,
 Qui cuident sain et sauf en lor terres torner. [3870]
 Assés i a grant terme por grant los achater,
 Ja ne finerai mais de terres conquerer
 Jusque de tout le mont segnor m'orraï clamer.
 Ne por paor de mort ne lairai a aler
 Ne praïgne Babilone q'ai tant oïloër,
 Car avoir veul la tour qui au ciel dut fremer
 S'ocirrai le serpent qui la cuide garder."
 [3.217]Meüs est Alixandres, en Ynde s'en retourne

La ou Porrus l'atent et toute l'ost sejourne,
 De grant duel fait samblant ne de riens ne s'aorne. [3880]
 Por ce qu'il fu pensis, et sa compaignie morne,
 S'aperçut bien Porrus, qui ot la teste auborne,
 Q'il ot oïtel chose qui a nul preu ne torne.
 [3.218]Porrus vit Alixandre des deus arbres venir,
 A l'encontre li vint si li dist son plaisir.
 "Sire, fait il au roi, de vos volons oïr.
 Dites nous, s'il vos plaist, que vos doit avenir."
 Alixandres respont: "Ne vos en quier mentir:
 Sires serai du mont trestout a mon plaisir."
 Qassement li respont, ne puet son duel covrir. [3890]
 Porrus se porpensa qant le vit amornir,
 Vit les pers conseillier et main a main tenir,
 De ciaux qui s'entralient oïles fois plevir.
 Le jor pensa Porrus, la nuit ne pot dormir;
 Por ce qu'il nes veoit jouer ne esbaudir
 Sot bien en son corage, que tres bien set covrir,
 Q'Alixandres pensoit a ce qu'il dut morir.
 Fors lui n'a sous ciel home qui l'osast envair
 Ne qui riens nule osast vers lui contretenir.
 Por ce qu'il l'avoit fait de bataille fuïr, [3900]
 S'en cuide bien vengier se il en a loisir.
 Et que li rois ne sache qu'il le veulle traïr,
 Por le roi corecier commence a messervir
 Et manace ses homes et fait as siens laidir;
 Cil s'alerent clamer, qui nel porent souffrir.
 "Porru, dist Alixandres, veus tu me dont guerpier,
 Qui manaces mes homes et fais as tiens laidir?
 Le don que t'ai doné ne te veul retolir;
 Se tu te veus de moi ne sevrer ne partir,
 Ne te veul de parole ne blasmer ne laidir. [3910]
 Je te donrai congié s'il te vient a plaisir,
 Va t'ent en ta contree, fai tes cités garnir.
 Et se tu teus estoies que vausisses issir
 Ne vers moi cors a cors de bataille aatir,
 M'espee qui bien trenche te cuït faire sentir;
 Mais tant com ies a moi ne te veul desmentir,
 Entre Ynde et les desers vaudrai cest plait furnir."
 "Sire, ce dist Porrus, ce veul je bien oïr;
 Encor vos en pöés tout a tans repentir,
 Car je sai bien de lance et d'espee ferir." [3920]
 Lors respont Alixandres comme hom de grant air:
 "Se vos ne savés bien le chaple maintenir
 Et d'espee et de lance, ce vos di sans mentir
 Q'a seür pöés estre de la teste tolir."
 [3.219]"Porré, dist Alixandres, qu'est tes sens devenus?

Or ne te membre mie de l'eaue de Calus?
 Qant je i ving poignant et li chans fu vaincus,
 Moi fu tes brans d'acier presentés et rendus;
 Tu cuidas estre mors et as forches pendus.
 Por ce que tu fus humles et de sorparler mus [3930]
 Et le pié me baissasses se j'en fuisse creüs,
 J'oi de toi tel pitié et te fis teus vertus
 Que lors fus de ta terre saisis et revestus
 Si eüs tes prisons desliés et rendus.
 Tu juras a tes homes par tes dieus mescreüs
 C'onques si larges hom ne fu el mont veüs;
 Les dons que t'ai doné ai malement perdus.
 Va t'ent en ta contree, rompus est li festus,
 Ja ne t'amerai mais ne ne seras mes drus.
 S'en champ te puis trover, mors es et confondus, [3940]
 Ne te puet garandir ne haubers ne escus
 Que desi qu'es arçons ne soies porfundus."
 [3.220]Lors s'en torne Porrus, mal est partis du roi;
 Semont toute sa terre et met en tel effroi.
 Il en jure ses dieus et son chief et sa loi
 Que tant comme Ynde dure mar i remanront troi
 Qui puissent porter armes ne joster en tornoi;
 Et se nus i remaint, il en plevist sa foi
 Que il iert griilliés ou rostis en espoi.
 Tresq'a quarante jors portent pain et conroi; [3950]
 Ne laira por paor ne por autre boufoi
 Q'entre Ynde et les desers ne se mete el chaumoi.
 Ja ains ne remandra li consels de par soi
 Tant que li Grieu seront en bataille tuit coi;
 Ou il ou Alixandres en sera pris au broi.
 [3.221]Porrus semont ses homes si effr[e]ement,
 Qu'il en jure ses dieus et canq'a aus apent
 N'a si lointaing ami ne si prochain parent,
 Se il ne vient a lui a grant efforcement,
 Que il nel face pendre et presenter au vent. [3960]
 Li arbalestier furent plus de mil et set cent,
 Onques Dieus ne fist home qui nombrast l'autre gent.
 Soissante chevaliers des melors d'Ynde prent
 Et vient a Alixandre, sa terre li deffent
 Que il n'i entre mais ne n'i pregne noient,
 Car s'il le trovoit ens tant com uns ars destent,
 Ja ains ne seroit hors qu'il le feroit dolent.
 Alixandres l'oïparler si fierement,
 A malvais se tenra se il ne s'en repent.
 [3.222]"Porré, dist Alixandres, or ies en ta contree, [3970]
 Assés m'as manecié et ta terre vee,
 Orguel et grant folie as faite et porpensee.

Vois tu la ma compaigne qui tant est redoutee?
 Toute la gent du mont n'avroit vers li duree,
 Tu l'as ja par deus fois en bataille esprovee.
 Cil qui riens n'ont forfait por q'en prendront colee?
 Combatons nos andui cors a cors en la pree,
 Et se tu me pués vaintre et conquerre a t'espee,
 Je te dirai la fin qui t'iert asseüree:
 Mi home s'en iront tuit cuite en lor contree, [3980]
 N'en porteront du tien vaillant une denree;
 Et se je te puis vaintre, j'ai ta terre donee."
 "Par foi, ce dist Porrus, ains l'avrois comperee.
 Ceste fins que me dites se m'est asseüree,
 Ja mais ceste bataille ne sera trestornee."
 [3.223]De la bataille faire l'aseüra li rois,
 Ambedui la plevissent et jurent sor lor fois.
 Porrus s'est tost armés, voiant tous les Grigois; [3988a]
 Il vesti une broigne serree de grant pois, [3988b]
 Li pan et la ventaille en sont d'or espanois,
 El cercle de son hiaume sont paint li douze mois; [3990]
 Et ses escus fu fais d'un grant poisson marois,
 Desus fu covers d'or et dedens fu tous blois;
 A son col le pendi par la guige d'orfrois,
 De plaine terre saut sor le destrier norois.
 Qant se fu eslaissiés, de ce fist que cortois
 Q'il escria s'ensegne quatre fois en yndois.
 [3.224]Alixandres s'arma a guise de vassal;
 Il vesti une broigne, ainc nus hom ne vit tal,
 Car ja hom qui la porte n'avra dolor ne mal;
 El cercle de son elme sont molt cler li esmal. [4000]
 Son escu a son col, sailli sor Bucifal
 Et a pris un espié o la hante poingnal;
 La ou il vit Porrus, s'eslaissa en l'ingal.
 Porrus le vit venir, si l'atent a estal;
 Si le fiert en l'escu el senestre costal
 Que son glaive depiece tres par mi le cheval.
 Li rois le vait ferir a la guise mortal,
 Que la broingne li trenche les la vaine orgenal;
 Rompent les estrivieres et engles et poitral.
 Tant com hanste li dure l'eslonge du cheval; [4010]
 Trestous joins s'en passe outre et fait le tor roial.
 [3.225]Ançois que li rois fust arriere repairiés,
 Se fu Porrus levés et en estant dreciés.
 De riens n'est Alixandres desjoins ne desliés,
 La ou il vit Porrus vers lui s'est adreciés.
 Qant cil le vit venir, forment s'est esmaiés,
 Sot que li rois fu fors et trenchans ses espiés;
 S'il le fiert contre terre, mors est et escachiés.

A une part se traist, car el cors fu plaiés.
 Alixandres li dist: "Por noient guenchisciés, [4020]
 Onques ne fu encor geudons par moi touchiés."
 Qant Porrus l'entendi, vers lui s'est aprochiés
 Et traist le branc d'acier, qui n'estoit pas oschiés,
 S'en a a Bucifal les deus garés trenchiés;
 Li chevaus chiet a terre, li rois vint sor ses piés.
 De ce fu Alixandres coureçous et iriés.
 [3.226]Li rois fu a la terre, ses chevaus fu perdus,
 Mais por ce n'est il mie recreans ne vaincus.
 La ou il vit Porrus, seure li est courus;
 Li dels de Bucifal li iert ja chier vendus. [4030]
 O les brans acerins detrenchent lor escus;
 Ains qu'il se fust de lui partis ne desrompus,
 Le navra en trois lieux du branc qui fu molus.
 Alixandres le haste, qui se fu irascus,
 Trois plaies li a faites, bien fu en char ferus;
 Del sanc qui ist de lui est molt grans li palus.
 La coiffe del hauberc, dont les las ot rompus,
 Li vint sor les espaulles et li chiés remest nus.
 Ja chaïst a la terre pasmés et estendus,
 Qant il fu par le roi souspoiés et tenus; [4040]
 S'espee li veut rendre et se claime vaincus.
 [3.227]"Porré, fait Alixandres, molt fus ja mes privés,
 Tes cors et tes avoires me fu abandonés,
 Et se tu ne te fuisses de m'amor dessevrés,
 Li dons de Babilone t'eüst esté donés.
 Qant tu vaincus te clames et a moi t'ies livrés,
 Ne seras mais par moi de mal faire adesés,
 Ains te donrai respit tant que soies sanés,
 Por ce que seüirs soie par ostages livrés,
 Qant seras de tes plaies garis et respassés, [4050]
 Que tu venras el champ sor ton destrier armés;
 Lors avras tes ostages garis et aquités."
 "Sire, ce dist Porrus, malement sui navrés.
 Par la vostre merci a mes homes alés,
 De ciaux que vos plaira trente m'en amenés."
 Alixandres meïsmes i est a pié alés.
 Et quant fu des ostages molt bien asseürés
 Et que Porrus li ot par sairement livrés,
 Alixandres remest et cil en fu portés.
 [3.228]Li rois s'est desarmés, iluec se hebrega, [4060]
 Son cheval vit morir, mervelles l'en pesa.
 Ainc vilains de la terre mie n'en escorcha,
 Au trenchant de l'espee trestout le detrencha;
 Des crins ne de la ceue nus hom nen adesa
 Ne onques de la char chiens d'Ynde ne gousta;

Une fosse fist faire, molt parfont l'enterra.
 Une cité i fist, de haut mur la ferma;
 Les homes de la terre trestous i amena,
 Desque pueplee fu, onques ne s'en ala;
 Mist li non Alexandre au pui Bucifala, [4070]
 Ce fu une cités que mervelles ama
 Por amor son cheval que ja n'oublïera.
 Maintes fois por s'amor a ses deus ieus plora,
 Biau don li a doné et bien franchie l'a;
 Ja n'iert homs si faidis, des que la parvenra,
 Que ja i ait regart tant comme il i sera.
 Aristé oiant tous par non en apela,
 Voiant tout son barnage la cité li dona.
 [3.229]Porrus s'en fait porter a son mellor repaire,
 Mire ot a son talent cortois et de bon aire [4080]
 Qui tel poison li done tout le cuer li esclaire;
 Onques riens n'i remest de venin ne de glaïre,
 L'entraï qui fu as plaïes fu bons et souef flaïre.
 En vint jors fu plus sains que faus qui gerpist s'aire
 Et voit de la bataille qu'il ne s'en puet retraire,
 Il en est plus dolens assés que il ne paire.
 Por ce qu'il fu assés plus d'Alixandre maire,
 Li cuide il faire mal et grant honte et contraire.
 En son espié trenchant fist une hante faire
 Bien deus toises plus longe que l'Alixandre n'aire; [4090]
 Par ce le cuide abatre et l'ame du cors traire
 Q'il puisse a lui ataindre et mal li puisse faire,
 Car autrement, ce pense, ne li puet il forfaire.
 Qanque Porrus engingne tout ce ne monte gaire,
 Car aïnc nel pot lever ne de l'arçon fors traire.
 [3.230]Porrus fu sains des plaïes, mire ot a son talent.
 Qant ot le cors gari et sain et combatant,
 Por ce que Alixandres l'avoit fait recreant
 Vergoingne ot vers ses homes, molt s'en vait eschievant.
 Par quatre chevaliers et par un drugemant [4100]
 A mandé Alixandre selonc le covenant
 Pres est de la bataille, mais que le jor li mant.
 Li messagier monterent si sont alé avant
 Et truevent Alixandre, le hardi combatant,
 Ou juoit as eschés a Tholomé le grant.
 Li message s'arestent devant lui en estant:
 "Sire, Porrus te mande pres est del covenant.
 Se tu veus la bataille, di li le jor devant,
 Si t'apareille bien, car il vendra avant."
 Qant Alixandres l'ot, tous taint de maltalant, [4110]
 Aristé apela par molt fier hardement,
 Dona li trestoute Ynde desi q'en Oriant,

Le palais et la trelle trestout a son commant
 Et la terre de Bastre, que il pot amer tant;
 Puis revient as messages si lor dist en riant:
 "Segnor, dist Alixandres, franc chevalier vaillant,
 Ce me dites Porrin: trestout a son vivant
 Ai donee sa terre Aristé par mon gant,
 Bucifal veul vengier, dont j'ai le cuer dolant.
 Se le matin n'est ci a l'aube aparissant, [4120]
 Tous sera parjurés et sel ferai taisant,
 Perdu avra sa terre, son or et son argent,
 Si ostage n'avront ja mais par lui garant;
 Vengier veul Bucifal a m'espee trenchant.
 Tant com le savrai vif, n'avrai mon cuer joiant."
 [3.231]Li message s'en tornent, arriere sont venu,
 De quanqu'il ont oïen ont un mot teü.
 Li latimiers parole et a dit a Porru:
 "Alixandres te mande et jure quanque fu,
 Se demain ne l'atens sor Morel le crenu, [4130]
 Perdue avras ta terre et avras conneü
 Que trestuit ti ostage seront encoreü.
 Il a ja de ta terre Aristé revestu,
 Si que nos l'avons tuit et oïet veü.
 Bucifal veul vengier, dont a le sens perdu;
 Hui matin se vanta a Tholomé son dru
 Que demain te taudra le chief desor le bu."
 "N'est mie de mervelle, Porrus a respondu,
 S'il me tient por malvais et por escombatu;
 Chacié m'a de bataille et cors a cors vaincu. [4140]
 Se mi dieu me garissent ma force et ma vertu,
 Ains avrai rout l'auberc et percié mon escu
 Que il ait mon païs que maint jor ai tenu."
 [3.232]La nuit se jut Porrus et fu en grant freor.
 Por ce que Alixandres avoit doné s'onor,
 Ne li caut de sa vie ne de mort n'a paor;
 Au matin crient targier, de ce fu en error.
 Qant vit l'aube aparoir et du soleil l'ardor,
 Il a prises ses armes et monte el missaudor,
 Vint au tref Alixandre, le roi mascedonor. [4150]
 Por ce qu'il fu desvés et plains de grant iror,
 A dit au roi tel chose qui torna a folor:
 "Alixandre, fait il, escoute ma clamor,
 Es desers te gardai a joie et a baudor
 Tresq'as bonnes Artu, ainc n'i sentis dolor,
 Et je souffri por toi et le vent et l'ardor,
 La noif et la gelee et la roisde froidor
 Et te servois bien et tenois a segnor.
 Qant tu venis des arbres ou alas a cremor,

Vers toi m'ont encusé ti serf losengeor. [4160]
 Je ne m'en tornai mie a loi de traïtor,
 Ençois te deffiai et parti de t'amor.
 Geü as en ma terre et esté a sejour,
 Onques tant ne prisas ne moi ne ma valor
 Que ne l'aies donee a un tien vavassor.
 De tous les plus malvais me tiens au noaïllor
 Et je si sui por voir: je me tieng au pior
 Qant je daignai servir a fil d'enchanteor.
 Mi ostage sont cuite, je sui pres de l'estor;
 Ancui verront cil d'Ynde et li Grieu soduitor [4170]
 A nos brans acerins qui avra le le mellor."
 [3.233]Laidement a Porrus le roi araisoné
 Qant fil d'enchanteor l'a son oiant clamé.
 Alixandres l'esgarde sel tient por forsené,
 Ne li daigna respondre ne li a mot soné.
 De mervelloses armes a son cors conréé.
 La sele li ont mise sor le vair Tholomé;
 Ce estoit uns chevaus mervelles alosé,
 Il n'ot en toute l'ost destrier si abrievé;
 Toute la crope ot noire, blanc furent li costé, [4180]
 Ansdeus les cuisses plaines, si pié furent caupé,
 Les espaulles ot yndes et le col ot tieulé
 Et la teste vermelle par lieus de blanc mellé.
 Alixandres i monte par son estrier doré
 Et pendi a son col un fort escu listé
 Et tint en son poing destre un espié neelé;
 La ou il vit Porron si l'a araisoné:
 "Porré, dist Alixandres, je te tieng por desvé.
 L'autr'ier te combati cors a cors en cest pré;
 Qant je t'oi abatu et ens el cors navré, [4190]
 Tu me crias merci; je l'avoie enpensé,
 Se tu te deduississes a loi d'ome sené
 Et mon cheval n'eüsses ocis ne afolé,
 M'ire et mon maltalent t'eüsse pardoné,
 De quanque m'as mesfait ne fust ja mot soné.
 Or me ras dit folie; ses qu'i as conquesté?
 Ne te lairoie vivre tant qu'il fust avespré
 Por tout l'or de cest mont, tant t'ai cuelli en hé;
 Se je te puis sorvaincre, le chief avras caupé."
 "Sire, ce dist Porrus, ja est ce tout passé; [4200]
 Vos en repentirés, a tort m'avés blasmé.
 Mi ostage sont cuite qui vos furent livré,
 Ves me ci de bataille garni et et apresté."
 Li uns broche vers l'autre, si se sont desfié.
 Porrus ot longe lance, si l'ot ains enversé
 Q'il puisse a lui ataindre ne qu'il l'ait adesé.

Cil de Bastre cuidierent qu'il l'eüst aterré,
 Tuit crierent ensamble si ont un hu levé;
 De joie qu'ot Porrus s'eslaisse en mi le pré.
 Alixandres saut sus, n'i a pas demoré; [4210]
 Ja comperra Porrus, bien le ra encontré.
 [3.234]Il brocent les destriers, chascuns est airés.
 Grans caus s'entredonerent es escus painturés,
 Desous les boucles d'or les ont frais et troués,
 Molt sont fort li hauberc qant il nes ont faussés;
 L'uns ne l'autres ne chiet, si est chascuns pronés.
 Este les vous au chaple o les brans acerés.
 Porrus a trait l'espee dont li poins est dorés,
 Vait ferir Alixandre sor l'elme qu'est gemés
 Que les flors et les pierres en a jus arasés, [4220]
 De l'escu un quartier, qui a or fu listés,
 Et tant com il consieut del hauberc qu'iert saffrés
 Et la chauce de fer et l'esperon de les;
 Damedieus le gari q'en char n'est adesés.
 Por quant si est li rois si forment estonés
 Por poi ne chaïjus du cheval tous armés.
 Cil d'Ynde et cil de Bastre en ont lor cris levés:
 "Vassaus, rendés vos tost, que ne soiés tüés."
 Et la gent Alixandre s'escrie de delés:
 "Que fais tu? Tien te bien, gentieus rois coronés. [4230]
 Onques mais por caup d'ome ne fus si aterrés,
 Nous somes trestuit mort se tu es affolés."
 Et cil de l'autre part ont si grans cris levés
 Que n'i puet oïr goute nus hom de mere nes;
 Vis est que se combatent et qu'en soit mort assés.
 Porrus oïla noise et le cri qu'est levés,
 Pensa que de ses homes i fust aucuns mellés,
 Il en ot grant paour si les a escoutés,
 Devers l'ost se retorne si les a esgardés;
 Il a fait grant folie, tost en iert affolés. [4240]
 [3.235]Alixandres se drece, tuit en sont irascu,
 Et entendi la noise et le cri et le hu.
 A ce que tuit l'esgardent, a bien aparceü
 Que la dolor qu'il ot de la soie gent fu.
 Il esgarde sor destre si a choisi Porru,
 De Bucifal li poise que il avoit perdu
 Et del ruiste contraire que il li ot rendu,
 Que dist au pavellon fieus d'enchanteor fu;
 Se il or ne se venge, tient soi a confondu.
 Il a traite l'espee, qui le branc ot molu; [4250]
 Dementres que Porrus a de la entendu,
 A mont desor son elme li a grant caup feru.
 Ne li vaut ses haubers la monte d'un festu

Q'il n'en trenche la teste et le vis et le bu
 Et la sele d'yvoire et le cheval qernu,
 Quatre moitiés en fist devant soi en l'erbu.
 Cil d'Ynde et cil de Bastre i sont poignant venu,
 Et dist li uns a l'autre: "Mervelles ai veü.
 Alixandres est fiers et de molt grant vertu."
 Sor lui a grant effors sont tuit acoureü; [4260]
 Et la gent Alixandre se sont tuit esmeü,
 A force i acoururent li grant et li menu.
 Et li home Porrus sont forment irascu,
 Ja l'eüssent ocis ou pris ou retenu,
 Qant vers aus tent ses mains si lor a respondu.
 [3.236]"Segnor, dist Alixandres, laissiés m'a vos plaidier.
 Se vos volés bataille ne estor commencier,
 Ce sera grant folie, trop me troverés fier.
 Vos n'avés qui vos gart ne face ralier;
 Vostres sires est mors, ne vos puet mais aidier, [4270]
 Et je vos di por voir que a l'estor premier
 Serés tuit desconfit, ja n'en irés entier.
 Mais rendés vos a moi et chasé et princier,
 Car tant com jou vivrai avrai chascun molt chier."
 Qant cil l'ont entendu, merci li vont proier,
 A lui se rendent tuit sergant et escuier
 Et après li haut home, baron et chevalier.
 [3.237]Porrus gist a la terre en deus moitiés caupés.
 Tuit le pleurent cil d'Ynde, car molt estoit amés,
 Et des Grigois meesmes la flor et li barnés, [4280]
 Q'il lor soloit doner or et argent assés,
 Chevaus et palefrois et bons muls sejournés
 Et dras et gonfanons, tout a lor volentés.
 D'Alixandre meïsmes est il molt regretés
 Et de chevalerie molt proisiés et lões;
 De la gent de la terre est forment dolousés,
 Li barnages de l'ost est iluec assamblés,
 Qui le plaignent et criënt: "Gentieus roi et senés,
 Com vous nos laissiés hui dolans et esgarés!
 Gentieus hom, preus et sages, de tous biens apensés,[4290]
 De conseil et d'aïde en tous tans porpensés,
 Li avoires de nos terres est hui anientés,
 Li deduis, li depors est ore tous alés.
 Molt par est grans dolors q'encore ne vivés,
 Car de vos enemis estiés redoutés
 Et de tous vos amis proisiés et honorés;
 Vous leur donïés bours et chastiaus et cités.
 Qui maintendra vos terres, ou sera il trovés,
 Et nos tuit que ferom? Sire, car respondés
 Après toi morrons tuit, cist dons nos est donés,[4300]

Et après toi irons puis que tu es finés."
 [3.238]Si grant duel fait chascuns que nus nel puet veïr,
 Qui les voit ne se puet de plourer astenir,
 Car tant fort se dementent que nus nes puet oïr.
 Li rois est les le cors, onc nel vaut deguerpir,
 D'un paille d'Oriant le fait bien sevelir.
 Por ce que en sa vie le fist si bien servir,
 Et qu'il fu nobles hom et de tant grant aïr,
 Li fist tel sepulture et fonder et bastir
 Dont il sera parlé tresq'au siecle fenir. [4310]
 Une cité fist faire et de haut mur garnir
 En l'onor de Porron, qant l'ot fait enfoïr.
 Tresque pueplee fu ains ne s'en vaut partir,
 Et a fait par la terre et crïer et banir
 Que Alixandre ait non, si la veut establir.
 [3.239]Porrus gist a la terre, ains li rois nel guerpi,
 Ains prie Damedeu que il en ait merci.
 Au cors sont assamblé cil de Bastre et li Gri.
 Li douze per le pleurent qant l'orent seveli,
 Car maint don lor dona et maint jor les servi. [4320]
 Un molt riche sepulcre li a li rois basti,
 Tresq'en la fin du siecle nen iert mis en oubli.
 Une cité i fist, de haut mur la garni,
 Devant qu'il l'ot pueplee onques ne s'en parti;
 Alixandre l'apelent de sornon la Porri.
 [3.240]Cil d'Ynde et cil de Bastre, li prince et li chasé,
 Tout droit a Alixandre en sont trestuit alé,
 Tuit sont prest qu'il li facent fiance et seürté.
 Li rois a fait venir devant lui Aristé
 Et dist lor que il facent a celui feeuté; [4330]
 Devant lui ont iluec et plevi et juré.
 Et qant il orent fait iluec la feeuté,
 Alixandres lor prie qu'il soient si privé
 Et servent par amor lor signor Aristé;
 Et cil ont respondu et bien acreanté
 Que il l'ameront plus c'ome de mere né.
 "S'il nos aime et fait bien, nos l'en savrons bon gré
 Et serons du servir garni et apresté."
 A Aristé en vienent, congié ont demandé,
 Car chascuns s'en reveut aler en son regné; [4340]
 Et il l'a a chascun otroié et graé.
 Li rois les aime molt et tient en grant chierté;
 Por ce que il ont faite toute sa volenté,
 De son avoir lor a molt largement doné.
 De lui prenent congié si s'en sont retorné,
 De lor signor se partent par grant humilité.
 Chascuns d'aus s'en retourne droit a sa fremeté,

Et la menue gent la ou ont conversé.
 Molt se fait chascuns liés du segnor q'ont trové,
 Molt le tienent a sage et a bien doctiné. [4350]
 [3.241]Li rois sot des deus arbres que on claime d'Ibroine
 Qu'il ont dit qu'il morra a venim de syphoine.
 Ses letres, ses sèaus tramist par testemoine
 A Divinuspater, qui fu nes de Sydoine,
 Et a Antipater, le fil au viel Antoine,
 Q'il ne laissent por riens ne por nisune essoine
 Q'a un an et un mois soient en Babiloine,
 Si verront la richece qu'il maine par le troine,
 Car n'a en sa compaigne si petite persoine
 N'ait a fin or batu tous les pans de sa broine; [4360]
 Tant i a esmeraudes et pierres de sardoine
 Qui valent le tresor au duc de Carcidoine;
 Lor escu sont orlé de pierre de Midoine.
 [3.242]Qant Divinuspater ot veü le seel,
 Du maltalent qu'il ot descira son mantel,
 N'i remest a desrompre atache ne noiel;
 Antipater apele si li tent le brevel.
 Qant il ot lit les letres, ne li fu mie bel,
 Si estraint son poing destre que brisa son anel.
 Or pleurent ambedui comme petit tousel, [4370]
 Et dient: "Qant nos fumes meschin et jovencel,
 Vesquimes en repos, chascuns en son chastel,
 Et or somes tuit viel si devenrons hapel,
 D'aler par le païs commencerons cembel,
 Du chaut et du soleil avrons noire la pel
 Et seront de suour porri nostre drapel.
 S'Alixandres vit longes, tuit seromes mesel,
 Ja mais tant com il vive n'avrons un jor de bel.
 Mais se faisons que sage, faisons lui tel chaudel
 Q'il nous laist en tel pais que soions damoisel, [4380]
 Car plus somes or vil que pute de bordel."
 [3.243]Dist Divinuspater: "Cis rois nos tient por fox
 Qui mande par ses letres, escrites sont a rox,
 Q'aillons en Babilone, la dont fu nes Minox,
 Por veoir la richece dont si home sont vox.
 Qant travellier nos veut, molt nos puet estre grox,
 Car ains q'aions passé les puis de Libanox
 De nos armes porter avrons brisiés les ox.
 A venim l'ocions, si abatons son lox,
 De tous ses mandemens serons puis tuit assox." [4390]
 Et dist Antipater: "A bien poi ne vos chox.
 Qui nos recepteroit? Qui ja seroit tant ox?
 Dont n'a il tout le mont dedens son puing enclox?
 On ne set home nul tant hardi ne tant ox;

Se nos n'alons a lui, trencheroit nos les cox.
 Chevauchier nos convient, ja n'avrons mais repox,
 A paines passerons les grans puis de Banox."
 [3.244]Qant oient li cuivert que pas ne remanront,
 Ou il veullent ou non, en Babilone iront
 Au fort roi Alixandre, qui est sires du mont,- [4400]
 Il les mande por bien mais mal li meriront,-
 Oés quel felonie et quel mal li feront:
 Le venim apareillent a qoi il l'ocirront.
 N'i remaint a cerchier ne bos ne val ne mont
 Ne gaut ne desertine qui tant soit en parfont,
 Por querre les serpens qui plus mortel i sont,
 Car del plus fort venim abevrer le vauront
 Qui soit en la contree et que il troveront;
 Bien le çoilent entr'eus, mais pluisor le savront.
 Encombrier lor doinst Dieus quant l'en abevreront! [4410]
 Si grant damage firent et grant duel par le mont.
 Ja mais en lor vivant si bon segnor n'avront
 Ne qui tel bien lor face ne tel avoir lor dont;
 Molt grant pais avoit faite, mais or le comperront.
 Li rois n'en savoit mot de ce que il li font,
 Ains iert a joie en Ynde. Car pendu en fuissent!
 Par matin sont monté, en Babilone vont.
 [3.245]Alixandre iert en Ynde si n'avoit nul dehet,
 En la cité q'ot fait sejournoit entreset.
 Qant ele fu fondee, tours i ot cent et set, [4420]
 Ne crient assaut ne siege ne tornoi ne aguet,
 Perriere ne berfroi n'engin qui ja soit fet.
 Molt fu la cité bele et sist en un desert,
 Il n'ot si aaisie, de ce soiés bien cert,
 Enfresi que a Baudaire, ou fu né Dagobert.
 Alixandres li rois a grant joie la let
 A Aristé son dru et guerpist entreset.
 Au matin est montés, en Babilone en vait.
 [3.246]Par trestout Oriant est la novele alee
 Que li rois Alixandres a si fort destinee [4430]
 Que sous ciel n'a cité de si haut mur fondee
 Qu'a lui puisse durer nisune matinee;
 Il est teus de son cors, c'est verités provee,
 C'un chevalier armé trenche tout a s'espee.
 Candace la roïne oïla renomee,
 Tant l'ama en son cuer a poi n'en est desvee;
 Ne puet prendre conseil comment soit sa privee,
 Et se ele l'i mande, crient que n'en soit blasmee,
 Et s'il ne vient a li, ce samblera posnee;
 Mieus vauroit estre morte qu'il l'eüst refusee. [4440]
 Ne por qant si s'est tant vers lui abandonnee

Que d'or molu d'Arrabe li envoie charee
 Et charchie une mule de porpre a or fresee
 Et soissante destriers du mieus de sa contree.
 Cil qui le present portent l'ont au roi tant loëe
 Que li rois l'aime tant qu'il l'a asseüree-
 Il en jure sa teste qui d'or est coronee-
 Que ja mar criembra home tant com il çaingne espee.
 Li message revienent, la novele ont contee
 Que li rois Alixandres l'a tant fort aamee [4450]
 Plus que nisune feme qui de mere soit nee.
 "E! Dieus, dist la roïne, com sui boneüree,
 Or puis je bien savoir li dieu m'ont regardee."
 [3.247]Lie fu la roïne et maine grant baudor.
 Des mellors dras de soie d'Ynde superior
 Et de ciaus de Nubie charchié un missaudor,
 Une ensegne de paile et paroles d'amor
 Tramet a Alixandre, le roi mascedonor.
 Aveuc ciaus envoia Apellés son paintor,
 Que sor tous les paintors en porte cil la flor; [4460]
 Onques Dieus ne fist chose, s'il s'en met an labor,
 Que il ne contreface autresi ou gençor
 La façon et la forme, ja mar querrés mellor.
 La roïne li prie a conseil celeor
 Que du roi Alixandre li escrive l'ator.
 Tant dis com Apellés fu iluec a sejour
 Une ymage i a faite de grosse et de longor
 Trestout a la samblance du roi mascedonor;
 Bele fu et bien faite, mist i mainte color,
 Ausi com li rois iert de grosse et de longor; [4470]
 Cil qui verra l'ymage ja nen iert en errour
 De connoistre Alixandre sans autre mostreor.
 Qant ot faite l'ymage, torne s'ent a peor,
 Crient que li rois nel sache, de ce en ot cremor,
 Et vint a la roïne, qui fu de grant valor.
 Ele reçut l'ymage et porte grant honor
 Por l'amor Alixandre le roi mascedonor.
 Qant la dame le voit si maine grant baudor,
 Forment l'a esgardee et loe le paintor,
 Ne la donroit nului por d'or plaine une tour. [4480]
 A celui qui l'ot faite dona por son labor
 Soissante livres d'or et cheval coureor.
 Et regrete Alixandre et lui et sa vigor,
 Sovent baise l'ymage, acole et vait entor;
 Tel travail a la dame ne puet avoir gregnor.
 [3.248]La gent de cele terre d'Ynde la desertine
 A l'issue de mai avoient un termine
 Q'il assambloient tuit au chief d'une gaudine

Por faire sacrefice, chascuns lonc son convine,
 A une lor deuesse c'on apele Lucine. [4490]
 Candeolus i vait, qui fu fieus la roïne;
 Sa feme maine o soi, qui fu joene meschine,
 Et trente chevaliers qui tuit sont de s'ourine,
 Trestous li plus lointains iert fieus de sa cousine.
 En mi sa voie encontre le duc de Palatine,
 Quatre cens chevaliers ot de gent barbarine.
 Qant vit la dame bele, si li taut par rapine;
 Ou ele veulle ou non, par force l'en traïne,
 Si que tout li derront son peliçon hermine,
 Et qant ele s'estort, si la prent par la crine. [4500]
 Candeolus le voit, de vergoigne s'encline,
 Mist la main a l'espee, qui fu d'oeuvre latine,
 Ja en ferist le duc tres par mi la poitrine,
 Se il ne fust guenchis desous une aube espine;
 Iluec se laist chaoir li fel, barbe sovine,
 Le cheval desous lui trencha par mi l'eschine.
 Se de son cors garir ne prent ore mecine,
 Ja estera pendus au chief d'une sapine.
 A esperon s'en fuit tres par mi la gastine,
 Dusq'au tref Alixandre ne cesse ne ne fine. [4510]
 Cil retornent arriere toute une viés sentine.
 Si en mainent la dame dolente et orfeline,
 Il en avront encore destorbier et haïne.
 [3.249]Devant le tref le roi une aucube ot tendue
 Qui estoit de soie ynde bien lacie menue,
 L'entree dedevant fu toute a or batue.
 Tholomés se sist ens et tint l'espee nue,
 La place d'entor lui fu de barons vestue.
 Cuida Candeolus por la gent q'ot veüe
 Que ce fust Alixandres, comme roi le salue. [4520]
 Tholomers comme rois li a raison rendue:
 "Amis, dont viens, ou vas et quels besoins t'argüe?"
 Candeolus respont parole aperceüe:
 "Sire, dist li vallés, molt grans besoins m'argüe,
 Li dus de Palatine m'a ma feme tolue;
 Se tu ne la me rens, a estrous l'ai perdue.
 Je sui fieus la roïne qui se tient por ta drue."
 Et Tholomés respont: "Grant paine t'est creüe,
 Or en prendrai conseil qant ma gens iert venue."
 Mandé a Alixandre, son droit non li remue, [4530]
 Antigolon l'apele a la teste quernue.
 [3.250]"Antigoné, fait il, vien ça isnelement.
 Vois ici un vallet qui de longues m'atent,
 Il est fieus la roïne qui me fist le present.
 Li dus de Palatine l'a bailli laidement,

Qui sa moillier li taut et mie ne li rant.
 Il s'en complaint a moi molt dolerusement;
 Se je la li lais perdre, ne sera mie gent."
 Alixandres respont molt afaitiement:
 "Cil qui merci te crie, jel te di ci briement, [4540]
 Molt avras le cuer dur se pitiés ne t'en prent;
 Et por amor sa mere se il merci ne sent,
 Ce ne sera pas bien par le mien ensient."
 Et Tholomers respont: "Or sai bien ou ce pent.
 Por ce que le conseilles et es en loëment
 Or i va tu meïsmes et maine de ma gent,
 Et par force la pren se li dus la content.
 Que ja mais ne te voie por nul essoinement
 Devant qu'il ait sa feme et canq'a lui apent."
 Antigonus respont: "A ton commandement." [4550]
 [3.251]Antigonus se torne devers Candeolon:
 "Candeolé, fait il, va t'ent en ta maison.
 O toi ameneras se tu as nul baron;
 Le matin endroit prime si m'envoie un guion
 Qui desous Palatine me conduie el sablon.
 A muls et a somiers nos engins porteront,
 Et cloies et eschieles et berfrois meneront;
 N'i a si haute tour ou nos bien n'avegnon,
 Et o le fu grigois ciaus de la vile ardront."
 Candeolus respont: "A Dieu beneïçon." [4560]
 Il saut sor le destrier, onques n'i quist arçon,
 Tout droit a la roïne est venus au perron.
 [3.252]La roïne est as estres et ne furent que troi,
 Et vit Candeolon venir a grant esfroi.
 A val est descendue si l'a pris par le doi:
 "Biaus fieus, dont venés vos?" "Dame, je vieng du roi,
 Qui por la vostre amor m'aidera bien, ce croi;
 Antigonus me charche si li a dit por coi.
 D'un chevalier ques guit faites prendre conroi;
 Le matin aut a lui, ses armes port o soi, [4570]
 Desous Roche Pendant le conduie el sabloi;
 A soissante mil homes sera iluec o moi.
 Des que il iert montés, plevi en a sa foi,
 Ja mais ne guerpira l'estrier du palefroi
 Tant que sous Palatine descendra el gravoï."
 [3.253]La roïne fu lie et maine joie grant.
 Un chevalier apele cortois et avenant;
 Por ses armes porter vont o lui dui enfant.
 Connoissances ot vaires et un cheval ferrant,
 Droit a l'ost Alixandre en est alés poingnant. [4580]
 Li rois et Tholomés s'aloient deduiant,
 Encontrent le message qu'il vont contratendant.

Alixandres parole si li dist en riant:
 "Amis, parole a moi, di nous que vas querant. "
 Et cil a respondu: "Antigonon demant.
 Je vieng por lui conduire trestout a son talant,
 Trop criem avoir targié, por ce me vois hastant."
 "Amis, dist Alixandres, or aies pais a tant,
 Assés es tost venus selonc le convenant.
 Je sui Antigonus, ja mar iras avant." [4590]
 Li rois et li conduis remerent la parlant
 Et Tholomés s'en torne sor un mulet amblant
 Et vait par les herberges les barons semonant.
 Soissante mile d'omes hardi et combatant;
 S'en issirent des tres tout de soleil estant
 Li conduis les en guie droit a Roche Pendant.
 Dejoste une sauçoie les une eaue bruiant
 Truevent Candeolon, ques vait contratendant;
 Qant il les vit venir, molt ot le cuer joiant.
 Par desous une lande les va si adreçant [4600]
 Q'a Palatine vinrent ançois l'aube aparant,
 A la porte descendent si se vont hebregant.
 [3.254]Alixandres descent joste l'eaue el rivage,
 Envoie por le duc et livre guionage.
 Qant li dus fu venus, si li dist son corage:
 "Ce te mande Alixandres, de moi a fait message,
 Qu'a cest fil la roïne qui est cortoise et sage
 Rendes li sa moullier et fai droit de l'ontage.
 Se tu autrui mollier veus tenir en putage,
 Ja seroit ce meruelle et fors orguel et rage. [4610]
 Comment la tenras tu et feras tel outrage?
 Tel chose ne doit faire nus hom de ton parage.
 Se tu ne la li rens, tu feras ton damage;
 Li rois de Mascedoine m'a semons par homage
 Que la cité li rende et fonde ton estage
 Et te pende a la porte, voiant tout ton barnage."
 "Par Dieu, ce dist li dus, or oi je grant folage;
 Je ne tieng d'Alixandre la monte d'un fromage.
 Dit que cele li rende qui le cuer m'asouage;
 Dehait ait qui por lui emploiera son gage." [4620]
 [3.255]Alixandres li dist: "Ce te mande mes sire:
 Qant tu autrui mollier retiens en avoltire,
 Dont n'es tu pas loiaus, il le me rova dire.
 Qant je tornai de lui, en mes briés fist escrire
 Soissante mile d'omes du mieus de son enpire.
 Ançois que midis past te cuit je si aflire
 Que ces grans tours de marbre ardront plus cler que cire
 Et toi et tous tes homes livrerons a martire,
 Ja vis n'en estordra li mieudres ne li pire."

Li dus ot la manace, de maltalent souspire, [4630]
 Il comperra ancui ce qu'il dira par ire.
 [3.256]"Par Dieu, ce dist li dus, assés te tieng por nice;
 Tes sires me manace et laidenge et covice.
 Il a la loi du chien qui les autres pelice;
 Des qu'il trueve mastin qui vers lui se hirice
 Met queue entre ses jambes si crient q'on ne le hice.
 Ma cités n'est pas close de verge ne de clice,
 Ains est de haut mur çainte de pierre tailleice.
 Je ne tieng d'Alixandre vaillant une saucice,
 Ne lui ne sa manace ne pris un fil de lice. [4640]
 Ce dist que jou li rende qui au cuer m'est delice;
 Dehais ait qui por lui enterra en jostice
 Ne qui por lui feroit vaillant une raïce."
 [3.257]Or s'en revait li dus, dolens et irascus;
 Mais encor n'estoit mie el palais descendus,
 Garde derriere soi si a les Grieus veüs.
 Vit les engins dreciés et les berfrois tendus
 Et les murs qui sont pris et des Grigois vestus
 Et les grans tor de marbre qui ardent comme fus.
 Lors dist a soi meïsm: "Mors sui et confondus." [4650]
 Tout droit a Alixandre est sans conduit venus,
 La feme li presente dont li maus est meüs
 Et veut doner ostages que li drois soit seüs.
 "Par Dieu, dist Alixandres, trop estes tart meüs,
 Ja mais n'en iert drois pris ne gages receüs.
 Qant ta cités iert arse et tes palais fondus,
 La robe toute prise et tes avoïrs tolus,
 Donés et departis, gastés et despendus,
 Se Candeolus veut, si seras tu pendus."
 Li dus fu esbahis et de paour vaincus; [4660]
 Antigonus s'en torne, cil remest iluec mus.
 Palamidés le garde et Crenus li chenus.
 [3.258]Qant la cités fu prise et arse et enbrasee
 Et li avoïrs perdus, la gent toute robee,
 Alixandres fu hors, sa teste desarmee;
 Sist sor un cheval noir et tint nue s'espee.
 A l'un des estalons dont la porte iert fremee
 A fait pendre le duc qui la dame ot preee.
 Candeolon apele si li rent s'espousee,
 Les prisons et la proie li a toute donee [4670]
 Et trestout l'autre avoir, ainc n'en retint denree.
 "Amis, maine ent ta feme que je t'ai aquitee."
 Cil li a respondu: "Autre chose ai pensee:
 Mi home l'en menront, ma dame iert commandee.
 Qant l'onor ne puet estre par moi guerredonee,
 Si l'en mercïerai qu'il nel tiegne a corvee."

Alixandre respont: "Ce me plaist et agree."
 [3.259]Lors font cuellir lor tres, andoi en sont torné.
 Alixandre a pris un message privé,
 Droit a l'ost l'en envoie por querre Tholomé; [4680]
 Tholomés vait encontre deseur son vair comé.
 Alixandres li mostre samblant d'umilité,
 Descendus est a pié si li a encliné.
 Et Tholomés s'areste, comme rois a parlé;
 Orgelleusement dist: "Ça vien, Antigone.
 Que quiert Candeolus? Por coi l'as amené?
 S'il n'a droite justice du duc qui l'a robé
 Et s'il n'a sa mollier, malement as ovré."
 Alixandres respont: "De toute sa cité
 Sont les tours depecies et li mur crevanté, [4690]
 Li piler trebuchié et empli li fossé.
 Cestui rendi sa feme tout a sa volenté,
 Les prisons et la proie et canqu'i ot trové,
 Ainc n'en reting denree, ains li ai tout doné."
 [3.260]"Amis, dist Tholomé, quant ta feme as eüe,
 Va t'ent a la roïne, de ma part la salue,
 Di li que une fois la veul avoir veüe."
 Candeolus respont parole aperceüe:
 "Se tu i veus aler, molt avras bone aiue,
 Car je te conduirai les plains de Valgrenue, [4700]
 N'i troveras mal pas ne grant eaue creüe;
 De bons pailles fresés la chambre iert portendue,
 L'onors que m'avés faite vos i sera rendue."
 Et Tholomés respont: "Ne l'ai pas conneüe,
 Amor de riche dame molt tost se change et mue,
 Teus cuide qu'ele l'aint nel prise une laitue;
 Se primes n'en estoit garnie et perceüe
 Que je alasse a li, seroit tost irascue;
 Por moi torner arriere diroit une treslue.
 Lors si avroie honte et ma voie perdue." [4710]
 [3.261]"Amis, dist Tholomés, savoir dois et entendre
 Riche dame n'a cure q'on la doie sousprendre;
 Qui parler veut a li jor en doit primes prendre,
 Qui folement i vait grant haïne i engendre.
 Mon mes li trametrai, car ne la veul offendre,
 Si parlerai a li samedi ou devenir.
 Se par le mien message me veut sa raison rendre,
 L'amor que j'ai a li nen iert ja por ce mendre."
 [3.262]"Amis, dist Tholomés, qui porrai envoie?
 Se je i envoioie un autre messagier, [4720]
 Il te seroit estranges et maus a acointier;
 Antigonus ira, qui avec toi fu ier,
 Qui te fist droit du duc et rendi ta mollier;

Por ce qu'il t'a servi, si l'en avras plus chier,
 Si l'en raconduiras se il en a mestier."
 Et dist Candeolus: "N'i avons que targier."
 Et respont Alixandres: "Vois m'ent apareillier."
 [3.263]Alixandres s'en torne et monte el palefroi,
 Li lorains et la sele fu Salemon le roi;
 Trente et cinc chevaliers mena ensamble o soi. [4730]
 Candeolus les guie les plains de Valgrenoi,
 A une part le traist si li dist en secroi:
 "Belement chevauchiés, n'alés mie a effroi.
 Ceste terre est seüre et li home sont coi,
 N'i a nul qui ne tiegne de ma mere ou de moi.
 Je m'en irai avant por faire le conroi."
 Alixandres respont: "Bien est et je l'otroi."
 [3.264]Candeolus s'en torne si s'est du roi partis,
 Vait s'ent grant aleüre deseur son arrabis,
 Dedevant la roïne descent sor un tapis. [4740]
 "Biaus fieus, dist la roïne, molt venés escharis.
 Que fait li mieudres rois qui onques fust escrit?"
 "En la moie foi, dame, tous est preus et hardis.
 Tramet vos un message, qant li jors sera dis
 Qu'il parlera a vous, ja n'en iert pris respis:
 Antigonus a non, li plus amanevis
 Que onc veüst des ieus Persans ne Arrabis.
 Nel despisiés vos pas por ce s'il est petis;
 Espaulles a bien faites et les membres fornis.
 Quarante chevaliers n'a el val de Grenis, [4750]
 Tant soient garni d'armes ne de haubers treslis,
 Se il estoit armés et fust un peu maris,
 Ains nes eüst tous pris que par aus fust saisis.
 Il me fist droit du duc, qu'il pendi au postis,
 Et destruisit Palatine desi q'en la raïs
 Et me rendi ma feme, dont iere malbaillis."
 "Biaus fieus, dist la roïne, molt par iert bien servis,
 Ja de riens que il veule ne sera escondis."
 [3.265]Qant la roïne entent q'Antigonus venoit,
 Ele li vait encontre, tantost comme el le voit [4760]
 Membra li de l'ymage, lores sot bien et croit
 Que ce est Alixandres, mais dire ne l'osoit;
 Puis que il son non çoile, bien tost l'en peseroit.
 Antigonon l'apele, par la main le tenoit,
 Puis le maine en la chambre ou la peinture estoit;
 Tres dedevant l'ymage en son lit l'asseoit.
 Qant voit lui et l'ymage, bien s'en apercevoit
 Que ce iert Alixandres qui avec li estoit.
 Lors l'a mis a raison, doucement li disoit:
 [3.266]"Sire, dist la roïne, ne te merveillier mie [4770]

De ceste gentil dame que t'amor a saisie.
 Vois tu la cele ymage qui por toi fu bastie?
 Ja hom ne la verra qui bien ne sache et die
 Que tu es Alixandres, a qui li mons sousplie;
 Se tu vers moi te çoiles, ce sera vilonie."
 Qant Alixandres l'ot, lors n'a talent qu'il rie
 Et dist une parole qui molt bien fu oïe:
 "Qant je laissai m'espee, molt par fis grant folie;
 Se je la tenisse ore, n'en portissiés la vie."
 Qant la dame l'oï, molt en fu esmarie, [4780]
 A la terre se couche, merci demande et prie:
 "Ce q'amors me fait faire ne tien a vilenie."
 [3.267]"Sire, dist la roïne, tu es et rois et dus;
 Se tu fenis sans oir, deus iert et mar i fus.
 Nule riens ne nos voit, ci somes en renclus;
 Proisie sui roïne, mais d'une riens m'encus
 Q'il n'a si bele dame dusq'as bonnes Artus.
 De ta volenté faire nule riens ne refus;
 Se je te puis avoir, par le roi de lassus
 De la gloire du mont ne querroie avoir plus. [4790]
 Moi soies Alixandres si que nel sache nus,
 Et a trestous les autres soies Antigonus.
 Nus ne set qui tu es, de ce molt bien m'escus,
 Ains cuident que tu soies ou cuenspalais ou dus."
 [3.268]Uns des fieus la roïne, sa mendre porteüre,
 Est entrés en la chambre, trestous ses dieus en jure
 Que ce est Alixandres, li rois d'Estrameüre:
 "Il m'ocist mon segnor par grant mesaventure,
 Le pere ma mollier, dont ai au cuer ardure;
 Doné a son roiaume et taut moi ma droiture. [4800]
 Des que nos l'avons ore en nostre claveüre,
 Dame, car l'ocions, ce seroit bien droiture."
 La roïne respont: "Tais, fole creature!
 Ce n'est mie Alixandres, j'en sui toute seüre.
 Se Candeolus t'ot, fait as ta norreture;
 S'il ne pooit trover ne mais que sa çainture,
 Si te pendroit il ja a cele entraveüre.
 Cist fu aveuc ton frere en la desconfiture,
 Antigonus a non, nes est de terre dure."
 "Dame, c'est Alixandres, si com dist la peinture; [4810]
 Vengier veul mon segnor de la grant forfaiture.
 Il m'a mis hors du regne qu'i[l] a mon segre fure,
 Ja li metrai cest dart tres par mi la faiture."
 La roïne respont: "Tais te, foleteüre!
 Ja n'avras point de sens, faus seras par nature;
 Por ce qu'il le resamble de la cheveleüre
 Cuides que ce soit il de cors et de faiture.

Ainc sous le monde Dieu n'avint tele aventure
 Que Dieus a itel home donast du mont la cure."
 [3.269]"Ne me chaut, fait li enfes, se ce est il ou non, [4820]
 Car tout ai en talent que cestui ocions;
 Vengons nos de cestui, quant de lui ne poons,
 Si savra bien li rois que de riens ne l'amons."
 "Voire, fait la roïne, a Dieu maleïçon!
 Li rois le m'a tramis, s'en ferai traïson?
 Fui, gars, d'en sus de moi, n'ai soing de ta raison;
 Les dens te peçoiasse se tenisse un baston."
 De la paume li done dejoste le menton,
 D'en sus soi le bouta sel hurte a l'estalon;
 Plorant ist de la chambre et vint en la maison. [4830]
 [3.270]Pensive est la roïne et est en grant freor
 Du roi qu'il ne marisse por son fil le menor,
 Piteusement li prie o lermes et o plor
 Du vallet c'a oïli pardoint la folor,
 Car se il nel faisoit seroit en grant esror.
 Qant li rois vit les lermes, un poi ot de tenrour
 Et dist a la roïne, qui fu de grant valor:
 "Se il m'avoit pis dit et fait honte gregnor,
 Tout seroit pardoné, dame, por vostre amor."
 La roïne s'apoie dedelés l'aumaçor, [4840]
 Tant doucement l'enbrace qu'il senti la chalar;
 Grant joie font ensamble par bien et par amor,
 Desus un lit paré se jurent demi jor.
 Puis issent de la chambre sus el palais autor;
 Que on ne s'aperçoive, li a fait double honor:
 Tant com porent porter trente mul ambleor
 Li done d'or molu comme a empereor;
 Cent pailles de Biterne trestous d'une color
 Li a fait apoter a un sien vavasor.
 "Antigoné, fait ele, ce donras ton segnor. [4850]
 Et tu, qui es messages, avras por soie amor
 Un mantel sebelin de paile paint a flor;
 Et tuit ti compaignon seront por toi mellor,
 Chascuns avra deus pailles d'Ynde superior.
 De ça venir a moi ne se mete en labor,
 N'i porroie parler, car el chief ai dolor."
 Alixandres respont dit de losengeor:
 "S'Alixandres mes sires vous avoit a oïssor,
 Mieux avroit exploitié que tuit si ancissor."
 Lors a pris le congié si s'en torne a baudor. [4860]
 Candeolus le guie les plains de Valgrenor
 Si le rent Tholomé, le riche poingneor,
 Que il tenoit encore por roi mascedonor.
 Lors a pris le congié si s'est mis el retour.

[3.271]A son demaine tref est li rois descendus.
 Departi sont li paile et li bons ors molus
 Q'on li avoit doné, qu'il ne fust conneüs.
 Or aproisme li tans, li termes est venus
 Que Babilone iert prise et li palais rendus
 Ou il sera destruis et ses grans los perdus. [4870]
 Conseus de nisun home n'en pot estre creüs;
 Par nul de ses barons ne pot estre tenus,
 Por aler a sa mort est par matin meüs.
 [3.272]Ains que li rois meüst, si a fait s'orison
 Dedens son tref de paile, dont sont d'or li fregon
 Et les forches dedens et dehors li paisson.
 Li rois en apela Tolomer et Cliçon;
 O ces deus sont venu li douze compaignon.
 "Segnor, dist Alixandres, entendés ma raison.
 Privé estes de moi et bien de ma maison, [4880]
 Onques de vos consaus ne m'avint se bien non,
 Car par vos tieng je cuite terre promission-
 La segnorie en ai tresq'a Cafarnaon-
 Et tant com dure terre et mers clot environ
 Fors seule Babilone, ne sai se ja l'avrom.
 Dieu merci et les vos n'ai segnor se moi non,
 Hui est venus li jors qu'en avres guerredon.
 Ore venés avant si vos ferai gent don,
 A chascun un roiaume sans ire et sans tençon
 Et s'en avrés les rentes quant nos en revenrom; [4890]
 Je vos coronerai a la loi que tenom.
 Alons en Babilone, le matin i movom;
 Une riens vos pramet se prendre la poom:
 Je vos ferai tous riches d'or cuit et de mangon,
 Le tresor l'amiraut vos metrai a bandon;
 Ne mais la povre gent et les borgois gardon
 Que ja par nous n'i perdent vaillant un esperon.
 Se la cités est nostre, por coi la destruirom?
 Des eaves plenteïves nos venront li poisson,
 Des forés qui sont larges avrons la venison, [4900]
 Une piece du tans nos i sejournerom."
 "Sire, diënt si home, por Dieu, car i alom!
 Faites vostre plaisir, et nos l'otroierom."
 [3.273]Par les herberges mainent grant joie et grant deduit
 Qant oënt les noveles, que par l'ost diënt tuit,
 Q'en Babilone iront après icele nuit.
 L'eschergaite commande Dant Clin, le fil Caduit;
 Il la fist richement avec ciaux qu'il conduit,
 Cinc cens chevaliers furent, n'en faillirent que uit.
 Par l'ost mainent grant joie et mangüent le fruit; [4910]
 Cil jogleor viellent et demainent tel bruit

De plus de quatre lieues les oïst on, ce cuit,
 Tresq'a l'aube aparant que li solaus reluit.
 [3.274]Au matin par son l'aube, quant l'aloëte crie,
 Est toute l'ost montee, des cors fu grant l'oïe.
 Cil olifant i sonent qui font grant estormie,
 De cinc lieues et plus en ot on la bondie.
 La gent de pié s'en vait s'est ensamble salie,
 Li rois s'en ist après o molt grant baronie.
 La peüst on veoir mainte broigne sartie, [4920]
 Maint bon espié a or, mainte espee forbie;
 Li solaus fiert es elmes, qui tant cler reflambie.
 Qant li rois les regarde devant lui une lie,
 "Biaus sire Dieus, fait il, qui tous li mons deprie,
 Tu soies aourés de si grant segnorie
 Com tu m'as otroïe en ceste mortel vie,
 C'onques mais n'asamblai tante targe florie
 Com jou fais hui, biau sire, et par la vostre aïe,
 Car il n'a sous ciel gent qui tant soit esbaudie,
 Tant comme la mer clot qui la terre aordie, [4930]
 Qui ne me doinst chavage et sous moi ne souplie,
 Fors seule Babilone, que n'ai mie envaïe;
 De li ne sai encore se l'avrai en baillie."
 [3.275]Li rois chevalche a force, dont est grans renomee.
 Ne trueve fort cité qui tant soit bien muree
 Dont il n'ait le treü, n'i estuet traire espee.
 Trespasse le païs, ainc n'i ot contrestee,
 Et est venus en Siste, une estrange contree.
 C'est uns divers païs d'estrangle renomee,
 Sauvage est molt la terre, orible et deffae. [4940]
 Tant i a ruistes mons que n'en sai devisee,
 N'i a cele montaigne ne soit dure et seree,
 Et a mont est si roisde com s'ele fust dolee
 Et samble que chascune soit au ciel ajostee.
 Molt petit i croist d'erbe desous en la valee,
 Clerement i a gent, ne puet estre habitee.
 La gent qui i abitent est molt maleüree,
 A povre gent i fait molt male conversee.
 [3.276]En icele contree dont vos fais mension
 Conversent un oisel qui sont nomé griffon, [4950]
 D'orible forme sont, hideus comme dragon,
 Bien mengüe au mengier chascuns d'aus un moton.
 Volentiers les esgarde li rois et si baron,
 Chevalier et sergant, escuier et garçon;
 Pluisors en a en l'ost q'en ont grant marison.
 Li rois est molt pensis que fera ne que non:
 Vers le ciel veut monter, s'il en trueve raison,
 Et dedesus les nues se metra a bandon,

Et s'il i fait trop chaut sentir en veut l'arson;
 Pieç'a q'a cest corage et ceste entencion. [4960]
 Bien porra acomplir son talent et son bon,
 S'il en puet vint avoir par l'ost en sa prison,
 Que porter le porroient au ciel sans doutison.
 Li rois en a en soi grant ire et grant tençon,
 Ne laira ne l'ensait por dit ne por sermon
 Ne por trestout l'avoir du temple Salemon.
 [3.277]Li rois en a pensé en soi molt longement,
 Puis a dit as barons: "Dirai vos mon talent:
 Je veul monter au ciel veoir le firmament,
 Veoir veul des montaignes en haut le comblement, [4970]
 Le ciel et les planetes et tout l'estelement
 Et tous les quinze signes ou li solaus descent
 Et comment par le mont courent li quatre vent
 Sorveoir veul le siecle, si com li mons porprent;
 La nue porte l'eaue, si veul savoir comment."
 Si home li ont dit: "Avés vos marement?
 N'est hom qui i montast por tout l'or d'Orient.
 Qui vauroit i monter, sachiés a ensient,
 Ains seroient passé quatre vins ans ou cent.
 Comment i monterés? Dites l'engignement." [4980]
 Li rois en a sousris, respont par maltalent:
 "Veés vos ces oisiaus, qui fort sont et poissant?
 Il me porteront bien, foi que doi toute gent,
 Et me monteront sus desi el firmament.
 De moi et de mes fais et de mon hardement
 Veul je que se mervellent a tous jors mais la gent.
 La mer ai ensaïe desi q'au fondement,
 Et comment li poisson font lor tornoïement
 Et lor aguais bastissent et li uns l'autre prent;
 Par aus en ai appris, car ainc n'en soi noient." [4990]
 Si home li ont dit: "Nos en somes dolent,
 Por nous ne lairés mie vostre commandement."
 [3.278]De ce q'a enpensé est li rois en argu,
 Charpentiers a mandé et il i sont venu.
 "Segnor maistre, fait il, se vos estes mi dru,
 Faites moi une chambre selonc vostre seü,
 Ja mais ne soit si bone, ne onques tel ne fu,
 De cuirs envolepee, novel soient et cru,
 A las les m'atachiés et englüés a glu,
 Et fenestres i faites, quel part que me remu, [5000]
 Que se besoins me vient, par ce n'aie perdu.
 Entendés vos, segnor?" Cil li ont respondu:
 "Si com vos devisés l'avons bien entendu,
 Nos la ferons legiere et fort de grant vertu,
 Mais molt somes dolent de ce et esperdu

Que s'il vos mesavient que ne soions pendu."
 "Taisiés, ce dist li rois, ja n'en soiés meü,
 Ja mar avrés paor q'en soiés irascu."
 Cil ont si charpenté et le cuir estendu
 Que de tous fu loëe et a son talent fu. [5010]
 Li rois la fait porter loins de l'ost en l'erbu,
 Cordes i fait lacier, molt se sont esmeü;
 Si home et si baron l'ont el champ poseü,
 De molt grant legerie sont paoreus et mu.
 [3.279]Vistement est li rois dedens l'engin entrés,
 Une lance aveuc lui et fresche char assés;
 Et dist a ses barons: "Ne vous desconfortés,
 Mais or me laissiés seul et de loins m'esgardés."
 Or s'en tornent si home, molt les a abosmés,
 N'i a nul ne s'en aut et dolens et torblés, [5020]
 Car se li rois i muert, ce estoit lor pensés,
 Tous ses homes avroit mors et desbaretés,
 Car toutes gens le heent por ce ques a matés.
 Li rois est en l'enging, qui n'est pas esgarés;
 Estes vos les oisiaus entor lui avolés,
 Sus et jus sont assis et decoste et delés,
 Les cuirs crus et la char ont durement grevés;
 Tant dis com i entendent fu li rois aprestés,
 Un gant ot en sa main que il ne fust mostrés,
 Et a pris les liens, es piés lor a boutés, [5030]
 En haut as gros des cuisses a ses las bien fremés,
 Ne sai ou set ou uit en i a acouplés.
 Qant chascuns d'aus se sent ainsi aficelés,
 Il sachent durement, li engiens est tumbés;
 Il s'en rist coiemment si s'est en piés levés.
 [3.280]Li rois estut sor piés, la chambrete est versee,
 Il a prise sa lance, la char i a boutee,
 Hors de l'enging la mist, contre mont l'a levee.
 Li oisel famelleus la char ont esgardee,
 Il tendent contre mont, rendent la lor volee; [5040]
 La chambre en ont molt tost lassus en l'air portee.
 Il vont la char chaçant, chascuns geule bae,
 A tel point com il montent si est la char montee,
 Tous tans la cuident prendre, mais folie ont pensee.
 Le roi portent a mont a si fiere jornee
 Le premier air trespassent, des pluies la nuee,
 Et plus l'ont haut porté, c'est verités provee,
 Que uns chevaux n'eüst demie lieue alee.
 Les quatre vens trespassent a icele alenee,
 Vient a la cholor qui est desatempree; [5050]
 Com plus vont contre mont plus est desmesuree,
 A poi n'art Alixandres, tant fort l'a apressee;

Li cuirs de la chambrete crespist a la bruslee.
 Li rois s'est porpensés, s'il perdent la volee,
 Il charra a la terre s'iert sa vie finee
 Et sa gent en sera dolente et esgaree,
 Car toutes gens le heent qui terre il a gastee.
 Il rabaisse sa lance, vers terre l'a clinee;
 Li oisel famelleus la sieuent la volee,
 Jus s'asieent a terre en mi lieu de la pree; [5060]
 Li rois est la dedens, fait ot bone jornee.
 [3.281]Qant li rois aperçut qu'il estoit assegiés,
 A quatre des oisiaus a les liens trenchiés;
 Chascuns s'en fuit molt tost quant se sent desliés.
 Estes vos les barons de l'ost tous eslaissiés,
 Assaillent les oisiaus a la chambre atachiés,
 Mais forment se deffendent, molt les ont damagiés,
 Quatre chevaus ont mors que as bes que as piés
 Et des riches barons ont les cors mehegniés,
 Chascuns bien se deffent, molt les ont anuiés; [5070]
 De la lasté du vol chascuns est travelliés.
 Li assaus fu molt fors, ne pot estre laissiés;
 Li rois trenche les cordes, lores les veïssiés
 Corre sor les barons, tant les ont angoissiés.
 Li uns s'en est fuïs, les trois ont detrenchiés,
 Des chevaliers de l'ost i a molt d'enpiriés.
 De l'angoisse est li rois molt müés et changiés,
 Car lassés est du chaut et molt afebloiés.
 [3.282]Le roi mainent en l'ost si prince et si chasé;
 Qant il le virent sain, grant joie en ont mené. [5080]
 Et li rois les regarde par grant humilité:
 "Segnor baron, fait il, dirai vos verité,
 Hui ai veü as ieus que j'ai molt desirré,
 Car tout ai ensaié et tout ai mesuré.
 Le mont si com il est et de lonc et de lé
 Si com je l'ai veü l'ai je tout conquesté
 Fors seule Babilone, ou a grant fremeté;
 Se je celi nen ai, petit pris mon barné."
 Et responent si home: "Ce iert tost afiné.
 Qant vous avés les nues et les vens sormonté,[5090]
 Dont pöés vos par force bien prendre une cité.
 Le matin par son l'aube serons tuit apresté,
 Sor Babilone irons, q'ainsi est devisé;
 El n'iert ja tant fermee de mur ne de fossé
 Que nos ne la pregnons en un seul jor d'esté."
 Alixandres respont: "Bien vous ai escouté,
 Ce que vos avés dit bien iert acreanté.
 Le matin i movrons, ja n'en iert trestorné."
 [3.283]Qant li solaus leva et li jors esclarci,

Se leverent par l'ost Mascedonois et Gri, [5100]
 Et li rois Alixandres se chauça et vesti;
 Qant fu aparelliés, nel mist mie en oubli,
 S'orison fist as dieus qu'il li facent merci.
 Par l'ost charchent soumiers si se sont bien garni,
 Car il en ont esté autre fois escharni
 Qant il furent en Bastre en la terre Porri.
 En Babilone en vont et muevent au juesdi.
 Qant il furent monté et des loges parti,
 Li escuier de l'ost ont tout ars et brui.
 A grant joie chevalchent les plains de Valgreni. [5110]
 [3.284]Qant Alixandres mut, molt ot gente compaignie,
 Licanor et Filote a commandé s'ensegne,
 Li douze per chevalchent rengié par la champaigne,
 Uns paisans les guie, qui fu nes de Brehaigne;
 Tout droit vers Babilone costoient la montaigne.
 Tant a or en lor armes et d'Arrabe et d'Espaigne
 Desi a quatre lieues en reluisoit la plaigne;
 Qui a tel gent le done s'onor bien le gaaigne,
 Q'il ne trueve chastel ne cité qu'il ne fraigne
 Ne nul home tant fort par armes ne destraigne; [5120]
 Malvais orguel ne prise li rois une chastaigne,
 A honte fait morir qui servir ne le daigne.
 [3.285]Si com il ajornoit et l'aube est esclairie,
 Tout droit a l'amiraut est venue une espie
 Qui li dist que l'os est a jornee et demie.
 "Comment, fait l'amiraus, ne me mentir tu mie,
 Di m'ent la verité se l'ost est bien garnie."
 "Oïl, fait li messages, de tous biens raplenie,
 Car du vostre meesme prenent la manandie,
 Il ne truevent nul home qui la lor contredie. [5130]
 Alixandres chevalche devant sa compaignie,
 Licanor et Filote ont s'ensegne enbaillie,
 Dans Clins et Tholomés les en chadele et guie,
 Ce sont quatre baron ou li rois molt se fie."
 "Par foi, dist l'amiraus, ce tien a grant folie.
 De coi cuident il vivre, cele gent esbahie?
 Ma terre est toute gaste et la proie fuïe;
 A grant honte morront, se Dieus me beneïe.
 Molt est faus Alixandres, il ne me connoist mie,
 Ce qu'il cuide de moi ne verra en sa vie. [5140]
 Se li dieu me garissent ma grant chevalerie,
 Ja ne verra tiers jor que l'ost iert assaillie;
 Je lor ferai as Griens une tele envaïe
 Q'il n'i vauroient estre por tout l'or de Pavie;
 S'il aprochent ma gent, que souef ai norrie,
 Ja n'en porrai un prendre que sempres ne l'ocie."

Alixandres chevalche, que pas ne s'i oublie,
 Et maine sa grant ost et serree et rengie.
 [3.286]Alixandres chevalche par fiere contenance,
 Li douze per o lui, ou il a grant fiance, [5150]
 Et sist sor un destrier de diverse semblance;
 La teste ot plus vermelle que n'est tains de garance,
 Le col et les costés ot blans par demonstrance,
 La crope ot pumelee par autre diference,
 Les quatre piés ot noirs, ce fu senefiance.
 Onques plus hardis rois de lui ne porta lance,
 Par sa proëce a il sor tout le mont poissance;
 Onques teus rois ne fu, s'en Dieu eüst creance.
 Trop sot d'astronomie et plus de ningremance,
 Assés sot de fisique, apris l'ot en s'enfance. [5160]
 Tholomés fait l'angarde par itel convenance
 Que il ne coure en proie par nule mesestance.
 [3.287]Alixandres chevalche le pendant d'un desert,
 Devers senestre part furent de mons covert,
 D'autre part ot un val, grant et lé et apert.
 Tholomés vait devant, qui volentiers le sert
 Et qui pas ne se plaint quant il por lui riens pert,
 Car tuit cil qui le servent du guerredon sont cert.
 Alixandres disoit trestout a descovert:
 "Li sires est traïtres, qant il voit l'ome apert [5170]
 Et qui por son servise le travail a soufert,
 Se il nel guerredone selonc ce qu'il desert."
 Ilueques ou on sue drois est que on se tert.
 [3.288] Alixandres chevalche a force et a vertu
 Et maine sa grant ost, qui merveilleuse fu.
 Les seles et li hiaume, li frain et li escu
 Luisent contre soleil, qui a or sont batu.
 Droit a eure de tierce ont un flueve veü,
 Et qant l'eurent passé eure de none fu.
 Es pres sor la riviere iluec sont descendu, [5180]
 Molt estoit pres de vespres quant li tref sont tendu.
 Alixandres commande par Tholomé son dru
 Q'as vilains de la terre ne leur soit riens tolu;
 Se il riens i aportent, point n'en aient perdu,
 Que ja riens n'i perdront tout ne lor soit rendu;
 Teus lor porroit tolir tost l'avroient pendu.
 [3.289]Li vilain des montaingnes, li riche Beduïn,
 Oënt que il avoient Alixandre a voisin,
 Car l'eaue de Cobar passa des ier matin.
 Portent en Babilone et le pain et le vin [5190]
 Et le fain et l'avaine et la laine et le lin,
 L'or cuit, le blanc argent, le poivre et le commin,
 La richece tant grant que n'en sai dire fin.

Tant i vienent espés tuit sont plain li chemin,
 De chars et de charettes i sont grant li train.
 Alixandres commande Tholomé et Dant Clin
 Que mar lor taura on vaillant un romesin,
 Et cil qui lor taura morra de male fin:
 Il le pendra a forches, ja n'iert de si haut lin.
 [3.290] L'amiraus oïdire q'Alixandres venoit, [5200]
 Il a mandé ses homes ou que nul en avoit.
 Desi q'en la mer Rouge, qui son regne clooit,
 N'i remest uns tous seus qui deffensables soit
 Ne viegne en Babilone par force et par destroit.
 Ja tant n'en i venra l'amiraus nes conroit
 Et que il nes honort ainsi com faire doit.
 Li fossé sont parfont et li terral sont droit,
 Devant les barbacanes sont li passage estroit;
 Babilone est si fors que nus hom ne la voit
 Qui ne jurt canques fu et le dieu ou il croit [5210]
 Que se toute la gent du monde l'asseoit,
 Se soufraite de boire ou fains nes destraignoit,
 Tresq'a la fin du siecle nus hom ne la prendroit.
 [3.291] Babilone fu fors et l'amiraus fu fiers
 Et hardis et cortois et molt bons chevaliers,
 De largement doner iert tous jors constumiers,
 S'avoit en sa compaignie vint mile saudoiers;
 Ja en cort ou il fust n'entrast nus losengiers.
 Un seneschal avoit qui n'iert pas pautoniers,
 Nabusardan ot non et si estoit ses niés; [5220]
 Cil aime gentieus homes et honore et tient chiers.
 Babilone est si plaine que nis ens es celiers
 Font les mareschaucies por couchier les destriers;
 Li riche home herbergent es tors et es soliers.
 Et la cité est close et li murs est derriers
 Et est molt bien porprise de gors et de viviers.
 La cités est molt riche de vignes, de vergiers,
 Grant plenté ont de miel et d'uele d'oliviers,
 Basme orent a foison, qui i iert es basmiers,
 De pain, de vin, de char fu li país pleners, [5230]
 Avaine orent assés et chevaus et somiers.
 Des murs de Babilone est si durs li mortiers
 Que n'en puet point avoir fers agus ne aciers.
 Onques Dieus ne fist home qu'il prisent deus deniers
 Ne mais que Alixandre, qui est tous constumiers
 Qu'il ne vient a cité qu'il n'assaille premiers.
 [3.292] Babilone fu plaine de vin et de forment
 Et de toute richece qui a vitaille apent;
 Qui ne l'a si la prent par tout communement,
 L'amiraus le fait faire par son commandement. [5240]

Il en a apelé le roi de Bonivent,
 A une part le traist si li dist bonement:
 "Biau sire, car me dites le vostre esgardement.
 Comment me contendrai envers si fiere gent?
 Bon est que je me tiegne a vostre loëment."
 Qant li rois l'entendi, si li dist son talent:
 "Qant conseil me querés, ja l'avrois bel et gent.
 On ne gaaigne gaires en grant foloïement;
 Cis rois nos cuide prendre par son efforcement,
 Mais il n'a pas o soi amenee la gent. [5250]
 Ceste vile convient garder molt sagement
 Et metre bones gardes du mieus de vostre gent
 Que li Grieu ne se metent sor nos celeement."
 Et respont l'amiraus: "C'est bon conseillement,
 Ainsi sera il fait, ja n'en iert autrement."
 Li jors est trespasés et la nuis les sousprent
 Et les gaites sont mises par grant esorcement,
 A chascune des portes en i a plus de cent,
 Et environ les murs crient molt hautement,
 Sonent cors et buisines et frestiaus molt forment, [5260]
 Q'il ne soient souspris des Griens trop folement.
 En la cité se dorment auques seürement
 Entresque au matin que li jors les sousprent.
 [3.293] Entresque au matin, que perçoivent le jor,
 Se dormi l'amiraus, il et si vavator;
 Par matin s'est levés, car il fu en freor.
 Entor lui sont venu si home li pluisor,
 Dient lui q'Alixandres chevalche par vigor;
 Et l'amiraus a dit: "Ja mar avrés paor."
 Son neveu en apele, le fil de sa seror, [5270]
 Du grant orguel de Gresse a fait a lui clamor,
 Et cil li respondi bonement par douçor:
 "Ja tant com il nos hee n'avrons a lui amor."
 Vestu l'a et chaucié a loi d'emperaor.
 Il a pris quatre rois et un riche almaçor,
 Par mi la vis de pierre est montés en la tor,
 Esgarde contre val es plains de Valcolor,
 Vit venir la grant ost au roi mascedonor,
 De la chevalerie de Gresce vit la flor.
 Il apele ses homes, si lor a dit: "Segnor, [5280]
 Est ce dont Alixandres qui plains est de folor?
 Ma cité cuide prendre et moi tolir m'onor.
 Se mi dieu me garissent ma force et ma vigor,
 Je assaudrai les Griens ains que passent cinc jor.
 Des vignes et des bles voi gaster le labor,
 Mais contre cest damage lor cuit faire gregnor.
 Se les puis desconfire, il morront a dolor,

Et si vous di por voir q'en avrai grant honor,
 Redouté en seront trestout mi ancisor."
 Si home li respondent: "Par Dieu le creator [5290]
 Ja ne vous en faurons por crieme de paor.
 Faites armer vos homes, ne soiés en freor,
 Si chevauchiés encontre a force et a vigor."
 [3.294] L'amiraus fu as estres de son plus haut estage
 Et voit l'ost herbregier devant lui el rivage
 Et tres et pavellons tendre par cel herbage
 Et vit ces chevaliers qui demainent grant rage.
 Un drugemant apele si li dist son corage:
 "Amis, tu et toi tiers porterés mon message,
 Si me di Alixandre, qui set de maint langage, [5300]
 En ma terre est entrés par force et par outrage."
 [3.295] "Sire, dist li messages, se toi plaist j'en irai;
 Les deus q'o moi iront aparellier les fai,
 Et je serai li tiers q'Alixandre dirai
 Tout ce que tu li mandes, ja ne li celerai.
 Se truis amor en lui, amor li responderai,
 Et s'il me dist orguel, orguel li parlerai,
 Et se tu le commandes, je le deffierai."
 "Par foi, dist l'amiraus, autre chose n'en sai,
 Car riens ne tieng de lui ne ja riens n'en tenrai. [5310]
 S'il veut de mon avoir, par amors l'en donrai,
 Et se il n'en veut prendre, je m'en consieurerai
 Et si porra bien estre q'a son tref l'assaudrai;
 Au conseil de ma gent a lui me combatrai,
 Ja un seul de tous aus raiembre n'en lairai,
 Ne ja jor de ma vie raençon n'en prendrai."
 [3.296] "Sire, dist li messages, je preng congié de toi;
 Je voi venir les deus qu'iront ensamble o moi:
 Le duc de Pincernie et le prince d'Ausoi."
 "Segnor, dist l'amiraus, alés a Dieu tout troi, [5320]
 Des or vous veul proier que vous pensés de moi.
 Alixandre me dites trop maine grant boufoi,
 Qui ma terre me gaste et met en tel effroi.
 Cuide me il dont prendre comme oiselet en broi?
 Babilone est si fors ne crient prince ne roi
 Ne mais le dieu du ciel, qui tout a desous soi."
 Nabusardan a dit au message en secroi:
 "Portés dant Tholomé salus que li envoi
 Por la premiere joste qu'il face ensamble o moi,
 Encontrer me porra premerain au tornoi." [5330]
 Li messages respont: "Volentiers par ma foi."
 Li portiers lor defferme la porte du gravoi.
 [3.297] Molt par furent cortois tout troi li messagier,
 L'amiraus n'i peüst nul mellor envoier.

A l'issir des herberges truevent un latimier,
 Le tref le roi demandent Alixandre d'Alier.
 "Segnor, bien le vous sai, fait se cil, ensegnier.
 Ves le la, cel plus haut a cel aigle d'or mier,
 La troverés le roi, la sont si chevalier.
 Jel vi ore monter sor Vairon son destrier, [5340]
 Par le mien ensient, vait soi esbanoier;
 Se parler i volés, n'i avés que targier."
 Li message s'en torment, pensent de l'exploitier.
 Encontrent Alixandre sous l'ombre d'un laurier,
 Oés com fais salus rendent a l'acointier:
 "Cil Dieus qui forma terre et Adam le premier
 Et de la coste Adam fist Evain sa mollier
 Garisse l'amiraut et si doinst encombrier
 A tous ciaux qui a tort le veulent guerroyer.
 Dans rois, il le vos mande, ne vos doit anuier, [5350]
 Por issir de sa terre vos donra plus d'or mier
 Que ne porront porter vint et quatre somier;
 Et se nel volés prendre, ja celer ne vos quier,
 L'amiraus vos deffie et tout si chevalier.
 Nabusardan vos mande, se volés tornoier,
 Envoiés Tholomé as jostes commencer;
 Molt volt a lui joster, tant l'a oïprisier."
 Tholomés li respont: "Molt l'en doi avoir chier,
 Mon cors ne mon escu ja veer ne li quier."
 "Segnor, dist Alixandres, n'ai soing de manacier, [5360]
 Ja ne quier a message ramprosner ne tencier.
 Oés, segnor message, que vos veul encharchier:
 L'amiraut me dirés, consieurrer ne me quier,
 Ja ne prendrai avoir por sa cité laissier.
 Tant est fors Babilone q'or m'i veul ensaier;
 Se prendre ne la puis, ne me pris un denier.
 En son plus haut palais me cuit faire sainier,
 De ses mellors viandes me cuit faire aaisier,
 Des que soient de Gresse venu mi conseillier,
 Dui baron de ma terre qui molt me tienent chier, [5370]
 Tant sont preu et hardi ne souffrent nul dangier.
 Plus lor donrai avoir que ne vauront baillier,
 Lor escus et lor armes ferai faire d'or mier.
 Au conseil de ces deus en vaurai exploier,
 Cil me feront la vile ou tenir ou laissier."
 [3.298] Li message se taisent et li rois a parlé:
 "Segnor, fait Alixandres, vos m'avés deffié
 De par vostre amiraut quil vos a commandé,
 Et je redeffi lui, ja mar li iert celé;
 Bien le li devés dire, tant estes si privé." [5380]
 Li rois en apela Cliçon et Tholomé:

"Segnor franc chevalier, qui tant m'avés amé,
 Por prendre Babilone demain tresq'au fossé
 Par matinet i soient vostre escuier armé."
 Cil li ont respondu: "A vostre volenté."
 Li messagier l'entendent s'ont congié demandé;
 Li rois done a chascun un esprevier müé.
 Cil prenent le congié si s'en sont retorné
 Et viennent a la vile, n'i ont plus demoré.
 La porte fu ouverte et il i sont entré; [5390]
 L'amiraus vait encontre si lor a demandé:
 "Que respont Alixandres? Laira sa foleté?
 Assaudra il la vile? Savés ent son pensé?"
 "En la moie foi, sire, ains a siege juré,
 Que ja n'en tornera si avra la cité."
 Nabusardan demande du hardi Tholomé:
 "Fera a moi la joste que je li ai mandé?"
 Li message respondent: "Molt vos en set bon gré."
 La nuit vient, li jors faut, si se sont dessevré;
 Gaites et eschargaites sont sor les murs monté, [5400]
 Toute nuit ont gaitié tant qu'il fu ajorné;
 A l'aube aparissant sont cil de l'ost monté.
 Li ort et li vergié sont par force esterpé,
 Les vingnes escepees et tuit soié li blé.
 [3.299] La cités fu assise a un mardi matin,
 Pris sont tresq'a la porte li ort et li gardin;
 Le tref le roi tendirent plus de vint Sarrasin,
 Les cordes sont de soie et li paisson d'or fin.
 Par l'ost criënt a vendre et pain et char et vin,
 Dras de toutes colors i portent li Hermin. [5410]
 En l'ost a tel richece q'on n'en set dire fin.
 [3.300] L'amiraus fu as estres et fu as fenestrés
 Et vit tant pavellons vers et yndes et bles.
 Estes vous une espie qui vint devers les Gres,
 Qui dist que Alixandres est en gibiers remés;
 De ça gardent les tentes Dans Clins et Tholomés,
 Et de l'autre part a quatre des douze pers:
 Licanor et Filote, Perdicas, Aristés.
 Li amiraus en jure et ses lois et ses des
 Ains que li rois reviegne les assaudra as tres [5420]
 Et derrompra les cordes et sachera les pes
 Et metra contre terre et forches et frestrés.
 [3.301] Tout droit a l'amiraut en viennent li baron,
 Il li ont demandé: "Sire, quel la feron?
 Entresi q'a la porte viennent lor pavellon,
 Faites la nos ovrir et si nos en istrom."
 L'amiraus respondi: "Par ma foi non feron;
 Vées ici devant Tholomer et Cliçon,

Et sont ensamble o eus li douze compaignon;
 Se croire me volés, par de ça en irom. [5430]
 Se nous ouvrons la porte, ja mais ne la cloron,
 Ains serions tuit pris par itel achoison."
 Si home li respondent: "Bien est si l'otrien."
 [3.302] L'amiraus s'en issi o merveilleuse gent,
 O la geude de pié, itant celeement
 Que nus qui fust en l'ost n'en sot onques noient.
 Ja lor feïst as tentes tel envaïssement
 Qui ne fust amendés por cent mil mars d'argent,
 Se ne fust dans Filotes, a qui li rois s'atent,
 C'est uns des douze pers ou li chiés de l'ost pent. [5440]
 Premiers s'en est issus por esbanoïement
 Et vit les gonfanons desploïés contre vent;
 As tres s'en retorna tost et isnelement
 Et a dît a ses homes molt afaitiement:
 "Segnor, adoubés vos, ne soiés mie lent,
 Car l'amiraus chevalche vers nos ireement,
 Il nos veut assaillir, par le mien ensient.
 L'assaut qu'il cuide faire et ce qu'il i entent
 Li tornera a mal, se Dieus le nos consent;
 Se nos le poons prendre en cest tornoïement, [5450]
 Li ferai comparer ancui molt durement;
 S'il sans perte s'en vait, molt li estera gent."
 [3.303] Si tost com d'ambes pars se sont entreveü
 Li Grieu lievent le cri et l'amiraus le hu;
 Tholomés et Dans Clins sont premerain venu.
 Tholomés point premiers desor le vair quernu;
 Nabusardan le voit, qui l'a aperçeu.
 Tant com li dui cheval lor ont eslais rendu
 Toutes plaines lor lances se sont entrabatu.
 Qant il furent a terre, n'i ont gaires geü, [5460]
 Ains saillirent en piés comme home de vertu.
 Tholomés fu molt preus, s'ot le cuer irascu,
 Et sot molt d'escremie si l'a premiers feru.
 L'espee li descent entre cors et escu;
 Se ne brisast l'espee, tout l'eüst porfendu.
 Del retrous que il tint l'a el vis conseü,
 Que un poi l'a navré et le grenon tondu.
 Nabusardans s'esmaie du caup q'a reçeu,
 Volentiers s'en alast s'il li fust consentu,
 Mais Tholomés le prent, qui l'a reconneü; [5470]
 Ne fust Falés d'Egypte, tout l'eüst retenu.
 [3.304] Falés fu nes d'Egypte, fieus le roi Faraon;
 Quant ot Nabusardan gari de la prison,
 Pas ne se meschoisirent entre lui et Cliçon;
 Tant com li dui cheval les portent de randon,

Se fierent as escus, qui sont paint a lion;
 Ambedui s'entrabatent devant un pavellon.
 Puis saillirent en piés ambedui li baron,
 O les espees nues resmuevent la tençon.
 Dans Clins le feri bien a loi de champion, [5480]
 O l'auberc li trencha un pan de l'auqueton,
 De la senestre cuisse tout le maistre braon;
 Ne pot ester sor piés, ains chaïel sablon.
 Falés crie merci et demande pardon,
 Dist que porter l'en face et tiegne en sa prison,
 Car molt est nobles hom et de grant raençon.
 Et Dans Clins demanda: "Vassaus, com avés non?"
 "J'ai non Falés d'Egypte, fieus le roi Pharaon,
 Tout le tresor mon pere vous metrai a bandon."
 "Amis, ce dist Dans Clins, molt me pramés grant don, [5490]
 Tu n'i morras hui mais se en mes coupes non."
 [3.305] De cele part de l'ost ou l'amiraus tornoie
 Anulas de Vilac de joster se desroie
 Et fiert si Licanor que sa lance peçoie;
 Licanor refiert lui, qui de mort le guerroie,
 Jouste le cors li passe le gonfanon de soie,
 Tant com hanste li dure l'abat en mi la voie.
 Uns damoisiaus le vit, de poindre se desroie,
 Le cheval Anulac saisist par la corioie;
 A hués Dant Clin le conte Licanor li otroie, [5500]
 Car Dans Clins n'est pas teus que on veer li doie.
 [3.306] Li damoisiaus s'en torne, quant ot le cheval pris,
 Droit a Cliçon le conte, qui Falés ot conquis.
 Dans Clins prent le prison sel commande a trois Gris
 Qu'il le mainent as tres, car s'il en estort vis
 Teus iert la raençons nus n'en set dire pris.
 Li damoisiaus l'esgarde se li a fait un ris,
 Le destrier li presente, qui fu vairs arrabis:
 "Cest destrier vos envoie Licanor li marchis."
 Et Dans Clins li respont: "Molt est biaux, ce m'est vis." [5510]
 Puis saut sor les arçons, ainc n'i ot estrier quis,
 La lance sor le fautre es grans galos s'est mis.
 La ou voit Licanor si li a dit: "Amis,
 Poigniés seürement, bien pöés estre fis,
 Ja mais n'amerai home qui de vos soit eschis."
 Et uns drus l'amiraut li vint en mi le vis;
 Grant caup li vait doner desor son escu bis,
 Que tout li a fendu et l'auberc a malmis,
 Tant com hanste li dure l'eslonge des estris.
 [3.307] L'amiraus l'esgarda si dist a un sien dru: [5520]
 "En moie foi, amis, mal nos est avenu.
 Maudis soit cis tornois qant il commenciés fu,

Car noient n'i gaaing, ains i ai molt perdu;
 Mais se mi dieu me sauvent ma force et ma vertu,
 Ançois que je m'en aille m'i avront conneü."
 Il fait soner deus cors et un graille menu,
 Et cil de Babilone sont entor lui venu;
 Et l'amiraus s'eslaisse par mi un pré herbu,
 Vait ferir Tholomé devant en son escu,
 Que lui et son cheval a a terre abatu. [5530]
 [3.308] L'amiraus abati et lui et son destrier;
 A icele rescousse veïssiés commencer
 Un estor perilleus et merveilleus et fier,
 Tant escu estrouer, tante lance brisier.
 Et l'amiraus escrie: "Or parra qui m'a chier;
 Se cestui ne puis prendre, ne me pris un denier."
 Pris i fust Tholomés, qant cinc cens chevalier
 Li sourdent des herberges et quatre mil archier
 Qui traient tuit ensamble ses font si esmaier,
 Ou il veullent ou non, lor convint a laissier. [5540]
 Dans Clins, li fieus Carduit, li rendi son destrier;
 "Sire, dist il, montés, fieus de gentil guerrier.
 Que deïsse je ore Alixandre d'Alie,
 Mon segnor naturel, qui vos aime et tient chier?
 Se mener vos en puis, ne quier plus gaaignier."
 [3.309] Une joustie i ot faite dont maint orent envie;
 Emenidus d'Arcade la fist par envaïe
 Par son cors seulement o le roi d'Alenie;
 Devant trestous ses pers requiert chevalerie,
 Et porte en son bras destre une manche s'amie [5550]
 De fin or et de pierres tout environ ordie.
 Il s'entrefierent bien, quant l'uns l'autre deffie,
 Li escu ne lor valent une pome porrie,
 Ambedui s'entrabatent en mi la praerie.
 Qant il furent a terre, ne s'aseürent mie,
 Ains sachent lor espees, dont li aciers brunie.
 Emenidus le fiert, qui fu duis d'escremie,
 L'espee li descent vers la destre partie,
 Le poing li fait voler deseur l'erbe florie.
 Li rois se sent bleciés, por Dieu merci li crie: [5560]
 "Merci, frans chevaliers, merci pri de ma vie,
 Plus te donrai fin or et autre manandie
 Que ne porroit porter par mer une galie."
 Emenidus respont, quant li rois s'umelie:
 "Vous n'i morrés hui mais, se Dieus me beneïe."
 Qant l'amiraus le voit, s'ensaigne a esbaudie,
 Il fait soner ses cors, si loins en vait l'oïe
 Q'Alixandres l'entent d'une lieue et demie,
 Qui estoit en gibiers o deus faus de Rossie,

Et a dit a ses homes: "Ne me mescreés mie, [5570]
 Par le mien ensient, que m'ost est assaillie.
 Poingniés, franc chevalier, car je chas la folie."
 [3.310] Par le tornoiement vint poignant Rodouans,
 Freres fu l'amiraut, nes fu de Valdormans.
 Li chevaus ou il sist fu pumelés ferrans,
 Et Aristés chevalche le vair qui fu movans.
 Grans caus s'entredonerent sor les escus luisans,
 Que jus s'entrobatirent des bons destriers corans;
 Quant il furent a terre, si sachierent les brans.
 Rodouans fu lassés et ot armes pesans, [5580]
 Et a Aristé crut un poi ses maltalans;
 Ja en preïst la teste, se ne fust Estorgans,
 Qui par mi le bras destre le feri deus caus grans.
 Si navrés com il fu, le saisi as pendans,
 La ou li helmes lace et l'aubers jaserans;
 A estrous l'en menast, se ne fust l'amirans.
 [3.311] Por son frere rescorre vint poignant Nabugors,
 A estrous l'en menast, se ne fust Licanors,
 Qui sist el cheval noir qui vint d'outre les pors;
 Tel li doune en l'escu, qui fu pains a Maros, [5590]
 Contre mont vont les gambes, car li espiés fu fors;
 Puis a sachié le branc, qui de ferir iert tors.
 La ou l'amiraus chiet, fu douteuse sa sors,
 Car se li Grieu le prenent malvais iert ses depors,
 Mais cil de Babilone sonent grailles et cors;
 D'espees et de lances i fu grans li apors,
 Dusqu'a vint chevaliers ot au rescorre mors.
 [3.312] L'amiraus fu de mort et de prison garis,
 Du tornoi maudist l'eure que il fu establis,
 Tant i a sanc perdu tout en est affeblis. [5600]
 Bien set se li rois vient mors est et desconfis,
 Ses archiers maine o soi si est du champ partis.
 Li rois vint de gibier et entendit les cris,
 Des mors et des navrés vit le defoleïs;
 Por ce que il ne fu a cel comploteïs
 De mautalent et d'ire est tous empaleïs.
 A son tref est alés, descent sor un tapis,
 Tous iriés s'est couchiés sor un lit cordeïs.
 [3.313] Tholomés oïdire que li rois iert iriés,
 Entre lui et Clinçon li sont venu as piés, [5610]
 Content lui du tornoi com il fu commenciés
 Et comment l'amiraus les avoit engigniés
 Et com Falés d'Egypte fu pris et mahaigniés;
 Les prisons li amainent si li ont desliés.
 Li rois vit les prisons, si est el lit drechiés,
 Ne li chaut de sa perte, tant est des prisons liés.

Li jors vait, la nuit vient, li tornois fu laissiés;
 L'amiraus s'en retourne, coureçous et iriés,
 De son frere li poise, qui est menés loiés,
 Et dist entre ses dens ja ne sera mais liés [5620]
 Devant a icele eure que il sera vengiés.
 L'endemain par matin, quant jors fu esclairiés,
 S'est levés Alixandres et vestus et chauciés.
 [3.314] Par main lieve li rois et fait ses orisons,
 Et qant il ot ouré, si disna ses faucons.
 Et l'amiraus li mande par set de ses barons
 Q'il li donra mil pailles, trestous pains a lions,
 Et cent somiers charchiés d'or cuit et de mangons,
 Mais rende lui son frere et ses autres prisons.
 Alixandres en jure Dieu et trestous ses nons [5630]
 Que ja, tant com il puisse chaucier ses esperons,
 De tous ciaux que il a n'iert prise raençons,
 Il les feroit ançois tüer comme gagnons.
 [3.315] Li message s'en tornent si l'ont dit l'amiral,
 Que canque il li mande ne prise pas un ail;
 Il les feroit ançois tous tüer a un mail
 Que de lor delivrance se meist en travail.
 L'amiraus lor respont: "Du tenir ne li fail.
 Damedieus me confonde, tant cuit je que je vail,
 Ançois que du sien n'aie s'a son tref ne l'assail." [5640]
 [3.316] Par main lieve li rois si comme l'aube esclaire.
 Desous un olivier flori qui souef flaire
 S'est assis Alixandres et fait ses engins faire:
 Eschieles ploieïces plus de cinquante paire;
 La cité cuide prendre et l'amiraut fors traire.
 Sans engin la prendra, ne li tamera gaire,
 Et porra sejourner ens el mellor repaire.
 [3.317] Qant il dut avesprer, s'asieent au mengier,
 Et qant il ont soupé, si muevent li forrier;
 Li geudon furent bien tresques a vint millier, [5650]
 Por la geude garder i vont mil chevalier.
 Licanor et Filote furent gonfanonier,
 Dans Clins et Tholomés i vont por chastoier,
 Q'il les tiegnent et gardent, s'il veulent foloier.
 [3.318] Tout le val Daniel ont pris et peçoié.
 De proies et de reube s'en vienent tuit charchié;
 Et cil de Babilone l'ont l'amiraut noncié.
 Et cil dedens s'en issent a cheval et a pié,
 Tresq'a soissante mile furent li haubergié.
 Cil qui l'amiraut guient l'ont si bien adreçié [5660]
 Q'ançois que li Grigois fuissent apareillié
 Orent pris de la geude toute l'une moitié.
 Dans Clins et Tholomés en sont molt esmaié,

Regretent Alixandre, dont sont desconseillié,
 Que il orent ersoir as herberges laissié.
 [3.319] "Segnor, dist Tholomé, ci voi une maison,
 Close est toute de marbre o chaus et o sablon,
 Une loëe durent li vergié environ;
 Entrons nos ens dedens si nos i deffendons.
 Un de nos por secors dusq'au roi envoion; [5670]
 Die qu'il nos sequeure, car mestier en avon."
 Trestout le premerain en apela Cliçon:
 "Car i alés, fait il, vassaus, fieus de baron,
 Et dites mon segnor que nos nos combaton."
 Dans Clins li respondi: "Tenés moi por bricon
 Qui dites que m'en aille por querre garison?
 Dehait ait qui veut estre aillors se ici non;
 Qant je serai navrés el pis sous le menton
 Et mes escus iert frais et brisié mi arçon
 Et li sans de ma teste me corra au talon [5680]
 Et tenrai en ma main de ma lance un tronçon,
 Ne samblerai pas home qui viegne d'orison,
 N'avrai au col pendu escherpe ne bordon;
 Lors irai au secors, se ançois ne l'avom."
 [3.320] Tholomé voit Dant Clin de l'aler si engrés,
 Il apele Filote, cil i vient a eslés.
 Il li a dit: "Filote, biaux amis, c'or i ves,
 Li rois nos secorra des qu'il orra le fes."
 Filotes li respont: "Tenés moi por malvés
 Qui dites que m'en aille et ci iluec vos les [5690]
 Et port de mon escu toutes saines les es?
 Tous jors vos en harroie sel me disiiés mes.
 Ne lairoie a ferir, puis que je sui si pres,
 Qui me donroit tout l'or qui fu au roi Sersés."
 Tholomé li respont: "Biaux amis, je m'en tes,
 Puis que vos nel volés je n'en parlerai mes."
 [3.321] Tholomé a veü de ces deus le boufoi,
 Il apele Aristé si li dist en secroi:
 "Aristé, biaux amis, car en alés au roi;
 Il nos venra aidier des qu'il orra por coi." [5700]
 Aristés li respont: "Non ferai, par ma foi.
 Se du fil vostre mere volés prendre conroi,
 Vous irés en l'aïde dont estes en effroi."
 [3.322] Tholomé voit q'as trois ne puet riens exploitier;
 Licanor en apele, faire en veut messagier:
 "Licanor, biaux amis, ses que te veul proier?
 Que tu ailles au roi por cest besoing noncier;
 Des qu'il orra por coi, il nos venra aidier."
 Licanor li respont: "Trop me sentés lanier.
 Por ce que sui malvais m'i volés envoier? [5710]

Se le fil vostre mere en volés conseilier,
 Vous meesmes irés desor vostre destrier."
 [3.323] Tholomé voit des pers que nus ne s'en remue;
 Antigonon apele a la teste chenué,
 Saudoiers fu le roi, nes fu de Valgrenue.
 "Antigoné, fait il, car alés en l'aiue."
 Orgelleuse parole li a cil respondue:
 "Ahi, dant Tholomé, quel la m'avés rendue?
 Aucune malvaisté avés en moi veüe?
 Envoyer me volés corner la recreüe; [5720]
 Ançois fust terre mere desous mes piés fondue
 Que ja ceste parole fust de ma bouche issue.
 Qant j'avrai l'escu frait et la broigne rompue
 Et je avrai du sanc et de la char perdue
 Et m'en irai navrés, el poing m'espee nue,
 Ne tenra pas li rois ma parole a faillue
 Qant je li conterai quel perte avons eüe."
 [3.324] "Segnor, fait Tholomé, or ne vos sai que dire,
 Ne puis penre conseil com le sache mes sire.
 L'amiraus a ici amené son empire, [5730]
 Por nos geudons q'a pris nos cuide desconfire,
 Mais ains que soions mort ne livré a martire
 Combatons nos a lui si li vendons nostre ire.
 As espees trenchans les poons si afflire
 Qant il istra du champ n'avra talent de rire."
 [3.325] "Sire, ce dist Filote, or avés bien parlé,
 Ceste raisons nos vient a talent et a gré,
 Qui de ceste vos faut ja ne voië il Dé.
 Por l'amor du segnor qui tant nos a amé
 Et tant nos a a tous et valu et doné, [5740]
 Combatons nos por lui et en sa feelté."
 Qanqu'il dient entr'aus a uns gars escouté,
 Espie iert l'amiraut, si li a tout conté.
 Qant l'amiraus l'entent, un ris en a geté,
 A une part apele le mieus de son barné,
 Et dist a soi meïsme: "Cil Grigois sont desvé."
 [3.326] "Segnor, dist l'amiraus, cil Grigois sont molt fier,
 Par le mien ensient, molt sont bon chevalier:
 Li uns d'aus ne puet l'autre au secors envoyer.
 Se vif se laissent prendre, jes ferai manaiier, [5750]
 Ja ne lor veerai ne boire ne mangier
 Ne por lor raençon nes ferai laidengier.
 Se par ceste maniere nes poons engignier,
 Ne querroie ja plus a cest tor gaaignier;
 Qanques du lor avrons comperrons nos molt chier,
 Que mieus en porrions a Baudas bargaignier."
 Si home li respondent: "Faites i envoyer."

[3.327] L'amiraus i envoie Savari de Solendre,
 Qui de la soie part lor dist et fait entendre
 Qu'il les maniera, se vif se laissent prendre, [5760]
 Et s'il les prent par force, il les fera tous pendre.
 "Comment? fait Tholomés, veut il nos dont attendre?
 Se par tans ne s'en fuit, de nos l'estuet deffendre;
 Qanque du nostre a pris li cuidons molt chier vendre,
 Que li avoires en iert au partir fors a rendre.
 Qant il istra du champ et il devra descendre,
 Il n'avra compaignon n'ait a lui a entendre."
 [3.328] Li messagier s'en vont, qui l'amiraut ont dit
 Que ja ne se rendront s'ains ne sont desconfit.
 Qant l'amiraus l'entent, a ses homes en rit, [5770]
 Et jure tous ses dieus c'onques teus gens ne vit,
 Qui combatre se veulent et si sont si petit:
 "Set tans ai je bien d'omes, qui trestout sont eslit."
 [3.329] "Segnor, dist l'amiraus, ceste bataille veul.
 Desconfire me cuident li Grieu par lor orguel;
 Aucuns m'en estordra se dedens nes acuel.
 Veés la Licanor, qui s'arme sous cel fuel,
 Devant moi prist mon frere si quel virent mi oel,
 Et me dona tel caup que encore m'en duel;
 Ja ne puisse passer de mon palais le suel, [5780]
 Se je son cors puis prendre, s'en chaudiere nel buel."
 [3.330] "Segnor, fait l'amiraus, je vos pri et enort
 Que de ceste bataille me donés tuit confort.
 De cel vergié lai ens voi issir Licanort,
 Desor cel cheval noir son gonfanon destort;
 Devant moi prist mon frere et me dut avoir mort.
 Maudient moi mi dieu et mon chief et mon sort
 Se ja de cest marchié envers lui m'en acort.
 Gardés quil porra prendre que le chief m'en aport."
 [3.331] Li Grieu se sont armé tost et isnelement, [5790]
 N'orent que set eschieles, que molt orent poi gent;
 Et cil de Babilone s'armerent ensement,
 Lor batailles devisent, s'en furent plus de cent.
 "Segnor, dist Tholomés, d'une riens m'espoënt,
 Que nel set Alixandres, qui as tres nos atent.
 Ja nos donë il tout canque il taut et prent,
 Nos armes sont couvertes toutes d'or et d'argent.
 Et l'amiraus a dit mors est s'il ne nos pent,
 Or sera vilonie se chascuns ne s'i vent."
 [3.332] Tholomés sist armés el vair de Calidoine, [5800]
 Qui la teste ot plus noire que n'est grains de pioine.
 S'il trovast autant qans iciaus de Babilone,
 Molt lor cuidast chier vendre son cors et sa persone,
 Mais ne furent que mil de ciaus de Mascedoine

Et bien soissante mil de ciaus de Babiloine;
 De jostes a meschief i ot molt grant essoine.
 [3.333] Qant li soissante mil sont o les mil jousté,
 Li mil lor chevalchierent par si grant volenté
 N'i a gaires nul d'aus n'ait le sien enversé;
 Qui chaut? que trop sont peu, n'i ont gaires duré. [5810]
 De l'alaine des cors et du poudrier levé
 Et del fum des chevaus qui ierent tressüé
 Estes vous l'air du ciel espoissié et müé,
 A paines se conurent quant se sont regardé,
 O tout ce que il sont de la soif si grevé
 Tuit li pluisor se sont de l'angoisse pasmé.
 L'amiraus i a fait auques sa volenté;
 De ciaus qui pris n'i furent sont li pluisor navré,
 A une part s'en soivrent Dans Clins et Tholomé.
 Qant Tholomés vit ce qu'il l'ont du champ geté, [5820]
 De la honte qu'il ot a si le cuer serré
 Qu'ens el cors li pantoise si a un poi ploré
 Et regrete Alixandre, qui trop a demoré.
 La lance sor le fautre a Baiart galopé;
 Au chief de la bataille a un roi encontré.
 Grant caup li vait doner sor son escu listé,
 Que tout li a fendu et l'auberc defaussé
 Et voiant l'amiraut a celui mort geté.
 Troi chevalier s'eslaissent, dont li dui l'ont navré;
 Qui chaut? pas ne l'abatent, son tor fist par le pré. [5830]
 [3.334] El champ ou li Grigois furent mort et vaincu
 Tholomés se deffent com hom de grant vertu;
 Entre lui et Cliçon ont le champ maintenu.
 Troi chevalier s'eslaissent s'ont Tholomé feru,
 Son destrier li ocient et lui ont abatu;
 A terre chiet pasmés, covers de son escu.
 Dans Clins beneïst l'ame qui dedens son cors fu,
 Cuida que il fust mors quant il le vit cheü;
 Ne pot mais endurer, car trop i a perdu.
 [3.335] Dans Clins crie s'ensegne, ne puet avoir soulas. [5840]
 Se il fust soi et autre ou soi tiers ou soi qars,
 De l'aler en l'aïde ne fesist il porchas,
 Mais il estoit navrés en la teste et el bras,
 Li escus de son col sanloit viés talevas,
 De son elme li pendent li quartier par les las.
 L'amiraus li escrie: "Ça esterés, couars!
 Ne savra hui par vos noveles li bastars."
 Et Dans Clins li respont: "Vos mentés comme gars,
 Molt sui ore malvais qant dolent ne vos fas."
 Du tronçon d'une lance li dona un tel flas [5850]
 Que trois dens li peçoie, car fors est li esclás.

L'amiraus fu bleciés, a terre chiet tous plas,
 Si home l'en redrecent, mais dolens fu et mas.
 Dans Clins prent le cheval, qui est de bon haras,
 Du champ s'en est partis par devant un margas.
 [3.336] Dans Clins se part du champ dolens et irascus,
 Tresq'au tref Alixandre ne fu ses frains tenus;
 Lors s'areste li quens, a pié est descendus.
 Alixandres le voit, contre lui est venus,
 Puis li a demandé: "Ou fu cil vostre escus?" [5860]
 Et cil li respondi comme hom aperceüs:
 "De cel val Daniël sui n'a gaires issus,
 La s'est li amiraus as forriers combatus,
 Trestous ciaux qui alerent avés fors moi perdus,
 Car l'amiraus les a tous pris et retenus,
 Et Tholomés i fu laidement abatus
 Et tres par mi le cors de deus espiés ferus."
 Qant Alixandres l'ot, molt s'en est irascus,
 Fremist et devint noirs et de parler fu mus;
 Puis jura Damedieu et toutes ses vertus [5870]
 Que se Tholomés muert l'amiraus iert pendus.
 [3.337] "Sire, ce dist Dans Clins, por coi vos demorés?
 Car secorés vos homes et vos armes prenés,
 Et je vos conduirai, se croire me volés.
 Ançois que l'amiraus se soit du champ tornés,
 Vous josterai o lui, si vos i combatés;
 Grant honor i avrois se vaintre le pöés."
 "Dant Clin, dist Alixandres, ici vos demorés,
 Ne venrois mie o nous, que trop estes lassés."
 "Sire, ce dist Dans Clins, por nient en parlés, [5880]
 Mi compaignon sont pris et je m'en sui emblés;
 Se n'estoie au rescorre, je seroie desvés."
 [3.338] Li rois a pris ses armes et par l'ost montent tuit;
 Tous premerains chevalche Dans Clins, li fieus Caduit;
 Si navrés com il iert, ens el champ les conduit.
 Et la gent l'amiraut demainent grant deduit,
 Par le vergié s'ombroient et mangüent le fruit,
 Iluec veulent atendre la froidor de la nuit.
 A tant es vos le roi et Cliçon quil conduit,
 Tant i sonent de cors que tous li vaus en bruit. [5890]
 De ciaux de Babilone n'i a un seul, ce cuit,
 Qui por son cors garir en son cheval ne puit;
 Et l'amiraus en jure n'i a nul, s'il s'en fuit,
 Qui a tout son vivant Babilone ne vuit,
 Et cil de son lignage seront ars et destruit.
 [3.339] Qant Alixandres vint, qui lors veïst les Gris!
 Onques Dieus ne fist home, tant fust poësteis,
 S'il les atent a caup, qu'il ne soit mors ou pris.

Li rois vint tous premiers, de maltalent espris,
 Et sist sor un destrier qui molt fu de grant pris; [5900]
 La lance sor le fautre, s'est es grans galos mis.
 Et l'amiraus guenchist comme hom bien ademis,
 Mervellous caup li done desus son escu bis,
 Que li trous de la lance li vole en mi le vis;
 Et li rois le feri comme hom volenteïs,
 Que tout l'escu li fent et l'auberc a malmis.
 Il l'empaint de vertu, si li taut les estris;
 L'amiraus chiet a terre, Clins a le cheval pris.
 [3.340] Dans Clins prist le cheval com hom aperceüs;
 Qant il le tint as regnes, ne se contint pas mus, [5910]
 Ains dist a l'amiraut: "Or estes vous cheüs,
 Mieux vous venist encore que ne fuissiés venus;
 Li fieus le roi de Gresce vos mostre ses vertus.
 Hui main le laidengastes, malvais est vostre argus,
 Molt tost vos en est or li guerredons rendus.
 O le cheval m'en vois dont estes abatus."
 Nabusardans l'entent, molt en est irascus,
 L'amiraut fait monter el bai qui fu crenus.
 Et cil de Babilone ont si les sens perdus
 Que onques du deffendre ne fu nus plais tenus, [5920]
 Tout droit vers Babilone vont les chemins batus.
 Qant l'amiraus le voit, tient soi por confondus,
 D'ambedeus pars de soi en voit aler ses drus,
 Bien set s'il i remaint pris iert et retenus;
 A la fuie s'est mis, car li chans est vaincus.
 [3.341] Or s'en vait l'amiraus, tout i laist son harnois;
 De ciaus de Babilone s'en vont li plus cortois
 Et li Grieu les enchaucent as chevaus qu'il ont frois,
 O les espees nues les fierent de manois,
 Onques nes pot tenir ne barre ne deffois. [5930]
 Tresq'au chief de la vile, dont li mur sont turcois,
 Les en mainent ferant et prenent trois et trois;
 Les portes de la vile ont closes li borgois.
 Molt en est coureciés Alixandres li rois;
 Arriere s'en retornent, car pres lor est li soirs.
 [3.342] Alixandres s'en torne qant il vit avesprer,
 En son tref descendi si se fist desarmer;
 Des barons q'a perdus se prist a dementer,
 Li cuers li atenroie, si commence a plourer.
 Dans Clins, li fieus Carduit, l'est alés conforter: [5940]
 "Sire, ce dist Dans Clins, cest duel laissiés ester,
 Onques por grant duel faire ne vi riens conquerer.
 Faites querre les mors ses ferons enterer,
 Et les navrés si faites a vos mires saner.
 A prendre Babilone porrés bien recouvrer."

"Dant Clin, fait Alixandres, molt savés bien parler,
 De ce que vos me dites me convient a penser."
 [3.343] "Sire, ce dist Dans Clins, ce est molt grans confors
 Que Aristés est vis, Filote et Licanors.
 Cil qui les iront querre portent eaue en lor cors [5950]
 Qu'il ne soient estaint du chaut qui est si fors,
 Et quierent Tholomé grant piece loins des nos;
 Envers le vi chaoir sor l'escu de Maros.
 De ciaus de Babilone i laissa tant de mors
 Que ses chevaus en iert el sanc tresq'as argos."
 [3.344] Li rois i envoia et fist le champ cerchier;
 Les mors et les navrés truevent par le vergier.
 Grant piece loins des autres, le trait a un archier,
 Troverent Tholomé sous l'ombre d'un laurier,
 Covert de son escu, ne se pooit aidier; [5960]
 A boivre li donerent por la cholor laisser.
 Sor deus chevaus li font litiere aparellier,
 Au tref le roi en portent le gentil chevalier.
 Alixandres le voit, n'i ot que courecier,
 Puis a dit a un mire qu'il penst de l'exploitier;
 Plus li donra avoir que ne vaura baillier.
 Et cil li respondi: "Ja n'en estuet plaidier,
 Tout sain le vos rendrai dusq'a un mois entier."
 [3.345] Tres devant Babilone, a mont dedevers bise
 Sor l'eaue de Cobar, qui la terre devise, [5970]
 Trois lieues environ ont la terre porprise.
 Tous li mondes le sieut por sa grant commandise,
 Li uns por sa largesce, l'autres por sa justise.
 Larges est Alixandres sans nule covoitise;
 Por ce a tout le mont et la gent si aqoise
 Que nus ne veut partir de lui en nule guise.
 Sor l'espaulle Aristé a sa destre main mise,
 Esgarde sa maisnie, durement s'en felise,
 Et dist a Aristé: "Nule autre manantise
 Qui soit en tout le mont n'aim je tant ne ne prise, [5980]
 Car par aus sui doutés et mes voisins en brise."
 [3.346] "Aristé, dist li rois, molt par ai grant leece
 Quant je voi ma maisnie plaine de grant proëce,
 Onques riens ne perdi, certes, par lor perece.
 Cist amiraus est faus, qui envers moi se drece,
 Car jel tenrai si court comme cheval en trece,
 Ne li lairai de terre vaillant un grain de vece;
 Faus est quant ne me rent toute la forterece."
 "Sire, dist Tholomés, ains est molt grant noblece
 Qui a son enemy et volentiers le blece." [5990]
 "Tholomé, dist li rois, dit avés grant proëce,
 La roïne d'Egypte vos doins et la richece,

Les chastiaus qui la terre tienent en grant destrece."
 "Par foi, dist Tholomés, ci a molt grant hautece."
 Au pié l'en vaut aler, qant li rois l'en redrece.
 [3.347] La roïne d'Egypte, le ceptre et la courone
 Et trestoute la terre par de ça devers none
 Alixandres li rois a Tholomé le done.
 Molt est sages li rois, les autres araisone:
 "Molt puet estre dolens, si com la letre sone, [6000]
 Li hom qui primes va et puis après chatone."
 Après parla uns princes qui fu nes d'Escalone:
 "Que vaut commencemens se la fins n'en est bone?
 Services sans eür ne vaut un grain d'anone,
 Car Salemons le dist en son livre et sarmone."
 [3.348] Assés i ot parlé et derriere et devant,
 Li pluisor de folie, de savoir li auquant.
 "Segnor, ce dist li rois, öés que je comment:
 Que tout soiés levé a l'aube aparissant,
 Conreé de vos armes comme gent combatant, [6010]
 Que ne vauroie mie que l'amiraus se vant
 Que je perde par lui la monte d'un besant."
 Lor parole ont finee, si le laissent a tant.
 Li rois entre en son tref, li cierge i sont ardent;
 Il a demandé l'eau, on li porte devant,
 Ses manches qant il leve li tienent dui enfant.
 Qant li rois ot mengié, s'apela Elinant,
 Por lui esbanoier commande que il chant.
 Cil commence a noter ensi com li gaiant
 Vaurent monter el ciel comme gent mescreant, [6020]
 Entre les dieus en ot une bataille grant;
 Se ne fust Jupiter o sa foudre bruiant,
 Qui tous les desrocha, ja n'eüssent garant.
 Qant Alixandres l'ot, si respont en riant:
 "Qant li sires vaut auques, li home en sont vaillant."
 [3.349] Li rois se vait couchier a deduit et a joie,
 Sor lui ot estendu une coute de soie.
 Au matin s'est levés por exploitier sa voie,
 Ses eschieles devise et sa gent bien conroie.
 Tholomés vait avant, molt docement li proie [6030]
 Que l'angarde li doinst, et li rois li otroie.
 "Mais gardés, fait li rois, que ne corés en proie;
 Trop ai or et argent et deniers et monoie,
 Poi pris autre gaaing se la cités n'est moie."
 "Sire, dit Tholomés, faus est qui vos guerroye."
 Des que li cor sonerent et li grans os s'effroye,
 Alixandres chevalche, qui pas ne se deroye.
 Licanor en apele, qui a la crine bloie,
 Puis li dist en riant: "Se Damedeus me voie,

Qui quiert autre richece malement se desvoie." [6040]
 [3.350] Ainsi com li rois l'ot commandé des la nuit,
 Leverent par matin et s'armerent trestuit.
 Et li autre somier n'alerent mie vuit,
 Ançois portent l'avaine, le pain, le vin, le fruit.
 A chars et a charretes sont li engien conduit;
 Qant l'ost dut aprismier, de cors i ot grant bruit.
 Alixandres s'apuie sor Clin, le fil Carduit,
 Si li dist en riant: "Or voi je mon deduit,
 Qant armee est ma gent qui por nului ne fuit."
 Dans Clins li respondi: "Sire, ne vos anuit, [6050]
 Vos dites verité et je molt bien le cuit;
 Gent qui ont bon segnor ne seront ja detruit."
 [3.351] Alixandres monta el destrier chastelain,
 Il estoit trestous blans, por ce ot non Albain;
 Conreés de ses armes, s'oriflambe en sa main,
 Devant lui fait soner deus buisines d'arain,
 Et plus de troi cens cors sonerent par le plain;
 Ces valees resonent, cil mont et cil cavain.
 Desi q'en Babilone l'oënt li citoiain,
 Lores sorent il bien et furent tuit certain [6060]
 Q'il avroient le siege ou anuit ou demain.
 Tholomés et li sien, qui ne sont pas vilain,
 Por faire l'avangarde chevalchent premerain.
 Après vont li somier, qui portent vin et pain,
 Engiens por murs abatre, qu'il n'i a si hautain,
 Se un jor i assaillent, qu'il laissent mie sain.
 [3.352] Ce fu el mois de mai, que florissent gardin,
 Que cil oiselet chantent souef en lor latin.
 Sovent est coureciés qui a felon voisin;
 Molt ot males noveles au soir et au matin. [6070]
 L'amiraus se seoit sor un perron marbrin
 Dedevant son palais, desous l'ombre d'un pin.
 Qant il ot la novele, manda por un devin,
 Por faire un sacrefice vait au temple Apollin.
 Un tor i amenerent plus de mil Sarrasin,
 Car de cele bataille vauront savoir la fin.
 [3.353] Li clers fu nes d'Egypte, hom ne sot plus de sort,
 Et des respens as dieus se penoit il molt fort;
 Le sacrefice a fait les le temple en un ort.
 Une vois vint du temple, qui issi d'un regort, [6080]
 Et dist a l'amiraut: "Noveles vos aport:
 Vous avés molt grant droit, Alixandres a tort,
 Mais de ce que vos chaut? venus est a sa mort;
 Mais comment il morra noient ne vos recort."
 Qant l'amiraus l'oï, s'en ot molt grant confort,
 Et a dit a Sorin, un roi de devers nort:

"Apolins me maldie se je des mois m'acort."
[3.354] Sorins fu riches hom, rois des Amoravis,
Et ot en sa compaigne plus de mil Arrabis,
N'en i avoit un seul ne fust preus et hardis. [6090]
Sorins parla premiers com chevaliers eslis
Et dist a l'amiraut: "Tous soiés vos honis
Se faites malvais plait. Dont n'estes bien garnis
De pain, de vin, d'avaine, de vaches, de brebis,
Chevaliers et sergans preus et amanevis?
Et desor tout ice, dont n'estes vos bien fis?
Venus est a sa mort, li dieus n'iert ja faillis,
Car nul de ses respons ne fu onques desdis."
[3.355] Après parla Farés, qui d'Egypte fu sire,
Et dist a l'amiraut, tout belement, sans ire: [6100]
"Tant avés chevaliers çai ens de vostre empire;
Mandés un chapelain, faites un brief escrire,
Et qant il iert escriis et seelés en cire,
Ce truiet li rois el brief, qant il le fera lire:
S'il n'ist de vostre terre, livrés est a martire,
N'i avra nul des siens qui n'ait mestier de mire;
Au partir de l'estor por voir le porra dire."
[3.356] Puis parla Macabrun, qui fu rois de Nubie,
Toute la noire gent avoit en sa baillie,
Vallés iert si amoit pris de chevalerie, [6110]
Et dist a l'amiraut: "Ice ne lo je mie
Que on ja i envoit, car ce seroit folie.
Alixandres est pres, bien a lieue et demie,
Trois tans avés vos gent mellor et plus hardie;
Qui ja l'en requerra Apollins le maldie.
Chevalchons contre lui a bataille furnie,
Venus est a sa mort, sa gens sera honie,
La raison d'Apollin ne sera ja faillie.
Alixandres est plains de molt grant felonie,
Il n'araisne nului ne nului ne deffie, [6120]
Ains veut de tout le mont avoir la segnorie.
Ja n'i envoierés, coi que Pharés vos die."
[3.357] Lors se dreça en piés Saligos li barbés,
Il fu rois de Sabba, cent ans avoit passés,
Sages fu de conseil et par armes doutés,
Et ot en sa compaigne dis mil de ses privés.
Il dist a l'amiral: "Un petit m'entendés.
Pharés a molt bien dit, un brief li trametés,
Par deus de vos barons le brief envoierés;
Par bouche et par escriis molt vilment li mandés [6130]
Que il vuit vostre terre, que c'est vostre herités,
Et s'il ne veut ce faire, si resoit deffiés.
Chevaliers avés bons, hardis et adurés.

Ce qu'Apollins a dit, se ce est verités,
 Dont sai je bien qu'il iert ou mors ou afolés.
 Il cuide avoir Persans et Yndiens trovés,
 Mais il n'i parra mie qant iert a nous jostés;
 As brans d'acier forbis iert ses orgeus matés.
 Se Dayres fu haïs, vos estes trop amés."
 [3.358] Au conseil Saligot se tienent li baron, [6140]
 Et l'amiraus meïsmes loe ceste raison.
 Il en a apelé Acarin et Sanson,
 Cil ierent chevalier andui de sa maison,
 Le brief a fait escrire sans noise et sans tençon
 Et dedens le seel a mis le quaregnon,
 Mais il n'i mande mie point de dilection,
 Mais selonc la deserte li mande guerredon,
 Et en après li mande par grant aatison:
 "Alixandre, or enten, fieus le roi Phelippon,
 Je te mant et commant: n'i fai arestison, [6150]
 Va t'ent hui ou demain fors de ma region;
 Et se tu nel veus faire, j'en jur mon dieu Mahon,
 Venus es a ta mort, a ta confusion,
 Et ta gent est venue a grant destrusion.
 Ce ne sont pas Yndoïis ne Persant n'Esclavon,
 Qui lor signor ocirent Dayron par traïson."
 [3.359] Des que cil ont oïle commant l'amiral,-
 Il furent molt sage home et cortois et loial,-
 Apareillier se vont ambedui li vassal.
 Chascuns d'aus ot vestu un bliaut de cendal, [6160]
 Afublé ont mantiaus de paile emperial;
 Lor palefrois lor mainent lor escuier loial,
 Molt sont bien enselé ambedui par ingal,
 Li lorain et les seles, li bouton, li poïtral
 Sont tout fait a or fin o pierres de cristal;
 Bien sont apareillé ambedui li vassal.
 Le congié demanderent, ne font plus lonc estal,
 Montent es palefrois si issent du portal,
 Et fait traire chascuns devant soi un cheval.
 Alixandres estoit les le plain el costal, [6170]
 Environ lui estoient si baron natural,
 Et faisoit un tref tendre, car li chaus li fait mal.
 [3.360] Li pavellons le roi sist sor une fontaine
 Qui sourt el chief du val, si est et clere et saine.
 De l'ost fu contre val la riviere si plaine
 Que sorveoir les pueent li message a grant paine.
 Tholomés et sa gent, qui n'est mie vilaine,
 Cil se sont herbregié vers la terre foraine
 Et voient la cité, dont li mur sont d'araine,
 Le charroi devers l'eaue qui la vitaille amaine, [6180]

Le pain, le vin, la char, le froment et l'avaine.
 La maisnie Aristé cele fu deesraine,
 L'arrieregarde ont faite toute cele semaine.
 [3.361] Tholomés premerains en l'angarde est montés,
 Ensemble o lui mena vint chevaliers armés;
 Les messagiers roiaus a premiers rencontrés,
 Puis lor a demandé: "Dont estes, ou alés?"
 Acarins fu molt sages et chevaliers menbrés,
 Il li a respondu: "Vos le sarés assés.
 De Babilone somes, qui molt est fort cités, [6190]
 Message l'amiraut, qui'n est sires clamés.
 Un brief nos a charchié, vostre roi iert portés,
 Pri vos par amistié tresq'a lui nos menés.
 Qant li briés l'amiraut li sera presentés
 Et il l'avra fait lire, adont savoir porrés
 Que l'amiraus li mande, se savoir le volés."
 Tholomés li respont: "Bon conduit i avrés."
 Tresq'au tref Alixandre les a ansdeus menés;
 Cil ont les palefrois as escuiers livrés.
 Li rois fu en son tref, en un lit acoutés, [6200]
 Et ot environ lui cinc cens de ses privés.
 Acarins parla primes qui fu preus et senés.
 [3.362]"Mahomés li grans dieus, qui tous nos puet sauver,
 Que quant il veut fait chaut et quant il veut geler
 Et de la lune fait par nuit obscure cler
 Et du soleil refait le jor enluminer,
 Et Apollins, li dieus qui ainc ne vaut fausser,
 Qui le respons nos dist, que n'i vaut demorer,
 Que l'amiraus li fist enquerre et demander,
 Icelui devons nos et croire et aouer; [6210]
 Il gart nostre segnor de mort et d'afoler."
 [3.363]"Or enten, Alixandres, que te mande mes sire:
 Ici t'envoie un brief, seelés est en cire,
 Par conseil de ses homes a fait le brief escrire.
 Fai le seel recevoir et fai les letres lire,
 Et se tu nel veus faire, tant te veul je bien dire:
 Se ne vuides sa terre, tu en seras li pires,
 Et trestoute ta gent en recevront martire."
 Qant Dans Clins l'entendi, de maltalent souspire,
 Et Tholomés meïsmes en commença a rire. [6220]
 Alixandres le voit, si lor a pris a dire:
 "Gardés, fait il, segnor, n'i ait courous ne ire."
 [3.364] Li rois a pris les letres si brisa le seel.
 Qant ot leü les letres, si rist sous son mantel
 Et a dit as messages: "J'ai veü en la pel
 L'amiraus me menace de mort par son revel.
 Montés es palefrois, n'i ait mais autre apel,

Et dites l'amiraut venus sui de novel;
 Demain par matinet passerons le moncel,
 Dedevant Babilone irons faire un cembel, [6230]
 Et prendrai la cité dont li portal sont bel;
 Ne li lairai après ne dongon ne chastel.
 Tel parole m'a dite dont il ment el musel;
 Se jel tieng en bataille, s'il n'a cheval isnel
 De m'espee trenchant li donrai tel bendel
 Dont il avra, ce cuit, sanglent le haterel.
 Je ne m'en irai mie, ne je ne mi dansel,
 Devant que j'aie prise la fort tor de Babel
 Que firent li gaiant de chaus et de quarrel."
 [3.365] Li messagier s'en tornent, pris sont li palefroi. [6240]
 Acarins fu molt sages et cortois de sa loi,
 Et dist a Tholomé: "Biau sire, entendés moi.
 Vos nos aconduisistes belement sans desroi,
 Or nos raconduisiés." Et cil dist: "Je l'otroi."
 Plus de lieue et demie les conduit sans esfroi,
 Et furent bien o lui chevalier vint et troi.
 Tholomés s'en retourne et cil s'en vont l'erboi.
 Li uns a dit a l'autre: "Ci a orgellous roi;
 Si home l'aiment molt et de cuer et de foi.
 Si com il nos a dit, et je tres bien le croi, [6250]
 Nous avrons le matin un orgellos tornoi."
 [3.366] Li messagier s'en viennent en Babilone errant,
 Ce fu un petitet ains le soleil couchant,
 Et truevent l'amiraut desous un pin seant.
 Li messagier descendent, Acarins vient devant,
 Tres devant l'amiraut a parlé en estant:
 "Sire, nos avons fait tres bien vostre commant.
 Orgelleus est li rois, chevalerie a grant;
 S'il ne nos a menti, par son l'aube aparant
 Devant ceste cité venront sa gent poignant. [6260]
 Tel parole avés dite dont il dist en riant
 S'il vos trueve en bataille tel vos donra du brant
 Que de perdre la teste n'avrés ja nul garant."
 [3.367] Après a parlé Sanses: "Sire, ne gabe mie;
 Alixandres est fiers et sa gent molt hardie,
 Ainc mais ne fu jostee si grant chevalerie.
 S'il ne nos a menti, ne lairai ne vos die
 Babilone sera par matin assaillie;
 Il l'avra, se il puet, par tans en sa baillie.
 Tel parole avés dite dont li rois vos deffie; [627]
 Se il vos puet tenir, il vos taura la vie.
 Ja mais ne finera o sa grant compaignie
 Devant que de Babel avra la tor saisie
 Que firent li gaiant par lor grant desverie."

Qant l'oï Macabrun, a haute vois s'escrie:
 "Cist rois fait a loër, se Dieus me beneie,
 Qui veut de tout le mont avoir la seignorie."
 [3.368] Li amiraus se gist desous l'ombre d'un pin,
 Environ lui estoient tel dis mil Sarrasin
 N'i avoit un n'eüst bon peliçon hermin [6280]
 Et bliaut de cendal et mantel sebelin.
 Li amiraus se sist sor un perron marbrin
 Qui a quatre chaenes iert atachiés d'or fin.
 Macabrun se dreça, molt i ot bel meschin,
 Joenes iert si iert rois du regne outremarin:
 En sa compaignie furent dis mile Barbarin.
 Qant il oï parler Sanson et Acarin,
 Il sache les ataches de son mantel porprin.
 Parla sarrasinois, ne sot autre latin,
 Et dist a l'amiraut: "Creés bien Apollin, [6290]
 Car molt par a en lui bon dieu et bon devin.
 Issons de la cité tuit armé le matin,
 Alons contre Alixandre tout le plénier chemin,
 Combatons nos a lui si le traions a fin,
 Et qui laist cest conseil molt a le cuer frarin;
 Plus est coars de lievre que chacent li mastin."
 [3.369]"Sire, dist Saligos, je sui de grant aage,
 Si ai oï parler et maint fol et maint sage.
 Macabrun est vallés si a legier corage,
 Si veut en Babilone mostrer son vasselage. [6300]
 Se vous i combatés, orgeus sera et rage,
 Et se vous i avés ne perte ne damage
 Tels le porra oïr quil tenra a outrage.
 Babilone est molt fors, faire i puet lonc estage;
 Tost ferons pais a lui par aucun avantage,
 Ou nous querrons acorde par aucun mariage;
 Ta fille li donras, molt est de haut parage.
 S'il s'en estoit alés, mais qu'il n'eüst ostage,
 Ja n'avroit plus du vostre vaillissant un fromage.
 Ne porroit rassembler si tost son grant barnage, [6310]
 Ne revenroit ja mais en cest païs sauvage,
 Car li destroit sont grief, et fort sont li passage."
 [3.370] En après Saligot en a Craté parlé.
 Icil fu dus de Mede, de molt grant parenté,
 En sa compaignie furent plus de set mil armé;
 Et dist a Saligot: "Or vos ai escouté.
 Ja par moi ne sera ice acreanté
 Que nous laissons enclorre ça dedens la cité,
 Car il nos torneroit a honte et a vilté.
 Por q'a dont l'amiraus si grant pueple mandé? [6320]
 Dont ne dist Apollin, qui tous tans dist verté,

Que il en Babilone perdroit sa poësté?
 Venus est a sa mort, ja n'en iert trestorné.
 Le matin par son l'aube soions trestuit armé
 Et si issons la hors tuit rengié et serré,
 Et se nous en bataille somes o eus josté
 Je cuit que cest besoing avrons tost afiné."
 Li chevalier s'escrïent, qui molt l'ont desirré:
 "Cest conseil loons tuit que Cratés a doné."
 [3.371] Or se sont affié de combatre au demain. [6330]
 L'amiraus apela un sien prevost, Soutain,
 Et après Torquentin, un sien cousin germain:
 "Je veul que vos soiés anuit mais chastelain
 De la cité garder; de ce soiés certain
 Q'on ne me puist tenir por fol ne por vilain."
 A tant s'en est tornés a son palais hautain,
 Richement fu servis de char, de vin, de pain.
 Tantost com il fu jors, trestout li citoiain
 Et l'amiraus meïsmes s'en issi hors au plain,
 Mais li roi et li conte issirent premerain. [6340]
 [3.372] L'amiraus vit ses homes haitiés de la bataille,
 Primes les chevaliers, en après la pietaille;
 Molt heent Alixandre, qui si fort les travaille.
 Par mi tout ce qu'il ont pain assés et vitaille,
 N'ont soing qu'il les encloe ne lai ens les assaille.
 Il ne redoutent gaires lui ne sa baronaille,
 En Apollin se fient et en sa devinaille.
 Il demande ses armes, uns chevaliers li baille.
 Il vesti un hauberc si laça la ventaille,
 Fort, entier et serré, et a menue maille, [6350]
 Et si ne poise mie douze pains de maaille.
 Puis a lacié un elme qui por fer ne fist faille,
 Et a çainte l'espee dont li brans d'acier taille.
 [3.373] Un cheval li amaint en la place devant.
 Et col et chief ot noir et tout l'autre ferrant,
 Covers fu d'une porpre molt riche et molt vaillant;
 Frain i ot assés bel et bon et avenant,
 Une sele ot el dos que firent dui gaiant,
 Les alves furent faites de l'os d'un olifant,
 Ambedui li arçon de pierre d'aimant, [6360]
 A glus i sont saudé par maïestire grant.
 L'amiraus i monta, puis a dit en riant:
 "Alixandres est fous s'il me tient por enfant,
 Qui cuide avoir ma terre trestout a mon vivant.
 Se il a chevaliers, et j'en ai autretant;
 Se li sien sont hardi, et li mien combatant.
 Je ne l'en lairai mie demi pié ne plain gant
 Se il primes ne m'a ou mort ou recreant.

Venus est a sa mort, segnor, por ce me vant
 Q'Apollins le me dist, lui en trai a garant." [6370]
 [3.374] L'amiraus est molt preus et le corage ot fier
 Por ce qu'il vit ses homes de bataille afichier.
 Par son droit non apele Macabrun le guerrier,
 Qui de chevalerie avoit grant desirrier,
 Son hardement voloit prover et ensaier.
 "Prenés, fait il, vos armes et montés el destrier,
 Menés ensamble o vos le riche duc Cratier,
 Et en vostre compaignie seront mil chevalier.
 Porprenés cele angarde lassus dusq'au rochier;
 Se veés l'ost venir, sel me faites noncier, [6380]
 Mes eschieles vaurai et serrer et rengier."
 Macabrun s'en torna tot le chemin plénier,
 Lassus a mont as roches fist s'ensegne drecier,
 Après dist tel parole que bien peüst laissier:
 "Certes, or me deüssent li roial aprochier;
 A tant quant, s'il nos pueent de l'angarde chacier,
 Entr'aus se porront bien et vanter et proisier
 Que bien nos devoit on faire ensamble mengier
 Sans table et sans touaille tout ensamble el foier."
 Ce nos dist Salemons, bien le puis tesmoingnier, [6390]
 Sovent s'esjoïst on contre son encombrer;
 Tholomé l'en fist puis le jor tout mençoingnier,
 Car a cinc cens des siens le fist le champ voidier,
 Tels cent en i chaïrent ne se porent aidier.
 [3.375] Macabrun s'aresta tres en mi le chemin,
 Li dus Craté o lui, et dui mil Sarrasin;
 Lor enseignes fichierent droites desous un pin.
 Alixandre li rois se leva par matin,
 Vestus d'une chemise deliie de lin,
 Et desus un bliaut d'un chier paile porprin, [6400]
 Et chauça unes chausces d'un paile alixandrin.
 L'eau li aporèrent por laver doi meschin,
 Et furent de fin or ambedui li bacin.
 Estes vos Tholomé sor un mul sarrasin,
 Et dist a Alixandre: "Jel di et sel devin
 Que cil de Babilone nos sont molt pres voisin;
 La sus en son cel mont sont ja li Barbarin,
 Ausi vont glatissant com se fuissent mastin.
 Mainte ensegne de paile i a et d'osterin."
 Alixandre respont: "Volés savoir la fin? [6410]
 Dont n'est l'angarde vostre, Tholomé, cest matin?
 Se je par vos i pert qui vaille un angevin,
 Dusqu'a quarante jors ne bevrés mais de vin."
 Quant Tholomé l'entent, si li fist un enclin.
 [3.376] Tholomé s'en torna, n'i fist plus lonc sejour,

Montés est el mulet si s'est mis el retor;
 Venus est a son tref, descent de l'ambleor.
 Si home li ont dit, si lige vavasor:
 "Quels noveles contés du roi macedonor?"
 "Bones, la merci Dieu, fait m'a molt grant honor, [6420]
 Car le premerain caup avrai hui de l'estor."
 Por sa gent tost armer fist soner un tabor;
 Il vesti un hauber, nus hom ne vit mellor,
 Et a lacié un elme qui fu a oriflor
 Et a çainte l'espee qui fu a l'aumaçor
 Qui tint en sa baillie la terre de Labor.
 Un escu li aportent de vermelle color,
 L'ensegne de sa lance li tramist par amor
 La roïne d'Egypte, qui puis l'ot a segnor.
 Puis li ont amené le bon vair coreor; [6430]
 Qant il fu sus montés, bien sambla poingneor.
 [3.377] Estes vos Tholomé fors de son tref issu,
 Ses grailles fait soner et sovent et menu;
 Après lui s'en issirent si ami et si dru,
 Et furent bien cinc cens qui o lui sont venu.
 Tholomés vint avant com hom de grant vertu,
 Garda sus en l'angarde s'a Macabrun veü
 Devant trestous les autres desous un pin agu.
 "Baron, dist Tholomés, or m'est bien avenu;
 Lassus en voi un seul, a son col son escu, [6440]
 Et je tous seus irai, ja ne m'iert deffendu.
 S'il demande bataille, ja ierent caup feru;
 Ja i avra bien tost gaaignié ou perdu."
 N'i a nul des cinc cens qui n'ait son fraim tenu,
 Et Tholomés s'en torne, qui preus et hardis fu,
 Les galos du cheval par mi le pré herbu.
 [3.378] Tholomés s'en torna, qui l'angarde porprent,
 Et a dit a ses homes: "Chevalchiés durement."
 Qant vint sus en l'angarde, si parla hautement:
 "Qui estes vos, vassal? nel me celés noient." [6450]
 Et respont Macabruns: "Jel dirai voirement,
 Se savoir le volés, par itel convenant
 Que après me dirés tout le vostre esrement."
 Tholomés li respont: "Par le mien ensient,
 Se me dites le vostre, et je vos ensemment."
 "Par foi, dist Macabruns, je sui hom de jovent,
 Sires sui de Nubie, de l'onor qui apent,
 Car li rois fu mes peres, se ma mere ne ment;
 Dis mile chevalier sont o moi et cinc cent.
 L'amiraus me manda et proia doucement [6460]
 Que li venisse aidier encontre vostre gent,
 Et je i sui venus prover mon hardement;

Et je l'i aiderai se Dieus le me consent,
 Ja ne m'i troverés trop malvais ne trop lent.
 Tes sire est orgelleus si fait molt malement,
 Qui veut de toutes terres avoir le tensement;
 Mais n'ira mie ainsi du tout a son talent,
 Tost i puet meschaver se garde ne s'en prent."
 [3.379]"Vassaus, dist Macabrun, ce est la verités,
 Je sui rois de Nubie si fu mes parentés. [6470]
 Et ai en ma compaignie dis mil homes armés
 Et sui de l'amiraut por aïde mandés.
 Orgelleus est tes sires si fait molt que desvés,
 Qui veut a tous les autres tolir lor iretés,
 Mais cist país li iert deffendus et veés;
 Se garde ne s'en prent, tost i iert afolés.
 Dites moi vostre non, gardés nel me celés."
 Et respont Tholomé: "Or endroit le sarés:
 Uns des douze pers sui si ai non Tholomé
 Et sui de mon seignor par ma proëce amés; [6480]
 De la bataille m'est li premiers caus donés.
 Molt est fiers Alixandres, et grans sa poëstés;
 Ja mais ne finera, li consaus est finés,
 S'avra de Babilone prises les fremetés,
 Et que de tout le mont sera sires clamés."
 "Vassaus, dist Macabrun, un petit m'entendés:
 De ce que musars pense remaint a faire assés."
 [3.380]"Vassal, dist Tholomé, rois estes de Nubie
 Et si vous a mandé l'amiraut por aïe,
 Dis mil homes avés en vostre compaignie; [6490]
 Uns sui des douze pers qui l'ost ont en baillie.
 Alixandres est fiers et sa gent est hardie;
 Toute cele du mont ne douteroit il mie,
 Por ce doit bien avoir du mont la seignorie.
 Qui riens li contenra, il fera grant folie,
 Car se nus se repent et il merci li crie,
 Tant par est li rois dous que sempres li otrie.
 Je sui ses liges hom, s'il est quil contredie
 Je li ferai jehir a m'espee forbie."
 "Par Dieu, dist Macabrun, or oi grant estoutie [6500]
 Et jel vos contredi, par ma chevalerie."
 A tant sont departi, li uns l'autre deffie.
 Or orrés ja bataille par molt grant aatie.
 "Vassal, dist Tholomé, or faisons cortoisie
 Que la pais de nos homes soit juree et plevie
 Desi que la bataille de nos deus soit fenie."
 [3.381] Macabrun apela le riche duc Cratier,
 La pais li fait jurer, plevir et fiancier,
 Et Tholomé la fist as siens afiancier;

Por la joste veoir font les rens esclairier. [6510]
 Cratés fist apeler a soi un escuier,
 A l'amiraut l'envoie por dire et por noncier
 Qu'il face ses batailles et serer et rengier
 Et après aus les face souavet chevalchier.
 Li armé vont devant, après li paonier,
 Car li rois Alixandres ne vaut mie targier,
 A cinc cens chevaliers les a fait aproismier.
 Macabrun fu armés et ot le cuer legier,
 Son hardement vaura prover et essaier.
 Le cheval point et broche des esperons d'or mier [6520]
 Et a baissié la lance dont li fers fu d'acier,
 En l'escu Tholomé feri le caup premier.
 L'anste fu de rosel, tost la fist peçoier,
 Et Tholomés fiert lui, qui fu duis du mestier.
 Li espiés fu trenchans et l'anste de pumier,
 L'escu li fait fausser et l'auberc desmaillier,
 Devant les compaignons li fait sele voidier.
 Macabrun ot grant honte si se vaut redrecier,
 Tholomés le rabat as piés de son destrier.
 [3.382] Tholomés le feri en guise de vassal, [6530]
 Que tout li a desrout et cengles et poitral,
 Et si l'ot abatu a terre du cheval,
 De l'escu li froissa la boucle de cristal,
 L'auberc li desrompi et trencha le cendal,
 El sablon fist fichier le hiaume de metal;
 Un petit fu navrés, mais n'a mie de mal.
 Macabrun resaut sus si vient en son estal,
 Et Tholomés s'abaisse un petitet a val,
 Au redrecier qu'il fist le prist par le nasal.
 Il l'en eüst mené avec soi l'egal, [6540]
 Qant s'escrierent tuit si home natural
 Et meïsmes Cratés: "Ne l'en menrés a tal."
 Tholomés lor escrie: "Tuit estes desloial,
 Certes anqui trairés un dolereus jornal."
 Por Tholomé rescorre poingnent tuit li roial.
 [3.383] Par le nasal du hiaume fu Macabrun saisis,
 Tholomés l'en menoit com chevaliers hardis.
 Garda arriere soi et vit mil Arrabis,
 Les lances abaissies, de bien faire aatis.
 Ne fu mie merveille se il fu esbahis, [6550]
 Bien set, se il l'ataignent, que de la mort est fis.
 Le prison a laissié, mais ce fu a envis,
 Ne por qant tel li done el col et el cervis
 Que Macabrun a terre chaïtous estordis;
 Mais tost resailli sus com chevaliers eslis,
 Venus est au cheval, en la sele est saillis.

Et Tholomés escrie s'ensegne a molt haus cris,
 Et li sien le sequeurent as brans d'acier forbis;
 As espees trenchans fu l'estors esbaudis.
 Li cinc cens ont les mil si forment envaïs [6560]
 L'angarde laissie et li chans fu guerpis.
 Li dus Cratés le voit, cele part est guenchis,
 Il broche le cheval que on claime Pertris,
 Vait ferir un Grigois devant en mi le pis.
 Se l'anste ne brisast, il fust mors et traïs,
 Ne por qant du cheval l'abati el larris.
 Puis li dist en reproche, com hom de sens garnis:
 "Autre cheval querés, que cist vos est faillis."
 De prendre le cheval ne fu mie esbahis.
 Qant le vit Pindarus, si com dist li escriis, [6570]
 Se or nel puet vengier, tous jors sera honis.
 [3.384] Pindarus est honis s'il ne prent la vengeance,
 Il broche le cheval par fiere contenance,
 Por vengier le Grigois durement s'en avance
 Et vait ferir Cratés, un duc de grant poissance.
 L'escu li a percié et la reconnoissance,
 L'auberc li desmailla, ainc n'i ot arestance,
 Un petit l'a navré el blanc desous la pance,
 Que toute fu vermelle la blanche connoissance,
 A terre l'abati sans nule demorance. [6580]
 Puis li dist par ramprosne: "Ce soit la peneance
 De ce que vos avés passé la convenance
 Que vos ja hui jurastes et feïstes fiance;
 Faus seroit qui en vos avroit ja mais fiance."
 Puis a pris le cheval, qui que tourt a pesance,
 Au Grigois le rendi s'i fist grant honorance.
 Qant le vit Tholomés, au cuer en ot joiance,
 Car il l'avoit molt chier, norri l'ot des s'enfance.
 [3.385] Des mil et des cinc cens fu molt grans la mellee,
 Maint caup i ot feru et de lance et d'espee. [6590]
 Li mil sont trait arriere, l'angarde ont devalee,
 Li cinc cens les enchaucent plus d'une arbalestee.
 L'amiraus, qant il ot la novele escoutee
 Que li escuiers ot de par Cratés contee,
 Ses batailles conroie, sa gent a ordenee.
 La compaigne Cratés s'est d'une part tornee,
 Et la gent Macabrun s'est d'ilueques sevrete,
 A son segnor s'en est sus en l'angarde alee;
 Et l'autre eschiele après fu Pharés commandee,
 Icil fu rois d'Egypte et de grant renomee. [6600]
 La tierce eschiele après a a Moral livree;
 Soudains conduit la quarte, qui bien fu atornee
 D'armes et de chevaus au fuer de sa contree;

Et Saligos la quinte, cele fu molt doutee,
 Et Alains et Sansons ont la siste menee;
 Li amiraus la sesme, la fu grans l'aünee,
 Et ot environ lui sa maisnie privee.
 Grant joie ot l'amiraus, quant il l'a esgardee,
 Qant la voit de combatre ensi entalentee.
 Lors fu a l'estandart sa buisine sonee, [6610]
 Plus de mil grailles sonent tot contre val la pree,
 La montagne tentist, resone la valee.
 [3.386] Les eschieles chevalchent tot contre val la voie
 Tout souavet le pas, que nus ne s'en desvoie.
 Qant le voit l'amiraus, au cuer en a grant joie,
 Il a tiré sa resne, sor Acarin s'apoie.
 "Certes, dist l'amiraus, son tresor bien emploie
 Qui le done a tel gent, qui onques ne s'anoie
 De faire son servise; itel gent est la moie."
 La dedens la cité fist remaindre la proie. [6620]
 Et li rois Alixandres la sieue gent envoie,
 Quant il ot la novele que Tholomés tornoie.
 Toute l'ost s'estormist, qui devant estoit coie,
 La grant chevalerie durement s'en effroie.
 Tuit se courent armer et li rois lor otroie,
 La bataille sera, s'il est qui les en croie.
 [3.387] Or se courent armer li douze compaignon.
 Tholomés en est uns, ce dist en la leçon,
 Qui ja en est issus en guise de baron;
 Il avoit commencié l'estrif et la tençon. [6630]
 La ou Macabrun ot lacié son gonfanon
 Les a il rechaciés le trait a un boujon.
 Qant il furent armé, vinrent a esperon
 Trestuit a Alixandre por oïr sa raison
 De la bataille faire par tel devision
 Que chascuns se metra de son cors a bandon
 Ançois que il ja fuie le travers d'un roion.
 Li rois en apela premierement Cliçon,
 De la premiere eschiele li otroia le don.
 La seconde livra Perdicas le baron; [6640]
 Doucement li proia et par grant guerredon:
 Gart q'on ne chant de lui nule male chançon.
 [3.388] La tierce eschiele baille Filote le vaillant,
 En tote l'ost n'avoit un seul mieus combatant;
 Cil ot en sa compaigne chevalerie grant.
 Estes vos Aristé devant lui apoingnant,
 Et fu tres bien armés sor un destrier courant.
 "Aristé, dist li rois, la quarte vos commant."
 Qant l'oï Aristés, si respont en riant:
 "Je m'en istrai de ça, dedevers cest pendant; [6650]

Se je truis l'amiraut et il me vient devant,
 Je li donrai tel caup de m'espee trenchant
 Que jel vos rendrai mort ou pris ou recreant,
 Ou il fera de moi, se il puet, autretant."
 [3.389] Antigonus s'arma en une mareschiere,
 Car ses tres iert tendus dejoste la riviere.
 Vestu ot un hauberc qui fu fais a Baiviere
 Et ot lacié un elme qui iert de tel maniere
 Plus estoit durs que pierre et plus clers que verriere.
 El cheval est montés, ainc n'i quist estriviere, [6660]
 Et vait plus grans galos poignant par la bruiere;
 Il souffrist bien a corre une jornee entiere.
 D'une porpre vermelle ot faite la coliere,
 D'un blanc drap de Sydoine fu faite la cropiere.
 Après lui sa maisnie molt orgelleuse et fiere,
 Por paor de nului ainc ne torna arriere,
 Auques fu par commant et auques par proiere.
 Icil mena la quinte, qui grans iert et pleniere.
 [3.390] Alixandres s'arma par dedevant sa tente,
 Il vesti un hauberc qui fu fais a Ostrente, [6670]
 Il ne doute de riens que armé par mi sente;
 Et a lacié un elme qui des autres vaut trente,
 Et a çainte l'espee, qui molt li atalente,
 Qanque il aconsieut destruit et acravente;
 Montés est el cheval, dont la sele fu gente.
 Li jors fu biaux et clers si ne pluet ne ne vente,
 Et a dit a ses homes: "Gardés nus ne repente;
 Se je puis exploitier, que Dieus le me consente,
 Et je preng Babilone, que mes dieus ne me mente,
 Ja n'i avra si povre qui n'ait molt riche rente." [6680]
 [3.391] El cheval est montés Alixandres li rois,
 Larges fu et hardis et molt preus et cortois,
 Et a la soie eschiele esleüe a son chois,
 Et furent entor lui Grieu et Mascedonois.
 Trois mil archiers i ot sor bons chevaus norois,
 Qui molt sevent bien traire et ont les ars turquois.
 Tholomés en l'angarde fu o cinc cens Grigois
 Qui n'ont soing de riviere ne de deduit de bois.
 Qant il vit les eschieles, primes quatre et puis trois,
 Des esperons hurta le destrier espanois, [6690]
 Fiert Craton ens l'escu, dont la guige iert d'orfrois,
 Que lui et le cheval abat en un chaumois.
 [3.392] Li amiraus chevalche a bataille establee,
 Et li rois Alixandres o grant chevalerie.
 Tholomés et li sien ont l'angarde saisie,
 Cratés et Macabrunz l'ont laissie et guerpie.
 Pharés, li rois d'Egypte, o l'eschiele qu'il guie

Est venus en l'estor, fist lor une envahie,
 Vait ferir Lisiart en la targe florie,
 De l'un chief tresqu'en l'autre l'a rompue et croissie, [6700]
 Del cheval l'abat jus et en après s'escrie:
 "Pitié ai des Grigois, venu sont a folie."
 Après Pharés s'eslaissent cil de sa compaignie.
 Pharés prist le cheval, qu'il ne s'oublia mie,
 Puis dist une ramprosne par molt grant felonie:
 "Par fiance a segnor est mainte gent honie."
 Qant le voit Tholomés, la sieue gent ralie
 Et embrace l'escu, tint l'espee forbie,
 Tout droit après Pharés a sa resne guenchie,
 Tel caup li a doné sor l'elme les l'oïe [6710]
 Qu'il en gut a la terre plus de lieue et demie.
 Qant il l'ot abatu, belement li escrie:
 "Par Dieu, dist Tholomés, ne lairai ne vos die
 Mieus vaut a home taire que parler estoutie.
 Mi home avront vers vos molt bone avoërie,
 Mais vostre gent avra par vos malvaie aïe."
 [3.393] Ançois que cil d'Egypte aient Pharés rescous,
 D'autre part li Grigois Lisiart l'amorous,
 Fu li estors molt grans, destrois et angoissos,
 Et ne por qant par force les font monter ansdous. [6720]
 Lisiars est montés desor un cheval rous,
 Et Pharés remonta, qui molt fu orgellous,
 De sa honte vengier estoit molt covoitous.
 Le cheval point et broche par mi un pré herbous,
 Vait ferir un Grigois preu et chevalerous,
 Que lui et le cheval abati a estrous.
 [3.394] Lisiars sist el rous qui por fuïr ne lasse,
 Il ot la teste maigre, la crupe lee et crasse;
 Il embrace l'escu, la lance porte basse
 Et feri un des lor que tout l'escu li quasse [6730]
 Et du fer et du fust mist outre une grant masse;
 Ja l'eüst abatu, qant la lance outre passe.
 Puis a traite l'espee, autresi les entasse
 Com li peschierres fait les poissons ens la nasse;
 Qui il consieut a caup a grant paine respasse.
 [3.395] Segnor, or porriés grans mervelles oïr,
 Quant doi mil chevalier vont les cinc cens ferir.
 Tholomés ne li sien ne puet longes souffrir,
 Il n'i puet arester n'il ne daigne fuïr.
 Lors regarde sor destre et vit Dant Clin venir, [6740]
 O lui mil chevalier, ce l'a fait esbaudir.
 Dans Clins baisse sa lance si les vait envaïr,
 Plus d'une arbalestee a fait les rens fremir.
 Cil qui chiet en la route onques ne pot garir

Que sempres ne soit pris ou l'estuece morir.
 Dans Clins en feri un par merveilleux air,
 Que l'auberc li estroue, l'escu fait dessartir,
 A l'abatre li fait l'ame du cors partir.
 Ja mais n'en osast uns retourner ne guenchir,
 Qant li rois de Saba les a fait ressortir. [6750]
 [3.396] L'eschiele au roi Sorin i est poignant venue;
 Cele fu bien armee, toute de fer vestue.
 Sorins tint une enseigne qui fu a or batue,
 Et broche le cheval, qui de corre s'argüe.
 Devant trestous les autres, plus que uns ars ne rue,
 Li destriers ou il sist vistement se remue.
 Un Grigois vait ferir, sa lance fu agüe,
 La targe de son col li a par mi fendue
 Et la broigne du dos desmaillie et rompue,
 Par vertu l'a empaint, la sele remest nue. [6760]
 Et qant Dans Clins le voit, de maltalent tressue;
 Se il puet exploitier, ceste li iert rendue.
 Puis a traite l'espee de novel esmolue,
 Par desous la ventaille l'en a une rendue,
 La coiffe li trencha et la maile menue,
 A icel caup en a la cervelle expandue.
 [3.397] Perdicas sist armés sor un destrier d'Espagne
 Et vint grant aleüre dedevers la montaigne,
 Plus de mil chevaliers avoit en sa compaignie.
 Perdicas lor escrie: "Gardés nus ne se faigne." [6770]
 Lors broche le destrier, ne cuit que mais remaigne
 Devant ce que sa lance par mi escu enpaigne;
 Vait ferir Saragon, nes fu de Moretaigne,
 La lance o le penon dedens le cors li baigne.
 Ne li vaut li haubers le pris d'une chastaigne,
 A terre l'abat mort, n'i fist autre bargaigne.
 "Par foi, dist Macabrun, ceste gent nos mehaigne."
 [3.398] Perdicas et li sien les ont si enchauciés
 Plus d'une arbalestee les ont outre chaciés.
 Tels chaïen la presse puis n'en fu redreciés, [6780]
 Des escus et des lances fu tous li chans jonchiés.
 La peüssiés veoir et tant puins et tant piés,
 Tant cheval estraié et tant arçons vuidiés.
 Qant le vit Macabrun, tous en est esmaiés
 Et a dit a ses homes: "A mesure fuiés,
 Vous perdés toutes eures et riens ne gaaigniés;
 Or estes vos honi, se vos ne vos vengiés."
 Lors broche le cheval, vers aus est eslaissiés,
 Vait ferir un Grigois qui s'estoit avanciés,
 Tel caup li a doné li escus est perciés, [6790]
 Li haubers de son dos rompus et desmailliés;

Li Grigois chiet a terre, durement fu bleciés.
 Qant le vit Macabrun, molt par en fu haitiés,
 As estriers de la sele est li ber aficiés
 Et tient en son poing destre le branc qui fu oschiés,
 De si male maniere s'est a aus acointiés
 Que deus en a ocis et quatre mehegniés.
 Par tant fu li estors engrés recommenciés,
 N'ot talent de jouer tous li plus envoisiés.
 [3.399] A tant es vos Filote devers la destre part, [6800]
 Et fu tres bien armés sor un destrier liart,
 Hauberc ot bon et fort, n'ot de fauser regart.
 En toute sa compaignie n'ot chevalier couart,
 Mil furent es destriers, a chascun estoit tart
 De ferir en l'estor ou de lance ou de dart.
 Devant laissent Filote aler joster soi quart;
 Entre lor enemis commencent lor essart,
 Ausi brisent lor lances comme une seche hart;
 Filotes lor ocist au premier caup Rohart.
 Farés, le roi d'Egypte, feri si d'un fausart [6810]
 Que l'escu de son col par mi la boucle part,
 Et cil s'en est tornés fuiant vers l'estandart.
 [3.400] Macabrun fu bleciés et Pharés fu navrés,
 Li dus Cratés s'en fuit sor son cheval armés,
 Mil s'en vont après lui, de combatre ont assés.
 De tous ciaux ne fust puis uns tos seus retornés,
 Qant lor vint dedevant Saligos li barbés,
 A dis mil chevaliers les a cil encontrés.
 Qant il les vit venir, en haut s'est escriés:
 "Dites moi, Macabrun, avés Grigois trovés? [6820]
 Avés vos tout ce fait dont vos estes vantés?
 Car assés estoit fort nostre bone cités,
 Et qui fust la dedens bien fust aseürés
 Q'il ne doutast nului tant com durast estés;
 Bien peüst avenir, ançois qu'il fust passés,
 Que li rois s'en alast et il et ses barnés."
 Qant l'oï Macabrun, un peu s'est vergondés:
 "Sire, fait il, g'i fui, et vos i revenés."
 [3.401] Saligos fu armés sor un cheval morel,
 En toute la compaignie n'avoit pas plus isnel. [6830]
 Un hauberc ot vestu dont d'or sont li clavel,
 Et ot en son sa lance un vermeil penoncel.
 Il broche le cheval et o lui mil dansel,
 Sachiés ja lor rendront un estor de novel.
 Saligos esperone, tint l'escu en chantel,
 Vait ferir un Grigois en mi lieu le tropel,
 Que lui et le cheval abat en un moncel.
 Qant le vit Tholomés, ne li fu mie bel,

Un des leur vait ferir que on clame Ospinel;
 Li escus de son col ne li vaut un mantel, [6840]
 Que lui et son cheval abat en un putel.
 [3.402] Saligos et li sien lor ont damage fait,
 Plus de deus cens en ont abatu el garait;
 Qant ce voient Grigois, arriere se sont trait.
 Saligos esperone, un Grigois ferir vait,
 Que l'escu de son col a peçoié et frait,
 Si l'a navré el cors que il geta un brait.
 Se ne fust Aristés, li hardis qui bien ait,
 Ançois qu'il s'en partissent i eüst malvais plait;
 Qant ce vit Aristés que il lor font si lait, [6850]
 Cele part est venus au partir du forfait,
 En la plaie q'ot faite vaura metre l'entrait.
 [3.403] Aristés est venus armés desor Vairon,
 Un escu ot au col ou ot paint un lion;
 Tuit ensamble esperonent il et si compaignon.
 Voit ciaus de Babilone, qui molt lor sont felon;
 La compaigne des Griens ont mis en tel friçon,
 S'il ne tornent en fuie, ne sevent garison;
 Ja les orent chaciés le trait a un boujon,
 Qant Aristés i vint, qui oïla tençon. [6860]
 Il a baissié sa lance a tout le gonfanon,
 Vait ferir Saligot par dejoste l'arçon,
 Le fer li mist el cors, de la lance un tronçon;
 Saligos est cheüs tous envers el sablon.
 Aristés fiert un autre el pis sous le menton,
 Par mi le cors li met le fer et le penon,
 Du cheval l'abat mort par delés un buisson.
 [3.404] Saligos fu navrés el cors, mais nequedent
 Paor ot de la mort, a son cheval se prent,
 Montés est par l'estrier, qui fu fait a argent. [6870]
 Grant paor a li rois por la plaie qu'il sent,
 De l'estor est issus par mi toute sa gent,
 Vait s'ent a esperon, que nului n'i atent.
 Qant l'amiraus le vit de la plaie sanglent,
 Contre lui est venus si li dist belement:
 "Saligos, biaux amis, par le mien ensient,
 Navrés estes a mort, dont ai le cuer dolent;
 Se je puis exploitier, j'en prendrai vengeance."
 Lors fait soner buisines et de cors plus de cent,
 Et li rois Saligos de son cheval descent. [6880]
 [3.405] L'amiraus fist soner deus buisines a glas.
 "Sire, dist Saligos, en la bataille iras;
 Se tu bien ne t'i gardes, tu t'en repentiras,
 Car li home Alixandre ne furent onques las,
 Lor cheval sont isnel, fort et corant et cras.

Ou qu'il truevent tes homes, ses vont ferir a tas,
 Lor haubers lor derompent autresi comme dras."
 "Par foi, dist l'amiraus, tout ce me samble gas,
 Li respons Apollin ne nos fausera pas.
 Tu es navrés a mort, por ice remanras." [6890]
 Or s'en ist l'amiraus tout souavet le pas,
 Ançois que none soit sera devers le bas.
 Et Saligos apele le bon mire Ypocras,
 Dist li: "Je te donrai de fin or dis henas
 Et dis mile besans, se de cest mal respas."
 [3.406] Or s'en vait l'amiraus tout droit en la bataille;
 De sa gent a perdu, mais de ce ne li chaille,
 En Apollin se fie et en sa devinaille.
 Le cheval point et broche, ne laira nes asaille,
 Li chevaus cort plus tost q'esprievers après qaille; [6900]
 Et feri un Grigois el pis sous la ventaille
 Et le fer et le fust li mist par mi l'entraille;
 L'auberc qu'il ot vestu li deront et desmaille,
 Tant souef l'abat mort que de riens ne travaille.
 Il escrie s'ensegne: "Apollins nos i vaille."
 [3.407] Droit après l'amirail estes vos Acarin;
 Molt avoit grant fiance el respons Apollin,
 Tresque ci l'ont tenu trestout por bon devin.
 Ses chevaus fu tous noirs, et blanc furent li crin,
 Ses escus fu vermaus a un chantel hermin, [6910]
 Et ot en son sa lance un gonfanon porprin.
 Vait ferir un Grigois sor l'escu a or fin,
 Que mort l'a abatu dedelés un sapin.
 Estes vous après lui Sanson et Torquentin,
 Li uns fiert Lisiart et li autres Maurin,
 Tous desconfis les chacent tresq'a la roche Arsin,
 Ou li rois Macabrun fist l'angarde hui matin;
 L'amiraus les enchaue, o lui mil Sarrasin.
 Tholomés trestorna el mont les le chemin,
 Acarin vait ferir de son branc acerin; [6920]
 Ne li valut li elmes une coiffe de lin,
 Si que mort le trebuche desous un aubespín.
 [3.408] Acarins fu ocis par tel mesaventure;
 Ne por qant l'amiraus tout a desconfiture
 Enchaue les Grigois tant com li mons li dure,
 Il n'i a si hardi de retourner ait cure.
 Lors vint Antigonus delés une costure,
 O lui mil chevaliers, vienent grant aleüre.
 Qant Dans Clins l'entendi, molt en ot grant ardure;
 Il dist a Tholomé: "Ce est molt grant laidure [6930]
 Que nos ainsi fuions por ceste gent tafure,
 Molt a mal emploié li rois sa norreture;

Se nos perdons s'amor, ce sera bien droiture."
 Lors poignent les a les andui a desmesure
 Et tint chascuns l'espee par mi l'enheudeüre
 Et fiert chascuns le sien tres par mi la faiture,
 Des chevaus les abatent andui a terre dure.
 "Dant Clin, dist Tholomés, querés lor sepulture,
 Car les ames ont ja en infer pris mesure."
 [3.409] A cele pointe vint Antigonus li ber, [6940]
 Mil chevaliers o soi qui molt font a douter,
 Plus de mil en ont fait chaoir et enverser;
 Ensamble o eus i poignent trestout li douze per.
 Si fort les enchaucierent qu'il les font reüser,
 Desi q'a l'estandart n'i pot nus arester.
 Or pöés grant merveille oïr et escouter,
 Ainc de si grant estor n'oïstes mais parler.
 La peüssiés veoir et poins et piés cauper,
 Les chevaus estanchiés par la champaigne aler,
 Tant chevalier sor l'erbe chaoir et reverser, [6950]
 Tant ruiste caup ferir, tante ensaigne escrier
 Et tant dolereus plaint et tant sospir geter.
 Molt fu preus l'amiraus por estor endurer,
 Il fait a l'estandart deus buisines soner,
 Et si ra fait ses homes ralier et serrer
 Que nus des chevaliers ne puisse entr'aus entrer,
 Et se il s'i enbat, ne puisse retorner.
 [3.410] Segnor, a l'estandart la fu li recovriers,
 Li chans fu grans et larges et vestus des premiers.
 Li amiraus fu preus et de ce costumiers, [6960]
 Aavec lui Macabrun et Sanson et Cratiers.
 Il vait ferir Filote en l'escu de quartiers;
 Qant il s'en departi, ne remest mie entiers,
 Sanglente en fu la hanste, li fers et li aciers.
 Filotes chiet a terre entre les paoniers;
 Par la resne de paille fu saisis ses destriers.
 L'amiraus s'aresta comme bons chevaliers,
 Il le cuida bien prendre, qant li vint encombriers:
 Licanor esperone, qui n'iert mie laniers,
 Ançois que il s'en parte, fera vuidier estriers; [6970]
 Vait ferir l'amiraut, qui estoit fors et fiers,
 Qu'il est cheüs a terre entre deus boutoniers.
 Puis a pris le cheval, dont il estoit mestiers,
 Si l'a rendu son frere, qui monta volentiers.
 [3.411] Entre deus boutoniers est l'amiraus cheüs;
 Se li rois Alixandres i fust a tans venus,
 L'amiraus i fust mors ou el champ retenus.
 Estes vos apoignant plus de mil de ses drus,
 Le cheval li rendirent dont il iert abatus;

De cel quil gaaigna fu molt tost reperdus. [6980]
 Li amiraus monta, qui s'est aperceüs,
 Et broche le cheval des esperons agus,
 Vait ferir Tholomé dolens et irascus;
 Desous la boucle d'or fu perciés ses escus,
 A terre l'eüst mis, se ne brisast li fus;
 Et Tholomé fiert lui du branc qui fu molus.
 Molt fu bien li estors d'ambedeus pars ferus,
 De sanc et de ceruele fu molt grans la palus;
 Grant force ot l'amiraus, qant ne fu retenus,
 Et li Grigois les fierent des brans d'acier tos nus. [6990]
 [3.412] Macabrins esperone le destrier de Castele,
 Plus tost le fait aler que ne vole arondele,
 Et fiert si un Grigois sor l'escu de Tudele
 Que l'auberc li faussa par desous la mamele,
 Après li a trenchié et chemise et gonele
 Et le fer et le fust li mist desous l'aissele,
 Que par derrier le dos en parut l'alemele;
 Enpant le de vertu si l'abat de la sele.
 Puis a traite l'espee qui luist et estincele
 Et vait ferir un autre, qui porte une roële, [7000]
 Ausi li trenche l'elme com se fust une astele,
 Tout li a espandu le sanc et la ceruele.
 "Par foi, dist l'amiraus, ceste joste est molt bele,
 Cist doit avoir amor et deduit de pucele."
 Macabrins Tholomé par son droit non apele
 Et dist c'or li estuet une biere novele.
 [3.413] Qant Tholomé oïque il fu rampronés,
 Le cheval point et broche des esperons dorés.
 Li espiés que il porte fu Macabrun privés,
 Que ses escus en est et frais et estroués, [7010]
 Li haubers de son dos et rompus et fausés.
 La lance li a mise par ansdeus les costés,
 Enpant le de vertu, Macabrins est versés;
 Por la plaie qu'il ot s'est quatre fois pasnés.
 Qant le voit l'amiraus, a poi n'est forsenés,
 Puis a dit a ses homes: "Or sui je malmenés.
 Macabrins est ocis ou il est afolés;
 Gardés qu'il soit vengiés, por Dieu or en pensés."
 Et cil li respondirent: "Si com vos commandés."
 A l'ensegne qu'il crie, vint ses riches barnés, [7020]
 El premier chief devant ot plus de mil armés.
 Segnor, li vilains dist et si est verités
 Tels veut son duel vengier tost est sor lui tornés.
 [3.414] Qant l'amiraus voit mort Macabrun et sa gent,
 Sa proëce regrete et son grant hardement,
 Et dist ja mais n'iert liés s'en avra vengeance.

Lors escrie s'ensegne si que sa gens l'entent,
 Entor lui sont venu plus de mil et set cent.
 Puis vont joster as lors molt aïreement;
 Tels chaï en la route qui bien ne mal ne sent. [7030]
 Li chevaus l'amiraut les menus saus porprent,
 La resne li alasche et nel fait mie lent,
 Des esperons le hurte et met l'ensegne au vent,
 Vait ferir un Grigois, que tout l'escu li fent,
 Tant com hanste li dure du cheval le descent.
 [3.415] Li estors fu molt grant et la bataille fiere.
 Macabrun ont couchié desor une litiere
 Et li Grieu en porterent le leur qui fu en biere.
 L'amiraus ot grant force ses vaut chacier arriere
 Et li Grieu sont molt fort, n'i a celui n'i fiere. [7040]
 La compaigne Alixandre vint toute une costiere,
 Li rois vint premerains, ne vint mie derriere.
 La lance que il porte ne fu pas de bruiere,
 Pesans fust a un autre, mais a lui fu legiere;
 Desus ot fait lacier de paille une baniere.
 Vait ferir un des lor sor la targe doubliere,
 C'onques nel pot tenir poitraus ne estriviere
 Que il ne l'abatist en mi la sabloniere.
 Lors s'escria li rois a la hardie chiere:
 "Segnor, or i ferés, la bataille est pleniere." [7050]
 Par la ou li rois vait fu molt grans la poudriere,
 Plus de cent en laissa gesir en la charriere.
 [3.416] La compaigne Alixandre vint de travers un mont,
 Et sont plus de deus mile devant el premier front;
 Tout si com li rois vait la grant presse derront.
 Qant vint as paoniers, tres par mi aus s'en vont,
 Les fuians vont ferant et des mors font le pont.
 Qanque li rois consieut tout destruit et confont,
 A ses homes parole, de ferir les semont;
 Ne cessent ne ne finent desi au val parfont. [7060]
 Dedevant la cité avoit un pin reont,
 La s'aresta li rois et cil qui o lui sont;
 Lors retornent arriere et par aus s'en revont.
 [3.417] Alixandres revint o s'eschiele d'a val,
 Et sont el premier front bien vint mile vassal,
 Trestuit sont si ami, si home natural.
 Li paonier s'en fuient, car trop avoient mal.
 Des esperons a or fait saillir le cheval,
 Ens en mi de sa voie encontre l'amiral,
 Un caup li vait doner, onques ne reçut tal; [7070]
 De l'escu li froissa la boucle de cristal,
 Par mi le cors li mist l'ensegne de cendal
 Et tout a desrompu et cengles et poitral;

Aprés le roi de Gresce poignent tuit li vassal.
L'amiraus est cheüs por la plaie mortal;
Alixandres li rois prist sor lui son estal.
[3.418] Li rois s'est arestés et a traite l'espee,
N'avoit encore pas la ramprosne oubliee
Que li ot par un brief li amiraus mandee.
A l'amiraut en done une si grant colee [7080]
Que la teste a tout l'elme li a du bu sevrete.
Adont fu sa compaigne toute desbaratee
Et cil a pié s'en fuient contre val la valee.
Alixandres li rois a sa gent apelee
Et dist une parole, qui bien fu escoutee,
Qu'il n'ocient mais nul de ciaus de la contree:
"Se feütés m'estoit et plevie et juree,
Lor cités lor seroit de moi asseüree."
Dementres que li rois la chose a devisee,
Tholomés et li sien ont l'angarde montee [7090]
Et brochent les chevaus, lor voie ont molt hastee.
Ançois que li fuiant venissent a l'entree,
Ont il prise la porte, qui lor fu deffermee.
Venus est a la tor, ainc ne li fu v[e]ee,
Et l'ensegne Alixandre a dedesus levee.
Alixandres li rois, qant il l'ot esgardee,
Si a dit en riant: "Ceste m'iert destinee;
Qui la tor a saisie m'amor li est privee."
Li rois s'est arestés dedesous en la pree;
Sa gens est descendue, après est desarmee. [7100]
[3.419] Tholomés a la tor et la cité saisie,
Et li chans est vaincus, la bataille est fenie.
Alixandres li rois fist molt grant cortoisie,
A ses homes commande et hautement lor prie:
"Gardés que un tout seul nus de vos n'en ocie."
Alixandres apele sa gent et si lor prie
Qu'aillent querre les mors, que nus nel contredie;
Il meïsmes i vait o grant chevalerie.
L'amiraut a fait metre en un drap de Rossie
Et tous ses compaignons, que nul n'en i oublie; [7110]
Les siens mors refait metre en une autre partie.
[3.420] Ses homes fist li rois richement enterer,
Puis fist faire un charnier, si com j'oïconter,
Les autres mors fist prendre et iluecques geter.
L'amiraut et ses rois en fist lai ens porter;
Ens el temple Apollin, qui soloit deviner,
Cent et cinquante cierges fist li rois alumer.
Les cors fist richement ouvrir et enbasmer
Et l'amiraut commande richement conreer,
Fist li tel sepulture qui molt fist a loër. [7120]

Se bien le vos voloie et dire et deviser,
 Je ne porroie mie bien trestout remenbrer;
 En tout le mont n'ot tele, bien le puis afermer,
 Fors que seul l'Alixandre, sous ciel n'en ot sa per.
 Et ne por qant, se vos me volés escouter,
 La verté en dirai, se g'i puis assener.
 De bon marbre et d'yvoire furent tuit li piler,
 Le fondement desous fist d'aïmant ovrer
 Et a fer et a plom fist les qarriaus sauder
 Et si en fist le mur si hautement lever [7130]
 Nus hom n'i peüst mie d'une pierre geter.
 Desus les quatre voutes, qui tant luisoient cler,
 Fist li rois par engien quatre harpes poser.
 Par itel maïestire les i fist compasser,
 Se nus por son deduit i vait por escouter,
 De pierre ou de martel s'il i daigne hurter,
 Donques orra les harpes tant doucement soner,
 S'il voloit la raison en son cuer porpenser,
 Si li seroit avis que il oïst harper:
 Les deus harpes commencent l'amiraut regreter. [7140]
 [3.421] Dedesous les quatre ars quatre lampes pendoient,
 Par art de ningremance en air se sostenoient.
 Ce d'ient bien por voir cil qui les lampes voient
 Q'eles pendent en air, que nul lieu ne tenoient,
 Et nuit et jor les lampes molt clerement ardoient
 Si que nule liqueur por ardoir n'i metoient.
 Es quatre ars par desous qui tout ce sostenoient
 Tous les fais l'amiraut de color i paignoient
 Et deseur tout ice letres i escrivoient;
 Li fait tel com il ierent tout de fin or paroient, [7150]
 C'estoit avis a ciaux qui bien les esgardoient
 Que fust chose vivant la peinture qu'il voient.
 De pierre ou de martel qant un peu i touchoient,
 Les harpes retentissent, qui volentiers chantoient;
 Aveuc ceste merveille, une autre en i faisoient,
 Cil qui ne l'ont veü molt a envis le croient.
 [3.422] D'une esmeraude vert firent la sepulture;
 Assés est longe et lee, trestout a sa mesure.
 Or vous dirai après dont fu la couverture:
 D'eles d'alerion, et est de tel nature [7160]
 Chose qui'n est coverte ne doute porreture,
 Ainsi furent saudees que n'i parut jointure.
 Qui sa main i metroit tost avroit grant ardure,
 Plus trenche que rasoirs, ja n'iert la riens tant dure;
 Tout si comme on la trait i pert la trencheüre.
 Puis firent d'Apollin tresgeter la figure,
 Trestoute de fin or, set piés ot de mesure.

Li oel sont de topasse, si com dist l'escripture,
 L'une est des douze pierres qui molt est clere et pure.
 Au chief li ont assis tout droit en estature; [7170]
 Plus de mil mars d'or fin en vaut la vesteüre.
 [3.423] Riche est la sepulture, nus ne set si vaillant.
 L'amiral ont ens mis, honor li firent grant,
 Car Apollin poserent a son chief en estant,
 De fin or tresgeté de molt riche samblant.
 En molle i sont fondu de coivre dui enfant,
 As piés les font drecier, molt furent avenant.
 Chascuns tint un escu d'or et fort et pesant,
 A deus bastons de fer se vont grant caus donant,
 Comme autre champion se vont escremissant. [7180]
 Puis que cil s'en issirent qui firent cest enchant,
 N'i vit on puis entrer nisune riens vivant.
 Por cel fist Alixandres, si com trovons lisant,
 Ne veut que nus i entre qui lor voist forfaisant,
 Qui le tresor en port que la verra gisant,
 Et qant il sera mors ne veut que nus s'en vant.
 Desi q'as quatre entrees viennent li païsant,
 De pierre ou de martel i fierent li auquant
 Por escouter le son des harpes et le chant;
 N'i a nul si hardi qui ost aler avant, [7190]
 Car se il i aloit, de mort n'avroit garant.
 [3.424] Si fu haute la tombe c'on la peüst choisir
 Bien de quatre lieuees, ne vos en quier mentir;
 Encore en porriés autre merveille oïr:
 N'i peüssiés jointure ne veoir ne sentir.
 Qant il orent fait l'uevre trestout a lor plaisir,
 D'un tout seul chapitel la font desus covrir.
 Un oisel de fin or por cele oeuvre acomplir
 Font sor le chapitel par grant engien tenir.
 Un chalemel d'argent li font du bec issir; [7200]
 Quel c'onques vent qu'il vente, quant il i puet ferir,
 Trestous iciaus qui l'oënt fait cele part venir.
 Puis l'ont fait par defors tout de fin or burnir;
 Qant li solaus reluist, tout le fait resclarcir,
 Q'a tous ciaus qui l'esgardent fait les ieus esbloïr.
 Or devons a l'estoire d'Alixandre venir:
 Se un peu me volés escouter et souffrir,
 Tels paroles dirai qui bien font a oïr
 Du regne as damoiseles que il ala saisir,
 De Divinuspater qui si l'ala traïr, [7210]
 Il et Antipater, et par venim morir.
 [3.425] La bataille fu faite et prise la cités,
 L'amiraus fu ocis et ses riches barnés.
 Alixandres li rois de ce fist que senés

Q'as citiens rendi toutes lor erités
 Por ce que il ont fait toutes ses volentés.
 En la tor de Babel en est li rois entrés,
 Que li gaiant fremerent par lor grans poëstés.
 "He! Dieus, dist Alixandres, com or sui honorés
 Qant ceste terre est moie et trestos cis regnés; [7220]
 Or veul desi q'a poi estre rois coronés
 Et desor tout le mont estre sires clamés."
 Desi q'a quinze dis fu li jors creantés.
 Lors fist ses briés escrire, ses homes a mandés
 De par toute la terre ou fu sa poëstés.
 Sanse uns hom l'amiraut, qui estoit eschapés,-
 Il n'estoit mie mors mais un poi fu navrés,-
 Cil a dit tel parole dont bien fu escoutés:
 "Sire rois Alixandres, envers moi entendés.
 Ne vos veul pas desdire, por noient vos vantés; [7230]
 Encor sai je tel terre, ce est la verités,
 Ains que l'aiés conquise a faire avrés assés."
 Et respont Alixandres: "Amis, car la només."
 "Sire, jel vos dirai, qant savoir le volés:
 Amazoine est, uns regnes d'un flueve avironés,
 Et est tous li pais de femes abités."
 [3.426]"Encor i a tout el, n'est hom qui m'en desdie:
 Molt est preus la roïne qui les puceles guie.
 Une feïe en l'an enprennent compaignie,
 Et quant sont assamblees, passent Meothedie, [7240]
 C'est uns fluns de la terre qui l'avirone et lie.
 A une feste en l'an qui lor est establee,
 Li chevalier i vont, chascuns d'aus por s'amie.
 La parolent d'amors et de chevalerie
 Et font lor volentés trestout par drüerie.
 Se l'une en est ençainte et li enfes ait vie,
 Por que il soit vallés de riens ne se detrie,
 Son pere le tramet qui l'ait en mainbornie;
 Et se ce est pucele, o sa mere est norie."
 "Par Dieu, dist Alixandres, or ai merveille oïe. [7250]
 Se je icele terre nen ai en ma baillie
 Et je ne puis avoir sor eles segnorie,
 Dont porrai je bien dire ma proësce est faillie.
 Le matin i movrai quant l'aube iert esclairie."
 [3.427]"Sire, ce li dist Sanses, la terre est molt salvage,
 Uns fluns l'açaint entor dont haut sont li rivage;
 A envis i trueve on pont ne gué ne passage.
 Molt est preus la roïne qui tient cel iretage,
 Et toutes les puceles sont molt de haut parage,
 Armes sevent porter et faire vasselage. [7260]
 Ja n'iert icele terre conquise sans damage,

Ançois que l'aiés prise i ferés lonc estage."
 Qant l'oï Alixandres, s'enbroncha son visage,
 Et qant se redreça, si a dit son corage:
 "Se ne la puis conquerre, ne me tieng pas por sage,
 Et s'eles ne me rendent ou cens ou treüage."
 "Eles n'ont onques cure de faire mariage,
 Mais une fois en l'an assemblent par lor rage."
 "Par Dieu, dist Alixandres, ains i lairoie gage
 Que ne lor face rendre ou treü ou chavage." [7270]
 [3.428]"Segnor, fait Alixandres, or est remés li jors
 De porter ma corone, de partir mes honors."
 "Sire, ce li dist Sanses, molt sont de grans valors,
 Sachiés qu'en nule terre n'a chevaliers mellors
 Por maintenir tornois ne guerre ne estors."
 "Par Dieu, dist Alixandres, se nes tor a mes mors,
 Dont ne sui je pas nes de gentieus ancisors
 Qui du regne de Gresce tinrent les maistres tors."
 Encor le dist Lucans, qui fu maistres auctors,
 Que de tous ciaus du siecle fu Alixandres [7280]
 Des rois qui sont en terre et des empereors.
 Lors fait li rois remaindre de ses homes pluisors
 Por resaner lor plaies et garir lor dolors.
 A vint mil paoniers fu donés li seors,
 Se il en a mestier, qu'il li facent secors.
 L'endemain sont monté es destriers missaudors,
 Et li rois fait soner ses cors et ses tabors,
 Aveuc lui maine Sanse, qui est ses vavasors.
 [3.429] Or s'en vait Alixandres par itel achoison
 Qu'il veut veoir la terre ou n'a se femes non [7290]
 Et qu'il la veut avoir en sa subjection.
 Et maine ensamble o lui son vavassor Sanson,
 Aristé et Filote, Perdicas et Caulon.
 Licanor est remés par tel devisions
 Que Babilone gart, la tor et le dongon,
 Et a en sa baillie toute la region.
 Or s'en vait Alixandres par grant aatison,
 Pain et vin fait porter et autre garison,
 Et passent ces grans tertres et ces vaus a bandon.
 Au chief de quinze jors, ce dist en la leçon, [7300]
 Une jornee pres tendi son pavillon.
 L'endemain se jorna et il et si baron;
 Une espie envoia coiement a larron
 Por cerchier le passage entor et environ.
 Icele nuit meïsmes, n'en dirai se voir non,
 La dame d'Amazoine vint une avision.
 [3.430] Un songe merveilleux a songié la roïne
 Qu'il avoit une peue en la sale perrine

Et avoit paonciaus que après soi traïne.
 Par devers Babilone en mi une gastine [7310]
 Vint une aigle volant par molt grant aatine
 Qui li voloit tolir ses paons par rapine,
 Mais o ses paonciaus s'en fuit en la cuisine;
 Qant ele i dut entrer, si chaïjus sovine.
 L'endemain par matin manda une devine,
 En un gardin l'en maine desous une aubespine,
 Iluec se sont assises, l'une a l'autre s'acline.
 La roïne parole et dist a la meschine:
 "A mie nuit songai dedesous ma cortine
 Un songe molt estrange, ne sai que il destine." [7320]
 [3.431] Le songe li conta, cele le vaut oïr;
 Et qant ele ot oï, si jeta un souspir,
 En plorant li respont, ne se pot astenir:
 "Dame, trestous les songes doit on a bien vertir.
 Vos esterés la peue, n'i pöés pas faillir;
 Uns rois ce iert li aigles, ne vos en quier mentir,
 Par force vous vaura cest roiaume tolir;
 Se vos i combatés, nel porrés pas souffrir,
 Ou vous veulliés ou non, vos convenra fuïr.
 Conseil vos estuet querre comment porrés garir; [7330]
 Je vos lo cest roiaume de lui a retenir
 Et par an treü rendre trestout a son plaisir;
 Mieux vos vaut ice faire qu'en bataille morir,
 Puis que la chose est faite tart est au repentir."
 [3.432] Lor conseil ont finé, la roïne le croit.
 En son palais s'en vait si s'est assise droit
 En un lit qui d'or fin trestous massis estoit.
 Les coutes sont de paille sor coi ele gisoit,
 Li lis cordés de soie qui les coutes tenoit.
 Es vos une pucele qui la poignant venoit [7340]
 Sor un destrier d'Arrabe qui cort a grant exploit.
 Qant el voit la roïne, gentement li disoit:
 "Jupiter li grans dieus, qui haut siet et loins voit,
 Saut et gart la roïne si com faire le doit,
 Mars li dieus de bataille en aide li soit,
 Phebus la gart de mal, n'ait trop chaut ne trop froit,
 Juno li doint richece, Pallas la li otroit,
 Venus li doinst amor ou ele bien l'exploit.
 Noveles li sai dire, s'ele veut, or endroit,
 Ja ne li celeroie por nule riens qui soit." [7350]
 La roïne fu sage, bonement respondoit:
 "Diane la dieuesse les autres deus en proit
 Que nos salves soions; or dites sans destroit
 Queles sont les noveles." Et cele li disoit.
 [3.433] La roïne commande descendre la pucele;

Lors commença a dire et conter la novele:
 "De devers Babilone, ce dist la damoisele,
 Vient uns rois Alixandres, sa gent ainsi l'apele;
 Fortune l'a levé tout en son la roële,
 Maint prince a afole et mis jus de sa sele; [7360]
 La gent que il conduist est hardie et isnele,
 Tout le mont a conquis-durement se revele-
 Fors seulement ceste ille, qui molt li semble bele,
 Et jostera ensamble le malle et la femele;
 Se il puet exploitier, de vos fera s'ancele."
 Qant la roïne l'ot, rougist comme estincele,
 Deffuble son mantel, remest en sa gonele,
 Un petit s'enbroncha, sa main a sa maissele;
 Qant se fu redrecie, la meschine en apele.
 [3.434]"Dites moi, damoisele, est ce dont verités? [7370]
 Enfin le veul savoir comment vos le savés."
 "Dame, jel vos dirai, quant vos le demandés.
 Je m'en estoie alee hui matin en ces gues,
 La estoit uns batiaus venus et arivés
 Q'a la cit d'Amazoine venoit tous abrievés.
 Qant il fu a la rive atachiés et fremés,
 Je ving poignant vers aus ses ai araisonés.
 Ciaus qui dedens estoient vi ge molt effreés
 Et je lor demandai: 'Biau segnor, dont venés?'
 Dirrent que l'ost venoit, qui grans estoit assés; [7380]
 Por la paor de l'ost guerpie ert la cités."
 Qant la roïne l'ot, molt fu ses cuers müés,
 Bien sot que lors estoit ses songes averés.
 Li consaus de ses dames fu molt tost assemblés;
 Qant fu de toutes pars venus et aünés,
 "Dames, fait la roïne, un petit m'entendés.
 Uns rois de Babilone, grans est sa poëstés,
 Tout le mont a conquis par ses tres grans fiertés
 Fors seulement cest ille qui tant li est löés.
 Tant par est, ç'oï dire, d'avarise provés [7390]
 Que de tout l'or du mont ne seroit assasés."
 Dist une sage dame: "Et vos l'en trametés
 Quatre chevaus charchiés et cinc muls afeutrés."
 "Dame, si ferai je, qant vos le me löés."
 Deus puceles apele, plaines de grans biautés;
 Onques encor li fluns ne fu d'eles passés
 N'onques encor ne fu fraite lor chasteés.
 "Alés, fait la roïne, vos gens cors conreés;
 Au fort roi Alixandre mon present conduireés,
 Proiés li doucement qu'il l'en pregne pités, [7400]
 Que ne soit ma terre arse ne mes païs gastés;
 Chascun an, s'il commande, li iert abandonés,

Ains que de moi departe li iert asseürés."
 [3.435] Florés et sa compaigne s'en vont isnelement.
 Chascune s'est vestue bel et cortoisement;
 Florés vest un bliäut, molt fu a son talent,
 Sa chars pert blanche et tendre par le detrenchement,
 Li mantiaus de meïsmes detrenchiés ensemment.
 Ses palefrois fu pres, n'iert pas li frains d'argent
 Ains estoit de fin or, ovrés molt soutilment [7410]
 A pierres precieuses, plus en i ot de cent.
 Florés i est montee, q'a estrier ne s'i prent.
 Biautés rot un bliäut d'un molt chier garnement,
 Il fu plus noirs que meure et ressemble arrement,
 Li mantiaus de meïsmes, se l'estoire ne ment.
 Li palefrois fu pres, frain ot et bel et gent,
 Bien valioient les pierres quatre vins mars d'argent.
 Cele qui l'amena par le resne li tent,
 Biautés i est montee molt acesmeement.
 [3.436] Des somiers i ot nuef, molt richement charchiés [7420]
 De riches dras de soie et de pailles ploiés
 Et de fin or d'Arrabe, qui molt est covoiétés.
 Encor fu li presens durement enforciés:
 Trente henas de saffre de tel tempre aliés,
 Primes les enversés et puis les redreciés,
 Ja por cheoir a terre n'en sera uns brisiés;
 Salemons les fist faire, qui molt fu ensegniés
 Ains qu'il veüst la dame dont il fu engigniés.
 "Mon anel li portés aveuc par amistiés,
 Proiés li doucement qu'il li praigne pitiés, [7430]
 Que il n'arde ma terre, que ce seroit pechiés."
 [3.437] Aprés quatre chameus d'or et d'argent charcha,
 Alixandre le roi le present envoia
 Et par les deus puceles doucement li manda
 Chascun an, s'il commande, autretant en avra.
 A mil de ses puceles la roïne monta,
 Tresq'a Meothedie le present convoia,
 Sor la rive s'estut dementres qu'il passa,
 Tant com les pot veoir tous tans les esgarda;
 Qant nes pot plus veoir, arriere retorna. [7440]
 Alixandres iluec un seul jor sejourna,
 Et li garçons revint qui le país cercha;
 L'endemain par matin Alixandres monta,
 Ne vaut plus sejourner, toute l'ost s'en ala,
 Et tant a exploitié que une eaue trova,
 En un pré descendi, ilueques se disna.
 Dant Clin et Aristé en un tertre monta
 Por l'angarde porprendre, et s'ensegne i ficha.
 [3.438] Florés et sa compaigne chevalchent a baudor,

Et si avoit chascune palefroi ambleor [7450]
 Et fait devant soi traire un destrier missaudor.
 Chantent une chançon o son de grant douçor
 D'un vallet qui ja fu, ce content li auctor,
 Onques tant bel ne virent trestout nostre ancisor;
 Por ce que de biauté avoit si grant valor,
 Amer nule pucele ne degna par amor.
 Une mesaventure li avint a un jor:
 Vint a une fontaine, tous las de son labor,
 En l'eaue vit son ombre, d'amor ot tel tenror
 Que plus le covoit que chevaliers s'oissor; [7460]
 Tant jut sor la fontaine et mena sa dolor
 Que li dieu le müerent en une bele flor.
 [3.439] Florés et sa compaigne chevalchent a bandon,
 Amblent li palefroi, chantent une chançon,
 A haute vois la diënt andeus et a un ton.
 Dans Clins et Aristés, ambedui li baron,
 Chevalchierent avant et puis lor compaignon.
 Qant il oënt la vois, sachiés molt lor fu bon,
 Chascuns tire sa resne si s'apoie a l'arçon.
 Aristés premerains commença sa raison: [7470]
 "Aïe! Dieus, dist il, par ta beneïçon,
 Est ce vois de seraine dont nos oons le son?"
 Lors a par devant soi apelé un garçon:
 "Amis, va moi lassus desi a cel buisson,
 A aler t'i covient par tel devision
 Que me saches a dire, s'en avras guerredon,
 Se ce est vois de feme qui chante a si haut ton."
 Li gars s'en est tornés, qui covoit le don,
 Bien pres d'une loëe a couru de randon,
 Delés une forest a pris arestison, [7480]
 Vit venir les puceles qui ont gente façon.
 [3.440] Qant celes le choisirent, tantost l'ont apelé.
 Florés fu molt cortoise si l'a araisoné:
 "Amis, dont estes vos? ne nos soit pas celé."
 Il li a respondu: "Ja orrés verité.
 Se savoir le volés, je sui hom Aristé,
 Il est hom Alixandre, le fort roi corouné,
 L'angarde fait de l'ost par molt grant nobleté;
 Dans Clins la fait o lui, qui est plains de bonté.
 Dui sont des douze pers proisié et alosé." [7490]
 "Amis, dist la pucele, par vostre loiauté,
 Por ce que il vos soit encor guerredoné
 Dites vostre segnor, mant li par amisté,
 S'il nos voloit conduire devant son avoué,
 Molt l'en amerions et savrions bon gré."
 "Volentiers, dist li gars, ja n'en iert trestorné."

A tant s'en est partis, n'i a plus demoré,
 Et a premierement son segnor encontré.
 Tantost com il le vit, si li a escrié:
 "Mervelles vos dirai, ne l'ai pas contrové." [7500]
 Por icele parole sont andui aresté.
 Dans Clins li respondi: "Di qanqu'as enpensé,
 Guerredon en avras ains qu'il soit avespré."
 [3.441]"Sire, ce dist li gars, merveille dirai grant.
 Ja sont ce deus puceles qui la vienent chantant;
 Chascune devant soi fait traire un auferrant
 Covert desi as piés d'un paile escarimant
 Et chevalche chascune un palefroi amblant,
 Qu'il n'en a nul mellor desi qu'en Orient.
 Sor l'arçon de derriere et sor celui devant [7510]
 Lor pendent lor chavel com fin or reluisant,
 Onques si beles femes ne vi en mon vivant.
 Un present aconduient molt riche et molt vaillant;
 La dame d'Amazoine au gent cors avenant
 L'envoie a Alixandre, le fort roi conquerant,
 Qu'il li soit en aide des cest jor en avant;
 Ne veut que son roiaume voist li rois degastant,
 Et dist que chascun an l'en donra autretant.
 Par moi vos ont mandé et jel di en oiant
 Que les alés conduire, que nus faus ne s'en vant." [7520]
 Qant Dans Clins l'entendi, si respont en riant
 Et dist a Aristé: "Car i alons poingnant."
 Lor chevaus demanderent, que mainent dui enfant.
 [3.442] Des palefrois descendent si montent es destriers,
 Li garçons les en maine tos les chemins pleners
 Deci q'as deus puceles qui les cors ont legiers;
 La ou il les troverent avoit quatre oliviers.
 Qant les puceles virent ansdeus les chevaliers,
 Sempres les salüerent et les tinrent molt chiers.
 Dans Clins parla premiers ses salua premiers: [7530]
 "Cil Dieus qui maint en haut vos doinst vos desirriers."
 Et dist a Aristé: "Ci a biaux saudoiers;
 Compaignie feroie a un d'aus volentiers."
 [3.443] Dans Clins vint a Floré, par la resne la prent,
 El ne fu pas vilaine, volentiers le consent.
 Aristés prist Biauté par la resne d'argent,
 Cele fu preus et sage, que pas ne li deffent.
 Or chevalchent ensamble tuit quatre belement,
 Li uns parole a l'autre d'amor et de jovent.
 "Pucele, dist Dans Clins, or faisons un covent: [7540]
 Car me dites vostre estre, dont estes, de quel gent
 Et comment avés non, nel me celés noient,
 Et je vos redirai de mon estre ensemment."

"Sire, dist la pucele, au Dieu commandement,
 Et dirai mon pensé et trestout mon talent.
 Je sui molt gentil feme et de molt haute gent
 Si ai a non Floré." Et qant Dans Clins l'entent,
 Lors si li a proié et dit molt doucement:
 "Bele, la vostre amor m'otroïé loiaument,
 Je vos otroi la moie sans nul atendent." [7550]
 "Sire, dist la pucele, je l'otroi bonement
 Que vos aiés la moie sans nul prolongement."
 Qant Dans Clins l'entendi, molt grans mercis l'en rent,
 Quatre fois la baisa par amor doucement.
 Lor amistié fremerent ambedui voirement;
 Puis l'ot il a mollier, se l'estoire ne ment.
 [3.444] Aristés et Biautés parolent en requoi,
 Il la tint par la resne de l'amblant palefroi.
 "Pucele, se vos plaist, dites par vostre foi
 Se estes fille a conte ou a duc ou a roi, [7560]
 Bien pert a la biauté certes que en vos voi
 Que estes gentil feme et de riche conroi;
 Se je vos veul amer, autresi amés moi."
 "Sire, dist la pucele, par la foi que vos doi,
 Vos dites vostre bon, mais molt petit vos croi."
 "Bele, dist Aristés, nos somes d'une loi,
 Loiaument je vos jur par le dieu ou je croi
 Que je por vostre amor sui mis en grant effroi."
 "Sire, dist la pucele, n'en sai autre conroi,
 Toute ma drüerie et m'amor vos otroi; [7570]
 Se je fail a la vostre, malement m'i foloi,
 Et se la puis avoir, la moie bien emploi."
 Qant Aristés l'entent, si l'a traite vers soi,
 Par amors la baisa coïement sans desroi.
 [3.445] Estes les vos tous quatre entresq'a l'ost venus,
 Sous un arbre descendent qui molt iert bien foillus.
 Molt furent esgardees de grans et de menus
 Et lor biautés loëes de princes et de dus.
 Alixandres estoit hors de son tref issus
 Et vit les deus messages a terre descendus. [7580]
 Florés parla avant, qui li rendi salus:
 "Sire rois Alixandres, por vos fait Dieus vertus,
 Car par tout le mont estes et doutés et cremus.
 Du regne d'Amazoine vos vient ci li treüs.
 La roïne vos mande que vos estes ses drus,
 Ne veut que ses roiaumes soit de riens confondus,
 Chascun an vos sera tous autreteus rendus."
 Li presens fu molt biaux, sempres fu receüs.
 Lors parla Alixandres com hom aperceüs:
 "Cis roialmes estoit a mon oés tous perdus; [7590]

Se li païs veut estre de moie part tenus
 Et li convens gardés et li treüs rendus,
 Ja n'en iert lance fraite ne estroués escus,
 Chevaliers n'en iert mors ne de sele abatus
 Ne ja mais n'en sera caus d'espee ferus."
 [3.446]"Sire, ce dist Biautés, ne lairai ne vos die:
 La roïne vos mande que ele est vostre amie,
 Son anel vos envoie par molt grant drüerie,
 Ves le ci en present, ne le refusés mie.
 Qant treü vos envoie, c'est molt grans segnorie, [7600]
 Et trestot son roiaume met en vostre baillie,
 De vos le veut tenir, ce vos requiert et prie.
 Par itel convenant iert de vos recuellie:
 Se volés guerroier, ce vos jure et affie
 Que dis mile puceles venront en vostre aïe.
 Chascune iert bien armee de broingne a or sartie,
 Lacié elme luisant, çainte espee forbie;
 Volentiers i feront, nel mescreés vos mie,
 Car mieus aiment le pris de la chevalerie
 Que nule riens qui soit en ceste mortel vie. [7610]
 La terre sera toute en vostre commandie
 Et la dame iert tous jors de vos servir garnie.
 Mandés por la roïne devant la baronie,
 Seürté vos fera ele et sa compaingnie."
 Certes, dist Alixandres, qant ainsi s'umelie,
 Se je ce refusoie, ce seroit vilonie."
 [3.447] "Certes, dist Alixandres, vostre dame est molt sage,
 Qui si beles puceles tramet en son message,
 Cortoises et proisies et de molt bel aage,
 Et si semblés molt bien femes de haut parage. [7620]
 Por la vostre biauté et por le vasselage,
 Devant tous mes barons pardonrai le chevage,
 Que ja mais en ma vie n'en avrai treüage
 Fors tant que du roiaume avrai le segnorage.
 Qant la vostre roïne m'avra fait son homage
 Et je l'otroierai au los de mon barnage,
 Puis li rendrai son fief et tout son hiretage,
 Si que ne li ferai ne honte ne damage."
 "Sire, ce dist Dans Clins, entendés mon corage.
 Certes je aim Floré, ne mie par putage, [7630]
 A mollier la veul prendre, n'i quier autre avantage."
 "Sire, dist Aristés, bons rois de franc corage,
 De moi et de Biauté faites le mariage."
 [3.448] Alixandres respont: "Volentiers le feroie
 Se les puceles veulent et chascune l'otroie."
 "Sire, ce dist Florés, onques n'oi si grant joie,
 A nul jor de ma vie, com se Dant Clin avoie."

"Sire, ce dist Biautés, se je ja lie soie,
 Fors le cors mon ami autre riens ne querroie."
 Es vos le chapelain, qui de ce se manioie: [7640]
 A la loi que il tienent ensamble les aloie.
 Et dist li uns a l'autre: "Fait avons riche proie,
 C'or est vostre Biautés et Florés si rest moie."
 Alixandres li rois por la roïne envoie,
 Il veut que ele viegne et que il parler l'oie.
 Qant la roïne l'ot, maintenant se conroie,
 A mil de ses puceles cui li sejors anoie;
 Eus ont vairs et rians et color qui rougoie,
 Molt sont bien acesmees, por ce que on les voie,
 De pailles orfresés dont li ors reflamboie. [7650]
 Chascune laist dehors pendre sa crine bloie,
 Chapiaus ont sebelins por le chaut qui nes broie
 Et çaignent les espees dont li aciers brunoie
 Et ont chevaus en destre qui sont covert de soie.
 La roïne fu çainte d'une large coroie,
 Amable ot non la dame, qui volentiers tornoie,
 Il n'ot si bele dame dusq'au siege de Troie.
 Montent es palefrois si acuellent lor voie
 Tresq'a Meothedie, l'eaue qui n'est pas coie;
 A navie la passent au port sous la sapoie, [7660]
 De l'autre part arrivent sor l'erbe qui verdoie,
 En un pré remonterent par delés une arbroie.
 La roïne chevalche, qui pas ne se desroie,
 Vint au tref Alixandre, qui les autres avoie.
 [3.449] La dame d'Amazoine est de son regne issue,
 A mil de ses puceles a sa voie tenue
 Et vint a Alixandre, comme roi le salue,
 Et Alixandres l'a gentilmente respondue.
 Por faire son homage est a pié descendue,
 Ele a parlé en haut, ne se fist mie mue: [7670]
 "Sire rois Alixandres, se guerre t'est creüe,
 A mil de mes puceles m'en venrai en t'aiue,
 Ja n'en i avra une qui n'ait broigne vestue,
 Lacié elme luisant et targe a or batue,
 Espee çainte au les trenchant et esmolue.
 De moie part sera la guerre maintenue,
 Que nos amons plus guerre que aler a charrue."
 "Par foi, dist Alixandres, bien soiés vos venue.
 Or vos dirai noveles: Floré avés perdue
 Et Biauté sa compaignie, car amors l'a vaincue, [7680]
 Car Dans Clins a Floré a mollier retenue
 Et Aristés Biauté a mollier et a drue."
 Qant la roïne l'ot, de maltalent tressue,
 Otroier li estuet qant li rois l'en argüe.

[3.450] La roïne demande le congié por esrer.
 "Certes, dist Alixandres, primes veul esgarder
 Comment vos damoiseles sevent armes porter."
 Et respont la roïne: "Ne fait a refuser."
 Isnelement commande son cheval amener;
 La roïne monta, n'i vaut plus demorer, [7690]
 Deffuble son mantel por son gent cors mostrer.
 Ses puceles commande d'une part atorner
 Et les armes a prendre et es chevaus monter.
 Qui veïst les puceles des armes adouber
 Et poindre ces chevaus et guenchir et torner!
 Et qant l'une voloit les autres trespasser
 Et veut des esperons le blanchet adeser,
 Plus tost vait li chevaus c'oisiaus ne peut voler.
 Il est uns grans poissons en cele Rouge Mer,
 Ce est uns chevaus pois, ainsi l'oï nomer; [7700]
 Le cheval la roïne sor coi aloit joster
 Engendra en une yeve, si com l'oï conter.
 Alixandres prist molt le cheval a loër;
 Qant le sot la roïne, si li fist presenter,
 Et li rois Alixandres l'en prist a mercier.
 La dame prist congié, n'i vaut plus demorer;
 Li rois l'acole et baise qant vint au dessevrer.
 [3.451] Qant la roïne fu el palefroi montee,
 Congié a pris du roi si s'en est retornee,
 Tresq'a Meothedie n'i ot regne tiree; [7710]
 Qant ot le flun passé, si fu en sa contree.
 Et li rois Alixandres a sa voie hastee
 Et vint en Babilone a l'onzime jornee;
 Or sera de fin or sa teste coronee.
 De par toute sa terre fu lors sa gent mandee,
 Et li prince et li conte furent a l'assamblee.
 Olimpias sa mere, qui fu preus et senee,
 Li tramist une chartre en cire saelee.
 Dromadaire chevauche cil qui l'a aportee,
 Qant il vit Alixandre, si li a presentee. [7720]
 Li rois prist le seel s'a la cire entamee
 Et a lute la letre; quant il l'ot esgardee,
 De maltalent et d'ire a la teste craulee.
 S'or estoit ma raisons un petit escotee,
 En romans vos diroie par parole membree
 Q'il trova en la chartre qui li fu presentee.
 [3.452] Olimpias sa mere, qui de son cuer l'amoit,
 Tout au commencement cent salus li mandoit,
 Et après les salus sachiés qu'il i avoit
 Que dans Antipater, qui Sydoine tenoit [7730]
 Et trestoute l'onor et qanqu'il apendoit,

De son service faire durement se faignoit,
 Et Divinuspater, cil qui Tyr maintenoit,
 Por son commandement riens faire ne voloit.
 Li uns parloit a l'autre et sovent conseilloit,
 Non mie de son preu, tout de fi le savoit.
 Or li mande sa mere par la foi qu'il li doit
 Que d'iluec en avant nus d'aus gardés n'en soit,
 De ce qu'il ont forfait pregne vengeance et droit.
 Qant li rois vit les letres, durement l'en pesoit, [7740]
 Molt pensa longement savoir qu'il en feroit
 Et trueve en son corage c'un brief i trametroit;
 Se c'est voirs qu'ele dist, molt bien l'esproveroit,
 Et s'il le set de voir, grant vengeance en prendroit.
 [3.453] Qant la chartre fu lute, li rois s'est porpensés
 Que il une autre fois les avoit ja mandés;
 Il n'i vaurent venir, or s'en est airés.
 Un brief lor envoya qui bien fu seelés,
 Il ne lor mande mie salus ne amistés,
 Ains i a fait escrire: "Oiés et entendés: [7750]
 Sachiés vostres services vos iert guerredonés.
 Je vos mant et commant, des que cest brief verrés,
 Que vos vegniés a moi ains que mais soit passés,
 Mar serés si hardi que vos i arestés."
 A ciaux qui les briés portent ont les chevaus livrés;
 Les briés ont pris du roi, li consaus est finés.
 Montent es palefrois, es les vos dessevrés,
 Entresi que a Tir ne fu lor frains tirés.
 Antipater i fu premerains apelés,
 Qui la estoit venus a uns plais devisés. [7760]
 De par le roi de Gresce fu li briés presentés,
 A un clerc l'ont baillié qui bien estoit letrés.
 Qant il l'oënt espondre, estes les vos desvés,
 Par un poi qu'il ne crievent, tant fu chascuns enflés.
 [3.454] Qant il l'oënt espondre, n'i ot que corecier,
 Ou il veullent ou non, les estuet chevalchier,
 Aler en Babilone por lor droit desrainier
 Et se il sont coupable de la merci proier.
 Aler les i estuet, n'i a que delaier.
 Si comme il chevalchoient il et lor escuier, [7770]
 Ce dist Antipater: "Molt nos doit anuier.
 Cis rois nos tient por fous, trop nos laissons plaissier.
 Qant nos chastiaus rendons, poi faisons a proisier;
 Set ans le peüssons richement guerroier
 S'eüssons assés quis a boire et a mengier;
 Dementres peüst il avoir tel enconbrier
 Que tost eüssons pais sans or et sans denier,
 Peüssiens la contree tenir et justicier.

Por malvais doit on l'ome tenir et por lanier
 Qui fait nul malvais plait por qu'il se puisse aidier." [7780]
 Dist Divinuspater: "Molt vos voi esmaier;
 Se je le vos osoie dire ne consellier,
 Tel chose vos diroie, dont vos veul acointier,
 Dont nos porriens tost de lui tres bien vengier.
 Rien n'i ferons par force, ja celer nel vos quier;
 S'engins ne nos aïde, force n'i a mestier.
 Fortune, qui l'a fait sor la roe drecier,
 Le refera par tans chaoir et trebuchier."
 [3.455] Ce dist Antipater: "Grant folie feïs
 Qant tu onques por lui hors de Tyr t'en issis [7790]
 Et je hors de Sydoine, certes bien le jehis.
 Li mur sont haut et fort de qarriaus qu'i sont mis,
 Les tors hautes de marbre qui est et blans et bis,
 D'autre part est la mer dont li mur sont porpris.
 Ne nos peüst chaloir s'il nos eüst assis,
 Car bien i peüst estre quatre ans ou cinc ou sis
 Ançois qu'il nos eüst par sa force conquis;
 En dementre avenist qoi que soit, ce m'est vis."
 Dist Divinuspater: "Tu es de sens mendis;
 C'est arriereconsaus, biaux tres dous chiers amis. [7800]
 Dont nen a il par force trestout le mont conquis
 Et Babilone prise, ou il n'a gaires sis?
 L'amiraut i a mort et ses homes malmis;
 Se bien ne nos gardons, encor nos fera pis.
 Querons prochainement comment il soit ocis.
 Se croire me volés, ançois quarante dis
 Li donrons nos tel boire dont il perdra le ris,
 Tous ciaus en vengerons que il a fait chaitis."
 [3.456] Ce dist Antipater: "Ci a molt male atente.
 Quant nos en son service avons mis nostre entente, [7810]
 Nostre terre nous taut et retaille la rente.
 Par lui a prise mort mainte bele jovente,
 Plus a il rois destruis mien ensient de trente.
 Cil Dieus qui maint en haut a veoir nos consente
 Des maus qu'il nos a fais qu'encore s'en repente."
 Dist Divinuspater: "A tel marchié tel vente.
 Fortune lieve l'ome, en après le cravente;
 Grans malvaistiés est d'ome qui tous jors se demente.
 Bon conseil ai trové, se il vos atalente:
 Nous li donrons venim si que la mort en sente, [7820]
 Que l'ame aut en infer en la plus grant tormente."
 Ce dist Antipater: "Ceste raisons m'est gente.
 La gent en vengerons que il a fait dolente."
 [3.457] Andui ont porchacié le venim d'un serpent,
 Et est de tel nature, se l'estoire ne ment,

Que qant li hom le boit et el cors li descent,
 Desq'au nuevisme jor ne bien ne mal ne sent,
 Et qant vient au termine, adont li maus li prent
 Et au disime jor l'ame du cors li rent.
 Itel le quirrent il par apercevement, [7830]
 Car qant il le beüst, s'il fust mors en present,
 Dont fust il conoissant a trestoute la gent
 Que il mort par lor enchantement.
 Lors plevirent lor fois andui priveement
 Que bien le celeront s'en firent sairement.
 Lors ont tant chevalchié a l'oré et au vent
 Q'en Babilone vinrent li traïtor pullent.
 Alixandres li rois, a qui li mons apent,
 Devoit porter corone l'endemain hautement.

Roman d'Alexandre IV

[4.1] A l'issue de may, tout droit en cel termine
 Que li biaux tans revient et yvers se decline,
 Estoit en Babilone nes d'une Sarrasine
 Uns mostres merveilleus par volenté devine.
 Alixandres l'ot dire si manda la meschine.
 Deseure iert chose morte desi q'en la poitrine,
 Et desous estoit vive, la ou li faut l'eschine.
 Tout environ les aines, la ou li ventres fine,
 De ces plus fieres bestes qui vivent de rapine
 I avoit pluisors testes et font chiere lovine; [10]
 Molt sont de male part et de malvaïse orine,
 Ne se pueent souffrir, l'une l'autre esgratine.
 Molt par est grans merveille que Dieus el mont destine,
 Que la mort Alixandre veut demostre par sinne.

[4.2] Par toute Babilone tramet li rois s'espie,
 Les sages gens fait querre par molt grant segnorie,
 Et les devineors, que nul n'en i oublie.
 Qant assablés les ot, si lor commande et prie
 Du mostre qui est nes ne li çoilent il mie,
 Mais dient verité, savoir que senefie. [20]
 Il i ot un sage home qui la teste ot florie,
 Cil li dist la verté, sor soi prist la baillie:
 "Rois, ce que tu demandes, veus tu que le te die?
 Se tu t'en coreçoies ce sambleroit folie.
 La chose que tu vois qui est a mort flaistrie
 Ce es tu qui te muers, nel te celeraï mie;
 Les testes que tu vois qui mostrent felonie
 Et que l'une vers l'autre porte si grant envie,
 Ce sont li douze per q'as en ta compaignie.

Si tost com seras mors et ta vie fenie [30]
 La guerre iert commencie et ta terre saisie.
 Fai le mieus que tu pués, molt est corte ta vie."
 [4.3] Se li rois a paor n'est mie de mervelle;
 Devant lui voit celui qui sa mort li conseille
 Ne de riens ne li dit qui la li apareille.
 Il a si grant angoisse que pas des ieus ne ceille,
 Ne nus aspiremens de lui ne descoreille.
 Il se vait acouter sous l'ombre d'une treille,
 Ne fust pas si molliés de l'eau d'une seille
 Com il est de suor sous la porpre vermeille. [40]
 [4.4] Une eure a chaut li rois si li rougist la face,
 Autre eure devint noirs si froidist comme glace.
 Divinuspater vint, li sers de pute estrace,
 O lui Antipater, qui de mort le manace;
 Desous un olivier descendent en la place
 Et manderent le roi que grant honor lor face.
 Li rois ot la novele que li mes li deslace,
 Il ala encontre aus ses acole et enbrace.
 Le treü li presentent qui est venus de Trasce;
 Et dona a chascun, por ce que mieus lor place, [50]
 Un anel de fin or de l'uevre de Galace,
 L'une moitié de Gresce valoient li topace.
 [4.5] Li termes est venus que li arbre orent dit
 Que li rois de sa mort n'aroit plus de respit.
 Li ans et li uit mois sont passé et complit,
 Dont entre li nuevismes, si com il est escrit.
 Li rois sot bien le terme, tous li cors li defrit;
 Il a mandé ses homes, talent a ques convit,
 Et vaura tenir cort, onques si grant ne vit;
 Iluec seront doné tyré, paile et samit, [60]
 Vaissel d'or et d'argent de la terre d'Egit.
 [4.6] Li rois par maintes fois a ses barons mandés,
 Dus et contes et princes et ses autres chasés;
 Cel jor fu haute feste que il fu coronés.
 Plus richement de lui n'iert mais rois atornés;
 Sa corone fu d'or, pierres i ot assés:
 Jagonces et topaces et saffirs neelés.
 Sa mollier Rosenés, qui tant avoit biautés,
 Fu aveuc coronee et ses cors atornés,
 Cors de si bele dame ne sera ja mais nes. [70]
 Qui veïst son viaire, com il iert colorés!
 De blanc et de vermeil estoit entremelés,
 Et li cors avenans et li cuers esmerés.
 Sous ciel n'a si dur home, tant soit vilains provés,
 S'il esgardast la dame, ne fust d'amors navrés,
 Tant iert de bones teches ses cors enluminés.

Qant fu fais li services et missael chantés,
 Li rois issi du temple hautement celebrés;
 Tholomés et Dans Clins vont devant les a les.
 Cel jor fu Alixandres de maint home esgardés; [80]
 Il ot larges espaulles et bien fais les costés
 Et grant enforcheüre, d'or fu esperonés,
 Chauciés fu d'un brun paile a oiselés ovrés,
 Et de meïsmes rest li bliiaus gironés;
 Molt estoit biaux et gens et de cors acesmés.
 Sa corone soustienent Dans Clins et Tholomés,
 D'autre part Perdicas, qui des Griens fu amés,
 Qui du regne Alixandre fu puis rois coronés.
 Emenidus d'Arcage, li preus et li senés,
 Tenoit une gisarme dont li fers estoit les [90]
 Et li aciers trenchans et li manches dorés.
 Por ce q'a icel jor iert li rois terminés,
 Q'a cel jor devoit estre mors et enpoisonés,
 Grant place li faisoient environ de tous les.
 Par ces rues a voutes avoit tapis getés,
 Et desus Alixandre tinrent pailles rões
 Por l'ardor du soleil, que li chaus iert levés.
 Jusq'au maistre palais en fu ainsi menés;
 El temple anciënor fu li rois desarmés
 De la corone d'or dont il iert coronés. [100]
 Les tables furent mises s'est li mengiers criés;
 Tels s'i assist a joie qui s'en leva troblés:
 Ce fu li rois meïsmes qui fu enpoisonés.
 [4.7] A grant joie en menerent le roi Mascedonés.
 Qui donques reveïst sa mollier Rosenés,
 Ainsi com li baron l'en menerent après!
 Ne fu si bele dame des le tans Moÿsés.
 Sa corone soustienent Leone et Filotés,
 Desus tinrent un paile Caulus et Aristés,
 Que li chaus ne li arde le vis ne le palés. [110]
 En la chambre l'en maint bonement et en pes;
 Sa corone li ostent li doi fil Aminés,
 Ses dras li ont ostés, car li chaus iert engrés.
 Au mengier sont assis a grant joie el palés,
 Ains en seront iré qu'il en relievant mes.
 [4.8] Par toute Babilone a fait li rois criër
 Et tous les chevaliers de la terre mander
 Que il viegnent a lui por sa cort honorer
 Et por sa grant richece veoir et esgarder.
 Onques n'en i vint nus qui ne feïst doner [120]
 Vaïssel d'or ou d'argent ou paile d'outremer.
 A son plus maistre dois sist li rois au disner,
 Et furent entor lui cel jor li douze per;

Se il ot grant paor ne fist mie a blasmer,
 Car venus est li termes que il oïnomer,
 Que li arbre li dirent ou il ala parler,
 Que cel jor de sa mort ne porroit trespasser.
 A tous ciaux qui servoient fait li rois commander
 Qu'il facent tuit lor manches jusqu'as coutes cauper
 Et vieignent en bras nus le mengier apoter, [130]
 Car durement se crient li rois d'enpoisoner;
 Grant joie avra au cuer se cel jor puet passer.
 Mais li serf de put aire, qui nel veulent amer
 Et que il pensoit molt hautement honorer,
 Ont apoté l'entosche por lui envenimer.
 Hé! las, por coi le firent? com l'oserent penser?
 Ja mais si bon segnor ne porront recouvrer;
 De Dayre le Persant lor peüst remembrer.
 Ja nus hom ne doit serf essaucier ne lever,
 C'onques bone chançon n'en oïon chanter. [140]
 [4.9] Molt par fu grans la cors q'ot li rois assamblee,
 Mainte bele richece i ot le jor donee.
 Li rois sist au mengier en la sale pavee,
 Molt par ot grant paor, sa gens fu effraee
 Por ce q'a icel jor fu sa mort destinee
 Ainsi com li dui arbre li orent devisee.
 Li doi serf qui sa mort li orent apotee,
 Li uns sist au mengier de la table honoree,
 Et li autres servi en la porpre roëe,
 Devant le roi demaine tint la cope doree [150]
 Qui iert de riches pierres porprise et aornee.
 Molt fu la traïson coiement porparlee:
 Por ce qu'il ont des bras chascuns la manche ostee.,
 En l'ongle de ses paus ot l'entosche boutee.
 Qant li rois vaut le vin, la coupe a demandee,
 Et cil fiert ens ses paus si la li a donee.
 Tantost com ot beü, si li art la coree,
 Li cuers li muert el ventre s'a la color müee;
 Puis sailli de la table, la coupe a jus getee,
 Por ce que vomir vaut une plume a rovee. [160]
 Antipater li fel l'en a une aprestee
 Q'il ot molt coiement sous son mantel botee,
 Et estoit de venim entoschie et louee.
 Il a prise la plume, ne l'a pas esgardee,
 Si l'a isnelement en sa bouche boutee;
 Li deerrains venins li a la mort donee.
 Tuit li membre li falent, la poitrine a enflee.
 "Ahi! fait il, maisnie, com dure destinee.
 Tout por voir sans doutance or est ma vie outree.
 Des arbres et des mostres est la chose averee." [170]

[4.10] Qant li rois ot beü, si li froidist li cors,
 Sa char devint plus vers que n'est fuelle de pors.
 Li dui serf le regardent, de la chambre issent fors;
 Or ne quiert chascuns plus mais d'iluec soit estors,
 Que ses pooit bailler Filote et Licanors,
 Nes raiembroit li mons s'il devenist fins ors,
 [4.1] Quant li rois se senti de la mort angoissier,
 En une chambre a vaute s'en est alés couchier.
 Li Grieu boutent les tables et lievent du mengier
 Et pleurent et regretent lor segnor droiturier: [180]
 "Ahi! rois, sor tous homes faisïés a proisier;
 Ne vos peniés mie de vos gens abaissier
 Mais a vostre pooir lever et essaucier,
 Et si les faisïés en richece baignier
 Et doniés l'avoir et l'argent et l'or mier.
 Ja mais n'avromes prince qui sache guerroyer.
 Que porront ore faire cil povre saudoier?
 L'uns vendra son hauberc et l'autre son destrier.
 Cil sera mieus amés qui mieus sara plaidier."
 Li rois entent les cris que font cil chevalier, [190]
 Tel duel a de sa gent que vis cuide esragier.
 Par mi l'uis d'une chambre entra en un vergier,
 Ens el flun d'Eufratés se veut aler noier,
 Mais la mort l'angoissa quil fist agenollier;
 Qant ne pot plus aler, si se prist a hercier.
 Sa mollier Rosenés le prist a enbracier
 Et les ieus et la bouche li commence a baisier:
 "Sire, drois empereres, veus me tu dont laissier,
 Et guerpier en cest siecle ta chaitive mollier?
 Je sui grosse et ençainte si ne me puis aidier, [200]
 Rois, qui or me deüsses aidier et consellier."
 En un lit l'en porta cele qui molt l'ot chier.
 Grieu et Mascedonois commencent a huchier
 Que se tost ne lor rent lor segnor droiturier,
 Ja feront tous les huis de la chambre brisier.
 [4.12] Li rois oïles cris et sa gent dolouser,
 Sa mollier Rosenés commence a demander:
 "Quel noise oi je la fors en cel palais lever?"
 "Rois, Mascedonés sont, qu'on ne puet atemperer,
 Qui veulent ceste chambre et les huis craventer [210]
 Por ce qu'il ne vos pueent veïr ne esgarder."
 Li rois se commanda el palais a porter;
 Lors veïssiés ses homes entor lui aïner
 Et tant cheveus desrompre et tant dras descirer.
 Et li rois a ses homes commença a parler:
 "Mascedonois et Grieu, je vos doi molt amer,
 Car vos m'avés les terres aidïé a conquerer.

Çai ens sont li baron et tuit li douze per;
Par le los de vos tous vos veul segnor doner;
Eslisiés qui vos plaist, je sui pres du livrer." [220]
Grieu et Mascedonois commencent a criër:
"Rois, qant nos ne poons a toi plus recovrer,
Et hui nos en covient partir et dessevrer,
Que mais ne te porrons en bataille mener,
Perdicas nos otroie, qui tant est preus et ber,
Car nel volons por autre ne changier ne müer."
Qant l'entent Alixandres, si commence a penser,
Car il ne cuidoit mie q'a ce peüst torner,
Mais sa grant aventure ne li vaut trestorner.
Adonques recommence le vassal a loër, [230]
Le sens et la proëce de lui a ramenbrer;
Toute Gresce li done et les illes de mer
Et toute Mascedoine, n'i vaut plus demorer.
Cil li courut au pié si l'en va mercier,
Grieu et Mascedonois l'en corent relever.
[4.13] Li rois ot grant angoisse, qui de la mort fu pres.
Qant vint de pasmison, si regarde el palés,
Entor lui vit sa gent, dont il i ot assés;
Perdicas apela, coureçous et irés,
Il li dist en plorant: "Biaus amis, je vos les [240]
Ma contree de Gresce et les Mascedonés,
Si vos commant ma feme, la bele Rosenés;
Espousés la demain, par amors vos en bes.
Ele est grosse et ençainte, d'enfant sostient le fes.
Se li enfes est malles, après vostre decés
Li otroiés le regne bonement et en pes,
Et vostre soit la terre qui fu au roi Cersés,
Plus bele ne mellor ne verrés vos ja mais;
Et se ele est meschine, molt grant avoir li les,
Et si la mariés et només Alixés." [250]
Et li rois li otrie par devant Filotés,
Et tuit li autre per li creantent après.
[4.14] Qant Alixandres voit que la mort le justise,
Contre terre s'estent et devoltre et debrise.
En mi la riche sale, qui fu de marbre bise,
Fait metre un lit a or, talent a qu'il i gise;
La coute fu de soie, qui tenoit grant porprise.
Li douze per le couchent sor un paile de Frise.
"Barons, dist Alixandres, tous jors vos ai pramise
Honor et grant richece se Babilone iert prise. [260]
Nos avons, merci Dieu, mainte terre conquise
Dont la gens est vaincue, confondue et malmise;
De ciaux qui deffendirent i ot fait grant justise.
Je vaudrai de vos douze faire rois par devise,

Si que chascuns avra la sieue terre assise;
 S'en sera, se Dieu plaist, m'ame en Paradis mise,
 Q'avrai fais douze rois en la terre q'ai prise."
 [4.15] "Segnor, dist Alixandres, molt sui en grant torment;
 La mort me tient au cuer qui me point molt sovent.
 Qant je vos esgart tous, molt grant pitié m'en prent, [270]
 Ne puis mais entre vos demorer longement.
 Qui la mort m'a donee ne vos aime noient,
 C'est Divinuspater, qui li cors Dieu cravent,
 Il et Antipater, qui me fist le present;
 Hui me feront partir de la plus noble gent
 Qui soit en tout le mont. Ha! Dieus omnipotent,
 Je ne verrai le jor qu'en soit pris vengeance."
 Tholomé apela et Cliçon ensement,
 Emenidon d'Arcage et Caulon voirement,
 Et tuit li autre vinrent, courecié et dolent. [280]
 Qant il furent assis, li rois dist son talent:
 "Segnor, dist Alixandres, ves me ci en present.
 Je ne serai mais gaires, puis Dieus nel me consent,
 Mais ançois que je muire ne pregne finement
 Avrés por vos servises guerredon bel et gent.
 Gardés bien qu'entre vos n'ait nul descordement,
 Car chascuns avra terre et fié et chasement
 Plus que n'en ot mes peres, qui toute Gresce apent."
 [4.16] "Tholomé, dist li rois, je vos donrai Egypte;
 Toute la mellor terre ai a vostre oés eslite [290]
 Qui soit en tout le mont ne par bouche descrite;
 Babilone tenrés des or mais toute cuite
 Et toute cele gent qui en la terre abite.
 Certes, vostre proëce devroit bien estre escrite;
 Li cop de vostre espee parurent en Eslite
 Et par toute la terre que nos avons afflite;
 Hui est venus li jors q'en avrés la merite.
 Li cop de vostre espee parurent en Eslite
 Et par toute la terre que nos avons afflite;
 Hui est venus li jors q'en avrés la merite.
 Li venins me destraint qui le cors me soubite,
 Ennevois me morrai de laide mort despite."
 Tholomé ot tel duel quant la parole ot dite [300]
 Tous ses cheveus derront et depiece et degite,
 Le paile c'ot vestu, qui fu fais a Melite,
 A si rout et fendu ne vaut une carpite.
 [4.17] "Tholomé, dist li rois, je vos aim de corage,
 Et por amor de vos trestout vostre lignage;
 Egypte vos doins quite et otroi par mon gage.
 Cleopatras, la bele de cors et de visage,
 Vos otroi a mollier, qui est de haut parage;

Mes peres l'espousa voiant tout son barnage,
 Mais je deffis les noeces, qu'il me vint a corage, [310]
 Qar ma mere i avoit perte, honte et damage.
 Uns enfes en est nes,-Dieus li croisse barnage!-
 Philiperideüs l'apelent en langage;
 Lui doins Esclavonie, une terre marage,
 Et trestout le païs li doins en hiretage.
 Le vallet gardés bien tant qu'il viegne en aage,
 Et la dame prenés, qui est cortoise et sage,
 Il n'a plus bele feme jusq'as murs de Cartage."
 Et cil li respondi belement sans outrage:
 "La chose que volés ne me sera salvage." [320]
 [4.18] Li rois par grant amor en apela Cliçon:
 "Dans Clins, venés avant, si vos rechaserom;
 Onques mieudres de vos ne chauça esperon.
 Toute Perse vos doing, le roiaume Dayron,
 Que nos avons conquise a force et a bandon.
 Bien la devés avoir quitement sans tençon;
 Vous vos i combatistes a guise de baron,
 Au fer de vostre lance vuiderent maint arçon,
 Tous jors vos ont trové mi enemi felon.
 Hui est venus li jors q'en avrés guerredon [330]
 D'un des mellors roiaumes c'onques veïst nus hom;
 Set rois et trente dus a en la region
 Qui en seront vostre home, chascuns par devisaon,
 Et iront en bataille o vostre gonfanon.
 Amis, par tel convent vos en fais livrison
 Que Dieus vos en doinst joie et gart de traïson,
 Que vostre home vers vos ne facent que felon
 Si com li mien m'ont fait, qui m'ont doné poison
 Dont ja jor de ma vie nen avrai garison.
 Enevois me morrai sans nule raençon." [340]
 Cil entent la parole si baissa le menton,
 L'eaue qui ist des ieus li cort a grant foïson,
 Si que les geules mollent de l'ermin peliçon.
 "Clin, vos et Tholomé fustes bon compaignon;
 Gardés q'après ma mort n'i ait riens se bien non,
 Car m'amè en seroit en male souspeçon."
 Et cil li respondirent: "Se Dieu plaist, non ferom.
 Nous somes bon ami et tous jors le serom,
 Que ja entre nos deus n'i avra se bien non."
 [4.19] "Ça venés, dist li rois, Emenidus d'Arcage; [350]
 Onques mielldres de vos n'issi de nul lignage.
 De vos me vint tous jors honors et vasselage;
 Mon gonfanon portastes et par mer et par nage,
 Onques n'i perdi riens par vostre guionage.
 Nubie vos otroi, une terre molt large

Qui molt est bien garnie de pres et de boschage,
 Si a riches cités et maint bel hebrege;
 Iluec puet on trover mainte beste salvage.
 Cent mile chastelain vos en feront homage,
 Qui vos en porteront honor et segnorage. [360]
 Par foi, plus bele terre ne mellor por estage
 Ne pot onques avoir nus hom de haut parage;
 Et vous la tenrés bien, qui avés bon corage,
 Ja n'iert hom si puissans qui vos toille hiretage."
 Devant lui s'agenolle, li rois li tent le gage.
 "Tenés, dist il, amis, Deus vos croisse barnage,
 Car ja mais bon conseil n'avrés de moi ne sage.
 Ennevois me morrai, ja n'i metrai ostage."
 Cil entent la parole, a poi d'ire n'esrage;
 Ses dras a descirés et ses cheveus esrache. [370]
 Lors veïssiés plorer el palais le barnage,
 Tels set cens le regretent qui sont de haut parage.
 [4.20] "Aristé, dist li rois, je vos ai doné tere;
 Plus bele ne mellor ne me devés requerre:
 Trestoute Ynde Maior, qui me fist mainte guerre.
 La mer et la vermine vos enclot et enserre,
 Par force n'est nus hom qui la peüst conquerre."
 [4.21] "Ça venés, dist li rois, biaux sire Antiocus;
 Tant m'avés bien servi ne vos puis amer plus.
 Je vos donrai Sulie et le país en sus [380]
 Jusq'au regne de Perse, que tint Assüerus,
 De l'entree de Gresce desi as mons de Tus;
 A destre et a senestre et d'encoste et dejus
 Et de mer et de terre iert vostres li treüs.
 De Gos et de Magos garderés le pertrus."
 [4.22] "Antigonus, fait il, je vos donrai Celice,
 Une terre aaisie ou a mainte delice.
 Les cités sont bien closes de pierre tailleïce
 Et les tors bataillies, mainte en i a treslice.
 Plus amerés la terre que enfes sa norrice; [390]
 Sous ciel nen a richece ne deduit ne espice
 Qu'on n'i puisse trover, et chiers dras de Venice.
 Por ce que tant m'avés esté de bon service
 N'ainc plus frans chevaliers ne vesti de pelice,
 Vos doins en croisement Partisent et Felice;
 Molt pres de vostre terre est li regnes de Grice.
 Molt a grant tort li sire qui sa gent apetice."
 [4.23] "Aprochiés vos de moi, biaux sire Filotas;
 Por moi avés eü sovent vostre escu quas
 Et enduré d'espee en estor felon glas. [400]
 Je vos donrai Cesaïre, la terre Nicholas,
 Et le roiaume tout, riches hom en seras;

Je l'ocis en bataille a mon branc de Damas.
 Tholomé la donai, mais il ne l'avra pas,
 Car il a tout le regne desi que a Baudas.
 Jusqu'a la mer d'Egypte tout le país tenras;
 Cele terre est molt riche de pailles et de dras,
 La sont li hardi home et li bon cheval cras;
 Por ce la te doins cuite que tant bien servi m'as."
 Filotas s'agenolle devant le lit en bas, [410]
 Et li rois l'en revest, voiant Mascedonas.
 [4.24] Alixandres apele Licanor, ou se fie,
 Le gentil chevalier a la chiere hardie.
 "Ça venés, dist li rois, vassaus sans couardie,
 Bons chevaliers et larges et plains de cortoisie;
 Ainc ne fustes repris de nule vilonie.
 Ja vos ai je doné la moie drüerie;
 Tant par est conneüe vostre chevalerie
 N'a home en tout le mont ne vos en port envie.
 Vous m'avés bien servi a l'espee forbie, [420]
 Guerredon en avrés, se Dieu plaist, en ma vie.
 Alenie vos doing et toute Esclavonie,
 Deus roialmes tenrés en vostre seignorie;
 De l'une part vos clot la mer devers Roussie,
 Les montaignes vos serrent devers l'autre partie.
 Vostre terre est molt bone et richement garnie
 De toute icele riens qui a cors d'ome aïe.
 Li país est molt bons et plains de gent hardie;
 Quatre cens mile d'omes menrés en ost banie
 Qui tuit vos porteront honor et seignorie. [430]
 Ta terre et la Filote a une mer partie,
 Estroite est, n'est pas large, et si porte navie
 De la mer d'Engleterre desi en Lombardie;
 De la vient li avoires et la marcheandie.
 Frere estes et ami et d'une compaignie,
 Gardés q'entre vos deus n'ait tençon ne envie;
 Tous jors en sera m'ame plus lie et plus joïe."
 Et cil li respont: "Sire, ja n'i avra folie."
 "Perdicas, dist li rois, je ne vos oubli mie.
 Qant je sailli en Tyr entre la gent haïe, [440]
 Ce fu li premiers hom de qui je oi aïe,
 Ne mais que Aristés fu en ta compaignie;
 Ambedui me siüstes par grant chevalerie."
 [4.25] "Festion, dist li rois, aprochiés vos de moi;
 Ne vos ai oublié, car molt vos aim et croi.
 Onques mieudres de vos ne josta entornoi;
 Il aparut molt bien a Tyr sor le gravoi,
 A vostre branc feistes maint Tyrien tout coi.
 Qant je sailli en Tyr du mur et du berfroi,

Festion, biaux amis, iluec me portas foi; [450]
 Aristés me sieui, plus le virent de troi,
 Et puis li douze per vinrent tuit après moi,
 Et tu as premerains, ainc n'en preïs conroi,
 Ne de mort ne de vie ne te chalut de toi.
 Qui tel saut fait por home il n'a cure de soi,
 Qant por moi le feïstes, grant guerredon vos doi.
 Je te donrai tel terre, par le dieu ou je croi,
 Dont cent mil chevalier en iront après toi:
 Or recevés Hongrie et le regne d'Ansoi."
 Festions li respont: "Biau sire, je l'otroi. [460]
 Que ferai je de terre quant je morir vos voi?"
 Ja se ferist au cuer se il eüst de qoi.
 [4.26] "Segnor, dist Alixandres, ne vos chaut de plorer.
 Por coi feriés duel? N'i pöés recovrer.
 De vostre compaignie me convient a sevrer;
 Molt par en sui dolans, mais nel puis amender.
 Se Dieus vausist, encore bien peüsse durer;
 Molt me samble grief chose de vos entroublïer.
 Je vos amoie plus, sor sains le puis jurer,
 Que nule riens en terre que l'on sache nomer. [470]
 Onques ne vos trovai jor pereceus d'esrer,
 Tous jors avés plus fait que ne soi demander,
 Si m'estuet vos services a tous guerredoner.
 Ou estes vous, Leoinés? Forment vos doi amer;
 Mainte fois avés fait vostre escu estrouer
 Por amor Alixandre, que hui verrés finer.
 Aprochiés vos de moi, car je vos veul doner
 Une terre aaisie qui molt fait a loër:
 Ce est Esclavonie et Venisse sa per,
 Et les pors qui sont larges desor l'eaue de mer." [480]
 Leoinés s'agenolle si l'en va mercier,
 Et li rois l'en saisist; n'i vaut plus demorer,
 Car li cerviaus du chief li commence a meller
 Et la face a noircir et li oel a troubler;
 A paines puet il mais de la bouche parler.
 [4.27] "Aridés, dist li rois, je vos donrai Cartage.
 La roïne Dydo la perdi par folage
 Por l'amor Eneas, ou ot mis son corage,
 Qui en icel païs estoit venus a nage
 Qant eschapa de Troies, ou il ot grant damage. [490]
 La dame le retint et fist gent hebregeage,
 Ainc de riens qu'il vausist ne fu vers lui sauvage,
 Car ele le cuidoit avoir par mariage;
 Et qant il s'en parti, s'en ot au cuer tel rage
 O le branc de s'espee s'ocist par grant outrage;
 Qant ele ainsi s'ocist, ne fist mie que sage.

Barbarie et Aufrique et Sebile el rivage
 Et le roiaume tout vos doins en hiretage.
 Hui me membre de Tyr, ou me portas message
 Qant ma gent fu afflite el val de Josafage. [500]
 Cel jor i receüsse molt dolereus damage
 Ne fust vostre proëce et vostres vasselage."
 Aridés s'agenolle, li rois li tent le gage,
 Et prie bonement que Dieus li doinst barnage.
 [4.28] Caulon de Mascedoine a li rois apelé:
 "Amis, venés avant; ne vos ai oublié,
 Car vos avés o moi en maint besoing esté,
 Du branc de vostre espee maint pesant caup doné.
 Hui est venus li jors que t'iert guerredoné:
 Hermine la grant terre vos doins en hireté, [510]
 A vous et a vostre oir tous jors en quiteé.
 Tous tans m'avés servi de bone volenté,
 Et je vos ai, ce quit, molt riche don doné."
 Cil li courut au pié si l'en a mercié;
 Voiant Mascedonois l'en a li rois fievé.
 "Or sont, dist Alixandres, li douze per chasé."
 [4.29] Qant Alixandres ot les douze pers chasés
 Et les regnes partis et trestous devisés,
 Les coronés des rois que il ot conquestés
 Fait venir devant lui si les a coronés, [520]
 Puis les fist arengier devant lui les a les.
 "Ha! Dieus, dist Alixandres, hautismes poëstés,
 Sire de tout le mont, verais et reclamés,
 S'or fuisse li tresimes entr'aus rois coronés,
 Lors fust mes cuers en joie et mes cors en santés.
 Mais, Dieus! je morrai sempres, tost iert mes cors finés;
 Ja ne verrai le terme que cis jors soit passés."
 Lors li troublent li oel et li rois est pasmé.
 Estes vous par la sale le duel qui est levés;
 La ot paumes batues et mains cheveus tirés, [530]
 Forment fu Alixandres de sa gent regretés.
 [4.30] "Segnor, dist Alixandres, franc chevalier vaillant,
 Vos estes douze roi pseudome et conquerant,
 Et avés grans les cuers et si fier le talent
 Que destruirés les terres que chascuns a si grant;
 Car soient desous l'un tuit li autre apendant.
 Ançois que je me muire veul que faciés itant
 Que devegniés tuit home Tholomé, jel commant,
 Et recevés vos terres et soiés si tenant."
 Et cil li respondirent: "Tout a vostre commant." [540]
 Devant lui se deffublent et drecent en estant
 Et devinrent si home si quel virent auquant.
 Tholomés les reçut, le cuer en ot joiant,

Tel parole lor dist qui puis fu aparant:
 Que ja ne perdront terre en trestout son vivant,
 Ains seront, se Dieu plaist, des autres conquerant.
 Et cil li respondirent qu'il l'en seront aidant.
 [4.31] Alixandres apele Licanor le fil Fale,
 Le preu Emenidon, qui sist a sa destre ale:
 "Aufrique avons conquise jusq'a la mer qui bale, [550]
 Et Aise et Eürope jusq'as mons en Itale.
 France la renomee, qui a conquerre est male,
 Eüsse en mon demaine, a Paris fust ma sale;
 Puis preïsse Engleterre et Normendie et Gale
 Et Escoce et Irlande, ou li solaus avale.
 France fust chiés du mont, que sa droiture est tale,
 Car la gens est molt bone, n'est nule qui la vale;
 Pieç'a qu'il m'ont mandé par letre communale.
 Mais je me morrai sempres d'une mort desloiale,
 Ne m'i vaura mecine, mandeglore n'orvale. [560]
 Dieus, reçoif mon espir en ton ciel par t'eschale,
 Qant il s'en istra sempres du vaissel taint et sale."
 A cest mot s'est pasmés, de dolor devint pale.
 [4.32] Alixandres se pasme por la mort quil destraint,
 Et qant fu revenus, si a geté un plaint.
 Tholomé apela et dist qu'on li amaint,
 Et Cliçon autresi, contre lui les estraint;
 A Dieu les commanda et de ses bras les çaint,
 Si lor prie et commande que li uns d'aus l'autre aint;
 Molt durement li poise que entr'aus ne remaint. [570]
 A icest mot se pasme et tous li cors li taint.
 Li dels lieve en la sale qui a paines remaint.
 [4.33] "Alixandres se muert," es vos le cri levé;
 La noise et la tumulte lieve par la cité.
 Par mi ces lis se pasment cil chevalier navré,
 Et li autre se sont el palais aüné;
 Plus de set cens se sont sor le marbre pasmé,
 Et quant il se redrecent, si l'ont bien regreté:
 "Gentieus rois debonaires, tant mar i fumes né.
 La vostre grant proëce ne la vostre bonté [580]
 Ne porroit mais avoir nus hom de vostre aé.
 Quel part porrons fuir, chaitif, maleüre?
 Ahi! com remandrons de signor esgaré."
 Qant l'oï Alixandres, si a le chief levé,
 Devant soi fait venir Cliçon et Tholomé:
 "Signor, franc chevalier, qui tant m'avés amé,
 A grant duel serons hui en cest jor dessevré.
 Ce m'ont fait li dui serf qui m'ont enpoisoné;
 Querés les et si soient devant moi amené,
 Si seront li cors ars et la porre venté. [590]

Se vengies m'en estoie molt me venroit a gré."
 Et cil li respondirent par grant humilité:
 "Sire, quis les avons, mais ne sont pas trové."
 Qant li rois entendi que il sont eschapé,
 Ne lor pot mot respondre, tant ot le cuer iré.
 Tout ainsi comme il pot apela Tholomé:
 "Qant vos me verrés mort et de cest siecle alé,
 Portés m'en Alixandre, el temple Josüé;
 Metés moi el sarcu que tant m'avés gardé."
 Et cil li respondirent: "A vostre volenté." [600]
 L'ame s'en est alee et li cors devüé.
 Onques por un seul home n'ot mais tel duel mené.
 Toute nuit l'ont gaitié et plaint et regreté,
 A l'aube aparissant ont le cors enbasmé.
 [4.34] La mort le roi de Gresce fist les barons plorer,
 Par toute Babilone en fait les cris lever.
 Or dist li uns a l'autre: "Quel part porrons aler?
 Remeses sont les guerres, li grant don a doner."
 Tholomés prist les piés le roi a enbasmer.
 Qui lors veüst sovent la roïne pasmer [610]
 Et ses chaveus desrompre et ses dras descirer,
 Des poins batre son pis, son vis esgratiner,
 Ja n'eüst si grant joie ne l'esteüst plorer.
 Les barons entor li faisoit de duel desver,
 Le fort roi Alixandre a pris a regreter:
 "Sire, fais te tu mus qant a toi veul parler?
 Des que je vos voi mort ne sai quel part torner.
 Je n'ai mais nul conseil, or me convient penser."
 Ses puceles se painent de li reconforter,
 Mais molt poi prise chose c'on li sache loër. [620]
 [4.35] Du bon roi Alixandre, dont terre est orfenine
 Et la gent souffraitouse et de tous biens frarine,
 M'estuet ramentevoir la mort et la ravine.
 Qant li rois ot conquis la terre barbarine,
 Et pendu a la porte le duc de Palatine,
 Et Babilone prise et la tor gigantine,
 Et toutes autres terres mises en sa saisine,
 Si vint Antipater a la chiere lovine,
 Et Divinuspater qui tout sot son convine.
 Li cuivert souduiant, par une orbe traîne, [630]
 Li donerent a boire la poison serpentine
 Par coi li gentieus rois ot la mort a voisine.
 Qant voient que la mors li cort seure a ravine,
 Fuiant s'en sont torné par devers la marine.
 Alixandres remest gisant sous la cortine,
 Sor lui ot estendu une porpre sanguine;
 La mort qui riens n'espargne l'a geté sor l'eschine.

Li cris en est levés en la sale perrine;
 Estrange duel en font la gent outremarine,
 Q'en toute Babilone n'a dame ne meschine [640]
 Ne soit trois fois pasmee et cheüe sovine.
 Li douze per desrompent lor barbes et lor crine;
 Plus de mil s'en pasmerent en la sale marbrine.
 Mais sor trestous les autres s'ocist et parafine
 Dans Clins, li fieus Caduis, qui fu nes a Valpine,
 Ce est une cité en terre alixandrine.
 Cil le pleure et regrete et devant lui s'acline,
 Un petit sousleva la grant coute porprine.
 "Alixandre, fait il, bons rois de franche ourine,
 Mar fu vostre jovente qui si tempre define. [650]
 Onques n'amai tant frere ne parent ne cousine
 Com le vostre gent cors que la mort adecline.
 Sire, vos me deïstes en la grant desertine,
 Le jor que nos feïmes le fu por la vermine,
 Que ja nus avers rois n'aroit joie enterine.
 Mais or puis je bien dire que barnages define,
 Tous biens va remanant et li maus enracine;
 Prouece est refroidie et malvaistés chemine.
 Rois, vostre bele bouche, que la mort en traïne,
 Estoit ersoir plus blanche que n'est oef de geline, [660]
 Or endroit est plus noire qu'escorce d'aubepine.
 Sire, n'i a mestier charnes ne medecine,
 Ja mires n'i vendra por veoir vostre ourine.
 Avarise et largece courent par aatine
 Et muevent d'un eslais, mais li siecles destine
 Que largece est vaincue, nis mes cuers le devine;
 C'est drois, puis que cil muert qui tout le siecle acline.
 Rois, vos nos doniés le vair, le gris, l'ermine,
 Et por nos faire riches preniés a rapine
 Qanque vos troviés sor la gent sarrasine. [670]
 Certes, or m'en irai en bos ou en gaudine;
 Ilueques me vivrai d'herbes et de racine,
 N'i avrai compaignie fors de la salvechine.
 Las! por coi ne me prent male mors palasine?
 Dieus, qui par ta vertu feïs plovoir ferine,
 Qant li fil Israel ierent en la gastine,
 Et les aloes frites,-n'orent autre cuisine,-
 Prenés de ciaus vengeance par qui ma joie fine.
 A tort sueffre mes sires si crüel dessepline."
 A cest mot chiet pasmés sor une coute hermine; [680]
 Au redrecier s'escrie en haut comme buisine,
 De son mantel desront toute la sebeline,
 A deus poins ses cheveux et sa face esgratine,
 Si que li sans vermaus li chiet sor la poitrine.

La dolor qu'il demaine por le roi qui termine
 I fist le jor plorer maint fil de palasine.
 [4.36] Ce fu un samedi, que li soirs les apresse,
 Q'Alixandres fu mors qui tantes terres lesse;
 N'a home en sa compaignie qui por lui ne s'iresse.
 Tholomés fait tel duel, qui de plorer ne cesse, [690]
 Plus de quarante fois vers ses cheveus s'eslesse
 Et regrete Alixandre, qui les orgelleus plesse:
 "Sire rois, la vostre ame soit devant Dieu confesse.
 Plus gentis chevaliers ne cuit que ja mais nesse.
 Plorés, Mascedonois, que vostres pris abesse."
 Des navrés entor lui veïssiés si grant presse
 Tel set cens le regretent, n'i a celui n'ait fesse.
 [4.37] Qi lors oïst son duel demener a Cliçon,
 Com il plaint et regrete le nobile baron!
 Dans Clins avoit vestu un hermin peliçon, [700]
 En plus de trente lieus l'a rompu environ,
 Des bendes qui en chieent sont covert li giron;
 Et tenoit sa main destre desus son compaignon.
 "Ahi! tant mar i fustes, sire fieus Phelippon,
 Bons chevaliers et larges, hardis comme lion,
 Preudom por bien conquerre et por faire grant don,
 Por preudome honorer, por destruire felon,
 Fel vers ses enemis et vers sa gent dous hom.
 Rois, vos n'amastes onques losengier ne garçon
 Ne couart en estor ne hardi en maison [710]
 Ne home qui vers autre porparlast traïson.
 Que fera or cis pueples? Tous ira a bandon.
 Or departiront sempres li douze compaignon."
 De dolor s'est pasmés et taint comme charbon,
 En plorant le regrete qant vint de pasmison:
 "Alixandre, Alixandre, biau sire, que ferom?
 Ahi! riche compaignie, com or departirom!"
 Lors oïssiés tel duel et tel escrïoison
 De plus de set cens vois i oïssiés le ton;
 Por la mort Alixandre plorent nis li felon. [720]
 [4.38] Après Cliçon le conte, le grant duel renovele
 Emenidus, li fieus l'amiraut de Tudele,
 Qui por l'amor avoir de la noble pucele
 Combati au gaïant es plaines de Castele,
 Tant que le cuer li traist par desous la mamele.
 Cil regrete Alixandre doucement et apele:
 "Gentieus rois debonaires, dolereuse novele
 Nous a la mort donee qui si nos amoncele.
 Sire, tant mar i fu vostre bouche la bele,
 Qui plus souef flairoit que mirre ne canele; [730]
 Hui matin iert plus fresche que n'est rose novele,

Rois, ore est perse et torble plus que sans qui flaele.
 Dehais ait or la mort qui devant nos champele
 Qant ele ne me fent le cuer et esquartele.
 Ahi! ahi! Fortune, com par estes isnele!
 Assés courés plus tost que ne vole arondele.
 Je cuit ja que la mort est vostre suer jumele,
 Qui onques n'espargna ne malle ne femele.
 Les eus avés crevés, n'i a point de pronele,
 Car vos avés changié corioie por cordele; [740]
 Le mellor prince avés abatu de la sele
 Qui onques escoutast ne harpe ne vïele.
 Dehais ait or li cuers qui el cors vos sautele
 Qant en itel maniere tornés vostre roële.
 Hui cest jor est estainte la plus clere chandele
 C'onques veïst ardoir dame ne damoisele.
 Proëce, vos dormés et malvaistés oisele,
 Hui cest jor estes mise de grant cuve en cuvele.
 Largetés est breaigne et avarisse aignele.
 Or sont li douze per en malvaïse brandele. [750]
 Dieus, por coi ne me part li cuers sous la mamele?
 S'or eüsse un coutel a trenchant alemele,
 Ja feroie saillir de mon cors la boïele;
 Onques mais ne fui cuis de si chaude estincele.
 Dieus, tu es endormis, et diables revele
 Et por monter au ciel ses angles atropele,
 Qant li bons rois est mors qui tout le mont chadele."
 A icest mot se pasme por le duel et chancele,
 Au piler se hurta de la maïstre tornele
 Si que du nes li vole de sanc plaine escuïele. [760]
 Il se hurte et debat et par terre roële,
 Li sans li bout et frit comme lars en paiele;
 Devant lui a ses piés vit gesir une astele,
 Ja se ferist el chief desi qu'en la cervele,
 Qant la li a tolue li princes de Nivele.
 [4.39] Qi lors oïst le duel que fait Emenidus!
 Nus chevaliers en terre n'en fera ja mais plus.
 Cil regrete Alixandre: "Gentieus sires, mar fus.
 Sire, bons conquerere, tels n'en iert ja mais nus.
 Le monde conquesistes jusq'as bonnes Artus, [770]
 Et trestoute la terre jusq'en Oceanus;
 Mors avés en bataille les princes et les dus,
 Rois et empereors et les amiraüs.
 Que fera or cis pueples? Tous ira a reüs.
 Ahi! chevalerie, comme entrés en renclus!
 Toute joie de terre, hui cest jor vos refus."
 De dolor s'est pasmés, a terre chaîjus,
 En plorant le regrete qant il releva sus.

Por Alixandre pleure Aristés et Caulus,
 Ses chaveus et sa barbe derront Antiocus. [780]
 [4.40] Licanor fait grant duel, por le roi crie et pleure:
 "Conquerere du mont, tant mar veïmes l'eure
 Que la mort nos depart, qui tant franc home aceure!
 Molt est fiere et crüel qant as mellors cort seure.
 Molt est preudom li sire qui ses homes honeure,
 Cil ne doit tenir terre qui sa gent deshoneure.
 Or vauroie sentir de mon espié la meure.
 Sire, li rois des rois, cui tous li mons aeure,
 Ait merci de vostre ame, au besoing la sequeure."
 Lors derront ses chaveus et se fiert et deveure; [790]
 Plus de mil chevaliers se pasment en peu d'eure.
 Qui por autrui fait bien aveuc son oés labeure.
 [4.41] Filotes fait grant duel, entre lui et son pere:
 "Bons rois de Mascedone, que fera vostre mere,
 Qui por la vostre vie estoit joians et clere?
 Par Dieu! ceste novele li iert au cuer amere,
 Plus parfont la poindra que pertruis de tarere;
 La joie de son cuer en estuet jus a rere.
 Ahi! tant mar i fustes, sire, drois emperere, [800]
 Bons chevaliers et larges et hardis conquerere.
 Ahi! mors, por qu'en iés vers tel baron amere,
 Dont tous li mons a duel, pleure et fait laide here?"
 [4.42] Aristés fait grant duel, por le roi fait sa plainte:
 "Conquereres du mont, vostre joie est estainte.
 Ahi! riche compaigne, comme or estes atainte!
 Mors est cil qui des dones nos avra faite mainte.
 Franche gent honorastes et l'orgellouse mainte
 Avés tous jors vaincue, confonduë et frainte.
 Onques de vostre bouche n'issi parole fainte. [810]
 Sire, vos me deïstes en la cité de Gainte
 Que bons rois conquereres doit tous jours porter enque
 Et pene et parkemin ou sa vie soit painte."
 [4.43] Por Alixandre pleure Caulus, li fieus Saberte,
 Une dame de Gresce, duchesse de Valerte;
 L'uns des douze pers fu, mainte paine ot souferte:
 "Alixandre, mar fus, franche chose et aperte!
 Par vos estoit largesce desserree et overte,
 Et meniés o vous de chevaliers tel herte
 Qui molt tost vos eüssent une tor descoverte. [820]
 Mainte bele richece as donee et offerte;
 Maint jentil chevalier charront hui en poverte
 S'iert mainte bele dame par povreté coverte.
 Sire, qui savra mais guerredoner deserte?
 Ja mais n'iert a nul jor restoree la perte."
 [4.44] Qi lors oïst le duel que maine Perdicas,

Com il plaint et regrete le roi mascedonas!
 "Sire, drois empereres, ja mais ne nos verras.
 Que fera or ta mere, la bele Olimpias?
 Ta mort l'a deceüe, de ton duel l'ocirras. [830]
 Au branc nu de t'espee oceïs Nicholas,
 Après donas sa terre au hardi Filotas,
 Le mellor chevalier des maigres et des cras;
 Cliçon donastes Perse, Corosçane et Baudas;
 Et moi, qui mains nes iere, chevaliers assés bas,
 As otroié ton regne. Dieus, tu li meriras;
 Conduisiés la soie ame pres du siege Elyas."
 De dolor s'est pasmés, a terre chiet a quas,
 En plus de trente lieus a le visage qas.
 [4.45] Mors fu li rois en may, que chante la chalende. [840]
 Au duel que fait Leoinés n'i a nul qui n'entende;
 N'a si chier drap vestu q'a ses deus mains ne fende,
 Environ lui a terre en chaïmainte bende,
 Et regrete Alixandre, qui conquist Oriende:
 "Sire, ceste compaigne por vostre mort n'amende.
 Tels trente mile d'omes teniés en provende,
 Ja mais ne sera princes si riche don lor rende.
 Tels a son bon cheval or estuet qu'il le vende,
 Por souffraite d'avoir li convenra despendre
 La mort ne laisse mie que tous ne nos offende. [850]
 Sire, qui vos a mort fait nos a laide offrende,
 Frans hom nes doit bailler qu'a ses deus mains nes pende."
 Ne puet müer Leoinés q'a terre ne s'estende,
 D'eaue froide et de pluie li ont faite marende.
 Por Alixandre pleure Minus, li fieus Clarende;
 Au duel faire en la sale n'i a nul qui n'entende.
 [4.46] Aridés fait tel duel que nus hom nel conforte;
 Ne se puet detenir que ses deus mains ne torde,
 Et desront ses cheveus et ses dras que il porte
 Et regrete Alixandre, qui tous les desconforte: [860]
 "Esgaree compaigne, quel dolor vos deporté?
 Que porrons devenir qant proëce est hui morte?
 Cortoisie et largesce, serree est vostre porte;
 Ja mais ne sera hom qui la clef en destorte.
 Or poons nos bien dire que largetés avorte,
 Ne puet mais remanoir que doners ne resorte.
 Mais un respit i a qui les pluisors conforte,
 Qu'après lui morrons tuit, n'est nus qui s'en estorte."
 [4.47] Antioçus fait duel si que tous s'en esroe,
 Et regrete Alixandre, cui tous li pueples loe: [870]
 "Ja mais tels chevaliers ne maingera d'aloë.
 Sire, mains gentieus hom seoit hui sor la roë
 Qui por la vostre amor est cheüs en la boë.

La vostre grant proëce, que tous li mons tresloe,
 Est plus fichiee en terre que li bes d'une hoe.
 Dieus, com faite aventure entor cel pueple roe!
 L'autr'ier l'avions blanche, or l'avons noire et bloe.
 Molt est la mors hardie qui en tel lieu s'encroe
 Dont nus hom ne vit onques issir malvaie escroe.
 Tels trente mil oison porsieuoient ceste oe [880]
 N'iert si hardis li leus qu'il i tendist la poe.
 Sire, vos me deïstes sor l'eaue de Dunoe
 Qu'eschars rois pereceus tient l'usage a la choe
 Qui quiert l'autrui viande et tous jors pert la soe.
 Par ma foi, Alixandre, sor trestous vos amoe,
 Vous estiés la riens ou je plus me fioe;
 Ja mais ne vos verrai, que la mort le desloe."
 Lors derront ses cheveus et se fiert les la joe,
 En plus de trente lieus ront sa char et estroe.
 [4.48] Antigonus fait duel, de plorer se saole [890]
 Et regrete Alixandre, qui les pluisors adole:
 "Sire rois, a l'espee maintenïés tel sole
 Dont mainte large terre justice vostre bole.
 Hui repaire largesce de la chaudiere en l'ole;
 Malvaistiés l'ocirra qui les pluisors engole,
 Avant li taut le cors et après la moolle.
 Tels vestoit blanc hauberc qui or vestira cole,
 Et saullers pains a or, qui chaucera cibole.
 Or poons nos bien dire q'aventure nos fole.
 La joie de cest mont ne pris une cibole, [900]
 Qant li sires du mont laira hui sa gent sole."
 [4.49] Du duel n'est pas merveille que li baron ont fait;
 Sa mollier Rosenés sor trestous crie et brait,
 Les proëces du roi cortoisement retrait:
 "Ha! sire, rois des rois, qui tant chastel as frait,
 Tant mur et tante tor as torné a garait!
 Envers orgelleus home ne feïs malvais plait,
 Et qui te vaut servir nel preïs a forfait.
 Que porrons devenir, qant cil le siecle lait
 Qui conquesist le mont, s'il vesquist, entresait [910]
 Et donast tout l'avoir de terre, ou qu'il estait?
 Ne sai bon chevalier hui cest jor ne s'esmait,
 Car s'il est endetés n'avra dont il le pait.
 Je ne cuit qu'il ait home, tant com li solaus vait,
 Soufraitte et poverté, rois, por ta mort nen ait.
 De tant com je vos voi, et il molt bien m'en vait;
 Mieus veul morir que vivre. Mors, sail de ton agait
 Si m'oci par moi seule, ne sai riens qui me hait."
 Sus le cors chiet pasmee, nus nel voit pitié n'ait.
 [4.50] As piés le roi de Gresce, devant les autres Gris, [920]

La derront ses cheveus et depiece son vis
 Caulus, uns damoisiaus, ses peres fu rois Mis.
 Sires fu de Melite si fu freres Biblis,
 Mais por le fol corage que sa suer i ot mis
 S'en issi de sa terre et laissa son païs.
 Au bon roi Alixandre ala servir mains dis,
 Et li rois l'ama molt et si fu ses amis;
 Por ce qu'il le vit sage, cortois et bien apris,
 Et que de son service s'estoit si entremis,
 Aveuc les douze pers l'ot Alixandres mis. [930]
 Li Grigois l'apeloient dant Caulus Menalis
 Por ce que li bons rois li avoit ja pramis,
 Qant il avroit de Rome le roiaume conquis,
 Q'il li donroit Melans au jor qu'il l'avroit pris;
 Et se il se tenoit de riens a mesassis
 Si li croistroit encores Monjeu et Moncenis,
 Verziaus et Yvorie et Astë et Toris
 Et trestoute la terre d'environ le païs;
 Coroner le feroit a la feste Jovis.
 "He! las, dist li vallés, que fera cis chaitis? [940]
 Puis qu'issi de ma terre essilliés et fuitis
 M'a plus doné mes sires, qui tant iert poëstis,
 Rouge or et blanc argent et bons chevaus de pris,
 Que n'ot Laomedon, qui fu aioel Paris.
 Ahi! riche compaigne, a quel duel departis;
 Com sera grans merveille se nus en estort vis!
 Mors, molt feïs que fole qant si tost l'oceïs,
 Ja mais n'ieres doutee, tous tans seras plus vis;
 Or as fait ton pooir, ne nos pués faire pis,
 Estainte as la lumiere dont li mons iert espris. [950]
 Solaus, molt feïs bien qant tu t'en oscurcis;
 Molt feras que cortois se ja mais n'esclarcis,
 Ne pués veoir le duel ou la mort nos a mis.
 Anquenuit se porra vanter sains Paradis
 C'onques en son ostel tel oste ne fu mis.
 Grant duel doivent mener Clotos et Lachesis,
 Entr'eles pueent dire que rompus est li fis
 Dont tous li mons estoit et atains et porpris.
 Ahi! rois Alixandre, franche chose gentis,
 Humles et frans et larges a tous tes bons amis [960]
 Et fiers et orgelleus contre tes enemis,
 Com voi ore troublés ces ieus et cest cler vis
 Et cele bele bouche dont ainc n'issi faus ris!
 Se fuissiés coreciés, ains que fust mïedis
 Toute en tramblast la terre jusq'au flun de Gangis,
 N'osassent avant corre Eufratés ne Tygris.
 Encor dist ier mes sires, ains qu'il fust si aquis,

Que ja nus avers rois n'enterroit en haut pris.
 Sire, tu donas tout, ainc riens ne retenis;
 Ains eüsses doné cinc roiaumes ou sis [970]
 C'uns autres riches hom n'eüst un mantel gris.
 Honors, sens et largesce avoient en vos mis
 Lor cuer et lor entente a vos servir tous dis;
 Hom qui tel conseil a ne puet estre mendis.
 Dieus, molt es envious quant tu le nos tolis
 Molt as sage conseil quant a ton oés l'as pris;
 Esgarde ciel et terre et canque tu feïs,
 Onques mais tel damage el monde ne meïs
 Ne si riche tresor a ton oés ne traisis;
 Por c'est li remanans coreçous et pensis. [980]
 Joie, tu l'amas molt, onques ne le guerpis;
 Va t'ent ensamble o lui es chans Elyseïs
 Qui tout sont plain de flors, de roses et de lis."
 Ja li baisast les piés desous le paile bis,
 Mais l'un tint Tholomé et l'autre tint Dans Clins.
 [4.51] Il n'avoit pas grant piece que li rois iert fenis
 Ains qu'il fust enbasmés, oins ne ensevelis.
 Ses lis estoit envous de deus riches samis,
 A pierres precieuses seelés et cleufis,
 L'un fu fais a Estrives, l'autre a Estrelis; [990]
 Par tel engin estoient et tissu et treslis
 Mil ans fuissent en terre ains qu'uns en fust porris.
 Qui or vos vauroit dire com il fu costeis
 Et roiaument gardés, plorés et obeïs,
 Nel seüssent descrire Salemons ne Davis.
 Si veüssiés mervelles ses barons amatis,
 De duel et de pesance vains et empaleïs;
 A son chief iert Filotes et a ses piés Dans Clins
 Et li autre gisoient pasmé sor ces tapis.
 Obscurcis fu li jors, li solaus fu maris [1000]
 Por la mort du baron dont il estoit partis;
 Des la mer de Sydoine jusq'as pors d'Alentis
 N'ot dongon ne murel qui ne fust escroissis;
 Par trestoute la terre dont il estoit saisis
 Tramblerent les cités desi qu'en la raïs;
 Trestous li firmamens par estoit si noircis
 Que li uns hom de l'autre ne pot estre choisis,
 Et por ce que li cieus estoit si obscurcis
 Ardoient en la sale mil cierge couleis.
 Lignalöés et ambre, nardus et autre espis [1010]
 Ardoient en la sale com s'il fust vieus palis;
 De l'odeur des especes et du bon flaireïs
 Deüst estre par droit uns malades garis.
 S'ilueques fust Herodes, Pilate et Antecris,

Si plorast il de duel ains qu'il s'en fust partis.
 Et por ce que li dels les a si affeblis
 Fu mendre un peu la noise et abaissiés li cris,
 Qant li bons Aristotes, li mieudres des escriis,
 S'apoya devant aus desous un arc vautis.
 Bien fu de philosophe ses fais et ses abis, [1020]
 Ne li chaloit de soi, tous estoit enhermis;
 Barbë ot longe et lee et le poil retortis
 Et le chief deslavé et velus les sorcis;
 De pain et d'eau vit, ne quiert autres pertris;
 Onques n'issi d'Ataines uns seus clers si soutis.
 Lors a dit as barons un peu de ses bons dis:
 "Maines rois, qui la gis mors et descoloris,
 Com tiens or peu de terre et com est briés tes lis!
 Et si deïs tu ja, sor Dunoe a Brandis,
 Que tous cis mons estoit a un home petis. [1030]
 Ahi! rois, sor tous autres conquerans et hardis,
 Largesce estoit ta mere et tu ieres ses fis;
 En doner iert ta gloire, ta joie et tes delis.
 N'atendoies pas tant, ja n'en serai desdis,
 C'uns preudom te rovast ne qu'il fust escondis,
 Tant ieres de doner pres et amanevis.
 Encor n'iert pas mes sire ier soir si affeblis
 Qant il dist q'avers rois fust destruis et maldis,
 Car il en est de Deu et du pueple haïs,
 En cest siecle et en l'autre est perdus et honis. [1040]
 Par covoitise fu li premiers hom peris,
 Et Dayres li Persans vaincus et desconfis;
 Et uns des rois de Rome, Crassus, si malbaillis,
 Escarant l'abevrerent d'or cuit qui fu boulis.
 Oés la prophecie que nos dist Johannis:
 Que oan ocirroito li lions la formis.
 Ahi! Antipater, traîtres dieusmentis,
 Com estiés par lui honorés et servis
 Et de si riches fiés chasés et enrichis!
 Gadres t'avoit donee, les dongons, les larris [1050]
 Et trestoute la terre que tint li dus Betis.
 Tantes gens chaciés hui a duel et a escis,
 Dont mainte gentil dame en plaindront lor maris
 Et mainte veuve mere en ploreront lor fis.
 Par toi sera li maus encore revertis,
 Car tu seras trovés ou que soies fuïs;
 Vis seras escorchiés ou sor charbon rostis
 Ou detrais a chevaus ou a coutiaus murdris.
 De toi ne puet chaloir se tu muers ou tu vis
 Qant par toi muert li rois qui sor tous iert eslis; [1060]
 Par lui fust tous li mons ains set ans esbaudis.

Hui partiras les homes que mes sire a norris,
 De lor lige segnor sans forfait departis.
 Alixandre, de toi nos ont li dieu traïs;
 Se tu peüsses vivre seul dis ans acomplis,
 Tu fuisses dieus en terre aourés et servis,
 Et te feisons temples, auteus et crucifis.
 Ahi! Dieus, molt par es envious et faillis,
 Qui les malvais espargnes et les bons nos ocis."
 Or deïst ja mervelles qant il fu acuellis, [1070]
 Qant doi autre gramaire, Varo et Egesis,
 Li senerent de loins que trop iert esbahis,
 Qant il des dieus mesdist, trop est de sens maris.
 Ja chaïst jus pasmés, tous est esvanuïs,
 Qant Litonas l'aert et l'estraint vers son pis.
 Lors commence tel duel et si fait ploreïs,
 Se Dieus tonast el ciel, ne fust il pas oïs.
 [4.52] Nel tieng pas a merveille se cil ont grant paor
 Qui voient a lor ieus mort gesir lor segnor,
 Et si ont d'Aristote grant duel et grant paor, [1080]
 Que il voient gesir tout pale et sans color;
 Or deïst ja mervelle a ciaus qui sont entor,
 Mais li souglout li tolent qu'il a pris par froidor.
 Lors se sont acoisié li grant et li menor.
 Emenidus se drece qui fu fieus de contor;
 Qant senti des especes la fumee et l'odor,
 Adont parla un poi a ciaus qui sont entor:
 "Je fui ja connestables au roi mascedonor
 Et portai en bataille s'ensaigne et s'oriflor
 Et li aidai a vaintre, merci Dieu, maint estor [1090]
 Et maint chastel a prendre et mainte ferme tor.
 Nel di pas por vantance, Dieu en trai a auctor,
 Car li rois n'ama onques chevalier vanteor.
 Esgardés d'Aristote, vostre maistre doctor,
 Qui estoit conseillieres au maine empereor;
 Essample i pueent prendre auquant et li pluisor,
 Car rois ne doit avoir malvais conseilior.
 Encor dist ier matin mes sire a Licanor,
 Qant il le corona a roi d'Ynde Maior:
 'Licanor, biaux amis, ne croi losengeor, [1100]
 Car mil fois en ont terre perdu nostre ancisor.
 Princes qui veut entrer en pris et en valor
 Doit metre en un preudome son conseil et s'amor
 Qui le bien li enseigne a faire chascun jor,
 Chevaliers a amer et tenir en douçour;
 Hom qui conquerre veut n'a soing d'autre labor.
 Puis que tu connoistras un home a menteor
 Qui fera en sa lange ne engien ne trestor,

Si t'eslonge de lui com du fu d'un chaut for,
 Car par nature sont losengier traïtor. [1110]
 Se tu vois saudoier qui entende a honor,
 Si en fai duc ou prince, amiraut ou contor;
 Nel laissier en souffraite gesir ne en esror,
 Car povretés est pire que n'est fievre maior;
 Garde qu'il ait en toi molt large doneor.'
 Q'en puis je, Alixandre, se je por t'amor plor?
 Car li tien don n'avoient ne terme ne sejour,
 Ains ierent plus isnel que le vol d'un ostor.
 Ainc n'eüs escrivain o toi ne conteor,
 Car dons qui est escrit fait home atendeor. [1120]
 Ha! mors, chaitive chose, dolente riens, puor,
 Ne criem mais ta manace la noise d'un tabor.
 Un sairement en fais, ne puis faire gregnor,
 Par cest cors qui ci gist desous cest covretor:
 Puis q'Adans morst la pome par le conseil s'oïsor
 N'oceïs tu son per ne si bon ne mellor,
 Et qant li dieu ont fait de toi commandeor,
 Bien en doivent avoir li aver grant paor.
 Biau sire, hui lais tes homes en paine et en tristor,
 Et aussi esgarés com beste sans pastor. [1130]
 Ja ne ferai por t'ame priere au creator,
 Bien sai qu'ele est la sus el ciel superior
 Ou li angle en demaint grant joie et grant baudor,
 Car la joie de terre ont mellee o la lor."
 [4.53] Après Emenidon, qui fu rois de Nubie,
 S'escria Perdicas a la barbe florie;
 C'est uns des douze pers ou li rois plus se fie.
 Por ce qu'il iert cortois et sans losengerie
 Li dona son anel, dont maint orent envie,
 Que li avoit doné par non de drüerie [1140]
 Candasce la roïne qant el devint s'amie;
 Li aniaus valoit bien la cité de Pavie;
 Perdicas l'ot el doit, li sires d'Orcanie,
 Qui si detort ses poins, a poi qu'il ne l'esmie.
 As piés du lit s'apuie si durement qu'il plie.
 Il sousleva le paile de soie d'Aumarie;
 Qant senti le cors froit et la char vit blaismie,
 Les ieus tornés el chief et la face empalie,
 Lors chaïa la terre si n'a talent qu'il rie;
 De l'angoisse qu'il a piteusement s'escrie: [1150]
 "Alixandre, biaux sire, bons rois sans couardie,
 Fontaine de largesce et puis de cortoisie,
 Comblés d'enseignement et res de vilonie,
 Hui matin aviés de cest mont la baillie;
 Rois, or l'avés perdue en mains d'eure et demie,

Ne sai par quel raison l'avés si tost guerpie.
 Sire, trop tost vos est la parole faillie,
 En poi d'eure vos est cele bouche noircie.
 Rois, car parlés a moi, se Dieus vos beneïe,
 Et a vostre maisnie qui por vos est marie. [1160]
 Por coi nes confortés? Com l'avés enhaïe!
 Ves com est esgaree et com est amortie;
 Onques por nule riens ne fu si esbahie.
 Rois, ja l'aviés vos si doucement norrie,
 D'armes et de chevaus si richement garnie;
 Ahi! com hui remaint de segnor esgarie!
 Segnor, qui me dira ice que senefie
 Que li rois ne parole a celui qui le prie?
 Fait il ce par orguel ou por la mort quil plie?
 Ne sai que ce puet estre ne ne truis quil me die. [1170]
 Onques mais ne fist Dieus si crüel felonie.
 Encor me dist il ier a parole serie,
 Au matin, ains que l'aube fust gaires esclairie,
 Que s'il pooit avoir un an santé et vie,
 Q'il donroit Tholomé le regne de Sulie,
 Et s'en feroit segnor de toute Esclavonie.
 Puis parlasmes assés de sens et de folie;
 Mais or sai je de voir, de ce ne dout je mie,
 Ja mais n'i parlerai, car la mort le me vie.
 Mal dehais ait Fortune qui si me contralie [1180],
 Hui cest jor m'a esté trop crüel enemie.
 Onques li rois du ciel, cui toute riens sousplie,
 N'ot mais si grant honor com de sa compaignie,
 Ne ja mais nen avra en trestoute sa vie.
 Ahi! toute franchise, com hui estes perie,
 Malvaistiés esveilliee et proëce endormie!
 Li biens va descroissant et li maus molteplie.
 Or ne pris mais le siecle une pume porrie,
 Hui cest jor est perdue toute chevalerie.
 Dieus, por coi vif ge tant? Male mort, car m'ocie! [1190]
 Par foi, je m'oceïsse a m'espee forbie,
 Mais mes cuers le deffent et tient a musardie,
 Et Fortune meïsmes, qui me jure et affie,
 Se Deus iert trespasés et sa vie fenie,
 Qu'il avroit après lui des angles la maistrie,
 Du ciel et de la terre toute la segnorie.
 Las! fait il, qu'ai je dit? C'est rage et desverie."
 A icest mot se done du poing joste l'oïe,
 Si que du sanc vermeil li est la bouche emplie.
 Sor le cors chiet pasmés comme beste estordie, [1200]
 Mais Tholomés l'en drece, qui souef le chastie.
 [4.54] Antioqus le pleure si que tous en est las.

Riches hom iert et sages, fieus le roi Cleofas;
 Antioche fu sieue et Halape et Damas,
 Puis li acrut son fief de l'onor de Baudas
 Li rois qui de doner ne pooit estre las,
 Cil li dona la terre du val de Josafas,
 La rente et le treü de l'onor de Baudas
 Et la cité de Meqes qui puis fu Goulias;
 Tant li dona de terre li rois mascedonas [1210]
 Dont maint home amaigrissent et il en devint cras.
 Or le plaint et regrete, mais ce n'est mie a gas:
 "Alixandre, fait il, biaux sire, tu t'en vas;
 Guerpi as ta maisnie, ja mais ne la verras;
 En tel lieu vas, ce cuit, dont ja ne revenras.
 Vos doniés l'avoir a foison et a tas.
 Hui sont li douze per venu du trot au pas;
 Molt lor est mescheü, geté ont ambes as.
 Or poons nos bien dire: 'Dieus! de si haut si bas,
 Onques mais ne venimes a si felon trespas.' [1220]
 Ha! Dieus, plains de douçor, qui tout le mont crias
 Et les quarante jors de ton gré jeüinas,
 Garis l'ame de lui du felon Sathanas,
 Q'en l'ostel ne le mete ou conversent li las."
 Lors dist a soi meïsme: "Chaitis, que devenras?"
 Et fiert l'un poing a l'autre et descire ses dras.
 De crier et de braire i demaine tel glas
 Que la sale en tentist qui fu faite a compas;
 Puis chiet pasmés a terre dejoste Perdicas,
 Au cuer a tel angoisse nus hom nel cuidast pas; [1230]
 Il ne deüst un mot qui li donast Baudas.
 [4.55] Aristés se replaint qui ot vois de seraine.
 Gentieus hom iert de Gresce, du parenté Elaine
 Por qui Paris soffri lonc tans dolor et paine;
 Ele iert, ce dist l'estore, sa cousine germaine.
 Biaux iert, mais il avoit une teche vilaine,
 Q'il n'amast nule dame se ne fust chastelaine
 Ne ne vaut porter armes a jor de diemaine
 Ne monter a cheval por ferir en quintaine.
 Cil regrete Alixandre et grant duel en demaine: [1240]
 "Alixandre, fait il, ce est chose certaine
 Que de toutes proëces estiés la fontaine,
 Sor trestoutes estoit la vostre souveraine.
 Rois, vostre bele chars soloit estre plus plaine
 Que n'est marbres polis, et soués comme laine;
 Or est poingnans et aspre plus que n'est pains d'avaine.
 De vostre bele bouche n'istra ja mais alaine,
 Hui matin iert vermeille com se fust tainte en graine.
 Sire, vos en alés la ou la mort vos maine,

Ci nos avés guerpis entre la gent foraine. [1250]
 Sire rois de bon aire, en peneuse semaine
 Entrent li douze per et en fort quarentaine;
 Il ont hui receü une malvaie estraine.
 Nous solions jadis parler de teste saine,
 Mais or en est rompue toute la maistre vaine.
 Ha! Dieus, qui a ta forme feïs la char humaine
 Et garesis Jonas el cors de la balaine,
 Pren vengeance de ciaux par qui ma joie est vaine,
 Et trebuche lor ames en la terre soutaine."
 A icest mot se pasme deseur un lit de laine; [1260]
 Tholomés li vaillans de conforter se paine,
 Et lui et tous les autres dont la sale estoit plaine.
 [4.56] Molt par fu grans li dels el palais de porfire,
 Entor la biere furent li douze per a tire.
 Leines a tel duel a poi n'esrage d'ire,
 Frere estoit Perdicas qui fu nes de Montire,
 Por la mort Alixandre parfondement souspire
 Et eschauffe d'angoisse et remet comme cire.
 A haute vois s'escrie: "Alixandre, biau sire,
 Onques mais ne vos pot nule riens desconfire [1270]
 Fors seulement la mort, qui nului ne remire.
 De garir vostre plaie n'avra ja denier mire.
 La tieue grant largesce ne porroit nus descrire,
 Nus clers qui tant seüst de chanter ne de lire,
 Neïs tant seulement de doner la matire.
 Ainc ne vausis a home ton avoir escondire.
 Rois, tu es entoschiés, ja n'en avras remire,
 Ta chars en est plus vers que n'est jus de colire.
 Au cuer ai tel angoisse que ne sai mais que dire,
 Mais tant voi je tout cler que cist siecles empire, [1280]
 Car proëce radote et malvaistiés se mire,
 Largesce voi plorer et avarisse rire,
 Cele qui soloit estre la mieudre est or la pire.
 Ha! mort, trop me delaies, trop mes a moi ocirre,
 A tort et a pechié me fais ici defrire."
 Lors a pris son bliaut et la pene en descire,
 De l'un chief dusq'en l'autre le desront et detire;
 Sa main mist a sa barbe, estraint et sache et tire,
 Ains qu'il la deguerpisse en sont mil poil a dire.
 [4.57] Licanors li marchis tort ses mains et debrise.
 Ce est uns chevaliers qui durement se prise;
 Nes estoit de la marche qui depart et devise [1290]
 La terre as Barbarins du roiaume de Frise;
 Molt iert preus et cortois et de grant gentelise,
 Onques mielres de lui ne nasqui de marchise;
 Vestus iert d'un biface ovré par grant maistrise,

Mantel ot de samit a une pene grise.
Vers la biere se traist por le duel qui l'atise;
Il sousleva le paile qui tenoit grant porprise;
Quant il l'ot descovert, piteusement l'avise, [1300]
Gentement le regrete qant s'alaine ot reprise:
"Rois des rois terriens, qui ainc n'ot couardise,
Ne de malvaistié faire n'ot onques covoitise,
Ja mais ne sera hom de la vostre franchise.
La vostre grans largesce ne pot ainc estre aqoise,
Car ains que tu eüsses la richece conquise
L'avoies tu, biau sire, ou donee ou pramise.
Bien ont li douze per emploié lor servise:
Chascuns en a el chief corone d'or assise.
Ahi! toute franchise, com hui estes malmise! [1310]
Avarisse est montee, largesce a terre mise,
Morte est comme la noif contre soleil remise.
Ja Damedeu ne place que je siece ne gise
Tant que j'aie de ciaus haute vengeance prise
Par coi ta gens est torble et de dolor esprise.
Molt orent felon cuer et plain de cuivertise
Quant il oserent faire vers vos si grant mesprise.
Certes, se jes puis prendre, j'en ferai tel justise
Qu'il en sera parlé jusqu'au jor du juïse.
Ne fust pas tels damages se fust morte ou ocise [1320]
Toute la gent qui est entre ploiel et bise.
Que fait ore Diables que le col ne me brise? "
A icest mot se hurte a une pierre bise,
Si que le cuir du front en trois lieux li encise;
S'il fust trois fois baigniés en l'eaue de Tamise,
Ne fust il plus molliés qu'il iert sous sa chemise
Du sanc qui de lui ist vermaus comme cerise.
Il ne deïst un mot por tout l'avoir de Pise;
A tous ciaus qui l'esgardent tel pitié en est prise
N'i a celui ne plort tenrement sans faintise. [1330]
[4.58] Filotes s'est levés tous drois en son estage;
N'ot mellor chevalier en trestout son lignage
Fors Licanor son frere, ou ot grant vasselage.
Cil regrete Alixandre forment en son corage:
"Gentieus rois debonaires, estrés de haut parage,
Sor tous rois terriens resambliés ymage;
Ja mais ne sera princes qui demaint tel barnage.
Rois, il n'avoit cité jusq'en la terre ombrage,
Bourc, vile ne dongon ne fort chastel marage
Dont li prince et li duc ne t'aient fait homage; [1340]
Trestout t'en obeïssent et rendent treüage.
Sire, a vous repairoient et privé et salvage;
Vous n'escondisiés ne le fol ne le sage,

Ançois lor doniés l'avoir de bon corage.
 Tout avés departi, neïs vostre hiretage;
 Onques n'en retenistes vaillissant un fromage.
 En vos et en largesce avoit bon mariage,
 Onques ne la tenistes un jor en soignantage;
 Or estes dessevrés a tort et par outrage,
 Nis Dieus ne porroit mie restorer cest damage. [1350]
 Gentieus rois de bon aire, mes dels point n'asouage;
 Ja mais ne serai liés en trestout mon aage,
 Car je voi enforcier le perilleus orage
 Qui tout le mont traïra a duel et a hontage.
 Or vos estuet ci metre et guerpir en ostage
 Vostre cors, biaux dous sire; n'i laïrons autre gage.
 Ha! Dieus, qui les Ebreus passas la mer sans nage
 Qant li rois Pharaon les chaçoit el rivage,
 L'ame de mon segnor commant a tel message
 Q'au jor du grant juïse soit a la destre page." [1360]
 Lors a si grant dolor a poi d'ire n'esrage,
 As ongles de ses mains depiece son visage.
 Onques por Eneas, quant issi de Cartage
 Et par la mer salee acueli son voiage,
 Ne demena tel duel Dydo au cuer volage
 Com Filotes demaine qui se hurte a l'estage.
 [4.59] Molt fu plains et plorés li rois de ses barons,
 De Suliens, d'Ermins, de Persans, d'Esclavons;
 Nis cil le regreterent d'estranges regions
 Q'il ot fait maintes fois grans persecucions; [1370]
 Mais desor tous les autres le pleure Festions.
 Cil fu plus ses privés, ainsi com nos cuidons,
 C'onques n'avoit esté Tholomés ne Cliçons;
 Por qant si n'iert il mie des douze compaignons,
 Mais en enfance avoit esté ses norreçons.
 Au chavés de la biere se met a genollons
 Et regrete Alixandre, non mie a conseillons:
 "Alixandre, fait il, li sires des Griffons,
 Com est por vostre mort li cieus noirs et enbrons,
 Li oïsel s'atapissent et abaissent lor sons. [1380]
 Molt nos avés laïsiés en grans torblacions;
 C'est par les traïtors qui firent les poisons
 Dont en terre est venue si grans confusions.
 Onques tels chevaliers ne chauça d'esperons;
 Ne vos en puis aidier ne doner garisons.
 Sire Dieus, quel damage et quels destrucions
 Qant li rois est matés par deus de ses paons;
 Mais au traire mesprinrent, qu'il i ot traïsons.
 Gentieus rois Alixandre, abondance de dons,
 Ainc amer ne vausistes traïtors ne felons; [1390]

Mais qui servir vos vaut nel fist mie en pardons,
 Car plus que ne servoit iert grans li guerredons.
 Ahi! rois Alixandre, a quel duel departons;
 Je m'en vois après vos, la mort m'en a semons,
 Et g'irai volentiers, n'i querrai achoisons."
 Lors desront ses cheveus, sa barbe et ses grenons,
 Que tous en fu sanglens ses pis et ses mentons;
 Au dolouser qu'il fist, ausi com il iert lons
 En travers de la biere chaïa ventrellons.
 [4.60] Tous jors devant le roi furent li douze per; [1400]
 Tant com il jut malades ne s'en vaurent torner,
 Car molt lor estoit bel qu'il l'oïssent parler,
 Molt lor plaist a oïr ses dis et escouter.
 Un poi devant ice que il deüst finer
 Apela Tholomé que il pot tant amer,
 De la tor de Babel l'a fait asseürer,
 As citoiens l'a fait et plevir et jurer.
 Alixandres li rois ne pot plus demorer;
 Li bel oel de son chief commencent a torbler,
 Li nes a acorcier et la bouche a crever, [1410]
 Si blanc bras li defaillent qu'il nes pooit lever.
 L'ame parti du cors, que n'i pot plus ester.
 Et qant li rois fu mors, qui les oïst crïer!
 Onques n'i ot un seul qui n'esteüst pasmer,
 Et quant sont redrecié, qui les oïst plorer
 Et detordre lor puins et lor cheveus tirer,
 Le roi et sa proëce durement regreter!
 "Ahi! gentieus rois, sire, ou porrons nos aler?
 Puis que vos estes mors ne savons ou torner.
 Ja mais ne morra hom qui tant face a loër [1420]
 Ne si seüst pseudome servir et honorer."
 Le roi ont fait ovrir et l'entraille geter,
 Puis ont isnelement le cors fait enbasmer.
 Li Grigois l'en voloient en lor terres porter,
 Mais nus de tous les autres nel voloit creanter,
 Iluec en Babilone le veulent enterer.
 Antioqus fu sages si prist a sarmoner:
 "Segnor, or ne vos chaut a tencier n'a choser,
 Car aler en covient as deus por demander
 En quel lieu li vaudront sepulture doner." [1430]
 [4.61] Li baron s'en tornerent, ne s'aseürent mie,
 Por ce que li uns d'aus a l'autre contralie,
 Car porter en voloient le roi en Romenie;
 Li uns le contredit et li autres l'otrie.
 Por la noise abaissier Antioqus les guie.
 Droit au temple Jovis, si com l'estoire crie,
 Ont fait un de lor sors par molt grant maiestrie.

Li prestres qui du temple avoit la seignorie,
 Et qui li mestiers iert qant on i sacrefie,
 Après ce que la messe fu chantee et fenie [1440]
 As dieus a demandé et doucement lor prie
 Ou li rois Alixandres, qui est alés de vie,
 Doit avoir sepulture; isnelement lor die.
 Iluec ot une ymage, de fin or fu plastrie,
 Et fu desor l'autel trestout droit estableie;
 Une vois en issi qui tres bien fu oie:
 "Segnor, en Mascedoine nel porterés vos mie,
 Ne ja mais Babilone nen iert de lui saisie;
 En la grant Alixandre iert sa char sepelie,
 La avra sepulture, Juspiter li otrie, [1450]
 Et qui ce ne feroit si feroit grant folie."
 "Par foi, dist Tholomés, ja ceste n'iert guenchie.
 La sera il portés s'en puis avoir aïe."
 Et Dans Clins li respont: "Ne vos en faurons mie.
 Volentiers vos ferons aïde et compaignie."
 [4.62] "Segnor, ce dist Dans Clins, et comment le ferons?"
 Respont Antiocus: "Bon conseil en prendrons:
 Anuit mais, se vos plaist, et nos le gaiterons,
 Au matin par son l'aube nos aparellerons;
 Sor un char tout d'or fin richement le metrons, [1460]
 Li cheval le traïront et nos après irons."
 Et respont Tholomés: "Se Dieu plaist, non ferons.
 Nous meïsmes a nos cols, certes, le porterons
 Si li ferons honor de tant com nos porrons,
 Que ja mais en nos vies si bon segnor n'avrons.
 Il nous a molt amés et donés les grans dons,
 Si en soit ore ci li premiers guerredons."
 "Par foi, dist Aristés, ce est drois et raisons.
 Faites faire la biere, si nos aparellons,
 Et chauciés grans saullers, ostés les esperons. [1470]
 Vous avrés bone aïde des douze compaignons,
 Ja nes en troverés orgelleus ne felons."
 [4.63] Une litiere firent adont apareillier:
 Li limon de ciprés por plus souef flairier,
 Les espondes d'ivoire, li pecoul d'olivier.
 Un riche lit i mirent por le roi sus couchier,
 De coute et de cousin le font apareillier;
 D'un blanc drap de Sydoine, qui molt fait a proïsier,
 Le covrirent desus por la cholor laïssier.
 Çaingnent soi et escourcent trestout li chevalier; [1480]
 Onques n'i ot ronci, palefroi ne destrier,
 Car por l'amor le roi furent tuit paonier;
 A chascunne jornee le firent bien gaitier.
 Onques ne porent plus en sis jors exploïtier,

En Alixandre vinrent au sesme jor entier.
 Or devons du sepulcre la verité noncier.
 Des autres puet on bien conter et fabloier,
 Li un sont veritable, li autre mençoignier;
 Un tout seul n'en puet on envers cestui prisier.
 S'or estoient ensamble trestout icil ovrier [1490]
 Qui or sont en cest siecle, por les poins a trenchier
 N'en feroient un tel, por les membres trenchier.
 Tholomés le fist faire, qui molt ot le roi chier,
 Et qant il fu tous fais, sel fist plus haut drecier
 Que on ne porroit traire qarrel d'arbalestrier.
 [4.64] Onques n'i ot qarrel ne pierre ne ciment,
 Ne n'i ot point de fust, n'en i covint noient;
 Deus cens charees d'or et autrestant d'argent
 Firent autresi maurre commë on meut forment;
 Le blanc et le vermeil i mirent sagement, [1500]
 Et le vert et le bis, trestout melleement.
 Quatre ymages d'yvoire mirent el fondement,
 Et ot chascune teste, par le mien ensient;
 Et avoit entredeus de terrë un arpent.
 Ilueques commencierent l'uevre massicement.
 La poudre fu saudee a glu molt maistrement,
 Une vaute i ont faite qui bien fu aparant;
 Une estache de fer par mi leu i descent,
 Le marbre firent maurre avec tout ensemment;
 Ainsi com l'uevre monte, la glus au fer se prent. [1510]
 Sus el premier estage firent fenestres cent;
 Qant l'une moitie oevre, et l'autre clot au vent.
 Les fenestres sont faites d'une pel de serpent;
 Qant vient el mois de may, que li solaus resplent,
 Tres par mi cele pel li rais lai ens s'estent,
 Car la pel est si clere que riens ne li deffent.
 Et por l'or qu'est molus, qant il le soleil sent,
 C'est a vis qui l'esgarde, a trestoute la gent,
 Que ce soit fus espris qui si grant clarté rent.
 [4.65] La piramide au roi fu molt et grans et lee, [1520]
 Et fu la sus a mont ainsi haute levee
 Nus hom n'i peüst traire qarrel d'arbalestee.
 Por ce fu en grigois piramide apelee
 Que d'une seule pierre fu toute acovetee;
 Cele fu d'aimant si fu a fer saudee
 Et ot neuf piés de lé, ainsi fu mesuree,
 Et vint en ot de lonc et fu dedens cavee;
 Et si ot sanc de buef plus d'une grant tounee,
 Que ja ne fust la pierre en autre sens ovree.
 La char au maine roi fu la dedens posee. [1530]
 La lame dedesus fu molt chier achatee,

Tholomés i dona d'argent une charee.
 Puis ont pris une ymage de fin or tresgetee,
 Ens el poing li ont mis une pome doree;
 La pome fu molt grosse, tout en reont tornee.
 L'ymage fu a glu sor la lame posee,
 Ja mais ne charra jus por vent ne por gelee.
 Li oel sont d'un topace dont est enluminee.
 Par grant senefiance fu l'ymage formee;
 S'or estoit ma raison oïe et escoutee, [1540]
 Tout ainsi com je l'ai en l'estoire trovee
 La dirai en romans, ja ne vos iert celee.
 [4.66] C'est l'ymage le roi qui iluec desous gist,
 Ice nos devisa cil qui l'estoire fist;
 Tholomés la dita a celui qui l'escrist.
 La pome fu reonde que ens el poing li mist,
 Si est li mons reons q'Alixandres conquist.
 Maint prince en afola et maint roi en malmist,
 Lor terres lor toli et les treüs en prist;
 Et qant il ot tout fait, si com l'estoire dist, [1550]
 De fer ne pot morir, mais maus venins l'ocist.
 [4.67] Mors fu rois Alixandres et a sa fin alés,
 Molt fu de ses barons et plains et regretés;
 En haute piramide fu bien par droit levés,
 Si com l'estoire dist, et il est verités;
 Se il fust crestiens, ainc tels rois ne fu nes,
 Si cortois ne si larges, si sages, si menbrés,
 Si cremus en bataille, ne d'armes redoutés.
 Et si n'ot que quinze ans quant il fu adoubés,
 Et qant il en ot vint, si fu rois coronés, [1560]
 Et douze ans regna puis, itels fu ses aés,
 Si que de tout le mont estoit sires clamés.
 Ne por qant ces douze ans fist il douze cités
 Dont li mur de chascune fu hautement fondés;
 Bien les vos nomerai, s'escouter me volés.
 Li nons au maine roi i fu primes posés,
 Et oés l'aventure por coi il fu trovés.
 Le jor que Bucifal fu mors et afolés.
 Fist il la premeraine, si com oïavés;
 Après Bucifala en fu li nous trovés. [1570]
 [4.68] Après en fist une autre que sor un mont leva,
 Alixandre Montoise por ce si la clama;
 Et une autre Alixandre la ou Porrus tua,
 Alixandre Porri por ce si l'apela;
 Et Alixandre en Frise, qant conquerre l'ala,
 Et le non de la terre o le sien i posa;
 Et la grant Alixandre q'en Egypte estora,
 Icele fu la mieudre et que il plus ama,

La fu sa sepulture, si com l'estoire va;
 Et une en Babilone que il après fonda, [1580]
 Ou l'amiraus fu mors qui vers lui s'adreça.
 [4.69] Ahi! rois Alixandre, com gentement ovras,
 Qui n'eüs que vint ans qant corone portas,
 Et en douze ans après tout le conquestas,
 Et dedens ces douze ans douze cités fondas
 Et a chascunne d'eles le tien non i posas.
 Les sis en ai nomees si com tu les nomas,
 Les autres nomerai, que je n'i faudrai pas.
 Tu feïs Alixandre as puis Masagitas,
 Puis en feïs une autre droit as puis Orgalas, [1590]
 Ices sont deus contrees ou on fait riches dras;
 Et as puis Gramaton une autre en estoras,
 C'est uns rois que par force meïs de haut en bas;
 Puis en feïs une autre, richement la pueplas,
 Alixandre fu dite et as puis Troadas;
 Sor l'eaue de Tygris la dousime estoras,
 Cinc letres de grigois es murs escrites as.
 [4.70] Por coi il fist ces letres jel vos sai bien a dire,
 Qu'Alixandres, qui fu de tout le monde sire,
 Du lignage Jovis,-et si fu de sa tire, [1600]
 Se cil fu dieus en ciel, cist ne fu mie pire,-
 Douze cités fonda; letres i fist escrire
 Que riens n'i gaaigna cil qui l'esmut a ire,
 Et qui le coureça ainc n'en pot au loins rire;
 Trestous ses malfaitors a livrés a martire.
 Qui l'ocist a venim la male mort le fire!

[4.71] Molt fu preus Tholomés, si fist grant cortoisie
 Qant en sa sepulture fist escrire sa vie.
 Or m'entendés, segnor, que Dieus vos beneïe!
 Cui Dieus done le sens, il nel doit celer mie, [1610]
 Mais bien se doit garder que a tel gent le die
 Qui disnes soit d'oïr, car cil fait grant folie
 Qui entre les porciaus gete sa margerie
 Ne avec le forment seme la gargerie.
 Teus se fait molt cortois plains est de vilonie;
 Avarisse est montee et largesce est falie,
 Bontés est refroidie, montee est felonie.
 Ois est cil qui sert de la losengerie,
 Services est perdu s'avoirs ne li aïe.
 Por ce le di, segnor, se Dieus me beneïe, [1620]
 Ne veul que ma raisons soit de tel gent oïe
 Qui bien ne sache entendre que ele senefie.
 Qui chante de mençoigne s'ame est pres de perie;

Qui vilain veut aprendre de la chevalerie
 De buison faire ostoïr se paine et estude;
 Icil est faus provés, la letre le nos crie.
 Salemons fu molt sages qui ce dist et otrie:
 Costume enseigne a l'ome cil qui bien le chastie,
 Mais nature a au loins toute la segnorie.
 [4.72] Segnor, ceste raison devroient cil oïr [1630]
 Qui sont de haut parage et ont terre a baillir.
 Li gentieus hom malvais, cil fait molt a hair,
 Qui veut avoir service et dont nel set merir.
 Princes qui terre tient a envis doit mentir,
 Mais proëce et largesce font bien terre tenir.
 Ice fist Alixandre essaucier et tehir,
 Car il conquist le mont trestout a son plaisir.
 Molt par i ot sage home, ainc ne vaut consentir
 Losengier entor soi, c'onques nel pot souffrir.
 Hom qui tent a honor, il n'i puet pas faillir, [1640]
 Mais q'en tel lieu entende ou il puisse avenir;
 Cil qui se desmesure si puet molt tost chair.
 Hardis fu Alixandres, ainc ne degna fuïr;
 Si fu larges li rois, se nus le vaut servir,
 Onques de son service ne se pot repentir.
 Bien sot qui dut doner et qui il dut tolir,
 Comment il dut doner tres bien le sot veïr,
 Selonc ce qu'il estoit sot doner et partir;
 Et qant vint au besoing, bien se sot esbaudir,
 Et bien sot en estor tous premerains ferir; [1650]
 Ainc ne vaut a nul home sa malvaistié covrir.
 [4.73] Li gentil chevalier et li clerc sage et bon,
 Les dames, les puceles, qui ont clere façon,
 Qui sevent de service rendre le guerredon,
 Cil doivent d'Alixandre escouter la chançon.
 Or se traient arrier li aver, li felon,
 Que ja ne lor feroit li oïrs se mal non;
 Li cuer lor endurecissent encontre la raison.
 Fous est qui d'esprevier cuide faire buisson,
 Ne de ronci destrier, ne de levrier gaignon. [1660]
 Nature et norreture demainent grant tençon,
 Mais au loing vaint nature, ce dist en la leçon;
 Si en trai a garant le sage Salemon.
 Alixandres le dist et mostre par raison:
 Fous est qui conseil croit de serf ne de felon
 Ne qui fait de nul d'aus prince de sa maison;
 Se gaaig i puet faire, ne doute traïson;
 Ci doivent prendre essample li prince et li baron.
 Hardis fu Alixandres et plus fiers d'un lion
 Et sages de parler, larges por doner don, [1670]

De droit sot et de tort faire division;
Por ce ot tout le mont en sa subjection.
Qui trestout veut tenir tout pert a abandon;
Souvent i pert grant chose par malvaise achoison.
[4.74] Li rois qui son roiaume veut par droit gouverner
Et li prince et li duc qui terre ont a garder
Et cil qui par proëce veulent riens conquerer,
Cil devoient la vie d'Alixandre escouter;
Se il fust crestiens, onques ne fu teus ber.
Rois ne fu plus hardis, ne mieus seüst parler, [1680]
Ne onques ne fu rois plus larges de doner,
Ne de chevalerie tant feüst a loër;
Onques puis qu'il fu mors ne vit nus hom son per;
Plus donast Alixandres qu'autres n'osast penser.
N'est drois que ja l'escoutent li escars, li aver;
Tout autresi est d'aus, tres bien l'os afremer,
Com il est de l'asnon qui escoute a harper.
Assés vos en puet on longement deviser,
N'en dirai plus avant, ma raison veul finer.
[4.75] Ci fenissent li livre, des or mais est mesure, [1690]
Du bon roi Alixandre, qui tant ama droiture.
Sor la tombe de lui ont fait mainte peinture,
Et de mer et de terre, de toute creature.
Li Grieu s'en sont torné la petite ambleüre,
Alixandres remest dedens la sepulture.
Dieus li face merci, qui fait la nuit obscure,
S'il onques a cel tans ot de nul home cure.
Ci fenissent li ver, l'estoire plus ne dure.
Ce raconte Alixandres de Bernai vers Eüre,
Qui onques nen ot jor longement aventure; [1700]
S'un jor la trova blanche, l'endemain l'avoit sure.

- *Bibliotheca Latina Lugudunensis* -
Texte proposé par Robert Delord
